

هداية الطالبين

شرح

صوفى الله يار

ثبات العاجزين



مؤلف: سيد حبيب الله بن سيد يحيى خان

(الفرغانى ثم الكابل)



کتاب بېلگيلری

کتاب آتی: هداية الطالبين شرح ثبات العاجزين

يازووچی: سيد حبيب الله بن سيد يحيى خان

تايپ و ديزاين: ابن اللطيف محمد حنيف لطفی

تېكشيريپ نشرگه تيارله گن: ابن اللطيف محمد حنيف لطفی

مقوا ديزاينی: رفيع اديب امينی و ابن اللطيف محمد حنيف لطفی

چاپ ييلى: ميزان آيى، ۱۳۹۹ هجرى شمسى

تيراژ: ۵۰۰ جلد

اوشبو اثر حاجى صاحب قارى عبدالرحيم اندخويى مالي ياردمى بيان چاپ بۇلدى.

بِسْمِ اللَّهِ الرَّحْمَنِ الرَّحِيمِ


مطلبلر فهرستی

عنوانلر.....	شماره.....
سۆز باشی	۱.....
اثرنینگ ایچکی موضوعلری	ح.....
اثرنینگ ینگى چاپى اوچون اېتگن ایشلریم	ط.....
سۆز سۆنگیده	ي.....
کتابنینگ اېسكى چاپیدن اؤرنک بېتلر	ک.....
تقریظ	۱.....
نظم	۱.....
تذیل و تکمیل	۴.....
قومیمیزنى یاش اولوغ پیشوالارى محترم اغنیالاریگه پندلی خطاب	۴.....
حیات گلستانینی گل رعناسی، یاشلیک دورانینى تخت نشین پادشاهسى،	۶.....
خاتمه فى المناجات و الدعوات و الصلوات و التسليمات سيد السادات	۷.....
مقدمه	۱۳.....
سبب تالیف	۱۴.....
ترجمه حال ناظم رحمه الله	۱۶.....
ناظمنى شرح حال لاری گه بعضی اثرلاری بیرلان استدلال	۱۷.....
ناظمنى شیخ و اساتذه لاری	۲۲.....
شارحنی ترجمه حالى	۲۳.....
بو عاجزنى قیسقچه شرح حالى	۲۴.....
موسى افندی نینگ طبع ایتگان ثبات العاجزینی و انگا یازگان مقدمه سیگه بیر نظر	۲۴.....
محترم اوقوچی لاردین رجا	۲۵.....
حمد	۱.....
نعت رسول الله	۳۸.....
سبب تألیف کتاب	۴۳.....
معرفت الله بیانیده	۴۴.....

۴۶.....	توحید باری تعالی
۴۸.....	واجب تعالی نی صفات ثبوتیه سی بیانیده
۵۹.....	مناجات
۶۱.....	کتاب لار و فرشته لارگه ایمان کیلتورمک بیانیده
۶۳.....	پیغمبر لارگه ایمان کیلتورمک بیانیده
۶۶.....	رسول الله نینگ معراج لاری بیانیده
۶۷.....	صحابه کرام وصف لاریده
۷۰.....	امامت بیانیده
۷۲.....	کرامات اولیاء بیانیده
۷۷.....	بیر حدیث نی ترجمه سی
۷۹.....	اجل نینگ بیانیده
۸۰.....	سوال منکر و نکیر و عذاب قبر نینگ بیانیده
۸۱.....	مناجات
۸۴.....	قیامت حق لیگی بیانیده
۸۸.....	ترازوی قیامت بیانیده
۸۹.....	صراط کوپروکی بیانیده
۹۱.....	حوض کوثر بیانیده
۹۲.....	مبحث شفاعت
۹۷.....	جنت و دوزخ بیانیده
۹۹.....	مناجات
۱۰۷.....	مصنف نی وصیت لاری
۱۰۹.....	پیر کامل ایستامک بیانیده
۱۱۴.....	شراب محبت نی پیر کامل دین ایچماق کیراک
۱۱۵.....	سالک قضاغه راضی و بلاغه صابر بولماقی کیراک
۱۱۹.....	حکایت
۱۲۳.....	حکایت بی بی رابعه علیهاالرحمه

۱۲۵	موعظه
۱۲۹	حکایت حجاج
۱۳۶	حکایت ثوبان
۱۳۶	محبت سیز کیشی دین قاجماق بیانیده
۱۴۰	حکایت شیطان
۱۴۱	دنیا دین تجرد حقیقنده
۱۴۶	حکایت ابن ام مکتوم
۱۵۲	حکایت
۱۵۲	رسول الله گه متابعت بیانیده
۱۶۰	موعظه
۱۶۵	ایکى حدیث ترجمه سی
۱۶۶	ریاضت و زهدغه ترغیب و کبر و هوادین ترهیب
۱۷۱	حکایت
۱۷۲	توگل بیانیده
۱۷۷	حکایت عبدالله بن مبارک
۱۷۹	درویش لیک بیانیده
۱۸۶	حکایت امام احمد حنبل و بیر بیوه زن
۱۸۸	موعظه
۱۹۲	ایکى مؤمن بیر-بیرینجه خیر قیلماق بیانیده
۱۹۵	کوزنی حرام دین یومماق بیانیده
۲۰۰	حکایت بایزید بسطامی علیه الرحمه
۲۰۱	خدانی نعمت لاری غه فکر ایلاماق بیانیده
۲۰۴	بنده مؤمن عشقده حریص بولماغی کیراک
۲۰۶	مؤمن بنده کیراک کیم دایم خوف و رجأ ده بولسه
۲۱۰	عمرنینگ فانی لیگی بیانیده
۲۱۵	نفس شوم بیانیده

۲۲۰	بنده عهدیده تورماقی بیانیده
۲۲۱	حکایت اسماعیل علیه السلام
۲۲۴	یخشی همراه بیانیده
۲۲۵	حکایت
۲۲۶	خوف و رجأ خصوصیده
۲۲۸	حکایت
۲۲۹	خدانی رحمتیدین امیدوار بولماق بیانیده
۲۳۰	حکایت
۲۳۲	قضاغه راضی و بلاغه صابر بولماق بیانیده
۲۳۳	حکایت
۲۳۷	خیانتدین یراق بولماق بیانیده
۲۴۰	جوانمردلیک نشانی
۲۴۳	احد تاغیده بولگان محاربه
۲۴۴	مناقب خواجه بهاؤالدین نقشبند علیه الرحمه
۲۴۶	ایشان صوفی یاران لاریگه وداع قیلگان لاری
۲۴۸	ایشان صوفی فرزندلاریغه نصیحت قیلغانلاری
۲۵۳	خاتمة الكتاب



سۆز باشى

يرەتگن تنگرى تعالى گە سان سىز حمد-ئىئال بۇلىسىن و بشريت نىنگ سۇنگى يۇللاوچىسى
محمد صلى الله عليه وسلم حضرتلرگە و آل و يارلرگە چېكىسىز درود-صلواتلر بۇلىسىن.

سۆزنى اساسى موضوعگە آلىب بارسم؛ مېن حاضرگى اۇقىب تورگن «هداية الطالبين شرح
ثبات العاجزين» (بىرىنچى مرتە عبدالله نىنگانى نىنگ اۇغلى قارى عبدالملك اهتامى بىلن
پاكستان نىنگ لاهور شەرىدە چاپ بۇلگن). كتابىنگىزنى و «رسالة عزيزة» نى چىنەكم اۇن يىل آلدىن
خواجە سىدىمىر كلال مدرسەسىدە اۇقىب يورگن چاغلىرىمدە كۆرگن اېدىم؛ اىكلە كتاب هم استاذىمىز
مولوى غلام سىخى عثمانى دن اېدى. مېن، اىكسىنى هم او يېرىدن - بو يېرىدن اۇقىب كۆرگن
اېدىم، منتها تۇلىق اۇقىگىنىم يۇق اېدى.

سل كم بىر آى آلدىن استاذىمىز مولانا شراب الدىن كرىمى گە حرمتلى حاجى صاحب قارى
عبدالرحيم اندخوى تىلفون آرقەلى قۇلىنگىزدەگى «هداية الطالبين شرح ثبات العاجزين» نى - چاپ
قىلەمن، حنىف گە ايتىنگ چاپگە حاضرل بېرسىن، دېگن اېكنلر؛ مېن اوشندە اندخوىدە اېدىم. مزار
شريف گە كېلىپ حاجى صاحبنى ياووقدن كۆردىم، حاجى صاحب اثرىنگ اۋزلىرىدە بىر ورىنتى و
مولوى صاحب غلام سىخى دە يىنە بىر ورىنتى بارلىگىنى ايتدىلر. مېن هم «يخشى ايشگە استخاره
كېرەك اېمس» مقولەسى بىلن چاپگە حاضرلش اوچون شىلندىم و استاذىمىز عثمانى جنابلرىدەگى
چاپىنى هم تىلدىم و ايشگە باشلەدىم.



اثر نىنگ ايچكى موضوعلىرى

اوشبو اثرده، سىز اهل السنة و الجماعة عقیده سىنى، اينىقسە، ماترىدیه تمانىنى يىخسى توشونىپ آلە سىز. عقیده سى تۇغرى و درست بۆلمە گن انسان نىنگ مسلمانلىگىدە ناتۇغرىلىگى و حتى نامسلمانلىگى بىلىنىپ قالەدى. بناء، عقائد علمىنى اۇرگنىش برچە نرسە دن مەهم، ضرور و كېرەكلى دىر.

اثرده عقائد علمىدن باشقە، ادبى، اخلاقى و اجتماعى نىهايت كېرەكلى و منفعتلى فكتلر و حكايلەر كېلتىرىلگن. هر بىرى آلتىندىن هم قىتملى و آسىغلى دىر.

اثر سۇنگىدە، نظم رشتە سىگە تارتىلگن بىر تقرىظى بۇلگن، يازو وچىسى سىد طە' دىر، چونكە تقرىظ سۇنگىدە

قىل دعائى ناتوان طە الهى مستجاب حضرتىنگىدىن اوزگا ملجأ بىزگە يوقدور باليقىن
دېب اداغىگە يېتكزەدى. سىد طە' اېسە شارح نىنگ ايناغە سى بۇلگن، «بو عاجز نىنگ قىسقىچە شرح
حالى» عنوانىدە اىگى مرتە شونگە اشاره بېرەدى.

مېن اېسە اۇشە تقرىظنى اثر نىنگ باشىگە كېلتىرىپ اۇلتىرغىزدىم. سىد طە' انچە عالم،
پىشيق انسان و نظم طبعى هم كۆپ يىخسى اېكن.

صوفى الله يار نىنگ هر بىر اثرلىرى عالي، اوشبو اثرلىرى هم اۇشە شاه اثرلىرىدن دىر. او
كىشى نىنگ تىللىرى و اسلوبلىرى جودە سادە؛ اينىقسە، عقیده وى، فقھى، علمى، اخلاقى، اجتماعى و
چىرايلى بديعى تىللىرى بۇلگن.

اوشبو اثرده، صوفى الله يار، تلميح صنعتى و جناس صنعتى نىنگ هر بىر تورىدن جودە كېنگ
قۇللنگنلر؛ گاهىدە اېسكى توركى سۆزلرنى ايشلتنگنلر؛ تىللىرى اسلوبى سادە بۇلىپ، عموم خلق تىلىگە
ياووق دىر، اينىقسە، قرەتقىچ «نىنگ» قۇشىمچە سىنى بىران يېردە رعايه قىلسەلر، كۆپ يېرلردە نظردە
تومتە يدىلر.

شعر و نظم هر قنچه ساده بۆلمه‌سین، ینه‌ده قیینلیگی بار-ده، «ثبات العاجزین» ده هم تلمیح و جناسلری و بعضاً فلکلوریک سۆزلری معنی دېرزه‌سینی جوده قتیق یاپگن.

حرمتلی سید حبیب الله خان (شارح) هم جوده سیر معلوماتلی کیشی اېکنلر، کتابنی اؤقیسنغیز بو سۆزیمگه سیز هم قۇشیلەسیز. بو کیشی، «ثبات العاجزین» نینگ بیر قطار قۇلیازمه‌سینی تاپیب، تېکشیریب و اولرنینگ یوزیدن شرح اېتگن. هر بیر مصرعینی آیت، حدیث، فقه، سۆزلیک و باشقه-باشقه مستند قیناقلردن کېلتیریب، ایضاح بېرگنلر.

اثرنینگ ینگى چاپى اوچون اېتگن ایشلریم

حاضرگی زمانده، اثرلرده قۇللنیلگن قیناقلر انیق و بېللی بۇلسه، کتابنینگ مستندلیگی و اعتمادلیگینی جوده آشیره‌دی. سید حبیب الله خان (شارح) آیه‌لرنینگ نیچینچی لیگینی و قیسی سوره‌دنلیگینی ایتمه‌گن، حدیث کتابلرنینگ بیر قطارینی ایسله‌گن، اما قیسی باب یا حدیث شماره‌سینی ایتمه‌گن حتی بعضاً قیسی کتابدنلیگینی هم ایسله‌گن.

مېن هم، اثرده کېلگن موضوعلرنی انیق و مستند قیلیش اوچون اوریندیم و حاجی صاحب قارى عبدالرحیم جنابلری نینگ هم شو تۇغریده جوده تأكیدلری بار اېدی.

مېن، آیتلرنینگ قیسی سوره و قیسی آیه‌لیگینی و حدیثلرنینگ قیسی کتابدن و نیچینچی شماره‌ده لیگینی هر بیرینی اؤز سۇنغیده کۇرستیب بېردیم. ترجمه بۇلیب کېلگن حدیثلرنی هم عربچه‌سینی تاپیب، کتاب و شماره‌سی بیلن پاورقیده کېلتیردیم.

بیر قطار کتابلردن آلینگن متن و شعرلرنی هم کتاب صحیفه‌سی و شاعر سوانحی بیلن بېت ایاغیده کۇرستدیم. قافیه علمی و شعرگه عاید بۇلگن بیر یېریده شارحگه قرشی اؤز توشونچمنی هم بېت سۇنغیده یازدیم. شارح، بیر قدسی حدیثنی - من تاپمه‌دیم، هر کیم تاپسه، شو یېرگه اۇرنشتیرسین - دېگنلرینی هم تاپیب پاورقیده یازیب قۇیدیم.

آچقراق ایتگنده، صفحه ایاغیده‌گی ایشلنگن نرسه‌لرنینگ بریسی مېنگه عاید، بیر-ایکیسی شارحگه تیگیشیلی بۇلگنینی سۇنغیده «شارح» دېب انیقله‌دیم.

اثرنى، حاضرگى اۋزىپك عربچە الفباسىگە ماسلشتىرمىسدن، اۋشە اېسكى عربچە الفباسى
 حاليدە قۇيىدىم، حاجى صاحب نىنگ نظرلىرى ھم شو اېدى.

مېنىنگ رايىم ھم قسماً شونگە كېتىدى؛ نېگە كە، اگر معاصر الفباگە كىرىتيلسە، اثرنىنگ
 بديعى چىرايلىگى و گۈزەللىكلىرى كۆپ بۇلمسە ھم بىراز يۇقاليشى يوزدە-يوز انىق دىر. شونگە بناء،
 اثرنىنگ الفباسىنى يېتەرلىچە ناظم و شارحنىنگ قۇليازمەسى حالىگە قۇيىدىم.

سۆز سۈنگىدە

اوشبو اثرنى تيارلش جريانىدە، بىلىم يورتىدە سىناولرىم بار اېدى؛ مسافرتلىك قىيىنچىلىكلىرى
 ھم باشگە چىققن اېدى؛ حياتنىنگ ايسىق-ساووقى و پست-بلندلىگى ھم مېنى انچە قىيىن تورگن
 اېدى. بىر آى ايچىدە كېچەلر ياتمەى، آدينە كونلرى راحتلىك نفس تارتمەى، كتابنى شو حالگە
 كىرىتىدىم.

قىتە كۆرىپ چىقىش اوچون مېنگە ياردەم بېرگن دۇستلرىم رفيع اديب امينى و محمد سرور
 ذوالحيا، اينىقسە، ھم اتاقىم اديب جنابلرىدن جودە منتدارليگىمنى بىلدىرىپ، قووانچىمنى اظھار
 ابته من. حاجى صاحب قارى عبدالرحيم اندخويى جنابلرىگە تنگريم اۋزى اجر بى بديلى بېرسىن، او
 كىشى مادى و معنوي ياردەمچى بۇلگنلر.


ينەدە، «الانسان مشتق من النسيان» دېگنلر. شونگە بناء، ھر بىر كمچىلىك و يىنگىلىشلىك
 مطالعە جريانىدە چىقىپ قالسە، مېربان كۆزلىگى بىلن قرەب و اصلاح قلمى بىلن تۈزەتەي، كمىنەنى
 آقىش و دعانگىزدن چېتدە قۇيىمىنگ!

ابن اللطيف محمد حنيف لطفى

تارىخ: ۱۳۹۹-۷-۱۳ ھجرى شمسى، مزار شريف

کتاب نینگ اپسکی چاپیدن اورنک بېتلر





تقریظ

الحمد لله الذى جعلنا من اهل الايمان و من امة سيد ولد عدنان و من اهل السنة و الجماعة فى العقيدة و توحيد الرحمن و من محبى اولياء ذوى العرفان، و الصلوة و السلام الاتمان الاكملان على سيدنا محمد المبعوث الى كافة الخلق من الانس و الجان و على آله و صحبه و من تبعهم باحسان.

اما بعد: قد رفع الى اخي الفاضل اللبيب الحسيب النسيب السيد حبيب الله شرحه للمنظومة المسماة بـ«ثبات العاجزين» و شرفنى بمطالعتة و التمس منى ان اكتب له تقریظا بلغتنا التركية فاجبته الى ملتسمه بالقبول و الى امتثال امره بالمشول و شرعت فيه مستعينا بحول الله و قوته متوسلا اليه بحبيبه و آله و عترته و اخترت النظم فانه اقرب الى فهم ذوى العقول و احلى عند الكملة الفحول و سميته الفلك المشحون بالدر المكنون و النظم الموزون فى تقریظ هداية الطالبين من العاجز المحزون.

نظم

صوفى الله يار تأليفى ثبات العاجزين	كورساتيب دور تُرك قومیغه هدايت شارعين
تولغازيب دُر و گهرلار بيرله منظوم ايلاميش	تركى تیلده اهل سنت اعتقاد و مشربين
طالب عرفان مرید حق اولان ياران لاره	بیلدیریب علم تصوف ایتدی حل كوب مشکلین
بیز کبی عاصی لاره پند و نصیحت كوب ایتیپ	رهنمالیک ایلامیش جایى بوسون خلد برین
گرچه تركی تیلده یازمیش لیک انده بار ایرور	بیلسه بولماس كوب عبارات دقیق و هم قیین
بیر یریم قرن اورتادین تخمین اوتوبدور بیلسنگیز	بايلامابدور هیچ کیشی شرح ایتکالی محکم بیلین
بول اولوغ خدمتنی ترک ایتمیش افاضل جمله سی	کوب تأسف بیرله غیرت قیلدی توردی اورنیدین



سید فاضل محقق قومیمیزی باشلیغی اوتکان ایرلاردین نشانه ییادگار متقین

حضرت ایشان یحیی خان توره فرزندلاری جنت فرغانه جایی بیل حبیب الله آتین

بایلادی محکم بیلینی قومیگه خدمت اوچون مستفید اولسون دیبان پیر و جوان اوغلانلارین

ایلادی شرح لطیف و واضح و مشکل کشا کوب قیین مغلق توگونلی جاینی بیچدی بیریرین

ایتدی تحقیقات و تنبیهات و حق آیتلاری فخر عالم سوزلاری بیرلان مزین سوزلاریین

عالم اول چون لازم اولگانه بیریب تفصیل خوب سهولی جایلارنی اصلاح ایتدی قویمای هیچ بیرین

قیل عطا فضلینگ بیلان یارب توگانماس اجرلار خدمت دینی ایتیپ دور قومیگه چین قلبی دین

علم و عرفان و کمالاتین فزون ایلاب انی اهل تقوی قُل لارینگدین ایلا رب العالمین

عزت و اقبال دارین و سعادت قیل نصیب ماسوی دین قیل سوی یارب اوزونگا قیل یقین

ایستادیم پیر خرددین تاریخین چیقسه دیدی سگیزی کم ایگی یوز «شرح ثبات العاجزین»

تذیل و تکمیل

مژده سیزلارگه عزیزلار کوب شرفلی قومی مین بول گوزدل شرحی که نامی دور نجات الطالبین

آلینگیز ساخلانگ او یونگیزده اوقونگ ایلانگ عمل جان و دل بیرلان بولگای سیز سعادتگه قرین

اوقوتینگیز قیز، اوغول، کتّه، کیچیکگه سعی ایلان بیلدیرینگ معنی سینی حق دین کورونگ فضل مبین

قومیمیزی یاش اولوغ پیشوالاری محترم اغنیالاریگه پندلی خطاب

و بول عزیز برادرلاریمیزگه برادرانه نصیحت و عتاب

ای اولوغ یاش قومیمیز سرکرده سی و کتّه سی عزت ایلاب سیزنی حق ایتمیش غنیلار جمعیدین

یاد ایتینگ اوتکان زمانلارنی وطن بلواسییی فتنه لیک کونلار قرانغو تونلارینگیز کیچمیشین

اول قولاغ حق سیز بولوب هیدلگانینگیز، حبسینگیز بار و یوغدین اجراشیب قالگانلارینگیز فرصتین



کوب دعا و التجا تنگری گه ایلاب بیغلاشیب
 قوتقازیب دشمن قولیدین مستجاب ایلاب دعا
 حق کلامیده مهاجر قُلالاریگه ایلاگان
 حضرت حق قیلدی ایفا وعده‌سینی یوزده یوز
 فکر ایتینگ عبرت کوزی بیرلان کورونگ اهل وطن
 شکر نعمتنی بجا ایلانگ بیربیدور حق سیزه
 خویش و قوم و عاجزینگیزگه زکوة فرضنی
 بول اولوغ نعمتلارین شکرینی حق فرض ای‌زلادی
 اغنیا و معتبرگه رستور انده بیرمانگیز
 کم‌بغل عاجزلارینگیزنی قوشوب اویده بیرینگ
 حضرت حق اوز کلامیده دیمیش کیم ساقلانگیز
 اوز خاتون، قیز و اوغوللارگه شریعت حکمینی
 بیلدرینگ علم طهارت هم نماز و روزه‌نی
 قیز، اوغوللار عادت ایتسونلار نماز و روزه‌گه
 قول، ایاغ، کوکرک، بویون یاپماقلاریدور فرض حق
 تانگلا حق آلدیغه بارگانه سورارنی فکر ایتینگ
 توبه ایلاب، حقگه یانیب، حق رضاسین ایستابان
 غفلت ایتمانگ حقنی یاد ایلانگ همیشه تون و ک‌زون
 توبه ایلاب حق‌غه بیرگان عهد و پیمان ساعتین
 یولنی آچدی هجرت ایتدینگیز او غم‌لیک کلبه‌دین
 کینگچیلیک امن و فراغت بایلیکنی وعده‌سین
 عهدینگیزنی ایتدینگیز می سیز بجا یوزدین بیرین
 خویش و قومینگیز عزیزلارنی بو کونگی حالتین
 نعمت عظمای دینی دنیوینی سان سیزین
 سیز ادا ایلاب خوش ایلانگ بول غریبالارنی دلین
 شکرینی هر دم بجا ایلانگ کورورسیز راحتین
 توی فرعونی یمان دیب‌دور شفیع المذنبین
 توی شرعی اوستینگیزگه یاغدورور حق رحمتین
 اوزینگیز باله چاقانگیزنی سقرنی اوتیدین
 اورگاتیشنی فرض ایتیب‌دور سیزگه رب العالمین
 غسل و حیض و هم نفاس احکاملارینی بیربیرین
 ساقلانگیز اوز عزتینگیز هم اولارنی حرمتین
 کیماسون نازک کیم کورساتماسون هم زبنتین
 قیلیمیش و ایتیمیش لارینگیز بلکه ذرّه-ذرّه دین
 جمع ایتینگیز کیم مسافرسیز سفرنی توشه‌سین
 بنده‌لیک‌گه بیلنی باغلانگ کیتماغینگیز دور یقین



حیات گلستانینی گل رعناسی، یاشلیک دورانی تخت نشین پادشاهی،

کوزلاریمیزنی آق و قراسی، محترم یاشلاریمیزنی پند و نصیحت لاری، بول ناتوان نی اینک بویوک مدعاسی.

نور دیده دل سروری یاش جوانلار جمله‌نگیز	ایشیتینگ بول خیر خواهینگیز نصیحت لی سوزین
اویغانینگ وقت اوتماسون فرصت غنیمت تیزکرینگ	حق یولیگه یخشی ایلانگ مصطفی نی پیروین
بابه لاردیک سعی و کوشش غیرت و همت ایتیپ	علم دین‌گه شاد ایتینگیز سیز الارنی روح لارین
حلقی فاسد، بی دیانت، بی عقیده، بی ادب	بی تمیز نادان جوانلار ترک ایلانگ صحبتین
فاضل و دانا عزیزلاردین اوزاقماسدین بولونگ	صحت شیرین لاریدین مستفید و خوشه‌چین
مجلس علمی توزینگیز هر زمان اوتکازمایین	بی افاده استفاده توپلانیشنی ساعتین
کوب غنیمت دور بو یاشلیک دورینی قدرین بیلیپ	لهو و لعب و مستلیک قیلمانگ چیکارسیز حسرتین
کمبغل عاجزلارینگیزگه سخاوت لطف ایتیپ	دل لارین شاد ایلانگیز بیرگای سیزه حق جنتین
اتحاد و اتفاق و بینینگیزده ائتلاف	یاش، اولوغ لار یخشی ایلانگ احترام و عزتین
دینینگیز، قومیتینگیز، اوز تیلینگیز فخرینگیز	عزت و قومی بقادور، ایستمانگیز اولماغین
قومیمیزنی فخری شیرلار شیرلی فاضل میر علی	ترکی‌گه بیرمیش ترقی هم آشورمیش رفعتین
خمسه دیوان نوایی موندین اوزگا کوب اثر	قالدوروب کیتیمیش اوقونگلار هم بیلینگلار قیمتین
حق یولی پیغمبرین پیرولیگی مسکین لاره	خیر و احسان عدل ایله قومینی قیلمش خدمین
بول کیشی دیک فاضل و دانا دواهی لار بسی	خدمت ایتیمیش حق بولارگه دایم ایتسون رحمتین
حق پرست و حق پسند و راستگوی و راستکار	ساده پوش و بی تکلف اقتصادی زمره‌دین
مُد پرست، تقلید پسند و فیشنی بولمانگ قاچینگ	یاوه‌گو یالغانچی آدامچی چقیمچی جمعیدین
ایچکیلیک، چرس و قمارگه مبتلا لاردین حذر	ایلانگیز هم مار افعلی قاره دارو زهریدین



خاتمه فی المناجات و الدعوات و الصلوات و التسلیمات سید السادات

اهل غفلت اهل عصیان اهل فسق و هم فجور	بیز ایرورمیز یا الهی توبه اعطا ایلاگین
نفس و شیطان و هوی بیرلان هوسنی ایلگیده	بیز اسیردورمیز بیزی قوتقاز بولارنی ایلگیدین
بیر بیلش و خوب تنیش هم بندهلیک قیلماق اوچون	خلق ایتیب سن بیز قیلورمیز نفسیمیزنی قُل لیگین
حق پرست لیکنی، خدا جولیکنی تشلاب آرقه گه	ایلا دینگ دنیا پرست لیک کیچه کوندوز تینمایین
حل و حرمت فرقین ایتمای حرص بیرلان جمع ایتیب	صرف عیاشی قیلورمیز بیز زکاتین بیرمایین
هجرت ایتکانمیز وطن دین حق رضاسی دین اوچون	دیب یورو رمیز حضرتینگ دین بیر کمی شرم ایتمایین
خودپرست، خودخواه و نادان بیز ایرورمیز، خودپسند	اوز ارا بسی اتفاق و بسی محبت، اهل کین
دل قرا هم روسیا قُل میز یمانلار دین یمان	بول یمانلار گه نصیب ایت یخشی لارنی صحبتین
کیتکزیم جهل و فساد و فسق و قومی اختلاف	تنبلی عیاش لیک وصفین کـوتارگین اورتادین
علم و حلم و خلق و آداب و داد و اتفاق	شیر صفت بابالاریمیز غیرت و همتلارین
یاشلاریمیز دللارین معمور ایتیب یادینگ بیله	ایچلاریده یاندوروب توحید و ایمان مشعلین
بیر لوای علم و عرفان قوللاری گه لطف ایله	دهری، بی دین فتنه سیدین سن بولارنی ساقلارین
جنت دنیا و طنده برچه قالگان خویش و قوم	چیقاییالمس کوب قوی دشمن ایاغین آستیدین
ترک و تاتار، اوزبک و قفقاز، داغستان ایلی	ترکمن، تاجیک و قـپچاق و قزاق و قرغزین
فخر عالم آل و اصحابی طفیلی برچه سین	اوستیگه یاغ دور الهی فضل و احسان یامغورین
اول حدیث آسمانی بدری بخاری کیم ایرور	جامعی خیر الکتب اول ذات امیر المؤمنین
ترمذی جامع لاری بیرلان شمائل حرمتی	دارمی خیر السنن جامع لاری آثاریدین
صاحب مبسوط و قاضیخان، هدایه صاحبی	اول بدیع صاحبی دور پیشوای اهل دین



جمله اوتمیش دین‌گه خدمت ایلامیش ارباب فضل
 اهل تقوی، اهل عرفان، اولیاء و صالحین
 بار ایرورلار بینیمیزده بیر نیچه اهل قلم
 اهل قرآن عندلیب حق مجرد بعضی‌سی
 مکه و طیبه حبیبینگ روضه‌سی طائفده هم
 ملک افغانده سکونت ایلامیش بعضی‌لاری
 عزتیمیز، آبرویمیز، باش اوزره تاجیمیز
 قوم اُچون آب بقا شمس هُدی‌دور هر بیرری
 باش اگر کیتسه تنیگه زنده‌لیک امکان یوق
 بی‌خرد، نادان ایرورمیز، بی‌بصیرت، کور و کر
 کوب خجل‌دورمیز الهی حضرتینگدین عذرخواه
 فضلینگ ایله هر بیرین عمرین اوزون، جاهین فزون
 بول عزیزلارنی حضورینگه چیقرسنگ هر بیرین
 کونیمیزگه نور توفیقینگ ایله بیرگیل ضیاً
 قرن ثانی‌دین مسلسل هیچ اوزولمای تا بو دم
 فضلینگ ایله ساقله یارب بول مبارک سلسله
 اول قتیبه فاتح فرغانه یارب حرمتی
 غازی‌لار بیرلان مجاهدلار، شهیدلار حرمتی
 بیرق کفر سرنگون و بیرق دینینگ بلند
 اول مقدس مملکت‌دین خارج ایلاب دشمنین
 اهل ایمان قُل‌لارینگنی ایله یارب جاگزین
 اهل علم و فضل، تقوی، اهل فتوی مرشدین
 بعضی‌سی برج شرفنی اختری تابان دین
 فضلینگ ایله جاگزین ایتدینگ بولارنی بعضی‌سین
 شُغْلَهْم دَرَسْ وَ اِرْشَادْ وَ نُصْحَ الْجَاهِلِینْ
 رهنمای قوم ایرورلار کورساتورلار حق یولین
 چشمه‌سین خشک ایتمه محروم ایلمه آفتاب‌دین
 تنلارینی سن جدا قیلمه الهی ———— یی باشیدین
 بیز ایماس‌میز زرشناس و قدردان و فضل بین
 بول عزیزلار حقیقی قیلمای ادا یوزدین بیرین
 نعمتین افزون ایتیپ قیل سرنگون اعدالارین
 اورنیگه یوق——— دور ایچیمیزده الهی جانشین
 اوقوتایلیک کوزلاریمیز نورلاریگه علم دین
 بیزگه یتیمیش دور بو علمی سلسله ارباب‌دین
 تا قیامت بر دوام اوزمای بو طلا زنجی——— رین
 صوفی قشلاق اندجان قرییده واقع مرقدین
 نصرت دینینگ اوچون غزو ایلادی، توکتی قانین
 ایله یارب کفر ایلی محزون و شادان اهل دین
 اهل ایمان قُل‌لارینگنی ایله یارب جاگزین



مدرسہ، مکتب، مساجد، خانقاہ اہل دین	آچیلیب معمور بولسون اہلی بیرلان قیتہ دین
قدرتینگ آلدیدہ آسان مشکل ایرمس ایلاسنگ	سرنگون دشمن لارینگنی دوستلارینگ مسندنشین
مستقل آزاد اولوب بارسک وطن تعلیم اوچون	خویش و قوم، ایرک-خاتون نادان لارگہ علم دین
کوزلاریمیز نوری یاشلار، دللاریمیز قوتی	اول وطن گلزارینی دورلار گلی بی خار دین
بیلمس ایرمیشلار الہی اعتقادات علمینی	بی خبر شرع نبی احکامی و اسراریدین
اورگاتیب توحید و تفسیر و حدیث و فقہ دین	اوقوتوب حقین ادا ایتسک بولرگہ حق سوزین
بول ایرور یارب دلیمیز آرزوسی مطلبی	خواہلسنگ آسان بیوروسن قل لارینگنی مطلبین
صَلِّ يَارَبِّ وَ سَلِّمْ، ثُمَّ بَارِكْ دَائِمًا	اول حبیبینگ مصطفی گہ ایردی ختم المرسلین
آل و اصحاب حبیبینگ و بولار پیرولاری	داخل ایله بول جماعہ ایچره بیز عاصی لارین
سرور عالم طفیلی آل و اصحاب بونلاره	پیرو اولگان اہل تقوی، اولیاء عارفین
قیل دعای ناتوان طہ الہی مستجاب	حضرتینگدین اوزگا ملجاً بیزگہ یوقدور بالیقین
بیز غریبلارگہ کیتارده تحفہ حسن خاتمہ	ایله واحشرنا جمیعاً فی عداد الصالحین



مقدمه

حمد بیحد و ثنای بی عدد اول ذات واجب الوجود که کیم ذات و صفاتیده تنها دور و عظمت و کبریا و بی نیازلیکده یکتا و شائبه حدوث و رائحه نواقص و عیوب دین مبرا دور، بی شبه و بی مثل و بی نظیر و بی همتا، خالق دورکیم بیر و کوکنی کمال اتقان و نهایت احکام بیرله یراتیب آسمانی ثوابت و سیارات بیرلان بیزاتیب انی کمال قدرتی بیرله بی ستون توختادی و تاغلار بیرله بیرنی ثابت ایتیب هر طرفدین چشمه و انهارلارنی جاری قلیب انواع گل و ریحان و تورلوک اشجار و اثمار بیرله زینت بیریب عظمت و اولوغ لیغینی کورساتدی و انساننی احسن تقویمده یراتیب عقل و فکر و نطق و بیان بیرله سایر حیوانات دین ممتاز ایتیب، **إِنِّي جَاعِلٌ فِي الْأَرْضِ خَلِيفَةً** [۱۱- البقرة] فحوی سیچه باشیغه تاج خلافت کیدوردی و **عَلَّمَ بِالْقَلَمِ** [۴ - علق] ارشادیچه لوای خط و کتابت نی انی باشیده اهتزازگه کیلترب صاحب قلم قلیب **عَلَّمَ الْإِنْسَانَ مَا لَمْ يَعْلَمْ** [۵ - علق] مضمونی چه انی همه علوم و فنونده دنیاده علم قیلدی و **إِنَّا هَدَيْنَاهُ السَّبِيلَ إِمَّا شَاكِرًا وَإِمَّا كَفُورًا** [۳ - الانسان] منطوقیچه پیغمبرلار واسطه لاری بیرله یخشی یولگه ترغیب و یمان یولدین ترهیب ایتیب الارنی حکم قبضتین بیرله ایکی گه بولوب راه راستده یورگان شکرگذارلارگه جنات النعیم و ایگری یولگه بارگان ناسپاسلارگه درکات الجحیمنی وعده ایبتدی.

و صلوة و سلام اول سید انام و مسک ختام هادی سبل و مقتدای رسل جناب حضرت محمد مصطفی علیه الصلوة والسلام که بولسون که اول ذات سببی ایله هادیه غوایت گمراهلاری و تیه ضلالت سرگردانلارینی الله جل شانته جاده شریعت و شاه راه طریقت و حقیقتگه یوللادی؛ و آل و اصحابلاریگه اولسون که شریعت آسمانیده نجوم و بدعت اربابلاریغه رجوم و احادیث نبویه سلسله سی نینگ سر حلقه سی و طریقت باشلوعلارینی سرکرده سی دورلار؛ و تابعین عظام و مجتهدین کرام و محدثین فخام و علما و مرشدین ذوی الاحترام که اولسون



که شریعت احکامی نینگ انتظامی و طریقت سلسله سی نینگ دوامی و احادیث نبویه نینگ کذاب لار دین ساقلانیشی و معتقدات صحیحہ اهل سنت و جماعت نی بدعت اهللی نینگ ید تحریف و تصحیفی دین اوزاغ قالیشی، همه بالذات الله اراده سی و حفظی بیرله بولسه ده لیکن عالم اسبابده اول ذات لار نینگ کوشش و زحمت لاریگه مرهون دور و عالم اسلام عموماً تاقیامت الار احسان لاریگه ممنون دور، صلی الله علیه و آله و صحبه و من تبعهم ^{رضی عنهم} و ارضاهم و احشرنا فی زمרתهم و متعنا بعلومهم آمین.

سبب تالیف

اما بعد، فقیر ذوالتقصیر گمنام لیک زاویه سیگه مقیم و گنه کارلار ارباییگه ندیم، بطالت اهللی نینگ سرکرده سی و سفاهت جمعیتی نی سر رشته سی، اکثر عمرینی هوٰی و هوس بیرله اوتکارگان و عنفوان شباب و ایام جوانی نی غنیمت بیلماگان، دنیا حیاتیگه مغرور و آخرت یادی دین دور مهاجر لیک آتینی بولغاگان، عمامه باشیغه برعبث چولغاگان، اگرچه علم و عمل دین عاری دور، بی علم لیکغه اقراری انی عاری درو، سید لیک نسبتیغه نالایق و غفلت ساعاتی ایامیگه فائق حبیب الله بن سیدی حی خان بن سید فیضی خان بن سید الوغ خان النمنگانی الفرغانی الحنفی النقشبندی هداه الله الی الصراط المستقیم و غفر ذنوبه و ستر عیوبه بفضلہ العمیم و کرمه الجسیم ایتورکیم «ثبات العاجزین» جناب صوفی الله یار تالیف لاری دین بولوب عقاید اهل سنت و جماعت نی یخشی صورته نظم سلکیگه تارتیب و نصایح متصوفانه زبوری بیرلان ارباب ذوق و اصحاب شوق قولا ق لارینی مزین ایتگان دورلار، لیکن مع الاسف باوجود احتیاج شدید ترکستان علمالاری دین هیچکیم انی حل مغلقاتی اوچون شرح یازگان لیک لاری بیزگه معلوم بولمادی، اما خدا خیر بیرسون تاتار علمالاری دین تاج الدین نام کیشی رسالہ «عزیزه» اسمیده بیر شرح یازیب دور، چون اول کیشی ترکی چیغاتایی لغت لاریگه و انی اصطلاحات مخصوصه لاریگه نابلد و اوزاق توشگان لیگی اوچون اکثر الفاظ و جملات شرحیده سهو و خطاگه کیتیش دور، چنانچه بیز بو شرحیمیزده اول جای لارگه غالباً اشاره ایتدوک، شارح دیساک مقصد رسالہ عزیزه صاحبی دور لیکن موندین مقصدیمیز اول کیشینی عیبینی آچماق ایمسدور، بلکه اوقوچی لارنی آگاه لانتروش دور و هم شارح رحمة الله علیه شرحیده اکثر قصه و حکایت بی اساس و خرافات لارنی یازگاندور، بیرآز علم دین بهره سی بار مطالعه قیلگان کیشی بیلور. چنانچه اوز تاتار علمالاری دین بیر کیشی شارح نی ترجمه حالیده بو شرحیگه اشاره ایتیپ و بو کتاب توغریسیده بیرگان بهاسی عیناً کیلتورولور.

بعضاً سیاحت ایامیده افاضل قندوز بیرلان بعضی مجالس لارده شول رسالہ «ثبات العاجزین» نی اوقوب اورتاده مطالعه ایتگانده همه نسخه لارده سهو و غلط و تحریف و تبدیل بارلیگی ظاهر اولوردی. و هم بعضی



الفاظ مترادفه و متجانسه توجیهی و بعضی ابیات لارنینگ تأویلی ده مباحثه لار واقع بولور ایردی، شونینگ اوچون بو بنده عاصی دلیکه اوتدی که اگر بعضی قلمی نسخه لار تاپیلسه الارنی بیر-بیریگه مقابله ایتیپ بیر نسخه صحیحه قولگه کیلسه یخشی بولور ایردی. الله بو مأمولنی یوزه گه چیقیشی گه یاری بیریب نیچه نسخه قلمی قولگه کیلیب نسخه الارنی بیر-بیریگه تقاسلاب بیر نسخه صحیحه قولگه کیلدی.

تصحیح اوچون قولگه کیلتورولگان نسخه لار شولاردین عبارت دور:

۱. بیر نسخه قلمی خوشخط کامل جناب سید احمد خان بن سید محب الله خان کاسانی دین، بو نسخه کوب صحیح نسخه بولوب آخیده غزلیات و رباعیات و قطعات و مثنوی مصنف مکمل بارلیغی باشقه نسخه لاردین مونی امتیاز بیرور.
۲. ینه بیر نسخه قلمی ناقص جناب مولوی محمد علی کوشانی دین قولگه کیلدی.
۳. ینه بیر نسخه چاپ تاشکند قولگه کیلدی، موندین هم استفاده ایتیلدی.
۴. ینه بیر نسخه کابل ده جناب داملا جمال آخوندین قولگه کیلدی، لیکن کوب سیرغلط ایردی.
۵. رساله عزیزه چاپ قزان حاجی عبدالخلیل افندی دین قولگه کیلیب، اول نسخه دین هم تصحیح و باشقه خصوصده استفاده ایتیلدی.

بو نسخه الارنی تیکشیریب تصحیح و تنسیخ و مقابله ده فرزند ارجمندیم سیدسیف الله و محترم قاری سیدهارون بن سیدعبدالاحد خان کاسانی کوب حصه آلدیلار، جزاهما الله خیرا الجزاء.

و هم بعضی احباب لار اشارتاً و عبارتاً بنده گه بیر شرح یازیش خصوصیده التماس ایتور ایردی لار، خصوصاً برادر جانی قاری سید عبدالاحد خان کاسانی کوب راق امر و الحاح ایتور ایردیلار. اگرچه بو عاجزده بو بابده لیاقت و علم کافی بولمسه ده، بولارنی سوزلارینی بیرگه قویماسدین به قدر استطاعت بشری بیر شرح موجز یازیشگه عزم ایتیپ، اولاً ملا تاج الدین آخوند تاتارنی شرحینی کاملاً مطالعه ایتدیم و انی سهو و غلط ایتکان جای لاریغه علامه قویدوم، سونگره اول شرحنی سوادیفه شروع ایتیپ بیر نیچه آی مدتیده اتمامیگه موفق اولدوم.

بیز شول ایشلارگه مشغول ایکان لیگیمیزده بعضی حاجی لار قول لاریدین شام شریفده موسی افندی اهتمام و مصرف لاری بیرلان چاپ بولگان بیر نسخه «ثبات العاجزین» مشهور به صوفی الله یار - نور دیده دیک بیزگه بیتوشدی و کوزلار منور بولدی و خداوند موسی افندی گه خیر بیرسون دیب کتابنی مطالعه سیگه دقت نظری و انتقاد بصری بیرلان باشلادوک، پُر طمطراق مقدمه سی و بعضی مغلق ابیات لارنی شرحی و ایضاحی و



ناظم‌نی شرح حال‌لاری و باشقه تحقیق و تدقیق‌لارنی کوروب بیر طرفدین سرور حاصل اولسه‌ده، بیر طرفدین بعضی سوزلارینی حقیقت‌گه مقرون ایکانلیگی‌ده و کتاب تصحیح و تدقیق‌ده شک و تردید پیدا بولدی. شو اوچون رساله‌نی قولیمیزده گی نسخه لارگه مقابله ایتیشگه باشلاب بیر آز تعمق و تدقیق دین سونگره خوب واضح بولدی که بو نسخه‌نی تصحیح و تدقیق‌ده سهل انگارلیک و دست اندازلیک لار بولوب و انگا تحریف و تبدیل و تغییر قولی کیریپ و تعصب مذهبی اثریده بعضی ابیات لارده حذف و مسخ لار واقع بولگاندور و هم بیر قانچه ابیات لار هر جایدین قصداً چیقاریپ تشلانگاندور، و شرح حال مصنف ده هم بعضی بی اساس سوزلار یازیلگاندور.

چنانچه بو مقدمه‌نی آخیده بو نرسه‌لارگه روشن‌لیک تشلاب و حقیقت‌نی محترم اوقوچی‌لارگه آچیب تشلاماک کیراک.

شرح حال ناظم و شارح رحمهما‌الله‌نی بعضی کتابلاردین تتبع اثریده تاپیب بو مقدمه آخیده درج ایتدیم، و بو شرحده باندازه قدرت بشری الفاظ متن‌نی بیر-بیریگه ربط بیرماق و بعضی الفاظ مغلقه و متجانسه‌لارنی حل ایتماق‌گه اوروندوم. متن‌ده‌گی مسایل‌لار اذله‌سینی حتی الامکان قرآن کریم و احادیث نبوی دین اوز مقامیده کیلتوروش‌گه کوشش ایتدیم و بعضی سوزلاریگه دلیلی سست و واهی بولسه انی ضعیفینی و احادیث موضوعه‌نی موضوع‌لیگینی آچیق بیان ایتدیم و کیلتورگان احادیث‌لارنی راوی‌لاریگه نسبت بیردیم و انگا «هدایة الطالبین شرح ثبات العاجزین» نام قویدوم، ابیاتی جمله [۱۶۶۳] دور.

ترجمه حال ناظم رحمه الله: صوفی الله یار کته قورغانی وفاتش در کوه وخشوار که در مضافات ده نَو حصار واقع است، در سال یک هزار و یکصد و سی و شش [۱۱۳۶] اتفاق افتاده است. از «مسلك المتقين» که تالیف کرده او است:

سامعا بر میچ پای سخن	یعنی تصحیح کن خطای سخن
ذی بصارت نیم زعمیانم	ناقصی‌های خویش میدانم
به جمیع عیوب اقرارم	لیک بر گفت نظم ناچارم
چونکه من ز اهل استفاده نیم	خواجه و میر و شیخ زاده نیم



اولیه‌های من اگر پرسی	زود از من گریزی و ترسی
خدمت شاه عصر می‌کردم	نان ز قوم و زهر می‌خوردم
یعنی نانی که از طمع پیدا است	گویم از این زیاده نیز رواست
در نشستن تعصب آئین بود	غم بالا و فکـر پائین بود
وقت خوردن طعام می‌شد زهر	یعنی او فوق ماست درین شهر
به رخ هر یکی شده خندان	گفته می‌شد خوش آمد چندان
ناگهان از عنایت باری	کرد سلطان بخت من یاری
تا که گشتم محب درویشان	یافتم صحبت خوش ایشان

در مجموعهٔ عبدالمطلب خواجه فهمی مذکور است که صوفی الله یار پسر الله قلی و برادر فرهاد بی اتالیق است. در آوان حکومت ابوالفیض خان در کتّه قورغان و سمرقند به مرتبهٔ امارت و حکومت رسیده است بر وجهی که در شعر سابق اشاره است، بعد از آن از خدمت و سپاهی‌گری استعفا کرده، راه علم و درویشی را اختیار نموده است، در اواخر عمر به ده نو حصار هجرت کرد، در آنجا مدفون است، الآن در کتّه قورغان گذری و قطعهٔ بنام صوفی الله یار موسوم است. انتهی.

[نمونهٔ ادبیات تاجک، تألیف صدرالدین عینی، صفحه ۱۶۹، شماره ۷۲، چاپ مسکو]

ناظمی شرح حال لاری که بعضی اثر لاری بیرلان استدلال: بیر مخمس لارینی آخیده بو ابیات لار مذکور دور، اندین مهاجرت لارینی سببی و قیسی بیرگه هجرت لاری معلوم اولور. مخمس:

«الخصوص خویش و تبار و قوم دین ایریلماغیم اختیار غربت و مسکین و مهجـور اولماغیم
بیر سینیغ دلنی تاپیبان انگا مسرور اولماغیم یاد ایتیپ عصیان لاریمنی چوخ رنجور اولماغیم
قوم شطاح صحبتی کونگولومنی بیمار ایلادی

قوم قپچاق و ختا قیلدی سمرقندنی خراب آلمادیلار حق سوزین و یورمایین راه صواب



امر و نهی حق اوقوب قیلدیم الارغه چون خطاب دیدیلار ای صوفی قیلمه بیزگا بو تورلوک عتاب

عاقبت اول ایل سوزی کونگولومنی افگار ایلادی

بو سبب دین اختیار صوب غربت ایلادیم اول گروه دین دور اولوبان ترک صحبت ایلادیم

بیلیبان اوز عیبیمی نفسیم مذمت ایلادیم وخشواره جای ایتیپ ترکیب عزلت ایلادیم

بیر نیچه مسکین غریبنی اوزینه یار ایلادی

مخبر صادق سوزین محکم توتوب قیلدی وطن گوشه صوب حصاره بول غریب پر محن

ایشیتیپ حکم شهید و رتبه مظلوم اولان شاید الله یاره یار اولغای خدای ذوالمنن

بو جهت دین مسکن مألوف وخشوار ایلادی»

مؤلف مسلک المتقین نی عینی کیلتورگان ایبات لارنی ایتاگی ده دییورلار. نظم:

«یعنی آن مرشد بلا اشباه پیرو حضرت حبیب الله

نام پاک مبارکش نوروز پای تا سر تمام درد و سوز

وصف ایشان اگر بیان سازیم نیست ممکن بیان آن سازیم

جذب آن متقی فرو بگرفت رگ-برگ رفت ومو-بمو بگرفت

بی توقف بپایش افتادم دست بیعت بدستشان دادم

زان محل چشم و دل باو بستم اندک از حال خویش دانستم

یعنی زین پیشتر خری بودم بلکه از خر فروتری بودم

با وجود چنین زبونی من گشت جازم برهنمونی من

دل سنگینم آن خدای شناس کرد حـک با توجه الماس

تا کند پاک زنگ «لا» از او بدهد زین به نقش «الا هو»

آن توجه به سنگ اگر سازد سنگ خاره بخویش بگدازد



آن مساکین نواز سلطان مرد حیف جان کندنی که بر من کرد
 کندن جان‌شان ندانستم قیمت کانشان ندانستم
 گرچه بی رنگ مانده ام بی بو دارم امید از عنایت او
 گر نباشد عنایت پیران پای تا فرق من بود عصیان»

و هم پیرلاری نی متبع سنت و هادم بدعت ایکان لیک لاری و اول ملاقات لاریده عقیده درست قیلماقغه
 بویورگان لارینی و هم مسلک المتقین نی اول ذات امرلاری بیرلان سلک تحریرگه کیلتورگان لارینی قوییده گی
 ابیات لارده ذکر ایتیپ دورلار. شعر:

شکر لله که پیش‌ش‌وای ما	پیر و مولای رهنمای ما
دایما پیرو رسول خداست	هادم جاهل و بدعتست و هواست
هست سنت جمیع ضابطه اش	باعث قرب اوست رابطه اش
از اصول و فروع و قال و حال	از جمیع علوم مالا مال
مرشد و ارشد بلا اشباه	اصلح الصالحین حبیب الله
گر بجسمم زبان شود هر مو	تا بروز جزا بگوید زو
نتوان ساختن بوصف ادا	من کجا وصف آن جناب کجا
اینقدر بس که محیی سنن است	در شریعت چراغ انجمن است
من که باشم ز اوزبکان قبح	بشگفاند جنان من چون صبح
مردمانی که فاضلند فکیف	هر که زین ذات غافلند چه حیف
او به این بنده پند داد نخست	اولا اعتقاد سـاز درست
کس نداند عقیده او چیست	او مسلمان به هیچ مذهب نیست»

و آخریده ایتور:



«از عقیده دگر ز فقه ضرور گوی نظمی شود به آنها نور
 به عنایات آن مسیح نفس ساختم با رسوخ علم هوس
 ساختم اندک از اصول و فروع تا بقدر مجال خویش شروع
 قریه‌ی نظم را نهادم گام مسلک المتقین نهادم نام»

ینه مقدمه‌نی آخیده دیرلار:

«شکر ایزد ز فرقه ظلما کرد بیرون بکرد از فقرا
 لطف خود را براش شامل کرد همره کامل و مکمل کرد
 داد مارا طریق مرضیه یعنی مسلوک نقشبنديه»

و هم پیرلاری وفاتیگه ایتگان تاریخ لاری قرار ذیل دور:

«شکر بیحد به حضرت حق باد رهنمایی به ما غریبان داد
 رهنمایی که مقتدای ماست صفت او بشرح ناید راست
 ظاهراً فاصل فصول فصل باطناً واصل مقام وصل
 محیی سنت رسول الله سرور عارفان حبیب الله
 عمل و علم و حلم و جود و سجود این همه در جبلت او بود
 بود در بحر معرفت غواص عارف حق بزرگ خاص الخاص
 بار اول باو که پیوستی روی میداد حالت مستی
 چون گرفتی دو دست آن شاکر دل خوابیده می شود ذاکر
 ابتدایش چنین بود ای کس انتهایش خدای داند و بس
 آخر این آفتاب عالمتاب کرد بر روی مشکبوی نقاب



به عنایات حق از آن بنده صد هزاران قلوب شد زنده
در ظهور و بطون و قال و حال رحمتی بود از خدای تعال
زین سبب نقل آن درست نهاد رحمتی بود غرق رحمت باد
پیر تاریخ از کمال جود [رحمت کردگار حی ۱۱۱۱ هجری] فرمود

و هم ایکی استادلارینی تعریفلاریده دیب دورلار:

«ای برادر ترا نباشد ظن از کجا داند این بنای سخن
گرچه این بنده است عام و خام هر دو استادماست مرد تمام
بحر علم و کرانه‌ی وقتند در فقیه‌ی یگانه‌ی وقتند
خواجه مومن که اعلم خاص است در بحر علوم غواص است
آنکه نامش محمد غزلیست شفقت او بما خفی و جلیست
یا الهی تو لطف کن حالی هر دو را چون جنید و غزالی»

شول صدر الدین عینی دین نقل ایتیلگان و اوزلارینی مخمس‌لاری و مسلک المتقین دین کیلتورولگان ابیات‌لارگه کوره و هم مرادالعارفین مقدمه‌سیدین معلوم اولور که مولفنی آتلاری الله یار و آته‌لارینی نامی الله قلی و برادرلارینی اسمی فرهادبی اتالیق و اوغوللارینی آتی صادق محمد و قوم لاری اوزیک و توغولگان بیرلاری کته قورغان دور، خاندان امارت و حکومتدین بولوب اوائلده ابوالفیض خان حکومتی آوانیده کته قورغان و سمرقنده امارت و حکومت ایتیب سونگره جذبۀ الهی غلبه قلیب حکومت و نوکرلیکدین استعفاء ایتیب شیخ نوروز ملقب به حبیب الله گه مرید اولوب و طریقه نقشبندیگه کیرگانلاری و اول ذات‌دین بالاخره مرشد اولوب تا آخر عمرکچه مریدلارنی ارشاد و هدایتگه مشغول اولوب و قپچاق و ختای قومینی سمرقندنی استیلا ایتیب و خرابلیکلار قیلگانلاریده، الارگه نصیحت ایتسه‌لار قولاقغه آلمای، بیزگه کوب نصیحت قیلمه دیب ظلم و استبدادگه مشغول اولگانلاریدین آزرده خاطر اولوب دللاری سینیب هجرت و ترک وطن ایتیب حصار ولایتیده ده نو ایالتیگه تابع و خشوار مضافاتی و قبادیان قشلاقیگه کوچوب کیلیب اول بیرده تعلیم و تصنیف گه مشغول اولوب سنه ۱۱۳۶ هجری ده اوشل و خشواری قبادیانی ده وفات ایتیب و او بیرده مدفون و قبرلاری زیارتگاه



خاص و عام لیگی معلوم اولور، و هم مشرب نمنگانی دیوانیده قبادیان گه باریب ناظم رحمه الله بیلان کوروشگانی ذکریدین هر ایکی لاری معاصر ایکان لاری معلوم اولور و ناظم رحمه الله نی مراد العارفین ده یازگان لاریغه کوره مولفات لاری بالترتیب شولاردین عبارت دور:

«مسلك المتقين»، «ثبات العاجزين»، «مخزن المطيعين» و «مراد العارفين».

اما موسیٰ افندی سراج العاجزین و نجات الطالبین آتی-له باشقه ایکی اثرلارینی بارلیگینی ذکر ایتیبدور.

اما شارحنی ناظم رحمه الله قومیت لاری خصوصیده «سمرقند ایلیده منگلان دیگان اوی بار ایدی انگا تیمور یار آتلی اصلی و نسلی نوغای بیر کیشی بار ایدی» دیب قیلگان قصه سی بی اساس معلوم اولور، چونکه ناظم رحمه الله کتّه قورغاندین اولوب آته لارینی آتی الله قلی دور، نه تیمور یار، اصلاً اوزبک دورلار، نه نوغای.

همده شارحنی شیخ حبیب الله خصوصیده «بخارا اهلی همه طاعت و عبادتگه سست اولوب و بدعتگه آغشته بولگانلاریده» «حبیب الله آتلی بیر یاش اوغول اولوب بیر کون تفکرگه باریب ای تنگیم بو بندهنگ گه علم بیرسنگ بولارگه امر معروف ایتسه نه اولور دیب بیغللاب حضرت بهاؤالدین رحمة الله علیه قبرلاریگه باریب الله گه یالبارغانده اویقو غلبه قیلیب حضرت بهاؤالدین نی توشیده کوروب اول ذات «سین سمرقندگه بار! انده منی بیر مریدیم باردور اول کیشی دین تعلیم آلیب سونگره بخاراگه کیلیب خلاقینی راه راستغه باشلاغیل دیگانلاریده» اول ذات امرلارینی برجا قیلیب سونگره بخاراگه قایتیب کیلیب ملالار بیرله مناظره ایتیپ الارگه قرآن ده سورة یوسفنی تاپمای من دیگانیده، عالم لار قرآن کریم نی اقتاریب سورة یوسف نی تاپماگان لاری» وینه بیر مجلس ده قدوقغه بیر تاوق توشوب اولگان لیگینی و اول حرام سو بیرله پیشیرگان طعمانی پلیدلیگینی» به طریق کرامت اثبات ایتگانی، و هم ناظم رحمه الله نی اول کیشیگه مرید اولوش لاری مقدمه سیده کیلتورگان قصه سی؛ و امینه و حلیمه آتلی ناظمی ایکی قیزی بار» دیگانی؛ چون بیر روایت صحیحه گه متکی ایماس و شارح هم بیر آدم ثقه و معتمد ایماس لیگی سببی دین بو حکایه لارنی افسانه بی اساس دیب سنالسه بولور.

ناظم نی شیخ و اساتذه لاری: بیر طریقت لاری شیخ نوروز شیخ حبیب الله بیرله مشهور دورلار، ناظم نی یوقاریده گی یازولاریگه کوره بیر عالم عامل و مرشد کامل اولوب کوب کیشی لارنی توغری یولگه یوللاب ناظمی: «[رحمت کردگار حی] فرمود» مصرع لاریگه کوره سنه ۱۱۱۱ هجری ده وفات ایتیمیش لار، اما تاریخ تولدلاری بیزنی نظریمیزدین اوتمادی.



بعضی اهل خبره لارنی و قندوز موی سفیدلارینی خبرلاریگه کوره بول ذاتنی قبرلاری قندوزده اولوب و زیارتگاه خاص و عام ایکانلیگی مشهوردور.

اما استادلاری علوم دینییه ده خواجه مومن اعلم و محمدغزالی دورلار. شرح حال لاری قولومیزگا توشگان یوق.

ناظم رحمه الله و اساتذه و پیرلاری همه حنفی المذهب ماتریدی العقیده و نقشبندی المسلك ایردیلار.

شارحنی ترجمه حالی: الشیخ تاج الدین یالچی قل الملمی آخذ العلم عن بعض علماء بلاده، ثم رحل الى طرف داغستان و استفاد فيها عن بعض علمائها ثم رجع الى وطنه و صار اماماً بقرية ملم التابعة لقصبة منزلة و له شرح ثبات العاجزين المسمى بالرسالة العزیزة و تفسیر القرآن الکریم من سورة الفتح الى آخره بالترکیة کلاهما مطبوعان، و شرحه المذكور مملوء بالحکایات الواهیة و الخرافات الداهیة و قيل ان له شرح القصيدة القافیة و تعلیم الصلوة و شروط الصلوة ایضاً و کان یحب السیاحة و یمشی فی اکثر الاوقات علی رجلیه و سمعت بعض الناس یقول انه کان یصاحب الشیخ عبدالرحیم الاونزایمانی فی اسفاره فی تلك البلاد و توفي فی قرية ایمانلی باشی التابعة لقصبة منزلة سنة ١٢٥٤ هج رحمه الله تعالى. انتهى [تلفیق الاخبار و تلقیح الآثار فی وقائع قزان و بلغار و ملوک التاتار، تالیف م، م رمزی، جلد ثانی، صفحه ٤٣٦]

ترجمه: شیخ تاج الدین یالچی قل ملمی اوغلی اوز شهری علمالاریدین اخذ علم ایتیب سونگره داغستان طرفیگه رحلت و بعضی علمالاریدین استفاده قیلیب سونگره وطنی گه قایتیب منزله قصبه سیگه تابع ملم قریه سیگه امام اولمیش، و انی ثبات العاجزین گه شرحی رساله عزیزه اسمیده و سورة فتح دین آخربگچه تفسیر قرآن ترکی تیلیده یازگان اثری بولوب هر ایکسی طبع اولگان دور، ذکر ایتیلگان شرحی سست حکایات لار و کته خرافات لار بیرله توله دور، شرح قصیده قافیة و تعلیم الصلوة و شروط الصلوة هم انگا نسبت بیریلگاندور، سیاحتنی یخشی کوروب اکثر اوقات ایاغی بیرله یورور ایردی، شیخ عبدالرحیم اونزایمانی نینگ او شهرلارده سفیده مصاحبت ایتکانی بعض آدم لار دین مسموع دور، منزله قصبه سیگه تابع ایمانلی باشی قریه سیده سنه ١٢٥٤ هجری ده وفات ایتیمیش دور. انتهى



بو عاجزنى قيسقچه شرح حالى: حبيب الله بن سيد يحيى خان فرغانه‌نى نمنگان شهريدين بولوب ييتى ياشيمده مكتبگه باريب ملارستم داملا حضورلاريده خط و حساب و سواد كتاب لاريني اوقوب توقوز ياشيمده قارى عبدالغفور داملا قاريخانه‌لاريگه شامل اولوب و اون ايگى ياشيمده قرآن كريمنى حفظ ايتيب سونگره بعضى علوم متداوله‌لارنى مذکور قارى داملا و جناب سيد ثابت خان توره و سيد افضل خان توره و برادریم سيد طه خان آلدیلاريده اوقوب، بالشويکلار استیلاسيدين عرصه حیات مسلمانلارگه تنگ اولوب اون ييتى ياشيمده برادریم سيد طه خان بيرلان اوش شهریکه باريب بير ييل استقامت دين سونگره تاجکستان گه کيليب کوکناش ديگان موضعه بير ييل توروب بعضى اهل خيرلارنى مددى بيرلان افغانستان سرحدى ده واقع سراى کمرگه کيليب اوچ ييل زراعت ايشيغه مصروف اولوب کوب زحمت و مشقت لاردين سونگره بالاخره حمل برجى نى اوائلیده سنه ۱۳۱۳ شمسی ده افغانستان عزيزگه هجرت ايتيب راساً دارالسلطنه کابل گه کيليب اوتوز بيش سنه دين بيرى پادشاه غريب پرور عدالت گستر المتوکل على الله محمدظاهر شاه سایه هما پايه سيده عمر کيچورماقده ميز و تجارتگه مشغول بولساکده بعض اساتذه‌لار مثل جناب سيدمبشر خان طرازی و داده‌خان مخدوم داملا و مولوى محمد قاسم جرمى و باشقه ذاتلار حضورلاريده بعضى کتابلارنى اوقوب اکثر کتابلارنى مطالعه ايتيب حتى الامکان اولادلارنى تربيه سيگه کوشش ايتيب و قوملاريميزنى بعضى کمپيلیکلارنى بيلديريب تورماقده ميز .

سنه ۱۳۴۲ ده حجگه بارگانيمده او بيرده گى بعض اساتذه‌لاردين علوم دينيه اجازه و سندىنى آلماقغه الله موفق ايتدى .

موسى افندى نينگ طبع ايتگان ثبات العاجزىنى و انگا يازگان مقدمه سيگه بير نظر:

تتبع اثریده معلوم اولدى که تعصب مذهبی آستیده و بعضاً نسخه‌لارنى ناقص ليک سببى دين کتابنى نيچه جائيدن اوتوزدين زياده ابياتلار چيقاريلگان و بير قانچه ابياتلارنى بعضى مصرع و کلماتلاريگه تغيير و تحريف قولى کيرگانليگى معلوم اولور و هم صحيح نسخه‌لار قولده بولماگان ليگى اوچون کوب يرده سهو و غلط وقوعگه کيلگانی کورونادور. جناب افندى اعتذار عنوانی آستیده بو طبع ايتيلگان کتابده بعضى تحريف و تغيير وقوعگه اعتراف ضمنیده اول تغيير و تحريف بعضى مجبورييت و مشکلات سببى دين ظهورگا چيقميش ديب اعتذار ايتيب دور، ليکن افندىنى بو اعتذارى فضلا و ادبا و روشنفکرلاريميز آلدیلاريده مقبول اولماسه کيراک، چونکه طبع کتبه کمال امانت و نهايت دقت لازم دور. بيز اولارنى تاليفيگه تحريف و تغيير قولينى کيرگوزماق عين خیانت سنالسه کيراک، و هم مقدمه‌ده شارحگه تقليداً ناظم رحمه الله نى آته لارینی تیموربار ديب جزم ايتيب و الله قلى



ایکانینی ایکینچی درجده کیلتورگانی سهو دور. چونکه ناظم رحمه الله مرادالعارفین مقدمه سیده؛ و صدرالدین عینی ادبیات تاجکده آته لارینی «الله قلی» دیگان لاری سند قاطع دور، و هم مؤلف ولادت لارینی سنه ۱۱۳۳ هجری وفات لارینی سنه ۱۲۲۳ دیگانی عین خطادور، چونکه تاریخ ولادت لاری معلوم ایماس و وفات لاری عینی یازیشیگه کوره سنه ۱۱۳۶ دور؛ و هم ناظم نی چهره لارینی اوزون بوی لیک قوی کوزلیک جیرن سقال لیک دیماغی؛ و هم بیت الله یولیده ارض روم و بلغارستان دین اوتوب اسکندریه گه باریب او بیرده وفات ایتیب و انده دفن اولیش لار دیگانی بی سند و بی اساس اولوب رجماً بالغیب کورونور. چونکه عینی نی یازگانیکه و حصار اهلی نی شهادت لاریگه کوره ناظم رحمه الله قبرلاری و خشوار ایالتی ده قبادیان علاقه سیده واقع ایکانلیگی معروف و مشهور دور.

محترم اوقوچی لار دین رجا: بو شرحیمیزده واقع اولان سهو و خطالارنی اغماض کوزی بیرله قاراب و صفح ایتاگی بیرله یاپیب و دعای خیر بیرله یادلاش لاریدین امیدیمیز باردور.

رَبَّنَا لَا تُؤَاخِذْنَا إِنْ نَسِينَا أَوْ أَخْطَأْنَا. وَصَلَّى اللَّهُ عَلَى سَيِّدِنَا مُحَمَّدٍ وَآلِهِ وَصَحْبِهِ أَجْمَعِينَ.



حمد

ثَنَا لِلْخَالِقِ غَبْرًا وَأَفْلَاكِ يِرَاتْدِي قَطْرَةً دِينِ گُوهرِ پاک

شرح: جمله ثنا و همه ستایش خاص اول ذات واجب الوجود که اولسون که بییر و کوکلارنی اوز قدرت کامله سی بییرلان یراتیب و بییر قطره آب منی دین بنی آدمنی که «گوهر پاک» ایرور، یراتدی و وجود که کیلتوردی.

سماوات اویینی توتدی معلق جهانہ حکمینی کورساتدی مطلق

شرح: آسمان اویلارینی هواده بیستون معلق توختاتیب جهان اهلغہ حکمی و قدرت مطلقه سی و عظمتینی کورساتدی. اللَّهُ الَّذِي رَفَعَ السَّمَاوَاتِ بِغَيْرِ عَمَدٍ تَرَوْنَهَا [الرعد: ۲] آیتی دلیل دور.

قیلیب غبرا مدارین ذمه حوت بنی آدم گه اندین قسم ایتار قوت

شرح: بیرنی مدار و توروشینی بلیغ اوستیده قیلیب بنی آدمگه اندهگی نباتات و ثمرات و حیوانات دین رزق و روزی نصیب ایتار. روح المعانی صاحبی سورة (ن) تفسیریده دیرکه، بعضی لاردین روایت دورکه (ن) بیرنی انی اوستیگه قوبولگان بیر بلیغ که انی آتی یَهْمُوت دور. بو خصوصده ضیاء مقدسی مختاردهده و حاکم و باشقه لار بییر حدیث ابن عباس رضی الله عنهما دین روایت ایتیپ دورلار که الله تعالی (ن) یراتدی، سونگره بیرنی انی اوستیغه یاییدی و قویدی. پس بلیغ قمیرلاب اضطراب ایتدی، پس بییر هم قمیرلادی و حرکتگه کیلیدی، پس تاغلار بییرلان محکم و استوار ایتیلیدی، سونگره ابن عباس رضی الله عنهما (ن والقلم) نی اوقودیلار و بو تفسیر مجاهد رحمه الله دین هم روایت دور، سونگره صاحب بحر دین نقل ایتیپ دیر



که، شاید «ن» لفظینی حروف هجادیں بیر حرف آتی ایکانیدین باشقه تمام احتمالات لار صحتگه بیتمگان دور، و بو سوزنی علامه الوسی هم تایید ایتیپ دور. اهل کشف لار دین سیدی عبدالعزیز دباغ حضرتلار دین ابریزده بیرنی شمال اوستیده معلق ایکانینی نقل ایتیپ دور. بو سوز بو کونگی اکتشافات اثریده معلوم بولگن بیرنی معلق لیگیغه موافق دور، و اللهنی کمال قدرتیغه دلالت قیلور.

پدید ایتدی جهان ایچره فواصل قیلور هر فصل تورلوک نشأ حاصل

شرح: یعنی الله بیر یوزیده دریالار، تاغلار و کوللار واسطه سی بیرله فاصله لار و جدالیکلارنی وجودگه کیلتوروب، اقلیم لار، قاره لار، جزائرلار و خصوصیات جداگانه گه ایگه اولکه لارنی یراتدی و هر اقلیم و قاره نی انسان و حیوان و اثمار و نباتات لارینی اوز اقلیمیگه موافق خلق ایتیپ تورلوک نشأ و حیات و تجدد حصولیغه سبب قیلدی. فواصل فاصله نی جمعی دور (اگرچه لغت مساعدت ایتماسه ده) فواصل دین فصول اربعه: یاز، کوز، قیش، بهارنی اراده ایتیلسه الله اوز قدرت کامله سی بیرلان معتدل اولکه لارده فصول اربعه نی ظهورگه چیقاریب و هر فصلنی تورلوک حیات و تجدد و رقم-رقم نشأ حصولیغه سبب قیلیب قدرت کامله سینی کورساتدی دیب توجیه ایتسه بولور.

عجب صنع و عجب احکام و تقدیر قیلور بیر قرص دین عالم کوزین سیر

شرح: مصنوعات و مخلوقات الهیه نی تعجب آور احکام و اتقانی و اندازه و مقدار معین ده هر بیرلاری اوز وظائف لاریده بولماقلاری تفکر ایتکان کیشی نی کمال قدرت الهی گه تسلیم ایتماق گه ناچار قیلور، چنانچه بیر قرص نان کبی کوزگا کورونگان قویاش ضیاسی سببی-له عالمده گی تمام مخلوقات گه رزق بیریب عالم اهلی کوزلارینی توق قیلیب کسب و کار و امور حیاتیه ادامه سیگه قادر قیلور.

اراده قیلسه اول حیّ توانا قیلور بیر لحظه ده بیلمسنی دانا

صفی تفراغین ایتگاج جان ایله جسم نچوک کیم ایلادی دانای هر اسم

شرح: خدای حی قادر و توانا خواه لاسه بیر لحظه ده بیلمس (جاهل) کیشینی بیلادیگان (عالم) قیلور و علم لَدُنْی عطا ایتور، چنانچه حضرت آدم صفی الله تفرغلاری لایینی قدرت کامله سی بیرله صورت معینه لاریده مصور قیلیب جان بیریب تیرکوزگان دین سونگره اول ذاتگه تمام آسمانی بیلدیریب علم لَدُنْی بیرله مشرف ایلادی، وَعَلَّمَ آدَمَ الْأَسْمَاءَ كُلَّهَا [البقرة: ۳۱] تفسیری مطالعه ایتیلسون.



خلاص ایتسه بیراونی رب الافلاک قالور تاغ آستیده اندین چیقار پاک

شرح: آسمانلارنی پروردگاری (الله) بیراونی کلفت و مشقت دین قوتقاریشنی اراده ایتکان بولسه اول کیشی تاغ آستیده قالسه ده، اندین ساغ و سلامت چیقار، چنانچه صحیح البخاری ده روایت ایتیلگان اصحاب غار قصه لاری مونگا دلالت قیلور، و یا محنت و غم تاغی مراد دور، چنانچه حضرت نوح قوملاری تبلیغیده کوب مشقت چکیب آخر الله خلاص ایتدی، اصحاب غار قصه لاری شول دور:

«اوچ کیشی سفرده رفیق اولوب بیر جایده یمغورده قالیب بیر غارگه پناه آلگان لاریده تاغ دین بیر تاش توشوب غار آغزینی توسگانده بیر-بیرلاری گه دیدیلارکه خدا اوچون یخشی قیلگان عمل لارینگنی وسیله قیلینگلار شاید الله کشایش بیرسه.

الاردین بیرلاری ایدی: خدایا منی آته و آنم و یاش باله لاریم بار ایردی، مال و مواشی لاریمنی اوتلاتیب کیلیب آته آنم گه الار سوتیدین ساغیب ایچیریب سونگره باله لاریمگه بیرور ایردیم، بیر کون کیچ کیلیم، الار اوخلاگان ایکانلار، سوتنی ساغیب الارنی باشلاریده کوتاریب اویغاتمای تانگ آتوردوم، و باله لاریم آچلیک دین ایاغ آستیده اینگراشیب تورار ایردیلار، اگر شول ایشنی رضانگنی ایستاب قیلگان بولسام آزگینه تیشوک آچغیل آسماننی کورایلوک، دیگانه؛ تاش قمرلاب بیر آز آچیلدی.

ایکینچی سی دیدی: خدایا عمکیمنی قیزینی یخشی کورار ایردیم، اندین کام دل سوراسام یوز طلا آلیب کیلسانگ بولور دیدی، یوز طلانی کوشش قیلیب تاپیب انگا بیتیب ایاغی اراسیغه اولتورگانه خدادین قورق بی نکاح یقین بولمه دیگانه اوستیدین توردوم، شو ایشنی سنی رضانگ اوچون قیلگان بولسام کشایش بیر دیگانه تاش سیلجیب بیر آز آچیلدی، لیکن آدم سیغماس ایردی.

اوچونچی سی ایدی: خدایا بیر مردکارنی بیر اندازه شالی گا اجاره قیلیب او کیشی ایشنی توگاتیب حقیمنی بیر دیگانه بیرسام آلمسیدین کیتدی، من شالینی ایکیب پولیدین مال و چوپان آلدیم، بیر قنچه دین سونگره اول کیشی کیلیب خدادین قورق منی حقیمنی بیر دیگانه اول مال و چوپان سنی کی دور آلیب کیت دیگانیمده منی مسخره قیلمه دیدی، من مسخره قیلمای من اوشل مال و راعی سنی کی دور. اول کیشی آلیب کیتدی، اگر



بول ایشنی سنی رضانگ اوچون قیلگان بولسم قالگان تاشنی آچغیل دیدی، تاش بالکل آچیلیب خلاص بولوشدی.^۱» [بخاری - باب الخوف من الله عز و جل]

نچوک کیم توتدی طوفان دشت و تاغی ولیکن بولمادی هول نوح ایاغی

شرح: قنداغ کیم طوفان سویی دشت و صحرا و تاغ و توز همه نی توتتی، لیکن حضرت نوح علیه السلام و من تبع لارینی حتی ایاغ لاری هول بولمادی و کیمه گه توشوب سلامت قالدیلار، قصه لاری مشهور دور. [هول] لفظی ترکی [تر - فارسی] معنا سیده دور، شارح چق سویی دیگانی سهو دور.

خلیل الله اوچون یاندوردیلار نار قدم قویمای اوشل اوت بولدی گلزار

شرح: نمرود علیه اللعنة نی امری بیرلان نیچه کون همه رعیتی اوتون بیغیب کته اوت یاندوردیلار و حضرت ابراهیم علیه السلام نی منجیق بیرلان اوتگه آتدیلار، امر الهی بیرلان اول کیشی اوتگه قدم قویمای و ایاغ باسمای توروب اول اوت گلزار اولدی، قصه لاری مشهور دور.

غضب ییل عادی لارنی قیلدی نابود ایدی اول ییل نسیم تابع هود

شرح: قتیق شمال که غضب الهی دین بیر نمونه ایدی، قوم عادنی اوشنچه قوت و جسامتی بیرله هلاک و نابود ایتتی، اما قدرت الهی نی کورونگ که اول شمال هود علیه السلام پیرو لاریگه [مسلمان لارگه] باد نسیم دیک یاقیم لیک و بی ضرر ایردی [ییل] لفظی ترکی [شمال - فارسی] معنا سیده دور، قصه لاری مشهور دور.

^۱ حدثنا يعقوب بن إبراهيم ، حدثنا أبو عاصم ، أخبرنا ابن جريح قال : أخبرني موسى بن عقبة عن نافع ، عن ابن عمر ، رضي الله عنهما ، عن النبي صلى الله عليه وسلم قال : خرج ثلاثة يمشون فأصابهم المطر فدخلوا في غار في جبل فانحطت عليهم صخرة قال فقال بعضهم لبعض ادعوا الله بأفضل عمل عملتموه فقال أحدهم اللهم إني كان لي أبوان شيخان كبيران فكنت أخرج فأرعى ثم أجيء فأحلب فأجيء بالحلاب فأتني به أبوي فيشربان ثم أسقي الصبية وأهلي وامرأتي فاحتبست ليلة فجئت فإذا هما نائمان قال : فكرهت أن أوقظهما والصبية يتضاغون عند رجلي فلم يزل ذلك دأبي ودأبهما حتى طلع الفجر اللهم إن كنت تعلم أنني فعلت ذلك ابتغاء وجهك فافرج عنا فرجة نرى منها السماء قال ففرج عنهم وقال الآخر اللهم إن كنت تعلم أنني كنت أحب امرأة من بنات عمي كأشد ما يحب الرجل النساء فقالت لا تنال ذلك منها حتى تعطيهما مئة دينار فسعيت فيها حتى جمعتهما فلما قعدت بين رجليهما قالت اتق الله ، ولا تفض الخاتم إلا بحقه فقمت وتركتهما فإن كنت تعلم أنني فعلت ذلك ابتغاء وجهك فافرج عنا فرجة قال ففرج عنهم الثلثين وقال الآخر اللهم إن كنت تعلم أنني استأجرت أجيرا ففرق من ذرة فأعطيته وأبى ذاك أن يأخذ فعمدته إلى ذلك الفرق فزرعته حتى اشترت منه بقرا وراعيتها ثم جاء فقال يا عبد الله أعطني حقي فقلت انطلق إلى تلك البقر وراعيتها فإنها لك فقال أتستهزئ بي قال فقلت ما أستهزئ بك ولكنها لك اللهم إن كنت تعلم أنني فعلت ذلك ابتغاء وجهك فافرج عنا فكشف عنهم. [حديث ٢٢١٥ : البخاری]



بلیغ قارنیده بیر صاحب کرامت چله اولتوردی و چیقدی سلامت

شرح: بیر صاحب کرامت [مکرم و معزز بیر کیشی] یعنی حضرت یونس علیه السلام دریاگه کیمه دین تاشلانیب بلیغ یوتوب انی قارنیده چله اولتوروب (قرق کیچه و کوندوز توروب) سلامت چیقدی لار، [چله] لفظی اؤلی نینگ کسريله لام نینگ تشدیديله دور. اصلی چهله اولوب درویش لار و ریاضت کش لار بیر گوشه ده قرق کیچه و کوندوز عبادت اوچون اولتوروش لارینی ایتی لور. ناظم رحمه الله ضرورت اوچون [لام] نی مخفف ایتیپ دورلار.

اگر امر ایتسه کیمنی فارق الفرق کیلور بیر لحظه ده غرب اوستیدین شرق

نچوک کیم دوستینی سلطان کونین ییتوردی ساعتیده قاب قوسین

شرح: اگر تانگ آتدورگوچی (کیچه قارانغولیگیدین صبح یاروغینی ایرغوچی) ذات هر کیمنی امر ایتسه کوز قیه سی بیرله قراگونچه وقتده کون باتیشدین کون چیقیشگه کیلور، چنانچه پادشاه دارین الله جل شأنه حبیبی محمد مصطفی صلی الله علیه وسلم نی اندک مدته قاب قوسین یعنی نهایت قرب منزلتیگه یتکوردی [قاب] مقدار [قوس] کمان [یای] معناسیده اولوب نهایت قرب دین کنایه دور. شارح (سلطان کونین) دین رسول الله نی مراد آلمیش، بو توجیه سهو دور، زیراکه (دوستینی) مفعول مقدم (سلطان کونین) معناً فاعل (ییتوردی) فعل دور. بیت باشقه ترکیبنی کوتارمس (دوستینی) دین مراد رسول الله صلی الله علیه وسلم دور.

اگر هر کیمگه بیرسه عزّ و امداد کیلور خدمتگا جنّ و آدمی زاد

سلیمان کیم ایگوردی انس و جن دین ایننگ فرمانی ایردی بیر نگین دین

غرض قدرت نمالغ ایلادی فاش وگرنه قدری ایردی بیر درم تاش

شرح: اگر هر کیمگه الله تعالی عزت و یاری بیرسه ایننگ خدمتیگه آجه و دیو و آدمی زاد لار کیلورلار، چنانچه حضرت سلیمان علیه السلام آلدیغه انس و جن و دیو و پری و پرنده و درنده لارنی توپلادی و بیغدی، اول کیشی نینگ فرمانی و حکمینی مذکور نمرسه لار اوستیغه یوروشی و الارنی اطاعتی الله تقدیری و بیر اوزوک کوزی سببی دین ایردی که (انگا اسم اعظم یازیلگان ایردی [نگین] اوزوک کوزینی ایتیلور) و بو ذاتگه همه نی بیر نگین سببی بیرله مسخر و مطیع و فرمان بردار ایتماغدین غرض الله جلّت عظمته اوز قدرت و عظمتینی همه گه آچوق کورساتیشی ایردی، بولماسه اول نگین بیر تنگه مقدارچه و وزیچه تاش ایردی [درم] درهم مخففی تنگه معناسیده دور.



کلیم ایلگیداگی قوتلوغ عصائی گهی کوپروک ایدی گه اژدهائی

غرض قدرت نمالیغ ایردی ای دوست وگرنه ایردی بیر قد چوپ بی پوست

شرح: حضرت موسی کلیم الله قول لاریده گی مبارک عصا و تیاغ لاری بعضی وقت سودین اوتوشده کوپروک بولور ایردی و گاه اژدها [کنه ییلان] صورتیده دشمن مقابلیده عرض اندام قیلور ایردی بولاردین مقصود و غرض الله نی قدرت و عظمتینی بنده لاریغه کورساتیشی ایردی، ورنه اول عصا آدم بویچه بی پوست یغاچ ایردی، قصه لاری مشهور دور.

اگر امر ایلاسه کونین بر پای بولور بیر پسته نی پوچاغینه جای

دیدیلار حضرت روح الامین نی قنات یازسه توتار روی زمین نی

انینگ دیک جبرئیل سدره پرواز محمد ینگیده ایتور ایدی راز

شرح: الله تعالی قدرتی شو قدر اولوغ دور که اگر بیورسه و امر ایلاسه ایکی دنیا توروشیچه ایچیده گی تمام موجودات بیرلان بیر پسته نی پوچاغی کبی کیچیک نمرسه نی ایچیگا جای بولور، چنانچه حضرت روح الامین نی اولوغ لیک لاریده روایت ایتیپ دورلار که قنات لارینی یازسه لار بیر یوزینی توتار و بیرکیتار، شونداغ اولوغ سدره المنتهی که بیر لحظه ده اوچوب بارادیگان جبرئیل حضرت محمد علیه السلام ینگ لارینی ایچیده راز وحی ایتور ایردی، ینگ نی کیچیک لیغی همه که معلوم دور. [ینگیده] لفظی شاید وحی نی سِرّی بولماقیدین کنایه دور.

تنبيه: وحی اقسامینی محقق لار سکیز خیل دیب دورلار، اما بولار اراسیده ینگ و یا قوینی لاریکه کیریب وحی یتکورولگانی مذکور ایماس دور، شاید قول ضعیف دور. [ینگ] یانینگ کسری-له کُم و آستین معنی سیده دور. [کونین] کوننی تشنیه سی دور، دنیا و آخرت معنی سیده دور. چنانچه فرهنگ عمیده کونین دنیا و آخرت دیب دور.

اگر قیلسه بیراونی حق لیغین فاش شهادت بیرگوسی گهواره ده یاش

شرح: اگر حق تعالی بیراونی حق انی جانبی ده ایکان لیگی نی ظهورینی خواه لاسه انی حق لیغیغه بیشیک ده گی یاش باله گواه لیک بیرور، چنانچه حضرت یوسف و حضرت مریم علیهما السلام برائت لاری اوچون یاش باله شاهد لیک بیرگانی تفسیر سورة یوسف و تفسیر سورة مریم مطالعه ایتیلسه بیلینور.



عزیز ایتسه قیو قلنی اوشل شاه اگر چاه آستیغه توشسه تاپار جاه

شرح: (شاهنشاه) الله جل شأنه قیسی قلنی عزیز و مکرم ایتسه هیچ کیم انی خوار ایتیپ بیلمس، اگر قدوق آستیغه توشسه ده جاه و منزلت تاپار، چنانچه حضرت یوسف علیه السلامنی برادرلاری قدوقغه تاشلاشدی، لیکن الله قدوقدین چیقاریب عزیز مصر ایلادی. قصه لاری مشهور دور.

سلیمان خدمتیده قیلدی پرواز حسابین بیلماگان شاهین و شهباز

ولی بیر مشت پر هدهد ایدی پیک دیدی سلطانیه آری و لبیک

شرح: حضرت سلیمان علیه السلام خدمت لاریده بی حساب لاجین، قرچیغای و بورگوت و باشقه قوشلار پرواز ایتیپ اوچوب سایه سالیب تورار ایردی، لیکن ایلچی لیک تاجی بیر مشت پر پویشک قوشی باشیغه قویولدی اول زیرک قوش سلطانی سلیمان علیه السلام جواب لاریگه آری و لبیک [قبول ایتهمن امرینگه اطاعت قیلمن] دیدی.

بو ایکی بیت دین شو بیلینور که عنایت الهی جتهنی کته لیگی و کوچ نینگ کوب لیگیگه باقمایدور، شول سببلی بو قدر قوت لیک اولوغ قوشلار اراسیدین بیر عاجز هدهد قوشی بو تاج افتخار ایلله مشرف بولدی، شارح نینگ سیمرغ قصه سی بی اساس دور. [پیک] ایلچی معنی سیده دور.

مدد قیلسه خدای عالم آرای حبیب ایتسه اشارت ایریلور آی

شرح: عالمنی زیب و زینت بیریب یساگان خدای یاری قیلسه و حبیبی محمد علیه الصلوة والسلام اشارت ایتسه آی ایکی گه بولونوب ایریلور. ناظم رحمه الله بو بیتده انشقاق القمر معجزه سیگه اشارت ایتیپ دورلار. آینی بولونیشی، اَفْتَرَبَتِ السَّاعَةُ وَانْشَقَّ الْقَمَرُ [۱: القمر] آیتی بیرله ثابت دور و هم امام بخاری و مسلم حدیث لاری انس رضی الله عنه دین «هر آئینه اهل مکه رسول الله دین معجزه کورساتماق ایستادیلار، پس الارگه آینی ایکی بولک قیلیب کورساتتی لار، تاکه حرا تاغینی انی اورتاسیده کوردیلار».

۱ عَنْ أَنَسٍ أَنَّ أَهْلَ مَكَّةَ سَأَلُوا رَسُولَ اللَّهِ صَلَّى اللَّهُ عَلَيْهِ وَسَلَّمَ أَنْ يُرِيَهُمْ آيَةً فَأَرَاهُمُ انْشِقَاقَ الْقَمَرِ مَرَّتَيْنِ. [حدیث ۸۶۷ : بخاری]، [۷۲۵۴ : مسلم].



انشقاق القمر خصوصیده کوب حدیثلار وارد بولگاندور، صحیح شولکه حدیث انشقاق متواتر دور، چنانچه علامه ابن کثیر و علامه الوسی تفسیرلاریده تحقیق ایتکان دورلار، مکّه مکرمه ده هجرت دین بیش ییل ایلگاری وقوعه کیلگاندور و رسول اللهنی اولوغ معجزه لاری دین دور.

کلیمین چهره سین قیلمس اوچون زرد چیقاردی لحظه ده نیل آستیدین گرد

شرح: الله جلّ شأنه کلیمی موسی علیه السلام یوزلارینی قوملارینی آلدیده سریغ و منفعل و خجالت قیلمس لیگی اوچون بیر لحظه ده نیل دریاسی نی آستیدین قوروتوب گرد و چنگ چیقاردی و قابل عبور ایتتی، بنی اسرائیل سلامت اوتوب فرعونلار دریا ایچیده همه لاری غرق اولدیلار، چنانچه قصه لاری قرآن کریم ده کوب جای ده مذکور دور. (چهره زرد) لیک احتیاج و خجالت دین کنایه دور.

تنبیه: بو دریانی قیسی دریا ایکان لیگی ده اختلاف باردور، بعضی لار نیل دریاسی و بعضی لار بحر قلزم دیب دورلار.

کیشی نینگ روزی سین گر قیلسمه کم بیتار هر ییـرده محنت قیلسمه هم

ییباردی مریمه روزی ملـک دین مسیحـه مائده توشدی فلک دین

شرح: الله تعالی کیشی نی رزق و روزی سینی ازله کم قیلماگان بولسه مقرر روزی هر ییـرده محنت و مشقت تارتمسه هم انگا بیتار، چنانچه حضرت بی بی مریم گه فرشته واسطه سی بیرله رزق ییباردی. کُلَّمَا دَخَلَ عَلَيْهَا زَكَرِيَّا الْمِحْرَابَ وَجَدَ عِنْدَهَا رِزْقًا [آل عمران: ۳۷] آیه سی بو سوزگه دلیل دور.

ترجمه: هر وقت که زکریا علیه السلام مریم حجره سیگه کیرسه لار آلدیده ییـدیگان نمرسه تاپار ایردیلار «یاز میوه سی نی قیشده و قیش میوه سی نی یازده» زکریا علیه السلام سنگه بو نمرسه قایردن بولدی و کیم بیردی دیگان لاریده، بو الله طرفیدین دور البته الله خواه لاگان کیشی سیگه بی حساب رزق بیرور دیب جواب بیرور ایردی، و هم حضرت مسیح عیسی علیه السلام گه توزالگان سفره آسمان دین توشدی، چنانچه قصه لاری اواخر سوره مائده ده مفصل کیلگاندور، خلاصه کلام شولکه حضرت عیسی علیه السلام نی اتباع لاری الله بیزگه آسمان دین توزالگان [مائده] خوان توشورماقگه یراسه بیز اندین ییب دللاریمیز آرام آلسه و سنی راست ایتگانینگنی هم بیلیم انگا گواه بولساک دیگان لاریده اول جناب دعا لاری اثریدین آسمان دین مائده توشوب الار کوزلاری بیرله کوروب ییب باز هم خیانت ایتیب ذخیره قیلیب میمون و تونغوز صورتیده مسخ بولدیلار. توشگان نمرسه نان و گوشت و بعضی روایتده بلیغ



و کوک اوت و سرکه و توز و نان و زیتون و خرما و یاغ و پنیر و گوشت قاق دییلگان دور، بولار اللهنی قدرت کامله سیغه دلالت قیلور.

نچوک کیم حضرت صالح اوچون فاش باله لیغ تیوه توغدی حکمیدین تاش

شرح: الله جلّت عظمته قدرت کامله سی دین حضرت صالح علیه السلامنی قوم لاری سورا شیگه بناء اول ذاتگه معجزه طریقیده امرلاری بیرلان تاش یاریلیب ایچیدین حامله (ایکّی قات) بیر تیوه چیقوب فوراً توغدی، شونداغ اولوغ معجزه نی کوروب توروب بیر آز کیشی دین باشقه لاری ایمان کیلتورمادی و آخر الامر هلاک بولدی، قصه لاری تفسیرلارده مذکور دور.

ازلده هر کیشینی ایلاسه سعد خلیل اوغلی دیک ایتسه صادق الوعد

اگر ذبح ایتسه لار قیتارمغای قاش کورونمس باش انی آلدیده بیر ماش

شرح: الله جلّ شانه ازلده هر کیمنی نیک بخت ایلاگان بولسه و ابراهیم خلیل الله اوغول لاری اسمعیل علیهما السلام دیک وعده سینی راست ایتگان بولسه، اگر اول کیشی نی (ذبحینی) سویوشینی ایستاسه لارده قاش قایتارمغای و خلاف وعده ایتماگای، عزیز باشی انی آلدیده بیر ماش چه کورونماغای. شارح ماش توجیهیده سهو ایتکاندور. حضرت اسماعیل علیه السلامنی قصه لاری قرآن کریم ده مذکور دور: **وَاذْكُرْ فِي الْكِتَابِ إِسْمَاعِيلَ إِنَّهُ كَانَ صَادِقَ الْوَعْدِ وَكَانَ رَسُولًا نَبِيًّا [٤: مريم] و آية: فَلَمَّا بَلَغَ مَعَهُ السَّعْيَ قَالَ يَا بُنَيَّ إِنِّي أَرَى فِي الْمَنَامِ أَنِّي أَذْبَحُكَ فَانْظُرْ مَاذَا تَرَى قَالَ يَا أَبَتِ افْعَلْ مَا تُؤْمَرُ سَتَجِدُنِي إِن شَاءَ اللَّهُ مِنَ الصَّابِرِينَ [١٠٢: الصافات]** بو سوزلارگه دلیل دور.

کیمه بیرسه جهالت خمیریدین جام بهشت آلدیغه کیلسه باسماغای کام

یتار رحمت سوئی کوک گوکبینه یتوشمس قطره گمره لبینه

کورونگ بو طالب ایله بو لهبنی اولوغ دریا لبیده خشک لبنی

شرح: خداوند متعال کیمسه گه جهالت و نادانلیک شراییدین بیر پیاله بیرگان بولسه جنت اوز ایاغی بیرله آلدیغه کیلسه و انگا کیریشگه بیر قدم یول قالسه قدم باسماغای و انگا کیرمغای، رحمت سوئی شونچه بلندلیگی بیرله آسمان یولدوزلاری و یا خود (اگر بالفرض انده گیاه بولسه) گیاه لاریغه یتار، اما ضلالتنی کوروب بیلیب اختیار



ایتگان کیشی لبیغه بیر تامچی هم یتوشمس، چنانچه رسول الله عمکی لاری بولمیش ابوطالب و ابولهبنی کورونگ که ایشیکی آستیدین اوتگان اولوغ دریا لبیده لب لاری قوروق قالدی و بحر موج نبوت دین بی بهره قالیب ایمان کیلتورمادی لار. کوکب: یولدوز و گیاه معنی سیده دور.

اگرچه اوت بیلہ سوده بولور فرق چیقاردی سو مکانیدین نچوک برق

اگر چندی که شمع اوتدین بولور جمع قرا سودین قیلور کوز نوری دیک شمع

قایو بیر قدرتین قیلماق کیراک یاد ایرور قاصر عقول آدمی—زاد

شرح: اگرچه اوت بیلہ سو اراسیده [ایکی سینی بیر-بیریغه ضدلیگی جهتیدین] بویوک فرق باردور، لیکن الله قدرت کامله سینی کورماق کیراک که، قنداق سو اورنیدین [بولوتدین] برق و چقماق اوتینی چیقاریب ضدانی جمع قیلدی و شونگه اوخشش گرچه شمع یاروغلیگی و نوری و باشقه چراغلارنی روشن لیگی عادةً (قوة ناریه) اوت ایله جمع بولوشی بیرله بولسه ده الله قدرتیگه باقینگ که ظلمت بیریدین یاروغلیک و نورانی لیکنی ظهورغه کیلتورور، چنانچه کوز نینیگی [مردمک] ده موجود قرا سودین کوزگه نور بیرور و انی شمع کبی یاریتور، ناظم رحمه الله «مسلك المتقين» ده شول بیتنی معنی سینی بو خیلده ادا ایتیپ دورلار:

«شمع را گرچه کرد ز آتش جمع که بسازد ز قطره آبی شمع»

الله تعالی نی قیسی بیر قدرتی نی یاد قیلماق کیراک، قدرتی دلائل لاری ایتگان بیرله توگامس و انساننی عقلی کنه قدرت خداوندی که بیتیش دین قیسقه دور.

نعت رسول الله

درود بی عدد هادی دین غه رسول رحمة للعالمین غه

خدانینگ دوستی مختار القریشی مدام امت اوچون تلخ ایردی عیشی

شرح: سان سیز و سناق سیز درود و صلوات اول رهبر دین مبین اسلام محمد علیه السلام که رسول خدا و عالم اهلیغه رحمت ایردی لار، وَمَا أَرْسَلْنَاكَ إِلَّا رَحْمَةً لِّلْعَالَمِينَ [الانبیاء: ۱۰۷] آیتی دلیل دور؛ و اول ذات خدانینگ



دوستی و حبیبی و قریش قبیلہ سینی برگزیدہ و تنلانگانی ایردیلاز ہمیشہ امتلاری اوچون (عیش و حیات) تیریکیکیلاز اچیغ [تلخ] ایردی.

امام مسلم و ترمذی واثلة بن الاسقع رضی اللہ عنہ دین روایت ایتیپ دورلار، رسول اللہ صلی اللہ علیہ وسلم ایتدیلاز: اللہ تعالیٰ ابراهیم علیہ السلام اولادلاریدین اسماعیل علیہ السلام نی برگزیدہ ایتدی، اسمعیل اولادیدین بنی کنانہ نی تنلادی، بنی کنانہ دین قریش نی اصطفی ایتدی، قریش دین بنی هاشم نی مختار ایتدی و بنی هاشم دین منی برگزیدہ قیلدی^۱.

ینه بیر حدیث صحیح ده «من سید و سردار اولاد آدم من»^۲ دیگانلاری وارد دور.

ایمس موجود انینگ دیک گوهر پاک دلیل اول دور که کییدی تاج لولاک

شرح: اول ذات دیک گوهر پاک اولدین آخرچہ وجودگہ کیلمگاندور و کیلمس و هیچ بیر پیغمبرنی مرتبه سی بو کیشینی مقام و منزلت لاریگہ یقین لاگان ایمس، بو سوزنی دلیلی شول که اول ذات تاج «لولاک لما خلقت الافلاک» نی کییدیلاز و بو صفت بیرله متصف بولدیلاز: اگر سنی وجودینگ بولمسه ایردی، هر آئینه آسمان لارنی یراتمیس ایردیم.

لیکن بو حدیثنی ملاعلی قاری «تذکرۃ الموضوعات» ده حدیث موضوع دیب دور؛ اما ملا علی قاری و عبدالباقی زرقانی «شرح مواهب» ده شول معنی ده بعضی اثرلارنی ورودینی ذکر ایتیپ دورلار. دیلمی حضرت ابن عباس رضی اللہ عنہ دین مرفوعاً روایت ایتیپ دور: رسول اللہ دیدیلار، «جبرئیل حضوریمغه کیلدی، پس ایدی، ای محمد سن بولماسنگ جنت یراتیلمس ایردی و سن بولماسنگ دوزخ هم یراتیلمس ایردی. حاکم مستدرک ده روایت ایتیپ حدیث صحیح دیب دور، لیکن امام ذهبی حدیث ده علت بار دیب دور، ابن عمر رضی اللہ عنہ دین مرفوعاً البتہ هر آئینه آدم علیہ السلام محمد علیہ السلام آتلازینی عرش گہ یازیلگان کوردی و بتحقیق اللہ جلّ شأنه آدم علیہ السلام گہ ایدی: «محمد بولمسه ایردی سنی خلق قیلمس ایردیم» و ابن عساکر روایتیده «سن بولمسنگ (رسول اللہ گہ خطاب) دنیانی یراتمیس ایردیم» کیلیب دور.

^۱ عَنْ أَبِي عَمَّارٍ شَدَّادٍ أَنَّهُ سَمِعَ وَائِلَةَ بِنَ الْأَسْقَعِ يَقُولُ سَمِعْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ يَقُولُ: إِنَّ اللَّهَ اصْطَفَى كِنَانَةَ مِنْ وَلَدِ إِسْمَاعِيلَ وَاصْطَفَى قُرَيْشًا مِنْ كِنَانَةَ وَاصْطَفَى مِنْ قُرَيْشٍ بَنِي هَاشِمٍ وَاصْطَفَانِي مِنْ بَنِي هَاشِمٍ. [۶۰۷۷ : مسلم]، [۳۶۰۵ : ترمذی].
^۲ قَالَ أَبُو هُرَيْرَةَ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: «أَنَا سَيِّدُ وَلَدِ آدَمَ يَوْمَ الْقِيَامَةِ وَأَوَّلُ مَنْ يَنْشَقُّ عَنْهُ الْقَبْرُ وَأَوَّلُ شَافِعٍ وَأَوَّلُ مُشَفِّعٍ». [۶۰۷۹ : مسلم]



انینگ پروانه سی روح الامین دور

اوشل شاهنشهی کیم شمع دین دور

شرح: رسول الله حضرت لاری پادشاه و اولوغ مرتبه لیک لارنی شاهنشاهی و دین مبین اسلام نینگ شمع و چراغ تابانی دورلار و اول شمع مبارکنی وحی الهی کیلتورماقده ۲۳ ییل پروانه [کفلک] دیک اطراف لاریده ایلانگوچی حضرت روح الامین جبرئیل علیه السلام دورلار.

دیدى معبود انینگ آتی محمد مقاماتیغه هرگز یتمادی حد

شرح: معبودیمیز الله اول ذات آت لارینی محمد دیب قرآن کریم ده یاد قیلدی: مُحَمَّدٌ رَّسُولُ اللَّهِ [۲۹: فتح] و بیر قنچه باشقه آیت لارده تعریف و توصیف لارینی بیان ایتدی، اول ذات همیشه مقامات عالیله لارگه ترقی و تعالی ده بولوب ترقیات لارینی حدودی یوق بلکه علی الدوام دور، و هیچ کیم اول جناب مقامات لاری حدودیگه یتوشمگاندور.

توشورمای بیر یوزیگه سایه سینی یتوردی عرش اوی گه پایه سینی

شرح: الله جلّ شانہ رسول اللهنی [کیچه نی بیر آزگینه مدتیده] سایه لارینی بیرگه توشورمای یعنی کوندوزی گه و سایه توشار وقتگه قالدورمای مرتبه و منزلت لارینی عرش اویگه بلکه اندین بلندراغ گه یتکوردی؛ و یا رسول الله وجودلاری کاملاً نور اولگان جهتیدین الله سایه لارینی بیرگه توشورمای پایه و منزلت لارینی عرش اویگه یتکوردی، پایه مرتبه معنی سیده دور. حکیم ترمذی ذکوان دین روایت ایتدیلار «رسول اللهنی آفتاب ده و آی دین کیچه ده سایه لاری یوق ایردی» ابن سبع آیدی: «رسول الله نورلار، آفتاب ده و آیدین ده یورسالار کولانکه لاری معلوم بولمس ایردی، بو سوزگه رسول الله دعا لاریده «اللَّهُمَّ اجْعَلْنِي نُورًا» دیگان لاری دلیل دور؛ و هم ابن المبارک و ابن الجوزی ابن عباس رضی الله عنه دین روایت ایتیب دورلار «رسول اللهنی کولانکه لاری یوق ایردی، هرگز آفتابده تورمادیلار مگر ضیاء لاری ضیاء آفتابگه غلبه قیلور ایردی و چراغ بیرلان تورمادی لاری مگر یاروق لاری چراغ یاروغیگه غلبه قیلور ایردی» بو حدیث لارنی عبدالباقی زرقانی «شرح المواهب» ده ذکر ایتگان دور.

قدم باسقان منازل ایردی پر عطر سحاب الابیض ایردی باشیغه چتر

شرح: رسول الله قدم باسیب اوتگان جای لار همه سی معطر و خوشبو ایردی و آق بولوت باشلا یغه بعضی اوقات سایه سالور ایردی. امام دارمی و بیهقی و ابو نعیم جابر بن عبدالله رضی الله عنهما دین روایت ایتدیلار: «رسول الله ده



کوب خصائل حمیده لار بار ایردی، هیچ یولدین اوتمس ایردی لار مگر سونگره اول یولدین اوتگان کیشی تیرلاری و رائحه لاری خوشبوئیدین اول ذاتنی شول یولدین یورگان لارینی بیلور ایردی و هیچ تاش آلدیدین اوتمس ایردی لار مگر سجده قیلور ایردی و رسول اللهنی بول و قان لارینی بعضی اصحاب لار ایچگان لاری روایت لارده کیلگان دور.

رسول اللهنی تیرلاری و حتی فضلات لاری خوشبوی لیگیده کوب حدیث لار مروی دور؛ امام قسطلانی «مواهب اللدنیة» ده ذکر ایتگان دور. رسول الله تیرلاریدین بعضی صحابی لار جمع لاب عطر اورنیغه استعمال ایتگان لاری و انی باشقه معمولی عطرلاریدین خوشبولیگینی زیاده لیگی کوب حدیث لارده مذکور دور. اما بولوتنی سایه سالگانی بیهقی و ابو نعیم روایت لاریده بحیری راهب رسول الله شامگه تجارت اوچون کیلگان و قتلاریده صومعه سیدین توروب بولوت خاص رسول اللهگه سایه سالیب کیلماغینی قافله ایچینده کورگانی و ابن عساکر و ابونعیم روایت لاریده خواهر رضاعی لاری شماء حلیمهنی قیزی چاشت وقتیده بولوت سایه سالیب [یورسه لار یوروب، توختاسالار توختاب] تورگانینی کورگانی مذکور دور. شیخ عبدالحق «مدارج النبوة» ده ایتگانلاریگه کوره بولوتنی سایه سالیشی بعضی اوقات ده وقوعه کیلمیش دور، دایمی ایمس دور.

جمال نعمتی مطلوب کونین کمالیده میسر قاب قوسین

شرح: رسول اللهنینگ نعمت جمالیه لاری دنیا و آخرت اهلینی مطلوبی دور، و مرتبه کمالیده اول ذاتگه قاب قوسین او ادنی [۹: النجم] (کمال قرب) میسر و حاصل دور.

شرافت موندین اوتمس سنت و فرض یوروسه تا خروج دابة الارض

شرح: شرف و رفعت موندین اوتمس و یوقاری بولمس که فرض و سنت (احکام دین اسلام) دابة الارض چیقغونچه [قیامت غچه] یوروسه و نافذ بولسه.

تنبيه: بعضی احادیثگه قراگنده دابة الارضنی چیقیشی قیامتدین ایلگاری دور، مکه قریده گی صفا تاغی یاریلیب بیر حیوانی چیقور که آدم لار بیرلان سوزلاشور و ابتور که حالا قیامت یقین دور، صادق ایمانلیک کیشی لارنی قیامتگه مخفی منکر کیشی لار دین جدا قیلور، بعضی روایتلار دین معلوم بولور که آخر وقتده آفتاب مغرب دین چیقغاندین سونگره بو واقعه ظهورگه کیلور. چون قیامت تمام نظام موجوده عالمی در هم و برهم بولوشینی آتیدور، لهذا شونداغ بیر خارق عادت بطریق مقدمه الجیش و نشانه نزدیک ظهورگه کیلماغی جای



تعجب ایمسدور. شاید دابة الارض ذریعه سی بیرله شول معجزه نی کورساتیش دین مقصود بو دورکه پیغمبرلار تولیدین قیامت و اندین سونگره بولادیگان ایشلارنی قبول قیلمس ایردینگلار بو کون اول نیمرسه نی بیر حیوان تولیدین مجبور قبول قیلورسیزلار لیکن بو قبول قیلیشنی هیچ فائده سی یوقدور تنها مکذبینی تحمیق و تجهیلی مقصوددور، زیراکه قبول وقتی اوتگان دور بعضی مفسرلار دابة الارض خصوصیده هر خیل هول و قوروق (بی اساس) سوزلارنی یازگاندورلار، اما روایات معتبره دین شو یوقاریده گی سوز بیلینور، آیه: **وَإِذَا وَقَعَ الْقَوْلُ عَلَيْهِمْ أَخْرَجْنَا لَهُمْ دَابَّةً مِّنَ الْأَرْضِ تُكَلِّمُهُمْ أَنَّ النَّاسَ كَانُوا بِآيَاتِنَا لَا يُوقِنُونَ** [۸۲: النمل] تفسیریده شیخ الهند ترجمه و تفسیرلاریدین ملخصاً آییندی. [ج ۲، صفحه ۱۱۲۸، چاپ کابل]

همه دین دین بولوبدور دینی بالا گواهی حضرت واجب تعالی

شرح: اسلام دینی باشقه همه ادیانلار دین یوقاری و بلند بولوبدور، چونکه هر خصوصده مکمل و هر آن و هر زمانگه مطابق، تمام اخلاق پسندیده گه حاوی بیر دین دور، بو سوز شاهی کلام حق تعالی دور، آیه: **الْيَوْمَ أَكْمَلْتُ لَكُمْ دِينَكُمْ وَأَتِمَمْتُ عَلَيْكُمْ نِعْمَتِي وَرَضِيتُ لَكُمُ الْإِسْلَامَ دِينًا** [۳: المائدة]، **إِنَّ الدِّينَ عِنْدَ اللَّهِ الْإِسْلَامُ** [۱۹: آل عمران]، **وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ** [۸۵: آل عمران]، **كُنْتُمْ خَيْرَ أُمَّةٍ أُخْرِجَتْ لِلنَّاسِ تَأْمُرُونَ بِالْمَعْرُوفِ وَتَنْهَوْنَ عَنِ الْمُنْكَرِ** [۱۱۰: آل عمران] بو سوزگه دلیل دور. چون آیت نصی بیرلان امت محمدی خیر امم لیگی ثابت بولدی، پس دینلاری خیر ادیان لیگی مقرر دور.

انینگ اوصافی نی یوق انتهاسی نغو یتمس دیسه وصفین خداسی

خدانینگ رحمتی بولسون دمامد انینگ اولادیغه اصحابیغه هم

شرح: رسول الله نی اوصافلارینی انتهاسی یوقدور، آیان بیرله هیچ توگامایدور و بیر ذاتی که انی تعریف و توصیفینی الله قرآن ده اوزی دیگان بولسه بنده لارنی وصفی هیچ جایگه یتمس. (نغو لطفی بو بیرده مدح و وصف معنی سیده دور). رحمت خداوندی هر لحظه و هر نفس اول ذات نینگ اولاد و اصحابلاریغه بولسون که حمله شریعت و انجم طریقت دورلار.



سبب تألیف کتاب

عقیدات فروع قرب محبوب	یازیلدی فارسی تیل بیرله مکتوب
دیدیلار گر دعا قیلسه ایران لار	انی کیم کوردیلار ترکی یاران لار
کونگول لار بولسه اندین آرمیده	بیتیلسه ترکی تیل بیرله عقیده
قلم تارتای خدا بولسون مددگار	تملق قیلدیلار چون بیر نیچه یار
منگا یوقدور مفصل قیلغالی حال	ولیکن ایلایین سوزلارنی اجمال
گرفتار ملامت دامی دور من	من بیچاره چونکه عامی دور من
تولای یار و برادرلار زبونی	ایرورمن بنده لارنی سر نگوئی
اشارت قیلدیلار چون بیر نیچه دوست	اگر چندی که بولسم مغزی یوق پوست
سواد ایتدیم نیچه منظومه ناچار	الارنینگ سوزلارین بوزمای من زار
انگا قویدوم «ثبات العاجزین» آت	عقیده سوزلارینی قیلدیم اثبات
نصایح دین هم اندک ایلادیم یاد	اوزوم دیک خسته لار بولغایمو دیب شاد
کوکارمس تاشغه یامغور یاغسه هم کوب	نصیحت تینگلامس دل سخت محبوب

شرح: فارسی تیل بیرله بیر کتاب «مسلك المتقين» یازیلیب ایریدی و انده علم عقائد و علم فقه فروع لاریدین (که قرب محبوب گه سبب دور) بحث ایتیلگان ایردی، وقتیکه انی ترکی تیل یارانلار کورگاج ایدیلار: «اگر ایرانلار و مرد خدالار دعا قیلسه لار و مدد ایتسه لار» عقائده ترکی تیل بیرله بیر کتاب یازیلسه و کونگوللار انی مضمونی دین آگاه بولوب آرام آلسه و اطمینان قلب حاصل بولسه قنداغ بولور ایکان؟ چون بیر نیچه یار و احباب لار بو خصوصده ایلا نیب التماس ایتدی لار، لهذا قلم تارتای و یازماق گه شروع قیلای، الله اوزی یار و مددگار اولسون لیکن من سوزنی قیسقه روشده اجمالاً بیان ایتای، چونکه مفصل ایتیپ سوزنی چوزماق گه منده حال یوقدور، چونکه من بیچاره عامی دورمن و ملامت توزاغی گه گرفتار دورمن و بنده لارنی اویاتلیک باشی قویبی سی و کوب یار و دوستلار ایچیده خوار و زبونی دورمن، اگرچه بی مغز قوروق پوست [ظاهر یخشی باطن



یمان [بولسمده بیر نیچه یار و دوستلار امر و اشارت قیلدیلار، من عاجز الارنی سوزلارینی بوزمای ناچار بیر نیچه بیت ایتدیم و یازدیم عقائدگه متعلق سوزلارنی اول منظومهده اثبات ایتیپ انگا «ثبات العاجزین» آت قویدوم. اوزومگه اوخشش خسته دل و دلشکسته لار شاد و خرم اولغایمو دیب نصیحتگه متعلق سوزلاردین هم بیر آز یاد ایلادیم و ذکر ایتدیم، لیکن نصیحتنی سخت دل و غفلت حجابیگه اورالگان کیشی تینگلامس و قولاق سالمس، چنانچه تاش اوستیگه هر قانچه یمغور کوب یاغسه هم کوکارمس و گیاه اونمس، وَمَا يَذْكُرُ إِلَّا أُؤْلُوا الْأَلْبَابِ [۲۶۹: البقرة] بو سوزگه اشارت دور.

معرفت الله بیانیده

نیدور قُل لوق انی مشتاقی بولماق اوزی دین فانی حق قه باقی بولماق

شرح: ناظم رحمه الله قُل لوق نه دور [و قُل دیگان قنداغ کیشی دور؟] دیب سوال ایتیپ، اوزلاری جوابده [انی] یعنی اللهنی مشتاقی بولماق، اوز هستی و وجودی دین فانی بولوب، حق تعالی یادی و ذکر بیله باقی بولماق دیب دورلار.

بنده خدانی یادلاسه الله هم انی یادلار، فَادْكُرُونِي اَذْكُرْكُمْ [۱۵۲: البقرة] آیتی دلیل دور. و یادلماق سبب محبت بولور، و بعضاً الله طرفیدین بیر جذب و تارتیش وقوعگه کیلیب انی اثریده بنده دین محبت و اشتیاق ظهورگه کیلور، آیه: يُحِبُّهُمْ وَيُحِبُّونَهُ [۵: المائدة] بو سوزگه دلیل دور. فنا و بقا خصوصیده تصوف کتابلاریده شرح و بسط بیریلگان دور. ناظم رحمه الله «مرادالعارفین» ده خوب توضیح بیرله بیان ایتگان دورلار، مراجعه ایتیلسون!

تانیماق تنگرینی تانماق هوادین کیین تورماق فعال ناروادین

بو یون سونماق ایگیلماق قُل دیمیشده قضاغه راضی بولماق برچه ایشده

امید ایتماق اوشل قدرت لی شه دین یاناردین خوف ایتیپ یانماق گنه دین

یقین بیلماق جماعت اعتقادین کیین سالماق مخالف اجتهدا دین



شرح: و هم قُل لوق الله جَلّ شأنه و حدانیت بیرله تانیماق و هوئی و هوس دین تانماق و انکار ایتماق و ناروا ایشلاردین کیین تورروب اوزینی ساقلاماق و جمیع اوامر و نواهی غه بویون سونماق و ایگیلماق و همه ایشلارده قضاغه راضی بولماق و اول پادشاه قادر فضلی دین امید ایتماق و دوزخ اوتیده یانماقدین قورقوب گناه دین یانماق و قَیتماق، و اهل السنّت و الجماعت اعتقادینی یقین بیلیم محکم اوشلاماق، مخالفنی اجتهدینی کیین گه سالیب آرقه گه تشلاماق و اندین یوز اوگورماق دور.

تنبيه: مذاهب اربعه (که هر تورتی حق دور) اعتقاده امام ابوالحسن اشعری گه متّبع دورلار ویا امام ابو منصور ماتریدی سمرقندی گه پیرو دورلار، بو ایکاولارینی یوللاری اصولده متفق اما بعضی فروعائده اختلاف لاری بار دور. بعضی محقق لار بو اختلاف جزئی نی اختلاف لفظی گه آلیب باریب دورلار، حنفی لار ماتریدی العقیده دورلار. بولار گه خلاف شیعه و معتزله و وهابیه و باشقه مذاهب لار راه راست دین اداشگان کیشی لارنی یولی دور.

عقیده بیل—ماگان شیطانہ ایل دور اگر مینگ ییل عمل دیب قیلسه ییل دور

شرح: عقیده حقّه نی بیلیم انگا اعتقاد ایتماگان کیشی شیطان گه ایل و تابع و پیرو دور قیسی یول گه باشلاسه کورکورانه اطاعت ایتور اگر مینگ ییل عمل دیب و طاعت بیلیم عبادت قیلسه ییل و باد کبی دور. وَقَدْ مَنَّا إِلَى مَا عَمِلُوا مِنْ عَمَلٍ فَجَعَلْنَاهُ هَبَاءً مَّنْثُورًا [الفرقان: ۲۳] آیتی مونگا دلالت قیلور. ییل: سال و سنه معنی سیده دور. ییل: یای مماله بیرله باد و شمال معنی سیده دور. ایل: اهل و تابع معنی سیده دور.

اویالمه معرفت نی اورگانور دین تنور جایینگ بولور قالسنگ تنور دین

اویالمه—سدور طلب امرینی آغان قالور یخشی اوی آغان دین اویالغان

شرح: معرفت الله گه سبب علم عقائدنی اورگانماقدین اویالماغیل و حیا قیلماغیل اگر علم عقائد اوقومای الله نی تانیماق دین قالسنگ سنی بارادورگان جایینگ تنور یعنی دوزخ بولور. تنور: لفظی اولگی سی نان پیشورادیگان معروف نمرسه دور، بو بیرده دوزخنی اراده ایتیلیب دور. ایکینجی سی تانیماق دین مأخوذ اولوب معرفت معنی سیده دور. شارع طرفیدین کیلگان طلب علم امرینی محکم اوشلاگان و انی قبول ایتگان کیشی فرض بولگان علوم ضروریه نی اوقوب بیلماقدین اویالمس و حیا ایتماس. علم اوقوب یخشی فکر و اوی آغان کیشی مرتبه سیدین اویالیم علم اوقوماگان کیشی کیین و آرقه ده قالور و یا علم اوقوب عمل قیلیب جنتنی اوی و



قصرلاریدین جای آغان کیشی منزلیتیدین اویالیب علم اوقوماگان کیشی پس قالور. اوی آغان: لفظی اولگی سی فکر آغان و یا خانه و قصر آغان معنی سیده دور. ایکینجی سی «اویالغان» حیا قیلگان و اویاتگان معنی سیده دور، بو لفظلرده جناس کامل بار دور. طلب علم خصوصیده کوب حدیثلار کیلگان دور، چنانچه عقیلی و ابن عدی و بیهقی و ابن عبدالبر انس رضی الله عنه دین روایت ایتیپ دور: **أُطْلِبُوا الْعِلْمَ وَلَوْ بِالصِّينِ فَإِنَّ طَلَبَ الْعِلْمِ فَرِيضَةٌ عَلَى كُلِّ مُسْلِمٍ**، یعنی، علم طلبیده بولونگلار گرچه چین کبی اوزاغ بیرده بولسه، پس به تحقیق طلب علم ایتماق هر مسلمانگه فرض دور و ابن عدی و بیهقی انس رضی الله عنه دین طبرانی اوسطده و خطیب حسین بن علی رضی الله عنه دین و طبرانی و بیهقی ابی سعید رضی الله عنه دین روایت ایتیپ دورلار: **طَلَبُ الْعِلْمِ فَرِيضَةٌ عَلَى كُلِّ مُسْلِمٍ**، یعنی، علم طلب قیلماق هر مسلمانگه فرض دور.

توحید باری تعالی

خداوندی که بیر دور بی شک و ریب روا ایرمس انگا اورتاغ ایله عیب

شرح: الله جلّ شانه خدای یگانه و واحد لاشریک له دور، اول ذاتگه اورتاغ، خاتون و عیب و نقصان نسبتی روا ایرمس دور، **وَقُلِ الْحَمْدُ لِلَّهِ الَّذِي لَمْ يَتَّخِذْ وَلَدًا وَلَمْ يَكُنْ لَهُ شَرِيكٌ فِي الْمُلْكِ [الاسراء: ۱۱۱] آتیی و أَنَّى يَكُونُ لَهُ وَلَدٌ وَلَمْ تَكُنْ لَهُ صَاحِبَةً [الانعام: ۱۱] بو سوزگه دلیل دور.**

ایننگ فرمانیدین هیچ کیم قوتولمس توانا دور همیشّه اوزگا بولمس

شرح: الله تعالی شونداغ اولوغ ذات دورکه بیر و کوکدهگی همه مخلوقاتلارانی فرمانی و حکمی آستیده بولوب انی بویروغیدین هیچ بیر قوتولوب بیلماس، اول ذات همیشه قدرت و عظمت بیرله متصف بولوب ضعف و عجز انگا طاری بولمس.

ایرور اول برچه عالمی خداسی ایننگ یوق ابتداسی انتهاسی

شرح: الله تعالی تمام عالمی یراتگان و یوقدین بار قیلگان پروردگاری دور، ایننگ ابتداسی و انتهاسی یوقدور قدیم ازلی دور، هر نمرسه که ابتدا و انتهاسی بولسه حادث و مخلوق دور، الله تعالی شوائب حدوددین منزّه دور.



انگا قیلغان ایمس سبقت زمانی

ایرور حاضر همیشه، یوق مکانی

شرح: الله جلّ شأنه همیشه هر بیرده حاضر دور و مکانی یوقدور و زمان هم انگا سبقت قیلماگان و اوتماگان دور، چونکه زمان و مکان خداوندنی مخلوقلاری دور، و جسم و جانلیک مخلوق مکانغه محتاج و زمان اندین اوتور، لیکن الله جسم و جانین منزّه دور، لهذا مکانغه محتاج ایمس دور و زمان هم اندین اوتمس، وهم الله نی حضوری معنوی دور، چونکه جسم و جانین منزّه دور، آیه: **وَهُوَ مَعَكُمْ أَيْنَ مَا كُنْتُمْ** [٤: الحديد] و آیه: **وَنَحْنُ أَقْرَبُ إِلَيْهِ مِنْ حَبْلِ الْوَرِيدِ** [١٦: ق] اشاره دور.

ایرور اندین منزّه حالق حی

کونگول گه کیچسه کوزگه توشسه هر شی

شرح: هر نمرسه که کونگول گه کیچسه و کوزگه توشسه و خیالین اوتسه، الله پاک خالقیمز او نمرسلارگه اوخشاماقدین منزّه و مبرّی دور، و الله نی بیر شی گه تشبیهی دلگه خطور ایتسه فوراً انی، **لَيْسَ كَمِثْلِهِ شَيْءٌ** [الشوری: ١١] مضمونیچه رد ایتیب قیتارماق لازم دور، و اکابرلارین منقول دور: **كَلَّ مَا خَطَرَ بِبَالِكِ فَاللَّهُ تَعَالَى** بخلاف ذالک، یعنی هر نمرسه که کونگولگه خطور ایتسه و خیالین اوتسه اول نمرسلارگه تیسکاری و مخالف دور و هرگز انگا اوخشامس.

روا ایرمس انگا چون و چگونه

اوزی بی شبهه دور هم بی نمونه

شرح: الله اوزی بی شبهه دور یعنی اول ذات هیچ نمرسه گه و هیچ نمرسه انگا ذاتیده و صفاتیده اوخشامس **لَيْسَ كَمِثْلِهِ شَيْءٌ** [الشوری: ١١] آیتی دلیلی دور و هم بی نمونه و بی نظیر و بی عدیل و بی مثیل دور، و چون و چگونه (یعنی انی ذاتی و صفاتی و افعالی ده نیمه گه انداغ و نیمه گه مونداغ دیب اعتراض ایتماق) روا ایرمس دور. لا **يُسْأَلُ عَمَّا يَفْعَلُ وَهُمْ يُسْأَلُونَ** [الانبیاء: ٢٣] آیتی واضح دلیل دور.

ایننگ ذاتیغه هیچ کیم عقلی بیتمس

او دور حاکم که حکمین اوزگا ایتمس

بو یون سوندی لار و فکر ایتمادیلار

فرشته لار، نبی لار بیتمادی لار

عجایب ایشلاریغه صنعتی غه

ولی فکر ایت خدانی قدرتیغه

شرح: الله تعالی شونداغ حاکم دور که حکمین اوزگا ایتمس و قضاسینی بوزماس، لا **مُعَقَّبٌ لِحُكْمِهِ** [٤١: الرعد] **وَلَا رَادٌّ لِقَضَائِهِ آيَةً لَا تَبْدِيلَ لِكَلِمَاتِ اللَّهِ** [٦٤: یونس]. **مَا يُبَدِّلُ الْقَوْلُ لَدَيَّ** [٢٩: ق] بو سوزگه دلیل دور



و انینگ ذاتیغه هیچ کیمنی حتی فرشته لار و پیغمبرلارنی عقللاری یتمادی انینگ امریغه بویون سونوب اطاعت ایتدیلار و مخلوقات و مصنوعات لاری که تفکر ایتیپ ذاتیغه هیچ فکر ایتمادی لار لیکن ای مومن الله نینگ قدرتیغه و عجایب ایشلاریغه و غرائب صنعتیغه فکر ایتغیل و اندین وحدانیت و خداوندیغه استدلال ایتگیل.

تنبيه: قرآن کریمنی کوب آیت لاریده آسمان و بیرده گی الله تعالی مخلوقات لاری که تفکر نظری بیرلان قراماقغه هدایت ایتیلیب و فکر ایتیپ اوایلان اندین عبرت آگان ذات لارنی ستایش ایتیلگاندور، چنانچه آیه: **إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لَآيَاتٍ لِّأُولِي الْأَلْبَابِ [١٩٠]** الَّذِينَ يَذْكُرُونَ اللَّهَ قِيَامًا وَقُعُودًا وَعَلَىٰ جُنُوبِهِمْ وَيَتَفَكَّرُونَ فِي خَلْقِ السَّمَاوَاتِ وَالْأَرْضِ رَبَّنَا مَا خَلَقْتَ هَذَا بَاطِلًا [١٩١ : البقرة]، إِنَّ فِي ذَلِكَ لَآيَاتٍ لِّقَوْمٍ يَتَفَكَّرُونَ [٣ : الرعد]، إِنَّ فِي ذَلِكَ لَآيَاتٍ لِّقَوْمٍ يَعْقِلُونَ [٤ : الرعد] شونگه اشاره دور، و هم احادیثده مخلوقات و مصنوعات الهی که تفکر و تدبر ایتماقگه امر و ذات الله که تفکر دین نهی وارد دور، چنانچه ابوالشیخ ابن عباس رضی الله عنه دین روایت ایتیپ دور: تفکروا فی کل شیء ولا تفکروا فی ذات الله تعالی فان بین السماء السابعة الی کرسیه سبعة آلاف نور وهو فوق ذالک؛ تفکروا فی الخلق ولا تفکروا فی الخالق فانکم لاتقدرون قدره. و ابو ذر رضی الله عنه دین روایت ایتیپ دور: تفکروا فی خلق الله ولا تفکروا فی الله فتهلکوا : و ابوالشیخ و طبرانی اوسطده و ابن عدی و بیهقی ابن عمر رضی الله عنه دین روایت ایتیپ دورلار: تَفَكَّرُوا فِي آلاءِ اللَّهِ، وَلَا تَتَفَكَّرُوا فِي اللَّهِ [حدیث ٦٨٣ : طبرانی]، [حدیث ٦٣١٩ : المعجم الاوسط] و ابو نعیم حلیهده ابن عباس رضی الله عنهما دین: تَفَكَّرُوا فِي آلاءِ اللَّهِ، وَلَا تَتَفَكَّرُوا فِي اللَّهِ – بو حدیث لارنی اسنادینی امام سخاوی همه سی ضعیف دیب لیکن همه سی بیر جایگه ییغیلسه، بیر-بیریدین کسب قوت ایتور دیب دورلار.

واجب تعالی نی صفات ثبوتیه سی بیانیده

ثبوتی دور انینگ سگیز صفاتی صفت ذاتی ایمس نه غیر ذاتی

حیات و علم و قدرت هم بصر، سمع اراده و کلام، تکوین دور ای شمع

شرح: الله تعالی نینگ صفات ثبوتیه سی (ماتریدییه لارنی نزدیکه) سگیز دور و صفاتی نه عین ذاتی و نه غیر ذاتی دور و صفات لاری شولاردین عبارت دور: حیات، علم، قدرت، بصر، سمع، اراده، کلام و تکوین.

حیات اول کیم تبریک دور اوزگا بولمس اولار هر ذی نفس هرگز اولولمس



اوزی نینگ ذاتیدین حی دور اوشل شه ولیکن جسم ایلہ جان دین منزہ
کیراکمسدور خداغه هیچ قایو شی غنی دور برچه عالم دین اوشل حی
ایماس هیچ ایشگه محتاج حق تعالی یوبارماغیل کونگولنی شیب و بالا
اگر مونده یبارورسن کونگولنی سالور شیطان کونگولغه اوزگه یولنی

شرح: حیات معنی سی شولکیم الله تعالی تیریک دور اوزگا بولمایدور یعنی اولوم انگا طاری بولمایدور و هر نفس لیک نمرسه و جان لیک مخلوق اولور اما اول ذات هرگز اولمس و انینگ تیریکیلیگی اوز ذاتیدین دور، جسم و جان دین منزهدور و الله تعالی گه هیچ نمرسه کیراک ایماس و اول حی توانا برچه عالم دین غنی و بی نیاز و هیچ شی گه محتاج ایمسدور. آیه: **اللَّهُ الصَّمَدُ [۲: الاخلاص]**، **وَاللَّهُ الْغَنِيُّ وَأَنْتُمُ الْفُقَرَاءُ [۳۸: محمد]** بو سوزگه دلیل دور. بو سوزلارنی محکم اوشلاب کونگولنی قوی و یوقاریغه یوبارماغیل و متردد بولماغیل. اگر شک و تردید بیرله دنی انده-مونده یوباریب بی ثبات بولسنگ، شیطان موقعدین استفاده قیلیب دلغه باشقه (ایگری) یوللارنی سالیب سنی آزغورور.

صفاتی نینگ بیری دور علم یارا ایروور دانای غیب و آشکارا
خلائق دین کیچیک دور یا اولوغ دور بولوبدور هر نه ایش یا بولغولوغ دور
توروشدور یا یوروشدور خیر و شردین نه کیم تیکسه انگا نفع و ضرردین
کونگولگه کیچسه قیسی حال پیشه ایمس پوشیده علمی دین همیشه

شرح: الله تعالی نینگ صفاتیدین بیری علم دور (بیلماقنی ایتیلور) بی کوک و آچوق نمرسه لارنی بیلغوچی دور، آیه: **إِنَّ اللَّهَ يَعْلَمُ غَيْبَ السَّمَاوَاتِ وَالْأَرْضِ [۱۸: الحجرات]**، **أَنَّ اللَّهَ يَعْلَمُ مَا فِي السَّمَاوَاتِ وَمَا فِي الْأَرْضِ [۹۷: المائدة]**، **وَيَعْلَمُ مَا فِي الْبَرِّ وَالْبَحْرِ وَمَا تَسْقُطُ مِنْ وَرَقَةٍ إِلَّا يَعْلَمُهَا وَلَا حَبَّةٍ فِي ظُلُمَاتِ الْأَرْضِ وَلَا رَطْبٍ وَلَا يَابِسٍ إِلَّا فِي كِتَابٍ مُبِينٍ [۵۹: الانعام]** بو سوزگه دلیل دور، الله مخلوق لاریدین کیچیک دور یا اولوغ دور و هر ایشی که ایلگاری بولوبدور ویا کیلاسی ده بولغولوغ دور و الارنی توروشی و یوروشی که یخشی لیکدین بولسون ویا یمان لیکدین و هر نه کیم منفعت و مضرت دین انگا تیکسه و یتوشسه و کونگولگه قیسی حال و قایو پیشه کیچسه و توشسه، شولار مجموعی و همه سی همیشه الله علمیدین مخفی ایمس دور.



بیری قدرت ایرور سگیز صفت دین

بیلور هر کیمده بولسه معرفت دین

نه کیم ایگی جهانده بولسه موجود

نفس لیک یا نفس سیز بود و نابود

یقین بیلگیل قضا بیرله قدر دور

ضرر دور نفع دور یا خیر و شر دور

ایمس بیر ذره بی تقدیر مولی

خلایق نی جمیع فعل و قولی

هر ایشنی بول دیدی بولدی اوشل دم

اراده ایلاگاج خلّاق عالم

قولی بیرله یراتدی دیمه زینهار

نه ایتسه ایرکی بار و قدرتی بار

منزه دور خداوندیم جسد دین

تیلینگنی ساقلا مونداغ قول بد دین

انینگ بیر وصفی دور ای آدمیزاد

کلام حقده کیم ید ایلاادی یاد

کونگونلی قویماغیل سن هر قایو یوز

ائمه بیلدی قرآن معنی سین توز

شرح: هر کیمنی علم و معرفت دین بهره سی بولسه، سگیز صفات دین بیری قدرت ایکانینی بیلور، دنیا ده گی تیریک نمرسه لار و بیجان [جمادات] لار و بولگان و بولماگان و ایگی جهانده هر نه موجود بولسه ضرر یا نفع، خیر یا شر، یقین بیلگیل که بو ایشلار همه سی قضا و قدر دین دور، خلایق نی همه ایشی و سوزی بیر ذره سی هم مولی میز الله تقدیر دین تشقری ایمسدور. عالمنی یراتگوچی پروردگاری اراده ایلاب هر ایشنی بول دیسه اوشل آن و لحظه ده بولور. آیه: **إِنَّمَا أَمْرُهُ إِذَا أَرَادَ شَيْئًا أَنْ يَقُولَ لَهُ كُنْ فَيَكُونُ** [۸۲: یس] بو سوزگه دلیل دور. الله تعالی فعال مایشاء دور، مخلوقات ای اوستیگه نیمه حکم و تقدیر ایتسه ایرکی و اختیاری بار و قدرت ایگاسی دور، هیچ کیم نینگ انی حکمی و تقدیری مقابیلده چون و چرا و لا و نعم دیماقگه حق یوقدور. **وَاللَّهُ يَحْكُمُ لَا مُعَقَّبَ لِحُكْمِهِ** [۴۱: الرعد]، **اللَّهُ يَفْعَلُ مَا يَشَاءُ** [۴۰: آل عمران]، **إِنَّ اللَّهَ يَحْكُمُ مَا يُرِيدُ** [۱: المائدة] بو سوزگه دلیل دور، لیکن مخلوقاتنی قولی بیرله یراتدی دیمه گیل و تیلینگنی مونداغ یمان سوز دین ساقلاگیل، زیرا که الله جلّ شانه پروردگاریمیز جسد و جسم دین منزه و پاک دور، الله اوز کلامیده بعضی آیت لارده [ید] لفظینی یاد ایتگان بولسه اول الله نینگ بیر وصفی دور، مثلاً، **بِيَدِكَ الْخَيْرُ** [۲۶: آل عمران]، **يَدُ اللَّهِ فَوْقَ أَيْدِيهِمْ** [۱۰: الفتح]، **بِيَدِهِ مَلَكُوتُ كُلِّ شَيْءٍ** [۸۸: المؤمنون] و شولارگه اوخشش آیتلارده کیلگان ید لفظی نی سلف صفات خداوندی دین دیب (بی تجسیم و بی تشبیه) **يَدًا يَلِيقُ بِذَاتِهِ**، یعنی اوز ذاتیگه لایق و سزاوار ید دیب دورلار، اما علمای خلق یدنی



قدرتگه تفسیر و تاویل ای‌تیب‌دورلار، سلف‌نی سوزلارینی اسلم و خلف سوزلارینی احکم دیلیل دور، سلف الصالحین پیشوالاریمیز قرآن معنی‌سینی درست و صحیح بیلگان دورلار، الارگه اتباع ای‌تیب دلنی هر طرفگه یوبارماغیل.

بصر هم سمع اینگ وصفی بلاشک بصر معنی‌سی کورماک، سمع ایشیتیمک
نه کیم موجود ایـــــرور دنیا و دین‌ده فلک‌دین یوقاری، زیر زمیـــــن‌ده
ایشیتیمک کورماکی بی‌شبهه و ریب ایرور بیردیک همیشـــه ظاهر و غیب
ایشیتیمک کورماکی دور قدرتی‌دن قولاق کوزدین ایمس دور بیلگیل ای تن
قولاق کوز بنده‌گه حاجت ایرور بس خدا هیچ قایسی‌نینگ محتاجی ایرمس

شرح: بصر و سمع الله‌نینگ ایکی صفتی دور، بصر معنی‌سی کورمک، و سمع معنی‌سی ایشیتیمک دور، هر نیمه کیم دین و دنیاده و آسمان‌دین یوقاری و یا بیر آستیده موجود بولسه اول نمرسه‌لارنی الله تعالی ایشیتیمک و کورمکی [بی‌شک و شبهه] همه بیر دیک ایرور، یوزه‌ده‌گی [ظاهر] و ایچده‌گی [پنهان]، کته و کیچیک، اوزاق و یقین همه‌سی الله کوروشی و ایشیتیشی آلدیده بیر دیک دور، انی ایشیتکی و کورمکی اوز قدرتی دین دور، مخلوقلارگه اوخشش قولاق و کوز بیرله ایمسدور، زیراکه قولاق و کوزگه بنده‌لارنی احتیاجی باردور و بس، الله‌نی هیچ قیسی‌سیگه احتیاجی یوقدور و اول ذات جسم و جسدین منزله‌دور.

تیریلسنگ آخرتده ای خـــــریدار خدایم کورساتور دوستلارگه دیدار
ولی کورماکنی بی‌چون و چنان بیل جهت‌سبز هم مثل سبز، بی‌مکان بیل
اوشل کیم بیلدورور بی‌شک‌لیگینی بیلور اول یخشی کورساتیمک‌لیگینی

شرح: ای خریدار دیدار! قیامت کونی تیریلیب جنتگه کیرسنگ، البتّه کورورسن‌که الله تعالی (اهل جنت) دوستلاریغه و دیدار و جمالینی کورساتور، لیکن بو کورماقنی بی‌چون و چنان و بی‌جهت و بی‌مثل و بی‌مکان بیلماق کیراک‌دور، اول ذات‌کیم بی‌شک و شبهه خدایغینی بیلدورور‌دور البتّه جمالینی کورساتماقنی هم یخشی بیلور.



رؤیت خصوصیده کوب احادیثلار وارد بولگان دور اهل السنت و الجماعت اعتقادلاری شولکه آخرتده الله تعالی بندهلاریگه اوز دیدارینی کورساتور بو سوزده معتزله خلاف ایتیبدور، آیه: **وُجُوهٌ یَّوْمَئِذٍ نَّاصِرَةٌ** [۲۲] **إِلَىٰ رَبِّهَا نَاظِرَةٌ** [۲۳] : القيامة] بو کورماقگه دلیل دور.

بیلور هر آدمی نینگ بولسه ایسی	کلام ایرمیش صفاتی نینگ بیرسی
کلامی حادث ایرمس دور قدیم بیل	انی ایتگان سوزی بی کام و بی تیل
خلایق سوزلایالمس کام و تیل سیز	خدا محتاج ایماس هیچ ایشگا هرگز
بیتیلسه یا اوقولسه آلسه ایل یاد	بولار حادث ایـــــرور ای آدمیزاد
خدایم نینگ کلامین یخشی بیل باز	سوزی نینگ ذاتیده یوق حرف و آواز
نه کیم مخلوقیده بار ایرسه ای شه	خداوندیم ایـــــرور اندین منزّه

شرح: هر کیمنی ایسی و عقلی و فکری بولسه (کلام) خدانینگ سکّیز صفاتی دین بیرى ایکانین بیلور و الله کلامینی قدیم دیب بیلماق کیراک دور انی سوزی حادث ایرمس دور و هم ایغان سوزی بی کام و بی تیل و بی صوت بی حرف دور، اللهنی سوزی سیره بو نمرسهلارگه محتاج ایرمس دور. اما خلایق بی کام و بی تیل و بی صوت و بی حرف سوزلایالمسلار.

کلام اللهنی بیتیلسه یا اوقولسه ویا بیر کیشی یاد آلسه بو ایشلار حادث دور. الله کلامی نینگ ذاتیده حرف و آواز یوق لیغینی یخشی بیلماق کیراک، هر بیر نمرسه که مخلوقلار سوزیده بولسه الله کلامی اول نمرسهلار دین منزّه دور، لهذا کلامی بی حرف و بی صوت و بی تیل و بی کام دور. آیه: **وَكَلَّمَ اللَّهُ مُوسَىٰ تَكْلِيمًا** [۱۶۴ : النساء]، **وَلَمَّا جَاءَ مُوسَىٰ لِمِيقَاتِنَا وَكَلَّمَهُ رَبُّهُ** [۱۴۳ : الاعراف]، **مِّنْهُمْ مَّنْ كَلَّمَ اللَّهُ** [۲۵۳ : البقرة] کلام نینگ صفت الهی لیکیغه واضح دلیل دور.

صفاتی نینگ بیرسی دور اراده	مونی بیلگان کیشی یتگای مراده
قَدَلسه بیر تیکان یا توشسه بیر قیل	اراده سیز ایمس هیچ ایش یقین بیل
اگر موری قویار بیر اوستینه پای	وگر بیر ذره چه قم بولسه بی جای



بولاردین یا کیچیک دور یا زیاده ایمس دور هیچ نمرسه بی اراده

شرح: الله تعالى صفاتیدین بیرى اراده دور. بعضی لار مَشِیَّتَنِ هم بو معنی گه اطلاق ایتیبدورلار. بولارنى معنی سینی بیلگان کیشی مرادیغه یتور، بیر کیشی نینگ ایاغیغه تیگان قدلسه و بیر مخلوق بدنى دین بیر قیل [موی] اوزولوب بیرگه توشسه و یا بیر قوموسقه [مورچه] بیر اوستیگه ایاغ قویسه و یا بیر ذره قم [ریگ] اورنیدین بیجا بولسه و یا بو ذکر ایتیلگان لاردین کیچیک و یا کتّه بیر ایش وقوعه کیلسه هیچ بیرى بی اراده و بی مشیت الهی ایمس دور.

صفاتینی بیرى تکوین دیمیش لار خدادین خلق روزی برچه ایشلار

یراتتی کیم نیچوک سیزنى و بیزنى ینه خلق ایتتى بیزنى، فعلیمیزنى

اگر چندی که قویمس ایرکی میزگا بیریب دور اختیار جزئی بیزگا

مناسب ایش ایرور یا نامناسب انی قیلماقغه بنده بولدی کاسب

اوشانچه اختیار جزئی دین باز تاپار بنده جزا کوب قیلسه یا آز

شرح: الله نی صفاتیدین بیرى تکوین دیب دورلار. تکوین معنی سی [عالم و اجزای عالمی وجودگه کیلار وقتیده پیدا قیلماقنى ایتیلور] الله طرفیدین خلق ایتماق و رزق بیرماق و شونگه اوخشش همه ایشلاری که تکوین گه متعلق بولسه مثل احیا و اماتت [تیرگوزماق و اولدورماق] و انبات و تصویر [اوندورماق و صورت تارتماق] شولارنى تکوین دییلور. تکوین رزقگه تعلق تاپسه تزریق و خلقگه تعلق تاپسه تخلیق و حیاتگه تعلق تاپسه احیاء و موتگه تعلق تاپسه اماتت دییلور.

تنبيه: چنانچه یوقاریده اشاره ایتدوک، تکویننى سگیز صفت دین بیرى دیب سنماق ماتریدییه مذهب لاری دور، اشاعره لار تکویننى صفات ثبوتیه دین سنمای انی بیئتى صفتگه حصر ایتیبدورلار. اول ذاتلار تخلیق و تزریق و احیاء و اماتت کبی شیء لارنى اراده و قدرت آستیگه داخل ایتیبدورلار.

الله تعالى سیز و بیزنى یراتکان دیک همه افعال و اعمالیمیزنى خلق ایتکادور، آیه: وَاللّٰهُ خَلَقَكُمْ وَمَا تَعْمَلُونَ [۹۶: الصافات]، اللّٰهُ خَالِقُ كُلِّ شَيْءٍ [۶۲- الزمر] بو سوزگه دلیل دور. اگرچه الله تعالى بنده سیغنه نه بالکل اختیار بیریب ایرکی غه قویوب دور و نه بالکل انی اختیارینى سلب ایتیپ جماد کبی بی اختیار ایتیبدور، بلکه بیر



اختیار جزئی بیریب تمام افعال و اعمالیده انی کاسب ایتیپ مناسب یا نامناسب یخشی-یمان ایشلارنی قیلماقده اوشل اختیار جزئی دین ایش آلیب و اول سببلی یخشی ایشلاریگه پاداش و یمان اعمالیگه سزا کورور.

نه کیم رزقی که بولسه شیب و بالا یراتیبدور انی واجب تعالی

حرامیدین ولی منع ایتتی بیزنی بیریدور اختیار جزئی میزنی

خدا راضی ایمس عصیانیمیزغه رضاسی دور انی احسانیمیزغه

کیشی راضی دیسه عصیان قیلورغه ائمه حکمی دور کافر بولورغه

شرح: آسمان و زمین، یوقاری و پستده هر نه رزقی که الله تعالی انی یراتیبدور، حلال و حرام همه سی الله طرفیدین بیریلگان رزق دور، لیکن حرامنی بیماقدین و استعمال ایتماقدین بیز (بنده) لارینی منع ایتدی، زیرا که بیزلار که اختیار جزئی بیرگان دور، و هم الله تعالی بیزنی عصیان و گناهیمیزغه راضی ایمس دور و یخشی قیلگان ایشلاریمیز که راضی دور. هر کیم الله بنده لارینی قیلگان عصیان لاریغه راضی دیسه (پیشوالاریمیز حکم لاریغه کوره) اول کیشی کافر بولور.

تنبیه: بنده لار دین صادر بولغان یخشی ایشلار بو دنیاده مدح و ستایش که سبب و آخرتده ثواب جزیل و دخول جنت که باعث دور، یخشی اعمال لار الله تعالی تقدیری و قضاسی و رضا و محبتی و امری بیرلان قرین دور، اما افعال قبیحه لار [که دنیاده مذمت عاجل که سبب و آخرتده عقاب آجل که باعث ایرور] همه سی اللهنی تقدیری و قضا و اراده سی بیرله بولسه ده لیکن خدای متعالنی رضا و محبتی و امری بیرله ایمس دور. آیه: وَلَا يَرْضَىٰ لِعِبَادِهِ الْكُفْرَ وَإِنْ تَشْكُرُوا يَرْضَهُ لَكُمْ [٧: الزمر]، إِنَّ اللَّهَ لَا يَأْمُرُ بِالْفَحْشَاءِ [٢٨: الاعراف] بو سوزلار که واضح دلیل دور.

خدا ظلم ایتمادی هیچ بنده لارغه ولی توز یولنی کورساتدی الارغه

اوشل خلقی که توز یول دین آزارلار^۱ الار اوز جانلاریغه ظلم ایتارلار

عذاب ایتسه بو عالم یا او عالم ایرور اول عدل ای فرزند آدم

^۱ینه بیر نسخه ده «آزارلار» اورنیگه «تیارلار» کیلگن.



نفس سیز خلق ایرور یا ذی نفس دور ایننگ اوز ملکی دور هیچ ظلم ایمس دور
 اگر عفو ایلاسه اوز فضلی دور اول بو دور صدقینگ و اخلاصینگ بو دور یول
 بیتار بیز عامی لارغه مونچه بیلساک توتوب محکم بویون سونساک ایگیلساک
 جماعت اهل سنت توزگان ایرلار دیدیلار طرفه نازک دور بو بیرلار
 اولوغ یولنی قویوب اولگونچه ای یار قدم قویمه تایار بیرلارگه زینهار

شرح: الله تعالی بنده لاریغه هیچ ظلم ایتمادی و ایتماس، چونکه پیغمبرلار واسطه لاری بیرلان الارگه توغری و یخشی یولنی کورساتیب هدایت ایتدی، لیکن الار اوز جانلاریغه ظلم ایتیپ توغری یولنی قویوب ایگری یولغه بارسه لارینه نیمه عذرلاری قالور، آیه: وَلَا يَظْلِمُ رَبُّكَ أَحَدًا [۹: الکهف]، إِنَّ اللَّهَ لَا يَظْلِمُ مِثْقَالَ ذَرَّةٍ [۱۰: النساء]، وَمَا رَبُّكَ بِظَلَّامٍ لِلْعَبِيدِ [۶: فصلت] اللهنی ظالم ایمس لیگیغه و آیه: وَهَدَيْنَاهُ النَّجْدَيْنِ [۱۰: البلد]، إِنَّا هَدَيْنَاهُ السَّبِيلَ إِمَّا شَاكِرًا وَإِمَّا كَفُورًا [۳: الانسان] یول کورساتگان لیگیغه دلیل دور (بالفرض) الله تعالی دنیاده و یا آخرتده جانلیک و یا جان سیز مخلوقین عذاب ایتسه انی اللهنی عدلی دیب بیلورمیز چونکه تمام مخلوقات الله نینگ مملوکی و بنده سی و مخلوقی دور و اوز ملکیده تصرف ایتماق ظلم سنالمایدور اگر بنده سینی همه گناه لارینی عفو ایلاسه اوز فضلی دور اگر آزگینه گناه اوچون عذاب ایتسه اول عدلی دور، صدق و اخلاص نینگ توغری یولی شول دور، لیکن الله تعالی نی بیر اسمی عدل دور هیچ وقت اوز یراتگان مخلوقیگه ذره چه ظلم ایتمس و قیلگان اعمال لاریگه قراب معامله قیلور، آیه: فَمَنْ يَعْمَلْ مِثْقَالَ ذَرَّةٍ خَيْرًا يَرَهُ [۷] وَمَنْ يَعْمَلْ مِثْقَالَ ذَرَّةٍ شَرًّا يَرَهُ [۸: الزلزلة] بیز کبی عامی لارگه مونچه لیک بیلساک و خبردار اولساک کفایه قیلور، و انی محکم توتوب بویون سونوب اطاعت ایتیپ ایگیلساک و انگا عمل قیلساک یخشی بولور سلف صالحین و علمای کرام اهل السنن مسئله قضا و قدرنی کوب نازک دیب دورلار.

ای برادر، اولگونچه اهل سنتنی بیوک شاهراه لارینی قویوب تاییلا دیگان و آزه دیگان بیرلارگا زینهار قدم قویمه. امام احمد و ابو داوود و ابن ماجه و ابن دیلمی دین روایت ایتیپ دورلار، اول کیشی دیدی که، اُبی بن کعب آلدیلاریغه باردیم و اول کیشی غه عرض ایتدیم که، قَدَر خصوصیده دلیم که چیزی تشویش توشگان، بیر حدیث نقل قیلینگ شاید الله جلّ شانه انی دلیم دین کیتگورسه! اول ذات ایدیلار: اگر الله آسمان و زمین اهلینی عذاب ایتسه بو عذاب ایتماقده الارگه ظالم ایمس دور، و اگر رحمت قیلسه انی رحمتی عمل لاریدین یخشی راق



دور، اُحد تاغیچه مالینگنی خدا یولیده صرف ایتسنگ اما [قضا و قدر] گه ایمان کیلتورماسنگ قبول درگاه الهی بولماس و هم مونى بیلماغینگ گیراک که هر نیمه که سنگه یتماغی مقدر بولسه هرگز خطا بولوب یتماغی قالماس و او نمرسه که خطا بولوب سنگا یتمس لیگی مقدر بولسه هرگز سنگا یتمس، اگر موندین باشقه عقیده ده اولسنگ دوزخ گه کیرورسن. سونگره عبدالله بن مسعود رضی الله عنه آدیلا ریگه، بعد حذیفه بن الیمان حضور لاریغه باردیم همه لاری ابی بن کعب سوزلا ریگه موافق سوزلا دیلار، پس زید بن ثابت آدیلا ریگه کیلیم [اول کیشی هم] رسول الله دین انگا اوخشش حدیث روایت قیلدیلا^۱.

تذیل: بو خصوصده قیسقه چه سوز شول که بنده عاجز که لازم شول که، اوامر الهی نی بجا ایتیب و نواهی لاریدین تارتیبب باوجود اطاعت همه وقت خوف و رجاده بولوب الله فضلیگه تکیه قیلیب قیلگان طاعت و عبادت لاریگه سویانمای یوروشی کیراک اوزیدین اوتکان ناسپاسلیک لار سببی دین بعضی مصائب لار بیتسه صبر ایتیب اوزینی اندین زیاده راق بلالار گه مناسب کوروب شکایت تیلینی آچمسلیگی کیراک، زیرا که بنده نی خیرینی (اوزیدن کوره) الله بیلور و انده نیمه حکمت لار بارلیگی هم اوزیگه معلوم دور، احتمال که کیچیک مصیبت لار بیرلان بیوک بلالارنی دفع قیلسه و یا رفع درجات گه سبب ایلاسه. لهذا بنده قضا و قدر الهی آستیده بویون سونوب شایبه اعتراض دین اوزاغ بولماغی کیراک، اولوغلاریمیز دین منقول دور **[نُومُنْ بِالْقَدَرِ وَلَا نَحْتِجُ بِهِ]** یعنی قضا و قدر گه ایمان کیلتورورمیز و انینگ بیرله احتجاج قیلمس میز [و گناه قیلیب تقدیر گه حواله ایتمس میز].

تنبيه: کابله گی مهاجرلارنی اکثری و اطرافده گی لارنی بعضی سی آیه: **وَلَوْ بَسَطَ اللَّهُ الرِّزْقَ لِعِبَادِهِ لَبَغَوْا فِي الْأَرْضِ** [الشوری: ۲۷] گه مصداق بولوب قالماقده دورلار، خداوند تعالی مهاجرلار گه قیلگان وعده سی لارنی شامل حال لاری بولوب صاحب جای و مال و اهل عیال بولگنده اولگی حال لارینی ایسلاریدین چیقاریب اوامر الهی دین بویون تابلاب نواهی لارنی ارتکاب ایتیب کبر و غرور گه گرفتار اولوب وطنده قالگان، برادرلاری یادلاریدین بالکل چیتیب عیش و نوش گه مشغول دورلار، فرض بولگان زکوة لارینی فقیر و بینوا برادرلاریگه (اکثرلاری) بیرمای بانک ذریعه سی بیرله کوبلاری سودگه آغشته بولوب خدا و رسول بیرله محاربه ایتماقده لار. اکثر

^۱ حَدَّثَنَا مُحَمَّدُ بْنُ كَثِيرٍ أَخْبَرَنَا سُفْيَانُ عَنْ أَبِي سِنَانٍ عَنْ وَهْبِ بْنِ خَالِدٍ الْجُمَيْيِّ عَنِ ابْنِ الدَّلَيْمِيِّ قَالَ أَتَيْتُ أُبَيَّ بْنَ كَعْبٍ فَقُلْتُ لَهُ وَقَعَ فِي نَفْسِي شَيْءٌ مِنَ الْقَدَرِ فَحَدَّثْنِي بِشَيْءٍ لَعَلَّ اللَّهَ أَنْ يَذْهَبَهُ مِنْ قَلْبِي. فَقَالَ لَوْ أَنَّ اللَّهَ عَذَّبَ أَهْلَ سَمَوَاتِهِ وَأَهْلَ أَرْضِهِ عَذَابَهُمْ وَهُوَ غَيْرُ ظَالِمٍ لَهُمْ وَلَوْ رَحِمَهُمْ كَانَتْ رَحْمَتُهُ خَيْرًا لَهُمْ مِنْ أَعْمَالِهِمْ وَلَوْ أَنْفَقْتُ مِثْلَ أُخْدٍ ذَهَبًا فِي سَبِيلِ اللَّهِ مَا قَبِلَهُ اللَّهُ مِنْكَ حَتَّى تُؤْمِنَ بِالْقَدَرِ وَتَعْلَمَ أَنَّ مَا أَصَابَكَ لَمْ يَكُنْ لِيُخْطِئَكَ وَأَنَّ مَا أَخْطَأَكَ لَمْ يَكُنْ لِيُصِيبَكَ وَلَوْ مِتُّ عَلَى غَيْرِ هَذَا لَدَخَلْتُ النَّارَ. قَالَ ثُمَّ أَتَيْتُ عَبْدَ اللَّهِ بْنَ مَسْعُودٍ فَقَالَ مِثْلَ ذَلِكَ - قَالَ - ثُمَّ أَتَيْتُ حُذَيْفَةَ بْنَ الْيَمَانِ فَقَالَ مِثْلَ ذَلِكَ - قَالَ - ثُمَّ أَتَيْتُ زَيْدَ بْنَ ثَابِتٍ فَحَدَّثَنِي عَنِ النَّبِيِّ - صَلَّى اللَّهُ عَلَيْهِ وَسَلَّمَ - مِثْلَ ذَلِكَ. [حدیث ۴۷۰۱: سنن ابی داوود]



توی لارده شراب و قمار و باشقه فسق و فجور آچوق ارتکاب ایتیلماقده و یاشی اولوغ ریش سفیدلاریمیز طرفلاریدین بو ایشلاردین ممانعت او یاقده تورسون، مونداغ فسادلارگه مساعدت کورساتیلماقده، اولاد تربیه سیده هم بالکل آرقه ده قالگان میز.

باله لار اکثر بد اخلاق و بی علم و دینی جهت دین بی پروا بولوب اوسماقده لار، خداوند عاقبتیمیزی خیر قیلسون و وطنده گی کیلگان بلالار بو بیرده هم باشیمیزگه کیلماسون، آمین!

خدادین هر نه کیلدی راست بیلدینگ تیلینگ بیرله یننه اقرار قیلدینگ

مسلمانلیغ یولیده بول دور ایمان مونی بیلمس کیشی تانگلا پشیمان

شرح: الله تعالی طرفیدین (پیغمبرلار واسطه سی بیرلان) هر حکمی که کیلگان انی راست دیب دل بیرله تصدیق ایتیپ و تیلینگ بیرله کلمه طیبه لَا إِلَهَ إِلَّا اللَّهُ مُحَمَّدٌ رَسُولُ اللَّهِ ایتیپ، اقرار قیلسنگ، مسلمان لیک یولیده ایمان دیب شونی ایتیلور، الْإِيْمَانُ اِقْرَارٌ بِاللِّسَانِ وَ تَصْدِيقٌ بِالْقَلْبِ^۱. اما مونی بیلماگان و ایمان کیلتورمگان کیشی تانگلا قیامت کونی پشیمان بولور، ولی فائده قیلمس.

یقین بیلغیل که ایمان بولمغای کم ایرور بیر دیک زیاده بولمغای هم

بو سوز دور اهل سنت نینگ طریقی جدل ایتتی بو سوزده هر فریقی

بولور اما عمل زائد و نقصان تا پار یخشی عمل دین اجر انسان

شرح: مونی یقین بیلماق کیراک که ایمان کم و زیاده بولمغای، بلکه بیر دیک بولغای، بو سوز اهل سنت و جماعت دین ماتریدیه لارنی عقیده لاری دور، بولار عملنی ایمان دین جدا دیب بیلورلار. بو سوزده بعضی فرقه لار مجادله و مباحثه ایتگان دورلار، چنانچه اشعریه لار عملنی ایمان کامل دین جزء بیلپ، ایمان کم و زیاده بولغای دیرلار، بو اختلاف لارنی مطولات لارده مطالعه ایتیلسه بولور (ایمان زیاده و کم بولمسه ده) عملگه زیاده و نقصان طاری بولور، انسان یخشی عملدین اجر و پاداش نیک تا پار.

عمل ایلانگ ولیکن آیمه غای سیز عمل دین داخل جنت بولور میز

^۱ صفحه ۲۷۶ : شرح العقائد - چاپ : مکتبه المدینه.



انینگ امرین دل و جانینگ بیلان آل	عمل قیل هم اوزینی فضلی گه سال
بهشت ایتسه نصیب اوز فضلیدین بیل	عملگه اِتکا قیلمای عمل قیل
غرض اول کیم عملگه بولمه مغرور	عمل قیلغیل عملگه بنده مأمور
عمل قیلماقدین اهل استفاده	دیدیلار نور ایمان دور زیاده
وگر نه بولمس ایمان زائد و کم	عقیده بول دور ای فرزند آدم!

شرح: عمل صالح قیلینگ، لیکن عمل سببیدین جنتگه کیرورمیز دیب ایتماغای سیز، الله تعالی اوامرینی دل و جان بیرله قبول ایتیب آغیل و عمل قیلیب توروب انگا تکیه قیلیب سویانمای اللهنی فضلیغه سالغیل، آخرته جنت نصیب ایتسه اللهنی اوز فضلیدین بیلگیل و عملینگدین کورماغیل، عملگه اِتکا قیلمای (سویانمای) عمل قیل. بو سوزدین غرض شولکه قیلگان عملینگگه مغرور بولمه، اما عملگه دوام ایت، چونکه بنده الله طرفیدین عملگه مأمور دور تاکه تنده جان بار هیچ کیم تکلیفدین قوتولمس، اهل استفاده یعنی عالم لار عمل قیلماقدین نور ایمان زیاده بولور دیب دورلار ورنه ایمان اوزی کم و زیاده بولماغای، عقیده ماتریدیه شول دور.

تنبيه: قرآن کریم نی اکثر جای لاریده عمل صالح گه ترغیب و یمان عملدین ترهیب کیلگان دور، و احادیث نبویه ده هم عملگه ترغیب وارد دور، چنانچه امام بخاری، مسلم و امام احمد حضرت عائشه رضی الله عنها دین روایت ایتیب دورلار: «سَدُّوْا وَقَارِبُوْا وَأَبْشِرُوْا فَإِنَّهُ لَنْ يَدْخُلَ الْجَنَّةَ أَحَدًا عَمَلُهُ». قَالُوا وَلَا أَنْتَ يَا رَسُولَ اللَّهِ قَالَ «وَلَا أَنَا إِلَّا أَنْ يَتَغَمَّدَنِي اللَّهُ مِنْهُ بِرَحْمَةٍ». [حدیث ۶۴۶۷ : بخاری]، [۷۳۰۰ : مسلم]، [۸۲۳۳ : مسند احمد].

ترجمه: عمل قیلماقده اورته روشنی اختیار قیلینگ لار [وطاعتگه مواظبت بیرلان] الله گه تقرب حاصل قیلینگ لار و سیزلارگه بشارت بولسون ثواب جزیل بیرلان، و بیلینگ لار هر بیرلارینگنی هرگز عملی جنتگه کیرگوزماگای، حتی منی هم (عملیم جنتگه کیرگوزماگای) مگر اینکه الله مغفرت و رحمتی بیرلان اوراسه و شامل حالیم بولسه.

عمل نینگ نفعی هم ایمان بیلان دور	قچان یلغوز عمل قیلگان بیلان دور
نعوذ بالله ایمان سیز کیشی نی	قبول ایتمس خدایم هیچ ایشینی
اگرچه یخشی لار اعمالین ایتسه	تصدق بیر یوزینی مالین ایتسه



اوشل کیم صدقی یوقدور قیلگانی هیچ

ریاضت بیرله بولسه ایرته و کیچ

قوتولمس هرگز اندین جسم و جانی

بولور دوزخ ایننگ آخر مکانی

بیرور أجرة انی خوب قیلیمیشی گه

اگر ایمان عطا قیلسه کیشی گه

تموغده قالمس ایمان لی مؤبد

اگر چندی کبائر قیلسه بی حد

شرح: عمل صالحنی فائده بیریشی ایمان بیرله همراهیگی بیرلان دور، قچان یلغوز (بدون ایمان) عمل قیلماق بیرلان دور. (ایمان سبب لیکدین خداگه پناه ایلته میز) ایمان سبب کیشی نی الله هیچ بیر قیلگان ایشینی قبول ایتمس اگرچه اول کیشی یخشی لارنی اعمالینی قیلیب بیر یوزینی مالینی صدقه ایتیب ایرته و کیچ همه اوقاتینی ریاضت بیرله اوتکارسه، چونکه انی تصدیق و ایمانی یوق دور، تمام قیلغان عملی هیچ دور، آخر جایی دوزخ دور، جسم و جانی اندین هرگز قوتولمس، آیه: وَقَدْ مَنَا إِلَى مَا عَمِلُوا مِنْ عَمَلٍ فَجَعَلْنَاهُ هَبَاءً مَنْثُورًا [۲۳ : الفرقان] واضح دلیل دور، و آیه: فَأَمَّا الَّذِينَ شَفَعُوا فِي النَّارِ لَهُمْ فِيهَا زَفِيرٌ وَشَهِيقٌ [۱۰۶] خَالِدِينَ فِيهَا [۱۰۷ : هود] دوزخ ده همیشه قالیشیگه دلیل دور. اگر الله بیر کیشیگه ایمان عطا قیلسه، انی یخشی عمل لاریگه اجر و ثواب بیرور، اول کیشی اگرچه بی حساب گناه کبیره قیلسه ده دوزخ ده ابدی قالمس یا الله فضلی بیرله یا شفاعت رسول الله بیرله و یا گناهی باریچه کویوب آخر جنتگه کیور. آیه: إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ [۴۸ : النساء] بو سوزگه دلیل دور.

مناجات

هوای نفس ایله آواره دور میز

الهی عاصی میز بیچاره دور میز

نه ایشلار کیچه دور بیزدین بو کیچه

قوناق میز بیر کیچه دنیای هیچه

صبا قوتقار توتوندین جانیمیزنی

بو تونده توت بوتون ایمانیمیزنی

شرح: الهی گنهکار و بیچاره میز و خواهشات نفس [اماره بالسوء] نی کیتیدین آواره و سرگردان میز، دنیای هیچ و بی بقاگه بیر کیچه گینه قوناق میز [بیر کیچه یاتیب و قونوب اوتوب کیته میز] آیا بیزدین بو کیچه ده نیمه ایشلار کیچه دور و اوتادور و قنداغ عمل لار ظهورگه کیلا دور؟ بو تونده [کیچه ده] ایمانیمیزنی بوتون توتغیل و ایرته



(قیامت کونی) توتون عذابیدین جانیمیزنی قوتقارغیل! آیه: یَوْمَ تَأْتِي السَّمَاءُ بِدُخَانٍ مُّبِينٍ [١٠] يَغْشَى النَّاسَ هَذَا عَذَابٌ أَلِيمٌ [١١: الدخان] (بیر قولگه کوره) بو توتون قیامتده واقع بولور. (قوناق) لفظی مسافر بیر جایگه توشوب کیچه سی انده قونوب اوتوب کیتگانینی ایتیلور. اصطلاحده [بیر کیچه بو بیرده قوناق میز] یعنی بیر کیچه یاتیب کیتورمیز دیگان لاریدور؛ اصلاً پرنده شاخه قوندی دیگان لغتدین آلینگان و مهمانی هم قوناق دیب دورلار. کیچه لفظی نینگ اولگی و اوچونچیسی تون و شب معنی سیده بولوب ایکینجیسی کیچماقدین مأخوذ اولوب اوتادور معنی سیده دور. (تونده) لفظی کیچه ده و بوتون درست و صحیح و توتون (دود) و دُخان معنی سیده دور.

کونگول صندوقینه بیـــــر بی بها دُر اوزونگ راست ایلا دینگ ای کاشف الضر
اوشل دُر قصدینه شیطان بدبخت توشوب دور کوب هوا خواهی بیلان سخت
اگر بولسنگ منینگ حالیمغه حامی توزار گل دیک عدولارنی تمامی
اگر سن ساقلاسنگ رحمت یولیدین عدولیک قیلسه نی کیلگای قولیدین

شرح: ای کاشف الضر (پروردگاریم) دل صندوقیگه بیر بهاسی یوق (کوب قدر و قیمت لیک) گوهر (ایمان) نی اوزونگ برابر قیلدینگ، بدبخت شیطان کوب اتباع و هواخواه لاری بیلان اول گوهر ایمان قصدیغه قتیغ توشویدور، اگر منینگ حالیمغه حامی و مددگار بولسنگ دشمن لار همه سی کُل دیک توزوب هر طرفگه ترقراب کیتار، اگر سن بیزلارنی رحمت یولیدین و شفقت بابیدین ساقلاسنگ اول ملعون لار دشمن لیک قیلغان بیلان قوللاریدین نیمه کیلغای. آیه: إِنَّ عِبَادِي لَيْسَ لَكَ عَلَيْهِمْ سُلْطَانٌ [٤٢: الحجر] بو سوزگه اشارت دور. کُل لفظی خاکستر و رماد معنی سیده دور.

ینه ایمانده آیدی اهل تحقیق خدادین دور هدایت بیرله توفیق
خدانینگ فعلی اول مخلوق ایمسدور کیشی مخلوق انی هرگز دیمسدور
دیدیلار معرفت بیرله اول اقرار نچوک کیم بنده سی نینگ فعلیدین بار
نچوک کیم بنده نی خلق ایتتی مولا تقی مخلوق ایرور قولی و فعلی



شرح: ناظم رحمه الله سوزنی ینہ ایمان بابیغه قیتاریب دیرلار، محقق علمالار هدایت بیرله توفیقنی الله طرفیدین دیب‌دورلار، تا الله هدایت ایتیپ توفیق بیرماسه هیچ‌کیم بیر کیشی‌نی یولگه سالالامس، چون توفیق و هدایت الله‌نینگ ایشی‌دور، لهذا مخلوق ایمسدور و هیچ‌کیم انی مخلوق دیمسدور، اما معرفت بیرله اقرار چونکه بنده‌نی ایشی‌دور و بنده‌نی تمام قولی و فعلی مولی‌میز الله مخلوقی‌دور، لهذا معرفت و اقرار مخلوق‌دور. آیه: **إِنَّكَ لَا تَهْدِي مَنْ أَحْبَبْتَ وَلَكِنَّ اللَّهَ يَهْدِي مَنْ يَشَاءُ** [۵۶: القصص]، **يُضِلُّ مَنْ يَشَاءُ وَيَهْدِي مَنْ يَشَاءُ** [۹۳: النحل - ۸: فاطر] بو سوزگه دلیل‌دور.

ایرور بیر معنی‌ده ایمان و اسلام **مونی بیلسه کیراک هر خاص و هر عام**

ائمه قولینی بیرک اوشله زینهار **جدلنی نفعی یوق بولسه نه درکار**

شرح: ایمان و اسلام بیر معنی‌ده دور، مونی خاص و عام همه بیلماغی کیراک، زیراکه اسلام معنی‌سی تسلیم و انقیاد و اطاعت‌دور. ایمان الله طرفیدین پیغمبرلار کیلتورگان احکام‌نی تصدیق ایتیپ انگا بویون سونوب قبول ایتمک‌دور، بعضی آیت‌لارده هر ایکی‌سی بیر معنی‌ده کیلگان‌دور، مثلاً: **فَأَخْرَجْنَا مَنْ كَانَ فِيهَا مِنَ الْمُؤْمِنِينَ** [۳۵] **فَمَا وَجَدْنَا فِيهَا غَيْرَ بَيْتٍ مِّنَ الْمُسْلِمِينَ** [۳۶: الذاریات] آیتی‌ده فی الجملة شریعتده بیر کیشی‌نی مؤمن اما مسلم ایمس و یا مسلم اما مؤمن ایمس دیب حکم ایتیپ بولمایدور، ایمان و اسلام بیر معنی‌ده دیماق‌دین شونی اراده قیلورمیز. پیشوا و مقتدی‌لاریمیز سوزلارینی محکم اوشلاب اول باره‌لارده مجادله و مباحثه قیلماس‌لیک کیراک، زیراکه جدل و مباحثه‌نی نفعی یوق بولسه نیمه کیراک‌لیگی بار.

کتاب‌لار و فرشته‌لارگه ایمان کیلتورمک بیانیده

ملائک کیم ایرورلار عالم غیب	همه حق بنده‌سی دور بی‌شک و ریب
الار فارغ ایرور ایچماک-ییمک‌دین	یمان قیلماق قباح‌ت سوزلامک‌دین
نساء ایرمس الارنی وصفی ایر هم	بلاشهوت یراتتی‌سی شاه عالم
الار برچه خدان‌ی طاعتی‌ده	ایمس غافل الار هیچ ساع‌تیده
اگرچه برچه‌سی طاعت سرشته	مقرب بعضی‌دین بعضی فرشته



شرح: فرشته‌لار کیم (مثل جن و روح) عالم غیب (کوزگه کورونمس) مخلوق‌لاردین ایرورلار و شک و شبهه‌سیز الله‌نینگ بنده‌سی و مخلوقی دورلار، الار ایچمک و بییمک‌دین فارغ و مستغنی و یمان ایش قیلماق و قباحث سوز سوزلامک‌دین بری دورلار. فرشته‌لار خاتون‌لیک و ایرک‌لیک صفت‌لاری بیرله متصف ایمس دورلار، بلکه الارنی الله بی شهوت یراتتی و همه‌لاری خدانی طاعتیده بولوب هیچ وقت غافل ایمس دورلار، اگرچه همه فرشته‌لارنی وجودلاری طاعت سرشتی بولسه‌ده، بعض‌لاریدین بعض‌لاری حضور خداوندی‌ده مقرب‌راغ دورلار، چنانچه حضرت اسرافیل و میکائیل و جبرئیل و عزرائیل و حملة عرش مرتبه‌لاری بلنددور، اما شیخ اکبرنی فتوحاتده‌گی سوزلاریگه قراغانده [عالون] اسمی بیرله یادلانگان فرشته‌لار مقاملاری همه‌دین یوقاری دور، چنانچه آیه: اُسْتُكْبِرَتْ اَمْ كُنْتَ مِنَ الْعَالِيْنَ [ص: ۷۵] مونگه دلالت قیلور، یوقاریده‌گی سوزلاریگه بو آیت‌لار دلیل دور: بَلْ عِبَادٌ مُّكْرَمُونَ [۲۶] لَا يَسْخَرُونَ بِالْقَوْلِ وَهُمْ بِأَمْرِهٖ يَعْمَلُونَ [۲۷: الانبیاء]، وَجَعَلُوا الْمَلَائِكَةَ الَّذِیْنَ هُمْ عِبَادُ الرَّحْمٰنِ اِنَاثًا اَشْهَدُوا خَلْقَهُمْ سَتُكْتَبُ شَهَادَتُهُمْ وَيُسْأَلُونَ [۱۹: الزخرف]، لَا يَعْصُونَ اللّٰهَ مَا اَمَرَهُمْ وَيَفْعَلُونَ مَا يُؤْمَرُونَ [۶: التحریم]، وَمَنْ عِنْدَهٗ لَا يَسْتَكْبِرُونَ عَنْ عِبَادَتِهٖ وَلَا يَسْتَحْسِرُونَ [۱۹] يُسَبِّحُونَ اللَّیْلَ وَالنَّهَارَ لَا يَفْتُرُونَ [۲۰: الانبیاء].

ایرور برچه کلام حق تعالی

مسلمانلار اوقور قرآن که حالا

خداوندیم کتب که قیلدی نازل

تقی پیغمبریمیزدین برون بیل

که ایمان کیلتوروب دورمیز بریغه

یباردی هر قایو پیغمبر ریغه

مونی بیلسه کیراک هر خاص و عامی

بررسی حق تعالی نی کلامی

قیلیب ایردیم صفاتی بابیده یاد

کلامی وصفینی ای آدمی زاد

شرح: مسلمانلارنی حاضرگی اوقوب تورگان قرآن‌لاری همه‌سی حق تعالی کلامی دور و هم کتابلاری که الله تعالی پیغمبریمیزدین ایلگاری هر قیسی انبیالارگه یوبارگان بولسه همه‌سی خدانی کلامی دیب برسیغه ایمان کیلتورورمیز، مونی هر خاص و عام [ملا و عامی] بیلیب تصدیق ایتماغی کیراک زیراکه جزء ایمان دین دور، آیه: وَالَّذِیْنَ یُؤْمِنُوْنَ بِمَا اُنْزِلَ اِلَیْكَ وَمَا اُنْزِلَ مِنْ قَبْلَکَ [۴: البقرة] بو سوزگه دلیل دور.

تنبیه: تور کتاب تور پیغمبرگه توشورلگان دور، تورات حضرت موسی^{علیه السلام}گه، زبور حضرت داؤد^{علیه السلام}گه، انجیل حضرت عیسی^{علیه السلام}گه و قرآن کریم حضرت محمد^{علیه الصلوة والسلام}گه. و بعضی صحائف‌لار



بیر قنچه پیغمبرلار [مثل حضرت شیث و ادريس و ابراهيم علیهم السلام] گه یوباریلگانی منقول دور، بو کتاب صحیفه لارگه اجمالاً هر کتاب و صحیفه که الله طرفیدین کیلبدور همه سی الله نی کلامی دیب ایمان کیلتوریشیمیز لازم دور و هم مونی بیلماق کیراک که اوتگان تمام پیغمبرلارگه کیلگان احکام لار قرآن نزولی بیرلان منسوخ بولگان دور و عملدین قالگان دور و هم انجیل و تورات گه تحریف و تبدیل قولى کیریب موجوده نسخه لاری تحریف دین خالی ایرمسیلگی محقق دور، آیه: **يُحَرِّفُونَ الْكَلِمَ عَنْ مَوَاضِعِهِ** [٤٦ : النساء] گه اوخشش آیتلار بو سوزگه دلیل دور، لهذا اجمالاً ایمان کیلتورورمیز. آیه رجم و نعت رسول الله نی یاشورگان لاری مشهور دور. الله کلامی نی صفاتی بابیده ذکر ایتیب ایردیم، قایتیه باشدین ذکرى ضرورتی یوق دور.

پیغمبرلارگه ایمان کیلتورمک بیانیده

ثنا و حمد قدرت لیک خداغه	که ایمان کیلتوروبمیز انبیاغه
الارنی اولی کیم آدم ایردی	محمد برچه سیغه خاتم ایردی
بریسى تنگرینی سویگان قلى دور	بریسى جنتِ رضوان گلى دور
خدانی حکمینی هر فعل و سوزگا	نبی لار قیلما دی بیر ذره اوزگا
یتوشمس هیچ ولی لار جالاریغه	یتوشمس بلکه خاک پالاریغه
الار دور ذریاتِ آدمِ خاک	گنه دین انبیاءنی برچه سی پاک

شرح: ثنا و ستایش خاص الله گه بولسون که قدرت کامله ایگاسی دور، اول ذات بیزارگه توفیق عنایت قیلیب تمام پیغمبرلارگه ایمان کیلتوروبمیز، الارنینگ اوللاری حضرت آدم علیه السلام و خاتم و آخرلاری حضرت محمد علیه السلام دورلار، همه لاری الله نینگ سویگان بنده لاری دورلار و جنتنی (که رضای خداوندی نی جای دور) گلی دورلار، یعنی همه انبیاء قطعی جنتی دورلار [رضوان مصدر دور] پیغمبرلار الله حکمینی [قولى و فعلى] بیر ذره اوزگه قیلماگان دورلار و تغییر و تبدیل ایتماگان دورلار و تبلیغی گه مأمور بولگان نمرسه لارنی بی کم و کاست قوم لاریگه بیتکورگان و ابلاغ ایتگان دورلار، الارنی مرتبه لاریغه هیچ بیر ولی [هر قنچه بلند مقامات گه یتوشگان بولسه ده] یتوشمس بلکه ایاغ لاری باسقان تفرغ گردیغه ایریشالمس. پیغمبرلار همه لاری تفرغ دین



خلق ایتیلگان آدم علیه السلام نسل لاریدین بولوب همه لاری گناه دین پاک دورلار. [یهودنی عزیر بن الله و نصاری نی مسیح بن الله دیگانی بهتان دور.]

الاردین بعضی ایش که قیلدیلا نقل	قیلور تأویلی نی نعمان با عقل
اول ایش قصداً ایمسدور انبیادین	الارغه لغزش پا دور خطادین
الار قصد ایله هرگز قیلما دیلار	بویورگان امری دین ایریلما دیلار
باری دریای رحمتده ایدی غرق	رسول ایله نبی ده بولدی بیر فرق
باریسی تنگری دین تاپدی خطاب اول	نبی غه شرط ایمس اما کتاب اول
رسولیغه ایرور شرط ای نکو نام	ولی بولدی بار یغه وحی و الهام
نبی دور هر رسول انگلا غوچی یول	ولیکن هر نبی ایرمس رسول اول
دیدیلار پاره مؤمن بالاسی	ایرور بیر معنی ده هر ایکلاسی
سلف کیم ایلادی لطف و عنایت	دیددی اولگی مشهور روایت

شرح: بعضی ایشلار که انبیاء علیهم السلام حقلاریده نقل ایتیلیب (ظاهری گناه کبی دور) اول ایشلارنی تأویلینی حضرت امام اعظم ابو حنیفة النعمان که [زیرک ایریدیلار] قیلیب دورلار، همه سینی محامل حسنه که حمل ایتیب، بی اساس بعضی قصاص و مداح لار ذکر ایتگان قصه لارنی رد ایتیب دورلار، چونکه بول زلات انبیاء علیهم السلام دین قصداً صادر بولمسدین بلکه سهواً ایاغ لاری تاییب خطا بولگاندور. الار هرگز بو ایشلارنی عمداً قیلماگان دورلار و الله بویورگان امریدین چیقماگان دورلار، و همه لاری رحمت دریاسیغه غرق دورلار، اما رسول بیرله نبی اورته سیده بیر فرق باردور اگرچه همه لاریگه [وحی و الهام کیلیب] تبلیغ احکام خطابی نی الله طرفیدین تاپگان بولسه لارده لیکن رسول که کتاب کیلماقی شرط دیب دورلار، اما نبی که کتاب شرط ایمسدور، همه لاریگه وحی و الهام کیلور، پس هر رسول نبی دور، اما هر نبی رسول ایمسدور. بعضی علمالار رسول و نبی هر ایکسی بیر معنی ده دیب دورلار، اما سلف صالحین که [مورد لطف و مرحمت الهی دورلار] اولگی سوزنی روایت مشهوره دیب مهربانلیغ قیلیب دورلار.



تنبيه: بعضی لار رسول بیرله نبی نی فرقیده [نبی انسان آزاد ایرکک بنی آدم دین دورکه بیر شریعت انگا وحی ایتیلگان دور، اگرچه او باشقه لارنینگ تبیلگی گه مأمور بولمسه، اگر تبلیغیگه مأمور بولسه اول رسول دور، و بول سوزنی اصح دیب دورلار.

بشر پیغمبرین سلطان اعدل	ملک پیغمبریدین قیلدی افضل
بو سوز دور مذهب سنت جماعت	الار هر نه دیدی قیلغیل اطاعت
دیدیلار عامه فرزند آدم	ملک نینگ عامه سیدین فضلی کوب هم
کتاب کافی کیم پر با صفا دور	دیدی عامه بو بیرده اتقیا دور
بشرده ورنه چندان بی عمل دور	بهایم دیک ایرور بل هم اَصْل دور
پیمبرنینگ باری عادل و اعدل	ولیکن بعضی سیدین بعضی افضل
ثواب و رتبه ده افضل ایرور حال	مساوی دور نبوت بیرله ارسال
باری نینگ مهتری اول مصطفی دور	حبیب حق نـگـین انبیا دور

شرح: سلطان اعدل (الله جلّ شانه) بشر پیغمبرینی فرشته پیغمبریدین افضل قیلدی، بو سوز اهل سنت و جماعتنی قول لاری و مذهب لاری دور، الار هر نه دیمیش لاری گه اطاعت قیلیب بویون سونگیل، چونکه سوزلاری بی دلیل ایمس دور. الله تعالی فرشته لارنی آدم عليه السلام گه تعظیماً و تکریماً سجده ایتماقگه بویوردی، آیه: **أَرَأَيْتَ الَّذِي كَرَّمْتَ عَلَيَّ [٦٢: الاسراء] دین و آیه: وَلَقَدْ كَرَّمْنَا بَنِي آدَمَ وَحَمَلْنَاهُمْ فِي الْبَرِّ وَالْبَحْرِ وَرَزَقْنَاهُمْ مِّنَ الطَّيِّبَاتِ وَفَضَّلْنَاهُمْ عَلَى كَثِيرٍ مِّمَّنْ خَلَقْنَا تَفْضِيلاً [٧٠: الاسراء] دین کرامت و فضیلت آدم و بنی آدم ثابت اولور، چونکه حکمت ادنی نی اعلی گه سجده قیلماقگه بیورولیشی نی تقاضا قیلور، نه اعلی نی ادنی گه. و هم فرشته لارگه اسماء تعلیمی و انبائی دین حضرت آدم نی فرشته لارگه فضیلت لاری و اعلم لیک لاری و تکریم و تعظیم گه استحقاق لاری واضح بیلینور، و علمالار عامه بشرنی عامه ملک دین افضل دیب دورلار، لیکن کتاب کافی ده [که معتبر کتاب لار دین دور] عامه بشر دین متقی و پرهیزگارلار مراد دور دیمیش، ورنه بشر اورته سیده کوب بی عمل لار باردور که چارپای (حیوان) کبی بل که اندین گمراه راق ایرورلار، بولارنی فرشته دین قنداغ افضل دیب بولور.**



پیغمبرلارنینگ برچه‌لاری عدالت بیرله متصف بلکه همه‌دین عادل‌راق دورلار و بعضی‌لاری بعضی‌لاریدین افضل‌دورلار، لیکن بو فضیلت حال و مقام و ثواب و مرتبه‌ده ایرور، اما خود رسالت و نبوت‌ده همه‌لاری برابر‌دورلار، چنانچه مسلمان‌لار مؤمن‌لیکده برابر، لیکن علم و حال و طاعات و درجات‌ده متفاوت‌دورلار همه پیغمبرلارنی اولوغی و مهتری و افضل‌ی حضرت محمد علیه الصلوة والسلام دورلار، اول ذات الله‌نینگ حبیبی و انبیالارنی خاتمی و نگینی دورلار.

رسول الله‌نینگ معراج لاری بیانیده

محمد کیم ایرور افضل و اصدق	ایرور بی‌شک شب معراجی برحق
حرم‌دین مسجد اقصی‌گه ناگاه	آلیب بارگانی دور آیت‌ده آگاه
هم اقصی‌دین سماغه باردی اول نور	بو سوزنینگ صدقیغه اخبار مشهور
سمادین یوقاری هر قیسی جاغه	عنایت ایلادی اول باصفاغه
بریغه صدقیمی‌ز، اقراریمی‌ز بار	ایمس هیچ قیسی ایش تنگریغه دشوار

شرح: حضرت محمد علیه السلام که افضل و اصدق انبیاء‌دورلار، الله اول ذاتنی کیچه‌سی معراج‌گه آلیب بارگانی حق‌دور و هیچ شک و شبهه یوق‌دور، کیچه‌سی حرم شریف‌دین ناگاه (فُوق قُوس‌دین) مسجد اقصی‌غه آلیب بارگانی آیه: **سُبْحَانَ الَّذِي أَسْرَى بِعَبْدِهِ لَيْلًا مِّنَ الْمَسْجِدِ الْحَرَامِ إِلَى الْمَسْجِدِ الْأَقْصَى** [۱: الاسراء] دین ثابت‌دور، و هم مسجد اقصی‌دین اول ذات پرنور آسمانغه بارغان‌لاری راست‌لیغیغه اخبار و احادیث مشهوره کیلگان‌دور، صحاح سته و انینگ شروح‌لاریده مفصل بیان ایتیلگان‌دور. آسماندین یوقاری اول جناب باصفانی الله عنایتی بیرله (هر قایسی بیرگه) آلیب بارگان بولسه همه‌سیغه تصدیق و اقراریمی‌ز بار، الله‌گه هیچ قیسی ایش مشکل ایمس‌دور.

مقام ســـــدره و نجم و ملک‌نی	بهشت و عرش و کرسی، نه فلک‌نی
اگر بیر کیچه‌ده کورساتسه نی کم	وگر بیر دمده کورساتسه نی شک هم



نچوک حکم ایلاسه قادر خدا دور چرا و چون دیمک قُل دین خطا دور
یقین بیلگیل ایننگ معراجین ای یار تنی بیرلان ایدی هم ایردی بیدار
حبیبین هر نچوک قیلسه سرافراز خدانی رحمتی کوبدور ایمس آز

شرح: اگر الله مقام سدرۃالمنتهی و یولدوزلار و فرشتهلار و جنت و دوزخ و عرش و کرسی و توقوز فلکنی بیر کیچهده کورساتسه قدرتی نی نیمه کم لیگی بار، اگر بیر نفس ده کورساتسه هم انده هیچ شک یوق دور، قنداغ حکم قیلسه خدای قادر و توانا دور بندهلاردین چون و چرا دیمک خطا دور.

ای برادر، مونی هم یقین بیلگیل که اول ذات معراج لاری اویغاغ لیکده جسم و جان بیرله ایردی (اویقوده ایمس) الله حبیبی نی هر رقم اعزاز و اکرام ایتیپ سرفراز ایتسه قادر دور و خدانینگ رحمتی کوب دور آز ایمس دور.

صحابه کرام وصف لاریده

صحابه نبی دور برچه سی حق	یمان یولده ایماس هیچ قیسی مطلق
ایرور هر قیسی سی نجم هدایت	خدا خلق اوغلیغه قیلغان عنایت
بهشتی دور الاردین قطعی اون یار	بشارت بیردی چون سلطان ابرار
ابوبکر و عمر دور سونگره عثمان	علی دور، طلحه دور هم عبدالرحمن
زبیر و بوعبیده بولدی اخبار	سعید و سعد دور آیغان بو اون یار
محمد کیم ایدی هادی عالم	بشارت بیردی اوچ فرزند یغه هم
بیری سی فاطمه دور هم خطیره	حسن بیرله حسین ایگی نبیره

شرح: رسول الله نی اصحاب لاری عموماً حق یولده بولوب هیچ قیسی لاری (مطلق) یمان یولده ایمس دورلار و هر قیسی لاری هدایت یولدوزی دورلار که الله مومنلار هدایتی اوچون عنایت قیلگاندور، أصحابی کالنجوم



بأیهم اقتدیتم اهتدیتم^۱. بو حدیثنی زرین حضرت عمر رضی الله عنه دین روایت ایتیبدور. فضائل صحابه ده کوب حدیثلار وارد بولگان دور و هم بعضی آیات قرآنیده توصیفلاری کیلگان دور. بیراز علم دین بهره سی بار کیشیگه معلوم دور صحابه کرام دین اون کیشی نی رسول الله قطعی جنتی لیک لاریغه بشارت بیرگاندور: حضرت ابوبکر، حضرت عمر، حضرت عثمان، حضرت علی، حضرت طلحة، حضرت عبدالرحمن بن عوف، زبیر بن العوام، ابو عبیده الجراح، سعید بن زید و سعد بن ابی وقاص دین عبارت دورلار [رضوان الله علیهم اجمعین] وینه رهبر عالم صلی الله علیه وسلم اوچ فرزندلاریغه هم جنتی دیب بشارت بیرگاندورلار، حضرت سیدتنا فاطمة الزهراء قیزلاری حضرت علی کرم الله وجهه نی خاتونلاری [کیم رفیعة القدر و شریفة] ایردیلار و حسن و حسین رضی الله عنهما که ایکی نبیره لاری دورلار. خطیره: خای معجمه و طای مهمله بیرله رفیعة القدر و شریفة معنی سیده دور، طای معجمه بیرله غلط دور.

که انسان افضلی بو بکر صدیق	نبی لار سونگیدین بیلگیل به تحقیق
که اندین سونگ علی بی شبهه ای جان	که اندین سونگ عمر دور سونگره عثمان
شفاعت خواهیمیز نینگ جانشینی	ایرور اول تورت امت نینگ نگینی
خلافت بولغای اوتوز ییلغه چه توز	رسول آیدی اوگور سام دنیادین یوز
الار وقتیده بوستان ایردی هر بیر	اول اوتوز ییلده شاه ایردی او تورت ایر
قیله آلمس الار دیک عدل کامل	الاردین سونگره هیچ عالم و عادل
بهشت معرفت گلزاری ایردی	اوشل تورت ایر که احمد یاری ایردی
سر مویی تخلف قیلما دی هیچ	رسول الله طریقین ایرته و کیچ
پیمبر قیلدی اوتوز ییلغه وعده	نچوک بولسون خلاف اول چار سعه
تمام آیتای دیسام امکانی یوقدور	الار نینگ وصفی نی هیچ سانی یوقدور

^۱ ابن ابی العز، شرح العقیدة الطحاویة، صفحه ۴۶۷.



شرح: پیغمبرلار دین سونگره انسانلارنی افضلی حضرت ابوبکر صدیق، سونگره حضرت عمر فاروق، سونگره حضرت عثمان و سونگره حضرت علی دورلار ^{رضی الله عنهم اجمعین}. بو سوزده شک و شبهه یوقدور اول تورت یار امت محمدی نی برگزیده و نخبه سی و شفاعت خواهیمیز رسول اللهنی جانشین و خلیفه سی دورلار، رسول الله بیر حدیثده [کیم امام احمد و ترمذی و ابو یعلی و ابن حبان سفینه مولی رسول الله ^{صلی الله علیه وسلم} دین روایت ایتیب دورلار^۱]. خلافت مندین سونگره و امتیمده اوتوز ییلغچه دور، اندین سونگره پادشاهلیک دور دیدیلار، اول اوتوز ییل ایچیده تورت یار مبارک خلیفه ایردیلا، الارنی وقتلاریده همه آباد چوللار بوستان ایردی، الار دین سونگره هیچ عالم و عادل کیشی الار دیک عدالت کامله قیله آلمس، اول ذاتلار رسول اللهنی یارلاری و معرفت بهشتی نینگ گلزاری ایردیلا، رسول الله توتگان یول دین هیچ وقت بیر سر موی تخلف و تجاوز قیلما دیلار. قنداغ الارنی رسول الله یوللاریگه مخالفتلاری بولسون، حال بوکه رسول الله خلافت صحیحه نی اوتوز ییلغچه وعده قیلیب، الار انده خلیفه ایردیلا، الار نینگ اوصافلارینی حد و حسابی یوقدور، همه سینی آیتماقگه امکانی یوقدور.

باریسی رهنمای راه دین دور

یتوشمس بلکه خاک پالاریغه

گمان یوقدور الارنی قربتیده

تخلف ایلا دی اول با صفاغه

خطا بولدی بناگه اجتهادی

جماعت اهلی دین آزدی دیمس میز

خطای مجتهد معفو دیدیلار

بو سوزدور اهل سنت نینگ جوابی

خطادین بلکه قیتیب ایردی اول جمع

صحابه نی باریسی پاک دین دور

الاردین سونگره هیچ کیم جالاریغه

کیشی بولسه نبی نی صحبتیده

صحابه بعضی سی کیم مرتضی غه

صواب ایردی اول ایرلارنی مرادی

خطا قیلغان بیلان یازدی دیمس میز

ائمه اهل سنت کیم ایدیلا

خطاغه بلکه تابتی لار ثوابی

بیتیب دور مجمع الاشیاده ای شمع

^۱ قال رسول الله صلى الله عليه وسلم الخلافة في أمتي ثلاثون سنة ثم ملك بعد ذلك ثم قال لي سفينة أمسك خلافة أبي بكر و خلافة عمر و خلافة عثمان ثم قال لي أمسك خلافة علي قال فوجدناها ثلاثين سنة قال سعيد فقلت له إن بني أمية يزعمون أن الخلافة فيهم فقال كذبوا بنو الزرقاء بل هم ملوك من شر الملوك. [۲۲۲۶ : ترمذی]



شرح: صحابه کرامنی همه لاری پاک دین پاک عقیده و دین یولینی راه نماسی ایردی لار و الار دین سونگره دنیاگه کیلگان تابعین و تبع تابعین و مجتهدین و علماء و اولیالار هر قنچه بلند مرتبه گه یتسه لارده صحابه لارنی مقام لاریگه بلکه خاک پالاریغه یتالمسلار، چونکه هر کیم رسول الله صحبت لارینی تاپیب فیض آلگان بولسه، الارنی درگاه الهی ده قرب لاریگه هیچ شک یوق دور، بعضی صحابه لارکه حضرت علی کرم الله وجهه غه بیعت قیلماقدین تارتینیب تخلف ایتدی لار، الارنینگ مقصد لاری راه صوابنی تاپماق ایردی ناخواست اجتهاد لاری خطاگه کیتدی بوگینه سهو و خطا بیرلان الارنی یازدی لار و اهل سنت و جماعت یولیدین آزدیلار دیمس میز. ائمه اهل سنت مجتهد خطاسی معفو بلکه خطاغه بیر ثواب بیرلور دیب دور لار، اهل سنتنی صحابه کرام ارالاریده گی مخالفت و منازعت لارگه حکم لاری شول دور، مجمع الاشیاء کتابیده بیتیب دور، بلکه اول جماعتی که حضرت امیرگه خلاف ایتیب ایردی لار، خطا لارینی بیلیب اندین قیتگان ایردی لار [یازگان و آزگان، اداشگان و خطا کیلگان معنی سیده دور].

امامت بیانیده

امامت شرط بولدی هر دیاره	حدود شرع تا تورغای قراره
یوروتگای تا شریعت نینگ قیامین	تقی قیلغای یمانلار اهتمامین
اگر چندی که سلطان بولسه فاسق	بویورسه ایش شریعتگه موافق
قیلورمیز جان و دل بیرله اطاعت	اوزی بولسه اگرچه بی قناعت
ایماسدور شرط امام اول بولسه معصوم	قیلیب دور شرط اما شیعه شوم
مسلمان عاقل و بالغ ایبر انسان	امامت شرطی بولدی ای مسلمان

شرح: هر مملکت و هر دیارگه بیر امام و خلیفه و یا پادشاه نصب ایتماق لاری ضروری دور تا حدود شرع شریف مستقر اولوب احکام شریعت برپا بولوب و یمان فاسق و فاجر و قطاع الطريق لارنی سوروش توروب سزالارینی بیرسه. امام پادشاه اگرچه اوزی فاسق و فاجر بولسه، لیکن امر و حکمی موافق شرع شریف بولسه انگا جان و دل بیرله اطاعت قیلورمیز [اگرچه اوزی بی قناعت و خواهشات نفسانیگه گرفتار بولسه] آیه کریمه: أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ [۵۹: النساء] بو سوزگه دلیل دور و بعضی صحابه کرام و تابعین عظام و



علمای فخام امویه‌لار نائب الحکومه‌سی حجاج ظالم‌نی آنقدر ظلم و تعدی‌سی بیرلان انکا اطاعت ایتیب انی علی‌هی‌گه خروج ایتماگان‌لاری هم بو سوزنی تقویه قیلور. امام‌نی گناه‌دین معصوم بولماغی اهل سنت و جماعت نزدلاریده امامت شرطی ایمسدور، اما (منحوس) شیعه‌لار امامت‌گه عصمت‌نی شرط دیب دورلار، اهل سنت امامت‌گه اسلام و عقل و بلوغ و رجولیت‌نی شرط دیب دورلار.

تنبیه: عقائد نسفی‌ده امام‌نی قریشی بولماغی‌نی شرط امامت‌دین سناپ‌دور و علامه شرحیده الأئمة من قریش^۱ حدیثینی دلیل ایتیب‌دور، اگرچه بو خبر واحد بولسه‌ده، حضرت ابوبکر صدیق رضی الله عنه انصارلار مقابل‌لاریده احتجاج ایتماگان‌لاریده هیچ بیر کیشی انکار ایتماگان‌لیگی‌دین اجماع قطاریگه کیریب‌دور، اما هاشمی و یا علوی بولماغی شرط ایمسدور، انتهى. لیکن کوب زمان‌لاردین بیری بو حدیث شریف‌گه عمل قیلینماس‌دین اکثر نقاط ممالک اسلامی‌ده متغلب‌لار زور بیرله پادشاه‌لیک و امامت‌نی قول‌گه آلیب حکومت سورماق‌ده‌لار، اما بولارنینگ ضدیگه چیقیب طاعتیدین گردن تابلاب بغاوت قیلماق درست ایمسدور، زیراکه امام احمد، ابو داوود، ترمذی روایت ایتیب‌دورلار، رسول الله ایدیلار: **أَوْصِيكُمْ بِتَقْوَى اللَّهِ وَالسَّمْعِ وَالطَّاعَةِ وَإِنْ تَأْمُرْ عَلَيْكُمْ عَبْدٌ فَاطِيعُوهُ**. [حدیث ۴۶۰۹ : سنن ابی داود]، [۲۶۷۶ : سنن الترمذی]، [۱۷۱۸۴-۱۷۱۸۵ : مسند احمد بن حنبل] و شو مضمونده باشقه حدیثلار هم کیلگاندور.

روا دور اقتدا فاجر‌گه قیل‌سنگ حدیث مصطفی‌دور یخشی بیل‌سنگ

اوقوسنگ یخشی لارنی کینیده لیک ثوابی بی‌عدد دور خصلت نیک

بیلورمیز برچه مسح موزه‌نی حق نچوک کیم قیلدی تعیین شاه اصدق

شرح: فاسق و فاجر‌گه اقتدا قیلیب نماز اوقوسنگ روا دور حدیث رسول الله هم [اگرچه ضعیف بولسه‌ده] شول مضمونده وارد بولگاندور، **صَلُّوا خَلْفَ كُلِّ بَرٍّ وَ فَاجِرٍ** [۶۶۲۳ : سنن البیهقی الکبری] یعنی هر یخشی و یمان (فاجر)‌نی آرقه‌سیده اوقوسنگ ثوابی کوب و یخشی‌راغ‌دور. موزه و مسحی و چاروق‌گه اوخشش نمرسه‌لار‌گه (شرائط مسح انده موجود بولسه) الار‌گه مسح موزه‌نی تعیین ایتیب و اوزلاری مسح تار‌تیب و انکا امر ایتدی‌لار، حضرت امام ابوحنیفه رحمه الله دین روایت دور، مسح موزه خصوصیده تا منگا تانگ یاروغی‌دیک دلیل روشن

^۱ ان رسول الله صلى الله عليه وسلم قام على باب البيت ونحن فيه فقال الأئمة من قریش ان لهم عليكم حقا ولكم عليهم حقا مثل ذلك ما ان استرحموا فرحموا وان عاهدوا وفوا وان حكموا عدلوا فمن لم يفعل ذلك منهم فعليه لعنة الله والملائكة والناس أجمعين. [۱۲۳۲۹ : مسند احمد]



کیلماگونچه مسح گه قائل بولمادیم، و حضرت امام مالک رحمہ اللہ دین اهل سنت علامہ سی نیمه دیب سورالگانده
«شَیخَین (ابوبکر و عمر رضی اللہ عنہما) نی دوست توتماق لیک، و ایکی کویاولاری (حضرت عثمان و حضرت علی
رضی اللہ عنہما) گه طعن دین ساقلانماق لیک، و ایکی ایاغ موزه سیگه مسح تارتماق لیک» دیب جواب بیردیلار.

کرامات اولیاء بیانیده

ایرور بر حق کرامت اولیادین	عنایت دور ولی لار گه خدادین
کرامت خارق عادت ایرور اسم	بولوبدور خارق عادت نیچه قسم
نبی دین خارق عادت نی تعیین	دیدیلار معجزه ای طالب دین
نبوت دین برون نی دیرلار ارهاص	مونی بیلسه کیراکدور ایها الناس
اگر صالح کیشی دین بولسه هر گاه	کرامت دین بولور بی شک و اشباه
کورونسه بول عوام مؤمن ایشیدین	معونت دور اوشل آیغان کیشیدین
اگر کورساتسه مونداغ کافر انسان	اول استدراج ایرور مانند شیطان

شرح: کرامات اولیاء الله حق دور، ولی لارغه الله طرفیدین بیر عنایت و مهربان لیک دور، کرامت دیب امر خارق
عادت ظهورینی ایتیلور، خارق عادت نیچه قسم دور، اگر پیغمبر مدعی نبوت دین کورولسه معجزه دییلور،
نبوت دین مقدم ظهورگه کیلگانینی ارهاص دییلور. ارهاص دیب بیر ایش اساسینی محکم و استوار قیلماقنی
ایتیلور [یقال ارهصه اسسه و اثبته] اگر خارق عادت صالح کیشی دین کورولسه بی شک و شبهه کرامتدین
بولور، و اگر بیر عوام مؤمن کیشی دین کورولسه اول کیشی نی عقیده سی محکم و ثابت بولوشیگه معونت و
کمک دور. اگر بیر خارقه کافر دین کورولسه انی استدراج دییلور، شیطان و ساحر و شعبده باز و دجال گه
بیریلادورگان بعضی خوارق لار کبی دور [استدراج اندک-اندک، کم-کم عذاب الهی گه یقین قیلماقنی ایتیلور]
آیه: سَنَسْتَدْرِجُهُمْ مِّنْ حَيْثُ لَا يَعْلَمُونَ [الاعراف: ۱۸۲] تفسیری کورولسون.

ولی اول عارف بالله بولسه ————— ایمان ایشدین قولى کوتاه بولسه



اوامرني هميشه قيلسه اول قُل	تقی قيلمه ديگانين قيلمسه اول
يراتقان تنگرينی قورقونچی دين نیز	قاو شبهه ديگاندين قيلسه پرهيز
تقی لذت ايلان شهوتگه ای يار	فرو هم کیتماسه اول يخشی کردار
بو تعريف لار کيشيگه بولسه صادق	ولی دور اول عقائدگه موافق

شرح: ولی الله ديب قویی دهگی صفتلارگه متصف بولگان ذاتنی ایتیلور:

۱. عارف بالله بولسه.
 ۲. يمان ایشلاردین قولى قیسقه [کوتاه] بولسه.
 ۳. اوامر الهی نی همیشه قیلیب، نواهی دین تارتینسه.
 ۴. [یراتگان الله نی خوفیدین] شبهه لیک نمرسه لاردین پرهیز ایتیپ اوزینی ساقلاسه.
 ۵. لذت و شهوت دنیاگه چوکوب کیتماسه.
- شو تعريف لار هر کیمگه صادق کیلیب [انده تاپیلسه] اول کیشی نی موافق عقائد اسلامیه ولی ديب ایتیلسه بولور.

شریعت سیز کیشی اوچسه هواغه	کونگول بیرمنگ انینگ دیک خود نماغه
هواغه اوچسه مانند چبیان دور	انی هادی دیمه شیطان دین دور
شریعت سیز کیشی گر یوتسه اوتنی	هوا اور تاسیده مینسه بولوتنی
قچان تاپغان ایرور قربت هیدینی	ولی بیلمنگ تقی انداغ گدینی
بولوبدور مونداغ ایشگه کافریدین	نچوک کیم بولدی سحر سامریدین
ایشیتگیل بول که فرعون امریدین نیل	قوییدین یوقاریگه آقدی بی قیل
مونی بیلگیل که هندوستانده حالا	اوجارلار کافر سَنَاسی بالا
شریعت حکمین ایتمای استقامت	تعجب ایش لاری بولمس کرامت



کرامت موندین اوتمس ایهاالناس

شریعتنی کیشی کیم توتسه خوب پاس

بولورمی موندین آرتوق خرق عادت

خلاف نفس استکمال طاعت

نعوذ بالله اول سوز کوب یماندور

کیشی دیسه ولی نی غیبدان دور

مگر بیلدورسه تنگريم بعضی ایش دین

نبی هم بیلماگای اوشبو روش دین

بو سوزده بولمغای بیر ذره ربی

خدانی خاصه سی دور علم غیبی

اگر بیرسه خبر یا اهل جن لار

یقین بیل غیب ایشدین فال بین لار

بولوب کافر قرا قیلغای یوزینی

کیشی چین دیسه اول باطل سوزینی

خدایم ساقلاغای بو رأی بد دین

نعوذ بالله انداغ معتقد دین

شرح: شریعت اوامریگه مخالفت ایتیب یورگان کیشی هواده اوچوب یورسه انداغ خودنماغه دل بیریب اعتقاد ایتماغیل، زیراکه بو اوچماغی نی اهمیتی یوقدور. چین [ذباب] گه اوخشاب دور انداغ کیشی نی هادی و راهبر دیمه بلکه دین یولیدین چیقارگوچی شیطان دور، اگر شریعت سیز کیشی اوتنی آغزیگه یوتوب هوا اورته سیده بولوتگه مینیب یورسه قچان قرب الهی هیدینی تاپگان دوستلاری دین بولور ینه مبادا انداغ محبت هیدی دین بی بهره [ظاهر فریب] مشک بی بوی نی ولی دیب بیلمنگ [کدی فعیل وزنیده مشک بی بوی نی ایتیلور گدی المسک و کان لاریح له فهو کدی و کدی. المنجد] یعنی ظاهری یخشی باطنی یمان [نامی اولوغ سفره سی قوروغ] مشک بی بوی کبی کیشیلاردین هر قنچه کراماتگه اوخشش [استدراج] لار کورونسه هم انی ولی بیلمنگ. شول توجیه مصرع اولگه هم مناسب دور [شارح «کدی» ایشک توقومی توشماسون دیب بیر قریش یاغاچ نی ایشک قویروغیدین تارتیب قویورلار دیگانی صریح غلط دور.]^۱ گاها مونداغ ظاهری کرامت کبی ایشلار کافرلاردین هم وجودگه کیلیب دور، چنانچه سامری نی سحرنا ایشیدین بنی اسرائیل گه یوزلاندی، مختصر قصه سی شول دور: موسی علیه السلام وعده الهی گه بناء طور تاغیگه بارگان لاریده سامری دیگان منافق (که فرعون لار دریاگه غرق بولوشی آلدیده جبرئیل علیه السلام آتلاری ایاغی باسگان تفراغدین بیراز آلیب ساقلاب

^۱ کدی عثمانلی ترکی ده مشیق (هزه، پشک) معنی سیده دور، یعنی مشیق صفت ظاهری ملائم باطنی فریب دین توله حيله گرنی ولی دیب بیلمنگ، دیب توجیه ایتسه بولور. یازوچییی نانیق کیشی. شارح



قیوب ایردی) فرعونى لار خاتونیدین آلیب کیلینگان زیوراتنى بیغیب اوتگه سالیب ایریتیپ اندین بیر بوزاک [گوساله] صورتینی یسادی، انی اوستیگه اوشل تفراغدین ساجدی، اول بوزاکدین آواز چیقدی، بنی اسرائیلگه ایدی، شو عجل [گوساله] سیزلارنى و هم موسىنى تنگرى سى دور، لیکن موسى یادیدین فراموش قیلیب کیتیپ دور هر قنچه حضرت هارون علیه السلام الارگه وعظ قیلیب سیزلارنى پروردگارینگیز کوب مهربان الله دور مونگه چوقونمانگ (عبادت قیلینگ) لار دیسه هم اکثرلاری اول بوزاکغه چوقوندیلا و حى الهى بیرله موسى علیه السلام بو واقعه دین خبر تاپیب غضبلاری کیلگان حالده غمگین قیتیپ قوبلارینی سرزنش و هارون علیه السلامنى عتاب قیلیب و سامرى گه (تاکه حیات سن مردم دین بالکل جدا حیات کیچیریب هر کیم یقین کیلسه منی اوشلامه دیماقگه گرفتار اول دیب) دعا قیلدی لار و بوزاکنى کویدوروب گلىنى دریاغه ساووروب یوباردیلار (چونکه بوزاک تفراغ ساچگانده گوشت و پوستگه ایلانیب جان کیریب ایردی) بو قصه سورۀ طه ده مفصل مذکور دور، تفسیرلارگه مراجعه ایتیلسون و هم نیل دریاسی فرعون امری بیرلان یوقاریگه قراب آفگانى حکایت ایتیلگاندور و مونى هم بیلماق کیراک که حالا هندوستانده [ناظم عصرلاریده] سناسى آتلى ریاضت کش کافرلار هواگه اوچورلار لیکن مونى بیلماق کیراک که هیچ کیشی تاکه شریعت حقگه مؤمن و مستقیم بولماگونچه تعجب آور و کرامت نما ایشلاری کرامت سنالمسدین بلکه استدراج دیب ایتیلور. الله تعالى کافرلارنى هم بو دنیاده درگاهیدین مایوس قیتارمغای، اما آخرته عذاب ابدیگه گرفتار اولورلار، هر کیم احکام شرع شریفنى رعایت ایتیپ انی پاسینی ساقلاسه کرامت موندین اوتمايدور و هر کیم نفسیگه خلاف ایتیپ و طاعت و عبادت لازمهنى برکمال ادا ایتسه، موندین آرتوق خارق عادت و کرامت بارمى؟ هر کیم ولى لارنى عموماً و یا خصوصاً (اوز-اوزیچه) غیبنى بیلور دیسه، بو سوز کوب یماندور، مونداغ سوزدین خداگه پناه ایلته میز، پیغمبرلار هم [بعضی ایشلارنى الله اوزی بیلدورماسه] علم غیبنى بیلمسلا، آیه: **عَالِمُ الْغَيْبِ فَلَا يُظْهِرُ عَلَىٰ غَيْبِهِ أَحَدًا إِلَّا مَنِ ارْتَضَىٰ مِنْ رَسُولٍ** [۲۷: الجن] بو سوزگه دلیل دور.

ترجمه: الله غیبنى بیلگوچی دور، پس هیچکیمنى اوز غیبیگه خبردار قیلمایدی مگر (اوزیغه) مقبول بولگان رسولىنى. اگرچه بو آیتده تنها رسول مستثنى بولسه ده اولیاء الله الارنى (الله بیلدیرمغای بیرلان) بعضی مغیباتنى بیلماقلاریگه خلاف ایرمس، چنانچه علامه الوسى تفسیریده اشارت ایتیپ دور، تفسیر شبیر احمد صاحب چاپ کابلده علوم غیبیهنى ایکیگه تقسیم [یا جنس اکوان دین و یا جنس احکام دین دیب] علم کلیات و اصول اکوان غیبیهنى اللهگه خاص دیب علم کلى احکام غیبیهنى رسول الله گه بیریلگانینی و جزئیات منتشره و متفرقهنى حسب استعداد کوب کیشی لارگه عطا قیلینیپ رسول اللهگه حصه وافرة بیریلگانى ذکر ایتیلیب دور.



اما علم غیب کلی خدانی خاصه سی ایکان لیگی ده هیچ شک و شبهه یوقدور. اگر فالبین رمال و یا اجنه نی تسخیر ایتگان اهل جن لار علم غیب دین خبر بیرسه لار هر کیم الارنی باطل سوزینی چین دیب اعتقاد ایتسه یقین بیلگیل که اوزی کافر بولوب (یوزی قرا) شرمنده بولغای.

تنبيه: شرح عقائد نسفی ده: وتصديق الكاهن بما يخبر به عن الغيب كفر لقوله عليه السلام من اتى عَرَفًا او كاهنًا و صدقه بما يقول فقد كفر بما انزل الله على محمد. [رواه الحاكم و احمد عن ابی هريرة رضی الله عنه] ^۱ دیب دور.

کاهن دیب اجنه واسطه سی بیرلان وقائع آینده دین خبر بیرگوچی نی ایتیلور، اما عراف اوتگان وقائع دین [اوغورلانگان و یوقالگان نمرسه لار دین] خبر بیرگوچی نی ایتیلور.

بو حدیث ضمنیگه رمال، تولگاچی، پریخان و غیرهم لار هم شامل دور، همه سی غیب دین خبر بیرور، منجم هم کیلادیگان حوادثی بیلماق دعوی سینی قیلسه کاهن حکمیده دور.

تذیل: بعثت رسول الله دین سونگره آیات قرآنی دلالتی چه همه اجنه و شیاطین لار آسمانگه چیقیب سوز اوغورلاماقدین توسولدیلا، فرشته لار شهاب ثاقب بیرلان اوروب الارنی هیدارلار، آیه: وَجَعَلْنَاهَا رُجُومًا لِلشَّيَاطِينِ [ه: تباری]، إِنَّا زَيْنَّا السَّمَاءَ الدُّنْيَا بِزِينَةِ الْكَوَاكِبِ [٦] وَحَفِظْنَا مِنْ كُلِّ شَيْطَانٍ مَّارِدٍ [٧] لَا يَسْمَعُونَ إِلَى الْمَلَأِ الْأَعْلَى وَيُقَذَّفُونَ مِنْ كُلِّ جَانِبٍ [٨] دُخُورًا وَلَهُمْ عَذَابٌ وَاصِبٌ [٩] إِلَّا مَنْ خَطِفَ الْخَطْفَةَ فَأَتْبَعَهُ شِهَابٌ ثَاقِبٌ [١٠: الصافات]، وَحَفِظْنَاهَا مِنْ كُلِّ شَيْطَانٍ رَجِيمٍ [١٧] إِلَّا مَنْ اسْتَرَقَ السَّمْعَ فَأَتْبَعَهُ شِهَابٌ مُبِينٌ [١٨: الحجر] بو سوزگه دلیل دور. [فالبین لار سوزینی چین دیب اعتقاد قیلماقدین] خدادین پناه سورایمیز، بو ایمان رای و عقیده دین اوزی ساقلاسون. (نعوذ بالله...) بیتی کوب نسخه لارده یوق دور.

یقین بیلگیل که بعضی نامسلمان	دیمیش وقتی که قربت تابسه انسان
کوتارور حق شریعت حکمین اندین	بولور یوزی قرا مونداغ دیگان دین
بو باطل سوز ایروور قول ملاحد	شریعت گه ایرور اول فرقه جاحد
شریعتگه کیشی کیم بولسه منکر	گمان یوقدور بولور البتّه کافر



الار بیزار ایـرور عجب و ریادین

کیشی بولماس مقرب انبیادین

خدا هرگز کوتارمس اوزگه لاردین

کوتار یلمادی اولگونچه لاردین

شرح: یقین بیلگیل که بعضی نامسلمان لار انسان قربت تاپیب خداگه یقین بولسه، حق تعالی شریعت حکمین انی اوستیدین کوتاریب (غیر مسؤول) ودر خوان قیلور دیب دور، البته مونداغ ناروا سوزنی ایتماغدین یوزی قرا بولور. بو باطل سوزلار ملحد بی دین (کافر) لارنی سوزیدور، الار شریعت و دین گه منکر دورلار، هر کیم شریعتگه منکر بولسه (البته) کافر بولماغیده گمان یوقدور. بارگاه الهی گه هیچکیم پیغمبرلاردین مقرب بولمس و الار عجب و ریادین بیزاردورلار تا اولگونچه شریعت احکامی الار دین کوتار یلمادی، البته هرگز باشقه لاردین کوتار یلمس.

بیر حدیثنی ترجمه سی

حبیب حق رسل سلطانی ایردی

محمد کیم محبت کانی ایردی

وضو ایلارگه یوق ایردی مجالی

کیتار وقتیده انداغ بولدی حالی

دیددی یا عائشه قیلدور طهارت

ایشیتتی چون اذان با بشارت

جماعت غه بارور غه ایلادی جزم

طهارت دین سونگ اول شاه اولوالعزم

عرق سیلان ایتیب گل دیک یوزیدین

قدم باسمای توروب کیتتی اوزیدین

ینه قوپدی که تا تاپغای جماعت

اوزیگه کیلدی باز ایتدی طهارت

اوزیدین کیتتی درمان یوقیدین باز

قدم باسمای توروب اول صاحب راز

خلاف ایتمادی بیر قیل ایغانیدین

نفس چیقغونچه تا قوتلوغ تنیدین

وضو قیلدی اوزیدین کیتتی اوچ یول

ایننگ دیک مصطفی قورقونچی دین اول

بولور قورقونچی آرتوق عشرتی کم

سویوک لوک بنده سی تا بولسه محرم

مبارک دل لاری خوف ایله قان دور

اگر چه انبیا بی ششک امان دور



ولی امت اگر غوث زمان دور ایسان کیتماغی آخر درگمان دور
 اگر عالم یاروسه سن سبب دین قویاش دیک تیتره دائم خوف رب دین
 کیراک عالی قدمنی خوفی کوبراغ بویوک بیردین ییقیلغان قالمغای ساغ
 اولوغ توتمس کیچیک دیک مذهبین کینگ تیوه تایماغی ایرمس قوی بیلان تینگ
 توهم لیک بولور افعالی خوب نینگ سفرده خوفی کوب دور مالی کوب نینگ
 توهم دین بیراغ غفلت لی بنده کیتار غصه بیلان غم اوخلاغانده

شرح: حضرت محمد علیه السلام که کان محبت و حبیب حق و انبیالار سلطانی ایردیلار، شو قدر قرب و منزلت بیرله آخر حیات و کیتار وقتلاریگه یقین حاللاری شونداغ بولدی که طهارت قیلگانی قدرت و مجاللاری یوق ایردی وقتی که اذان بشارت اعلاننی ایشیتدیلار دیدیلار، ای عائشه منی طهارت قیلدور! اول پیغمبر اولوالعزم طهارت دین سونگ جماعتگه باریشگا عزم قیلیب قدم قویوب قویماق اوزلاریدین کیتیپ ییقیلدیلار، گل دیک یوزلاریدین تیر آقیب کیتدی، قیته دین طهارت ایتیپ ینه شاید جماعتنی تاپسام دیب توروب قدم قویماسدین (اول صاحب راز) درمان یوقیدین اوزلاریدین کیتدی لار، الله نینگ سویوک لیک بنده سی هر قنچه قریب آشیب محرم راز اولسه اوشنچه قورقوشی آرتیب، عیش و عشرتی کم بولغای، اگرچه انبیا علیهم السلام سوء خاتمه دین [بی شک] امان دورلار (و همه لاری جنتی ایرورلار) لیکن خوف الهی دین مبارک دللاری قان دور، اما امت اگرچه غوث و قطب زمان دور (آخر چاغده) ایماننی ایسان-امان آلیب کیتماغی گماندور، اگر سنی علم و کمال و فضل و حالینگ دین آفتاب کبی همه عالم یاروسه ده (باید همیشه سن) الله خوفیدین تیتراپ قلتیراغیل و التجاده بولغیل [زیراکه حضور الهی حضرت اطلاق دور] نیمه خواهلاسه قیلور اول بارگاهده قید و بست یوقدور، هر کیم نینگ مرتبه سی بلند بولوب عالی قدم بولسه قورقونچی کوپراغ بولماغی کیراک، زیراکه بلند بیردین ییقیلغان کیشی ساغ و سلامت قالمغای [عالم و مرشد] اولوغ مقام ایگه سی کیچیک لاردیک مذهبی نی کینگ توتمسلیگی کیراک و نهایت احتیاط یولینی اوشلاماغی لازم، چونکه تیوه نی تاییلماغی [کیچیک حیوانلار] قوی، ایچکی تاییلیشی بیلان تینگ و برابر ایرمس «زَلَّةُ الْعَالَمِ زَلَّةُ الْعَالَمِ»^۱ مشهور مقاله دور، عالم و مرشدگه مردم عوام ایرگاشور. یخشی عمل لیک [عالم متقی] کیشی لارنی قورقونچی کوبراغ بولور، چونکه [قافله ده]

^۱ ترجمه: عالم (بیلیمدان) لغزشی و خطاسی عالم (دنیا) لغزشی و خطاسیگه سبب بوله دی.



مالی کوب راغ مسافرنی خوفی کوب بولور، اما غفلت باسگان [بی عمل] کیشی قورقونچ دین اوزاغ دور (غم و اندوه اوخلاگانده کیتگان کبی) غفلت لیک کیشیده هم قایغو بولمس، چونکه اول معنوی اویقوده دور.

تنبیهان [ایگی تنبیه]

بیرینچی: رسول اللهنی اوچ بار وضو قیلیب اوچ بار هوشدین کیتگان لارینی «مدارج النبوت» ده شیخ عبدالحق محدث دهلوی هم ذکر ایتیبدورلار، بعضی احادیثده روایت بولوبدور.

ایکینچی: دنیاده اولیالار تا قیامتکجه باردورلار، اینگ کتّه لاری قطب [غوث]، سونگره افراد، سونگره امامان، بعد اوتاد، پس ابدال دورلار؛ چنانچه محی الدین عربی فتوحاتده ذکر ایتیبدور الله شول ذاتلار دعا لاری سببی دین یمغور یا غدورماغی و رزق بیرماغی و دشمن قرشی سیده ظفر بیرماغی قوییدهگی حدیثلار دین بیلینور. چنانچه طبرانی عبادۃ بن الصامت رضی الله عنه دین روایت ایتیبدور: «الْأَبْدَالُ فِي أَمْتِي ثَلَاثُونَ، بِهِمْ تَقُومُ الْأَرْضُ وَ بِهِمْ تَمْطَرُونَ وَ بِهِمْ تَنْصُرُونَ» و هم طبرانی عوف بن مالک دین روایت ایتیبدور: «الْأَبْدَالُ فِي أَهْلِ الشَّامِ، وَ بِهِمْ يُنْصَرُونَ، وَ بِهِمْ يُرْزَقُونَ» [حدیث ۱۰۲۳۷ - ۱۴۵۴۷: المعجم الکبیر الطبرانی] و باشقه احادیث و آثارلار هم کیلگاندور، چنانچه جلال الدین سیوطی «الخبر الدال علی وجود القطب والاوتاد والنجباء والابدال» رساله سیده مفصلاً بعضی احادیث و آثارلارنی کیلتوروب بولارنی دنیاده وجودلارینی اثبات ایتیبدور؛ و هم امام مناوی «فیض القدر» ده و عبد الوهاب شعرانی «الیواقیت و الجواهر» ده و خواجه محمد پارسا «فصل الخطاب» ده، بو ذاتلارنی وجودلارینی و عالم تصرفی الله اذنی بیرله شولار قوللاریده لیگی و هر بیرلاری اولوب ویا معزول اولسه لار عوضلاریگه باشقه کیشی منصوب اولیشینی ذکر ایتیبدور.

اجل نینگ بیانیده

اجل البتّه بیر دور اوزگا بولمس	اولار هر ذی نفس هرگز اول اولمس
قایو قُل گه اجل نینگ وقتی بیتسه	قوتولمس هر نیچه کیم حیلّه ایتسه
کین قالمس اجل ای ابن آدم	یتوشسه ساعتی یا ایلگاری هم
کیشی نینگ ایلگیده هم اولسه هر جان	اجل بیرله اولوب دور بیلسه انسان
قایو باعث بیلان هر جان اولوب دور	اجل دین دور قضا مونداغ بولوب دور



شرح: اهل سنت و جماعت نزدلاریده اجل بیر دور اوزگا بولمس و تغییر تاپمس هر ذی روح (جانلیک نمرسه) اولور، اما تنگری تعالی هرگز اولمس و [حی لایموت] دور و حیاتی بیزلارگه اوخشش جان بیرله ایمسدور. آیه: **كُلُّ نَفْسٍ ذَائِقَةُ الْمَوْتِ** [آل عمران: ۱۸۵] هر ذی روح اولماغیگه دلیل دور، قیسی بندهگه اجل وقتی یتوشسه، هر قنچه حیل و نیرنگ قیلسه اجل قولیدین قوتولمس، بو همهگه معلوم و هویدا و مشاهد دور [ای آدم اوغلی] اجل وقت مقرره سیدین نه کیین قالور، نه ایلگری کیلور، آیه: **إِذَا جَاءَ أَجْلُهُمْ لَا يَسْتَأْخِرُونَ سَاعَةً وَلَا يَسْتَقْدِمُونَ** [الاعراف: ۳۴] دلیل واضح دور. بیر کیشی بیر انسان قولیده اولسه بیلماق کیراک که اوز اجلی بیرله اولودور، هر جانلیک نمرسه قیسی باعث و سبب بیرله اولسه اجلی یتیب اولودور و قضا و قدر شونداغ بولودور دیب اعتقاد قیلورمیز.

سوال منکر و نکیر و عذاب قبرنینگ بیانیده

عذاب قبر کافرلارگه دور چین	کورار گورنی عذابین بعضی مومن
بیتیک کوب نسخه مشهور ایچینده	کیلور ایکی فرشته گور ایچینده
سورار کیم دور خدا بیرله رسولینگ	نه دور دیرلار ینه دینینگ و یولینگ
اگر کیرسه فرشته لار غضب دین	چیقار اوت بورنیدین، آغزی و لب دین
اگر هیبت بیلان قیلسه نظاره	بولور غمگین کونگول لار پاره-پاره
دیگای ای آدمی بولدور سنگا جای	جوابین بیرماسنگ وای اوستیگه وای
اورار گری بیلان هم اول ایکی یار	ایشیتور انس و جن دین اوزگا جاندار
الارنینگ ضربیگه تاب ایتماگای تاغ	نچوک طاقت قیلور بیر مشت تفراف
تولار دوزخ ساریدین قبر ایچی دود	پشیمان انده هرگز قیلماغای سود
عنایت ایلاسه دانای اسرار	کیرار گورگه ملایم اول ایکی یار
دیگای لار کیرسه لار خوف ایتمه مندین	سورار لار مهربان لیغ بیرله اندین
اگر بیرسنگ جواب با صوابی	آچار جنت دین اول منزلگه بابی



جهان نینگ شوقی یادینگدین چیقار پاک

قرانغو گور بولور انداغ فرحناک

یاتورسن ینگى اویلانگان بیگیت دیک

کونگولده غصه قالمس بیر چیگیت دیک

خدادین اوزگه کیم بیلگای بارینی

که موندین سونگره غی نعمت لارینی

شرح: عذابِ قبر کافرلارگه چین و راست دور و بعضی مؤمن گنهکارلار هم عذابِ قبرنی کورورلار (روح و جسد هر ایکسی معذب اولور، بعضی لار تنها روح معذب اولور دیب دورلار) کوب مشهور کتابلار روایتی بیرلان احادیث صحیحهدده کیلگان دور و بیتیلگان دور، وقتی که اولوکنی قبرگه قویوب آدم لار نیچه قدم قایتسه لار، ایکی فرشته گورگه کیریب سورارکه: سنی یراتگان پروردگارینگ کیم دور؟ و پیغمبرینگ کیم دور؟ و دینینگ و یولینگ قیسی دور؟ اگر فرشته لار قبرگه غضب یولیدین کیرسه لار آغوز و بورون و لب لاریدین اوت چقیب تورور، اگر هیبت بیرله قراسه لار غمگین کونگولار پاره-پاره بولور، الار ای آدم اوغلی سنی جایینگ شول قبر دوزخ اثری دیرلار، اگر جواب باصواب بیره آلماسنگ حالینگه وای اوستیگه وای دور، اول ایکی یار گزی بیرلان چنان اورورلارکه انس و جن دین باشقه همه حیوان لار آواز لارینی ایشیتیب بیلورلار، الارینگ اورماغ لاریگه تاغ (شونچه قتیغ لیگی بیرلان) طاقت کیلتورماگای بیر مشت تفراغ آدمی زاد نچوک طاقت ایتسون قبرگا دوزخ تامانیدین دریچه آچیلیب ایچی توتونگا تولور، اول وقت پشیمان بولماقنی فائده سی یوقدور. دانای اسرار (الله) عنایت قیلسه اول ایکی فرشته گورگه ملایم لیک بیرلان کیریب بیزدین قورقماغیل دیب مهربانلیک بیرلان اندین سوال ایتگای لار، اگر جواب باصواب بیرسنگ جنت طرفیدین بیر ایشیک آچیلیب قرانغو گور فرحت و خوشلیک جایگه ایلانیب دنیا عیش و عشرتی و تمام لذاتی بالکل یادینگ دین چقیب بیر چیگیت چه غم و غصه کونگولده قالماغای ینگى اویلانگان [خاتون آلگان] بیگیت دیک عشرت و ناز و نعمته یاتورسن موندین کیینگى الله طرفیدین بیریلادورگان نعمت لارنی بارینی خدادین اوزگه هیچ کیم بیلمس.

مناجات

هوای نفس ایله آواره دور من

الهی بنده من، بیچاره دور من

مسلمان اوغلی قیلمس ایشلاریم بار

ایرور من برچه نقصانیمغه اقرار

تولای یار و برادرلار زبونوی

ایرور من بنده لارنی سرنگونی

گناهیم ظاهریم دین کوب نهانده

منینگ دیک عاصی بولغایمو جهانده



عمل هم یوق اگر بولسه ریا دور

نیتای چون عین عقلم بی ضیا دور

بولوب من معصیت دریاسیغه غرق

اگرچه من یمان قُل پای تا فرق

تیا نیب من سنی غافر لیگینگ گا

ولی صادق ایرور من بیر لیگینگ گا

اوگورسه یوز همه قوم و قرینداش

لحدگا کیرسه بو یلغوز غریب باش

یتوشسه سورغالی ایکی فرشته

تحیر بولسه جان غم سرشته

نچوک کیچگای غریب بندهنگنی حالی

سن آسان ایتماسنگ انداغ سؤالی

تیلیمگا جاری قیلغیل ربّی الله

دیسسه مَن ربُّک ایکی عبد درگاه

میننگ قُل من دیگانیمدین نچوک سود

اگر سن قیلماسنگ قُل لوق آتین جود

اوزونگ بندهم دیگیل ربّیم دیگانده

اگرچه عاصی دور یارب بو بنده

منی بنده ایتیب بیرکیت بو بنده

الهی لطف قیل موننده و انده

شرح: ناظم رحمه الله بو مناجاتنی اوزلارینی پستگه اوروب هضمًا للنفس ایتیب دورلار، ورنه اول ذات عالم باعمل ایردیلا و هم بیزلارگه تعلیم اوچون بو سوزلارنی ذکر ایتگان دورلار. الهی بیچاره غریب قولونگ من خواهشات نفسانی ایله آواره و سرگردان دورمن، تمام نقصان و کمچیلیک لاریمگه اقرار دورمن، مسلمان اوغلی قیلمایدورگان ایشلاریم باردور، بندهلار ایچیده سرنگون و اویاتلیگی من، کوب یار و برادرلارنی زبونی و خوار و ضعیفی دورمن، جهانده من دیک گنهکار بارموکیم، گناهیم تاشیمدین ایچیمده کوب، قنداق قیلای و نیمه چاره ایتای، چونکه عقلم کوزی بی ضیا دور، یخشی عملیم هم یوق، اگر بالفرض بولسه ریا آلود دور، اگر من یمان قُل باشدین ایاغ معصیت دریاسیگه چومولوب کیتسمده، لیکن سنی وحدانیتینگگه تصدیقیم بار، و غافر لیگینگگه تایانیب اعتماد ایتیب من، وقتیکه بو یلغوز غریب باشیم گورگه کیرسه، و قوم و قرینداشلار هم (دفن دین سونگره) یوز اوگوروب کیتسهلار، جان غمناکیم حیران بولسه، ایکی فرشته هم سورغالی یتوشسه، الهی سن انداغ قتیغ سوال جوابینی آسان ایتیب [تیلیمگه] جاری قیلماسنگ، بندهنگنی حالی قنداغ بولغای، ایکی فرشته [که بنده درگاه الهی دورلار] قبرده [مَن ربُّک] دیب سوراگانلاریده [ربّی الله] دیماقنی تیلیمگا جاری قیلغیل، اگر سن قُل لوق آتینی منگه عطا قیلیب منی قلم و بندهم دیماسنگ منی قل من دیگانیمدین نیمه فائده باردور، یارب اگرچه بو



بنده عاصی و گنهکار دور، رَبِّیم الله دیگانه اوزونگ بندهم دیگیل [و مایوس ایتماگیل] الهی دنیا و آخرته بو قلونگه لطف و مرحمت ایلاب من دیک عاصینی بنده لارینگ قطاریده سناپ بو قل لوک بندی و رشته سیغه محکم و ثابت ایتیپ انگا پابند قیلگیل.

تنبيه: منکر و نکیر سوال لاری عربی بولور، و هر کیم اوز تیلی بیرله سورالماگی هم منقول دور و سریانی تیلیده سورالماغینی جلال الدین سیوطی «شرح الصدور» ده ذکر ایتیپ دور و صاحب ابریز هم سریانی لسانیده بولوب و بو تیل فرشته و روحانیون تیل لاری ایکانینی و الفاظ سوال و جوابنی عیناً سید عبدالعزیز دباغ دین نقل ایتیپ دور.

اگر چندی که گورسيز اولسه انسان	سورالور البته بی شک و نقصان
اگر دریاده اولسون یا آسیلسون	عذاب ایتسه بنی آدم نه بیلسون
درنده آدم اوغلین قیلسه خوراک	گمان یوقدور سورار قارنیده ای پاک
اگر بنده معذب بولسه ——— انده	قالور تویمای بو ایشدین اول درنده
نچوک قیلسه ایرور قادر و ناصر	بو بیرده بنده سی نینگ عقلی قاصر
نه کیم ایدی خدایینگ یا پیمبر	انی محکم توتوب فکر ایتمه دیگر

شرح: بیر کیشی اولسه اما قبرگه (بنا بر سببی) دفن ایتیلماسه، مثلاً دریاده آقسه و یا دارگه آسیلسه و دفن ایتیلماسه، و یا درنده بیسه و شونگه اوخشش حالتلارده بی شک و شبهه الار سورالور، الله الارنی عذاب ایتسه، بنی آدم نه بیلسون، و درنده قارنیده سوراسه قادردور و اول بندهنی انی قارنیده عذاب ایتسه اول درنده (عذاب دین) بیخبر، (بیلما و انگلامای) قالور. (تویمای) لفظی بیلما و انگلامای معنی سیده دور. اگر (تویمای) نی مشهور معنی گه آلیب بارساک اول درنده (عذاب سببی دین) قارنی تویمای آچ قالور دیگان بولور. الله بنده لارینی هر ایکی دنیا ده همه حالتده تحت تصرفیده ساقلاب الار اوستیگه نیمه حکم یورغوزسه قادردور، و الارگه (امور مشروعه ده) ناصر و معین دور، قضا و قدر و علوم غیبیه گه متعلق جای لار بنده سی نینگ عقلی قاصر و کوتاه دور، شو اوچون هر نیمه کیم الله جلّ شأنه و یا پیغمبری طرفیدین ایتیلگان و خبر بیریلگان بولسه، انی محکم توتوب اعتقاد ایتماق لازم دور و اطرافیده باشقه فکر و خیال لارگه بارماق یرامایدور، زیرا که علم غیب خاصه الله دور، خواه لاگان پیغمبریگه بیلدورسه بیلور، قوروق فکر و عقل بیرله بیر جایگه بیتیب بولمس.



تنبيه: عذاب قبرنی انس و جن بيلمسليگی و باشقه حيواناتنی بيلمسليگی احاديث صحيحه ده ثابت دور، اما بيگان درنده قارنیده معذب بولگانیدین بی خبر قالماغی (اگر ثابت بولسه) کمال قدرت الهی که دلالت قیلور.

قیامت حق لیگی بیانیده

قیامت حق ایروور ای آدمی زاد خدا قرآن ایچیده قیلدی کوب یاد
بولور قدرت بیلان تفر اغیمیز تن کیرار جان قیته دین بی شبهه و ظن
تنینگ هر تورلی بولغان بولسه برهم قیلور بورناغی دیک خلاق عالم
خدا هیچ بیرده یوقنی ایلادی بار یراتسه قیته دین ایرمس بو دشوار
ایروور قادر نچوک کیم حکم قیلدی تیریل دیگاچ همه عالم تیریلدی

شرح: قیامت حق ایروور الله قرآن کریم ده کوب جایده یاد ایتیب دور (حضرت اسرافیل صور تارتسه لار) الله امری و قدرتی بیرله تفر اغیمیز تن و جسد بولور، بی شک و شبهه اول جسدکه اولگی روحی کیرور. تنینگ و جسمینگ هر رقم تیتیلیب درهم و برهم بولوب کیتگان بولسه ده عالم نی یراتگان پروردگاریمیز انی ایلگری کی (کما کان دنیاده گی صورتی) دیک قیلور، چونکه دنیا و آخرت و مافیهما من المخلوقاتنی بار ایتیب، عالم وجودکه چیقارگان ذات قیامت ده ینه الارنی تیرگوزسه نیمه قیین لیگی بار؟ الله که هر بیر نمرسه ابداعی و انی قیته دین وجودگا کیلتورماغی هر ایکی سی بیردیک آسان دور، إِنَّمَا أَمْرُهُ إِذَا أَرَادَ شَيْئًا أَنْ يَقُولَ لَهُ كُنْ فَيَكُونُ [۸۲: یس].
الله قادر مطلق دور، هر قن داغ حکم قیلسه حکمی نافذ دور، قیامت کونی (تیریلینگ لار دیب) حکم ایتسه، همه عالمده گی جاندارلار تیریلور. (مضارع متحقق الوقوع) نی ناظم ماضی بیرلان تعبیر ایتیب دورلار.

بیغار محشر بیرینده برچه جان نی سورار بنده سیدین یخشی، یمان نی
هر ایشنی کوب قیلیب دور سن و یا آز حسابین هم تیلار اول بنده دین باز
خدا هر بنده سیغه قیلسه آسان حسابین بیرگوسی بنده اوشل آن
اگر قتیغ توتار بنده حسابین اوزی بیلگان انگا سالگان عذابین



یوبارور نامۀ اعمالیمی—زنی

بیلور گرچه جمیع حالیمی—زنی

کیلور نامه او قُل نی اونگ قولیدین

یوبارسه نامه نی رحمت یولیدین

سویونگان دین قیلور اول بنده آواز

قیزیل یوزلوک بولوب اول قُل سرافراز

کیلیب دور نامه اخلاصیم گه لایق

اوقونگ نامم نی ای تورگان خلاق

غریق رحمت حق جسم و جانی

بهشت عالیہ بولغای مکانی

کیلور آرقه سیدین یا دست چپ دین

اگر نامه کیلور بولسه غضب دین

توتارلار هم سالورلار بونینغه غُل

قرا یوزلوک بولور شرمندہ اول قُل

ترحم بولمغای ی—البارغانیغه

تقی زنجیر ایتارلار گ—ردنیغه

قیلورلار جانب دوزخ کشاله

بولور تورلوک مشقت لار حواله

شرح: همه تیریلگان دین سونگره برچه خلاق نی محشر بیرگه ییغیب بنده سیدین قیلگان ایشلاریدین سورار و آز و کوب قیلگان ایشلارینی حسابینی تیلار، الله هر کیمگه آسان قیلسه اوشل آندہ حسابینی بیورور، اما خداوند بنده حسابینی قتیغ توتسه اول کیشیگه سالگان عذابینی بنده اوزی (ویا الله اوزی بیلگای اوزگه کیمسه بیلماغای) اگرچه الله همه احوالیمیزدین باخبر بولسده ده باز هم (اتمام حجت اوچون) نامۀ اعمالیمیزی یوبارور، اگر نامه نی رحمت یولیدین یوبارسه بنده نی اونگ قولیدین کیلور، قیزیل یوزلیک و سرافراز بولوب سویونگان دین اول کیشی آواز قیلور که منی نامم نی اوقوب کورونگلار نامه منی اخلاصیمگه لایق کیلوب دور. جنت عالیہ انی جایی بولوب تن و جانی رحمت الهی گه باتور. اگر نامه غضب یولیدین کیلسه آرقه سیدین یا چپ قولیدین کیلور، اول بنده یوزی قرا و شرمندہ بولوب فرشته لار انی توتوب بونینغه غُل سالیب گردنینی زنجیر بیرله بایلارلار یالینیب یالبارغانیغه ترحم قیلماغای لار، تورلوک مشقت و رنگ برنگ عذاب لار انگا حواله بولوب انی دوزخ طرفیغه سودراب آلیب بارورلار.

امیدیم کوب ایرور غفار آتینگدین

الهی قورقه دورمن حضر تینگدین

قُلونگنی قیلماغیل شرمندہ انده

بیغیلغانده یمان و یخشی بنده



سزاوار الم دیرمــن اوزومنی

اگر اعمالیمه سالسم کوزومنی

امیدیم کوب بغیشلنگای گناهیم

اگر الطافینگه باقسم الهیم

بولور تانگلا معین سانی یوق عیب

اگر سن یاپماسنگ ای عالم غیب

سنی کینگ رحمتینگ دین راجی دورمن

الهی مغفرت محتاجی دور من

یوبارسنگ نامه میزنی اونگ طرفدین

امیدلار کوب ایرور انداغ شرفدین

دُر رحمتنی سالسنگ جیبیمیزگا

حجاب عفو یاپسنگ عیبیمیزگا

یوبارسنگ نامه نی سول یانیمیزدین

الهی قورقه دورمیز جانیمیزدین

حسابیمیزنی اول کون قیلغیل آسان

امیدلیک بنده دورمیز هم هراسان

قرا قیلمه او کون رخساریمیزنی

تلطف بیرله سورگیل کاریمیزنی

اوزونگ ایدینگ قُلموگه مهربان من

اگر چه نامناسب من یمان من

حبیبینگ امتی من قُل آتیم بار

اگر چندی که بولسم زشت و بدکار

شرح: الهی حضرتینگدین قورقه دورمن، لیکن سنی غفار آتینگدین امیدیم کوب دور (که تمام گناه لاریمنی مغفرت قیلسنگ) یخشی، یمان بنده لارینگ محشرده ییغیلگانه قلونگنی شرمند قیلماغیل. اگر اعمال و افعالیمگه کوزومنی سالیب قراسم اوزومنی لایق و سزاوار درد و الم و عذاب و عقوبت دیرمن؛ و اگر سنی لطف و مهربان لیکینگه باقسم تمام گناه لاریم بغیشلنگای دیب امیدیم زیاده بولور، اگر (ستارلیک صفتینگ بیرلان) گناه لاریمیزنی یاپماسنگ تانگلا قیامت کونی سان سیز عیبالار و حساب سیز گناه لار معین و مقرر بولوب نامه میزگه یازیلور، (الهی سنی رحمت و مغفرتینگه محتاج و الار دین امیدوار دورمیز) و هم انداغ شرف و عزت دین امیدیمیز کوب ایرورکه نامه اعمالیمیزنی اونگ طرفیدین یوباریب عیبیمیزگه پرده عفو یاپیب و جیبیمیز (قوبنیمیز) گه دُر رحمت و مغفرتنی سالیب (قُل لارینگنی دلشاد قیلسنگ) الهی اوز حالیمیز و افعال و کرداریمیزدین قورقادریمیزکه [مبادا] نامه اعمالیمیزنی چپ یانیمیزدین (ویا آرقه میزدین) یوباریب شرمسار محشر ایتسنگ، الهی خوف و رجاء اورته سیده امیدوار رحمت و هراسان زحمت بنده دورمیز، قیامت کونی



حسابیمیزی آسان قیلغیل؛ الهی مهربان لیک بیرلان ایشیمیزی سوراب [او کون] یوزیمیزی قرا قیلماغیل اگرچه نالایق یمان قُل بولسا کده اوزونگ کلامینگده (قُلومغه مهربان من) دیدینگ: **اللَّهُ لَطِيفٌ بِعِبَادِهِ** [۱۹: الشوری].
وَاللَّهُ رَؤُوفٌ بِالْعِبَادِ [البقرة: ۲۰۷] اگرچه زشت اطوار بدکردار بولسمده حبیبینگ حضرت محمد علیه السلام امتلاری بولوب سنگا قُل آتیم باردور.

تذیل: نامه اعمال کیلشی خصوصیده کوب آیتلار کیلگان دور. سورة الحاقه ده: **يَوْمَئِذٍ تُعْرَضُونَ لَا تَخْفَى مِنْكُمْ خَافِيَةٌ** [۱۸] **فَأَمَّا مَنْ أُوتِيَ كِتَابَهُ بِيَمِينِهِ فَيَقُولُ هَؤُلَاءِ أَقْرَبُوا كِتَابِيَهٗ** [۱۹] **إِنِّي ظَنَنْتُ أَنِّي مُلَاقٍ حِسَابِيَهٗ** [۲۰] **فَهُوَ فِي عِيشَةٍ رَّاضِيَةٍ** [۲۱] **فِي جَنَّةٍ عَالِيَةٍ قُطُوفُهَا دَانِيَةٌ** [۲۲] **كُلُوا وَاشْرَبُوا هَنِيئًا بِمَا أَسْلَفْتُمْ فِي الْأَيَّامِ الْخَالِيَةِ** [۲۴] **وَأَمَّا مَنْ أُوتِيَ كِتَابَهُ بِشِمَالِهِ فَيَقُولُ يَا لَيْتَنِي لَمْ أُوتَ كِتَابِيَهٗ** [۲۵] **وَلَمْ أَذِرْ مَا حِسَابِيَهٗ** [۲۶] **يَا لَيْتَهَا كَانَتِ الْقَاضِيَةَ** [۲۷] **مَا أَغْنَىٰ عَنِّي مَالِيَهٗ** [۲۸] **هَلْكَ عَنِّي سُلْطَانِيَهٗ** [۲۹] **خُذُوهُ فَغُلُّوهُ** [۳۰] **ثُمَّ الْجَحِيمَ صَلُّوهُ** [۳۱] **ثُمَّ فِي سِلْسِلَةٍ ذَرْعُهَا سَبْعُونَ ذِرَاعًا فَاسْلُكُوهُ** [۳۲: الحاقه] و سورة انشقاق ده: **فَأَمَّا مَنْ أُوتِيَ كِتَابَهُ بِيَمِينِهِ** [۷] **فَسَوْفَ يُحَاسَبُ حِسَابًا يَسِيرًا** [۸] **وَيَنْقَلِبُ إِلَىٰ أَهْلِهِ مَسْرُورًا** [۹] **وَأَمَّا مَنْ أُوتِيَ كِتَابَهُ وَرَاءَ ظَهْرِهِ** [۱۰] **فَسَوْفَ يَدْعُو ثُبُورًا** [۱۱] **وَيَصْلَىٰ سَعِيرًا** [۱۲] **إِنَّهُ كَانَ فِي أَهْلِهِ مَسْرُورًا** [۱۳: الانشقاق].

ترجمه: اوشل کون [قیامت کونی] پیش قیلینورسیزلار [حضور الهی گه] مخفی قالمس سیزلار دین هیچ بیر نمرسه. پس هر کیم نینگ نامه اعمالی اونگ قولیدین بیرلسه پس [اول باشقه لارگه] دیر آلینگلار منی نامه اعمالیمی اوقونگلار من البته جزم بیلور ایردیم که بیر کون حسابیمگه یولوقورمن، ایمدی اول کیشی تیله گان عیشیده بولور، بلند جنتده که میوه لاری [انسان گه] یقین [فرشته لار دیرلار] بینگلار، ایچینگلار [وجودلارینگ گه] یاقوملیک اوتکان کونلارده اوزلارینگ دین اول یبارگان عمللارینگ بدلیده. و اما کیم نینگ نامه اعمالی چپ قولیدین بیرلسه، اول دیرکه، کاشکی نامه اعمالیمی بیرلماسم ایردی و حسابیمی نه ایکان لیگی نی بیللماسم ایردی، کاشکی [دنیا ده گی] اولوم بالکل ایشینی توگاتکان بولسه ایردی [و من تیریللماسم ایردیم] مالیم هیچ دردیما یرامادی، قولوم دین کیتتی حکومتیم [فرشته لارگه حکم بولور] توتونگلار و انی بوینیغه بوغا و سالینگلار سونگره دوزخ گه سالینگلار، سونگره اوزون لیگی بیتیمیش گز زنجیرگه باغلانگلار.

هر کیمنی نامه اعمالی اونگ قولیگه بیرلسه آز فرصته آسان حساب قیلیب اوز اهلیکه خوشحال قایتور، و اول کیشی کیم نامه اعمالی آرقه طرفیدین چپ قولیگه بیرلور، آز وقتده چاقیرور هلاکنی [اولومنی] و دوزخ گا کیروور البته [دنیا ده] اوز خاندانی ده شادمان [بی غم] ایردی.



ترازوی قیامت بیانیده

ترازو حق ایرور روز قیامت	انینگ صدقیغه نازل بولدی آیت
بیلور تنگری اگرچه حالیمیزنی	ترازوغه سالور اعمالیمیزنی
قیلور آگه قلین قیلیمیش لاریگه	یتوشمس عقل ایگامنی ایشلاریگه
ترازو باری غه اقراریمیز بار	نچوک ایرکانیگه نی کاریمیز بار
الهی قیل آغیر میزانی میزنی	سلامت توت بیزینگ ایمانیمیزنی

شرح: قیامت کونی بنده لار اعمالی ترازوغه سالیب تارتیلیشی حق ایرور، و انینگ راست لیگیغه قرآن کریم ده کوب آیت لار مثل: وَالْوَزْنُ يَوْمَئِذٍ الْحَقُّ [۸: الاعراف]، وَنَضَعُ الْمَوَازِينَ الْقِسْطَ لِيَوْمِ الْقِيَامَةِ فَلَا تُظْلَمُ نَفْسٌ شَيْئًا [۷: الانبیاء] ده نازل اولوب و احادیث لار هم بو خصوصده کیلگاندور. اگرچه الله تعالی تمام احوال و افعالیمیزنی بیلسه ده اعمالیمیزنی ترازوگه سالیب همه گه اوز عدلینی کورساتور، سونگره رحمت و مغفرت ایتیپ اوز فضلینی آشکارا قیلور و بنده لارینی اوز قیلیمیش لاریگه آگاه لانتورور. انسان نینگ عقل قاصری ایگمنی ایشلارینی حکمتیغه یتماقدین عاجز دور، ترازونی قیامتده بارلیگیگه اقراریمیز بار و انی تصدیق ایتورمیز، اما قنداغ ایگانیغه نیمه ایشیمیز بار. الهی قیامت کونی میزانی میزنی ثواب پله سینی آغیر قیلیب اولار حالتده ایمانیمیزنی سلامت قیلغیل.

تنبيه: کتب عقائد و تفاسیر معتبره و احادیث و آثارلار دین معلوم اولورکه الله جلّت عظمته محشرده قیامت کونی ایکی پله و شاهین لیک ترازونی قوروب بنده لارینی اعمالینی تارتور، لیکن نوعیت و کیفیت ترازو و پله لاری و قنداغ وزن ایتیلیشی بیزلارگه نامعلوم دور و عقلیمیز احاطه سیدین تشقاری دور و انی بیلماقگه مکلف ایمس میز. اکثر علما نامه اعمال تارتیلور دیب دورلار، بعضی لار الله اعمالنی مجسم ایتیپ سونگره تارتور دیب دورلار.

اگر بیر کیشی سوال ایتسه که اقوال و اعمال عَرَض و بالذات اوزی تورالمایدور و باقی قالمايدور، هر جزئی وقوعه کیلگان حالده یوقالیب (معدوم اولوب) کیتور، پس قیامتده مونی جمع لانیب تارتیلیشی عقلاً ممنوع کورونور، پس قنداغ بو ایش وجودگه کیلور دیسه، جوابیده ایتورمیزکه بو کون گرامافون (و تایپ ریکارد) ر



صفحه و فیتہ لاریگہ هر خیل کلتہ و اوزون سوزلار ثبت و قید اولور، بو همه گه مشاهد دور، البتہ سوزلاریمیز عَرَض دور اُولگی آغوزدین چیقغان سوز یوق بولوب، ایکینجی سی آغیزدین چیقور. بندۀ عاجزی توزاگان نمرسه سی عَرَضنی ثبت ایتماقگه موفق اولسه، قدرت خداوندی دین (دنیا ده بنده لارینی قیلگان تمام اعمال و اقوال لارینی کامل ریکاردینی آلیب ثبت ایتماغی) اوزاغ ایمس دور و علمالار تتبعاتی اثریده هر کیمنی سوزلاگان سوزی هواده (بطور جداگانه) توختاگان لیگی اثباتگه یتیب دور، بولاردین استنباط ایتسه بولورکه هر کیمنی سوزی و قیلگان ایشی فرشته لار صفحه لاریده ویا اوزلارینی وجودلارینی صفحاتیده ثبت اولوب باقی قالسه ممکن دور و آیه: **يَوْمَ تَشْهَدُ عَلَيْهِمْ أَلْسِنَتُهُمْ وَأَيْدِيهِمْ وَأَرْجُلُهُمْ بِمَا كَانُوا يَعْمَلُونَ** [۲۴: النور] بو سوزگه اشارت دور.

صراط کوپروکی بیانیده

جهنم اوزره بیر کوپروک ایرور آه	اوشل کوپروک صراط آتلیغ گذرگاه
قیلیچ دین تیز ایرور قیلدین اینگیچکه	پشیمان لار اوشل کون توشکای ایچکه
عجب حیران بولور فرزند آدم	قدم قویسه انینگ آستی جهنم
اگر قیتای دیسه قویمس مؤگل	بولور فرزند آدم حالی مشکل
معین کورسه لار خلق اول تب و تاب	بولور جان وهمی بیرله زهره لار آب
یوراک لار قان بولوب کوزلار توکار یاش	او منزلدین قوتولغای مو غریب باش
فغان لار قوبغای اولاد بشردین	کیم اوتغای کیم بیقیلغای اول گذردین
عنایت قیلسه بعضی آدمی زاد	اوتار اندین یشیل دیک بعضی چون باد
اوتار بعضی مسلمان یوگروک آتدک	اوتار قریبغه لایق یعنی هر یک
اوتار بعضی مسلمان تایه-تایه	یتار آخر دیگان عشرتلی جایه
قدم قویسه بیقیلور بعضی انسان	الهی ایلاگیل اول کوننی آسان



قُلونگ رسوا بولور روز قیامت

اگر اوتکارماسنگ اندین سلامت

بو مسکین قویمه دی عصیان ایترنی

بیلیب تصدیق ایته بول کوب خطرنی

صراط شرع اوزه ثابت قدم قیل

الهی بنده نی صاحب ندم قیل

عنایت کویگه کینگ قیل یولومنی

هدایت پیریگه تابشور قولومنی

بهشت معرفتنی ایلا جاییم

معاصی لایبغه تایدورمه پاییم

رحیما مغفرت لیک بیر و بارا

کرم لیک پادشاهها کردگارا

سلامت قیل خطرلار دین الهیم

اگر چندی که بی حد دور گناهیم

امید اول که سنی واحد بیلیب میز

اگرچه سانی یوق عصیان قیلیب میز

سلامت قیل او کوپروک محنتیدین

الهی بیر لیکینگ نی حرمتیدین

شرح: دوزخ اوستیده بیر کوپروک باردور، اول کوپروک صراط آتلیغ (بندهلار اوتادیگان) یولدور، انی دمی قیلیچ دین تیز و قیل دین اینگیچکه دور، قیامت کونی انسان دلیگه (نه اوچون کوب راق طاعت ایتمه دیم و نیمه گه ارتکاب گناه ایتمه دیم) پشیمان لیک توشور، لیکن فائده سی یوقدور، آدم اوغلینی کوب باشی قایتیب دوچار حیرت اولور کوپروک دین اوتای دیسه آستیده دوزخی شعله اوروب یانیب تورگانینی کوروب قورقوب قیتای دیسه مؤکل فرشته قویماسدین بیچاره آدمیزادی حالی مشکل اولور، خلاق اول تب و تاب (ایسیغ و محنت و مشقت) نی معاینه کوروب جان وهمی بیرلان زهره لاری سو بولوب یوراکلاری قان و کوزلاری یاش توکغای که غریب باش او منزلدین سلامت قوتولورمو یا یوق؟ بنی آدم دین آه و فغان داد و وایلا صداسی کوتاریلغای، معلوم ایمس که اول گذردین کیم سلامت اوتغای و کیم بیقیلغای. الله عنایت ایتمه اول کوپروک دین بعضی ذاتلار [یشیل] چقماق دیک و بعضی لار شمال دیک و بعضی لار یوگورادیگان آت دیک اوتورلار، هر بیر کیشی درگاه الهی ده کی قریغه لایق و مناسب روشده اوتور بعضی کیشی تاییب تاییب [لغزیده-لغزیده] اوتوب آخر عیش و عشرت مکانی جنگه یتور و بعضی لار ایاغ قویوش بیرلان بیقیلور. الهی او کون قتیغ لیگینی آسان قیلغیل، اگر اندین سلامت اوتکارماسنگ قیامت کونی قلینگ رسوا بولور، بو مسکین بیچاره بنده نگ بوکوب خطرلارنی بیلیب و تصدیق ایته توروب گناه قیلماقنی قویمادی، الها بو دنیا ده بنده نگنی قیلگان گناهلاریدین



تائب و پشیمان قیل و شریعت کو پروگی اوزره ثابت قدم قیل اوز طرفینگ دین بیرلادیگان توفیق و هدایتی یول باشلاغوچی بیر قیلیب قولومنی انگا تاپشورغیل و لطف و عنایت کویغیه یولومنی کینگ قیلغیل. ایاغیمنی معاصی لایغیه تایدوروب راه راست دین چیقارماغیل و جانیمنی بهشت معرفت ایتگیل که دنیانی جنتی دور، ای کرم لیک پادشاهیم و کردگاریم و ای رحیم مغفرت لیک بیر و باریم، اگر چندی که گناهیم بی حد دور، الهی اوز کرمینگ بیرله تمام خطرلاردین سلامت قیلغیل [کردگار] خداوندنی نامی فارسی دور. [بیر و بار] بیر: واحد معنی سیده ترکی دور. بار: خدانی اسمی فارسی دور. هر ایکسی مرکب خدای یکتا معنی سیده دور، اگرچه سان و سناغی یوق، کوب گناه قیلیب میز، لیکن سنی وحدانیت بیرله تانیگانیمیز دین امیدیمیز کوب دور. الهی بیرلیکینگی حرمتیدین پل صراط محتیدین سلامت قیل.

حوض کوثر بیانیده

قیامتده پیمبر حوضی دور حق	صفتین قیلدی تعیین شاه اصدق
سویی اول حوضی سوتدین ایرور آق	ایسینی مشک دین هم دیدی بهراق
دمی سو ایچسه اندین هر مسلمان	یقین بیل سوسامس هرگز اول انسان
خداوندا نصیب ایتگای سن اندین	امیدی کوب ایرور بنده نگی سندین

شرح: قیامت کونی رسول الله که عطا قیلینگان حوض حق دور، انی صفتینی (رسول الله) احادیث صحیحده بیان ایتیب دورلار، انی سویی سوت دین آقدور، ایسی مشک دین خوشبوراق و یخشی راق دور. هر کیم اول حوض دین بیر ایچیم سو ایچسه هرگز سوسامس، الهی اول حوض سویی دین (بیزلار که) نصیب ایتگای سن، قُلونگی سندین امیدی کوب دور، امام بخاری و مسلم عبدالله بن عمر رضی الله عنهما دین روایت ایتیب دورلار: قال عبد الله بن عمرو قال النبي صلى الله عليه وسلم: حَوْضِي مَسِيرَةُ شَهْرٍ وَزَوَايَاهُ سَوَاءٌ وَمَاؤُهُ أَبْيَضُ مِنَ الْوَرِقِ وَرِيحُهُ أَطْيَبُ مِنَ الْمِسْكِ وَكِيْرَانُهُ كُنُجُومِ السَّمَاءِ فَمَنْ شَرِبَ مِنْهُ فَلَا يَظْمَأُ بَعْدَهُ أَبَدًا [بخاری: ۶۵۷۸]، [۶۱۱۱]

: مسلم]



ترجمه: حوضیم (اوزونلیگی) بیر آی لیک یولدور، و همه زاویه لاری برابر دور، سوی سوتدین آقراغ و بویی مشک دین یخشی راغ و کوزه چه لاری (لمعان و کوبلیکده) آسمان یولدوزلاریگه اوخشش دور، هر کیم اندین ایچسه پس هیچ چنقامس.

تنبيه: کوثر معنی سیده کوب قوللار باردور، اکثر مفسرین جنتده رسول الله گه خاص بیر اریغ دیب دورلار و بعضی لار محشرده گی حوضگه تفسیر ایتیبدورلار و باشقه اقواللار هم کوبدور. لیکن صاحب روح المعانی [خیر کثیر] دنیا و آخرت نعمت لاری ایکانینی، ابن جریر و ابن عساکر حضرت مجاهد دین روایت ایتگانینی و حضرت ابن عباس دین هم روایت مشهوره شول ایکانینی و سعید بن جبیر ^{رضی الله عنه} دین بخاری و باشقه لار روایتیده خیر معنی سیده کیلگان لیگی نی و کوثر نه ری هم شول خیر کثیر دین بیری ایکانینی ذکر ایتیبدور.

مبحث شفاعت

خدا اذنی بیلان حق دور شفاعت قیلورلار انبیاء و اهل طاعت

شفاعت کیم مسلمانلار گه دور سود ولیکن بولمغای بی اذن معبود

خدا اذنی بیلان روز قیامت سویوک لوک بنده سی ایلار شفاعت

شرح: الله اذنی بیرلان انبیاء و اولیا و فرشته و اهل طاعتلار مؤمن گنهکارلارنی شفاعت ایتماقلاری حق و ثابت دور. شفاعت خاص مسلمان موحدلارگه فائده بیرور و الله اذنی بیرله بولور، انی سویوک لوک قللاری شفاعت قیلورلار، آیه: **مَنْ ذَا الَّذِي يَشْفَعُ عِنْدَهُ إِلَّا بِإِذْنِهِ** [البقرة: ۲۵۵]، **وَلَا يَشْفَعُونَ إِلَّا لِمَنْ ارْتَضَى** [۲۸: الانبیاء] بو سوزگه دلیل دور. اما احادیث صحیحده وارد بولگان شفاعت عظمی رسول الله گه خاص دور. حشرده اولین و آخرین امملار حضور خداوندی گه جمع لانیب همه کوب قتیغ حالتگه توشوب هیچ کیم جرأت قیلیب حضور الهی گه پیش بولوب بیلماگان حالده بیر جماعه بیغیلیب حضرت آدم ^{علیه السلام} آدیلا ریغه باریب سیزنی الله اوز قولی بیرله یراتیب و جنتگه کیرگوزوب اسماعنی بیلدوردی، سیز الله آلدیده بیزارگه شفاعت ایتینگ دیرلار! اول ذات نهی ایتیلگان میوه دین بیگانلارینی یادلاب من بو ایش عهده سیدین چیقہ آلمسمن، سیزلار نوح آدیغه بارینگ دیرلار، حضرت نوح آلدی لاریگه باریب بیر یوزیگه اولین یوباریلگان رسول دورسیز، الله بندۀ شکر گذار دیب یاد ایتگان، بیزنی حالیمیزنی کورمای سیزمی، پروردگار نزدیکه بیزار اوچون شفاعت ایتینگ دیگانلاریده



اول ذات هم اللهنى كوب غضبى كيلگانينى و خدا طرفيدین كيلگان بير دعاى مقبولنى قوملارى هلاكيغه، رَبِّ لَا تَذَرْ عَلَى الْأَرْضِ مِنَ الْكَافِرِينَ دَيَّارًا [٢٦ : نوح] ديب توگاتگانلارنى ياد ايتيب اوزومدين باشقه كيمسهگه (شفاعت ايتيب) فائده بيتكورالمسمن، ابراهيم خليل الله آديلاريغه بارينگلار ديگانلاريده، اول جناب حضورلاريغه بارسهلار، بو ايش منى قولومدين كيلمس، موسى كليم الله آديغه بارينگلار ديرلار، اول كيشىنى آديلاريغه باريشگانده قبطىنى اولدوروب قوبگانلارى يادلاريغه توشوب منى قولومدين كيلمس، عيسى روح الله آديغه بارينگلار ديگانلاريده، اول ذات حضورلاريغه بارورلار، اول كيشى هم منى قولومدين كيلمس محمد عليه السلام آديغه بارينگلار ديگانلاريده، اول جناب آدىلاريغه باريب كوب قتيغليكه قالدوك پروردگار نزديده شفاعت ايتينگ ديب عرض ايتگانلاريده [أَنَا لَهَا] يعنى من بو مقامگه مخصوص بندهمن و شفاعت عظمى منى ايشيم ديب عرش آستيغه باريب سجده قليب اللهگه كوب حمد و ثنا ايتگانلاريدين سونگره شفاعتلارى مقبول درگاه الهى اولوب محشر اهلى (مؤمنلارى) اول شدتلاردين قوتولماقلارى روايت اولوب دور.

قيامت کون عجب شدتلى کون دور	ايننگ قتيغليگى از حد فزون دور
او کون نينگ هيبتى دين بى شک و ريب	بولور کوک پاره-پاره تاغ و توز غيب
زمين اوتادى برچه کوه سنگين	بولور حق خشمى دين چون پشم رنگين
اوشل شدتگه يير-کوک قيلمسه تاب	نچوک طاقت قيلور بير قطره آب
بولور خم غم بيلان خوردان زيبا	دليليم يجعل الولدان شيبا
بولور بير-بيرگه دشمن دوست ديگانلار	مگر تقوى يوليدين غم ييگان لار

شرح: قيامت کونى عجايب قتيغ کوندور، انى شدتى حددين آشوقدور، اول کون هيبتى دين آسمان ياريليب پاره-پاره اولوب تاغ توز تيب-تيکيز بولوب کوزدين غايب اولوریده هيچ شک و شبهه يوق دور. بيرنينگ قازوغى بولگان شونچه اولوغ تاغلار (الله غضبى دين) بويالگان و تيتيلگان جونگه اوخشش هواده اوچوب توزوب يورور، وَتَكُونُ الْجِبَالُ كَالْعِهْنِ الْمَنْفُوشِ [ه : القارة] آيتى شونگه دلالت قيلور. [اوتاد] جمع وتد، قازوق معنى سيده دور. اول کونى قتيغليگى غه يير و کوک، تاغ و تاش طاقت كيلتورالمسه بير قطره سودين يراتيلگان آدم اوغلى قنداغ



طاقت قلیب بیلسون، اول کوننی غمیدین چیرایلیک یاش بیگیتلار قامتلاری خم بولوب قرّی کیشی دیک بیللاری بوکولوب ساچ و سقاللاری آقاریب کیتور، بو سوزگه دلیلیم آیه: **يَوْمًا يَجْعَلُ الْوِلْدَانَ شِيبًا** [المزمل: ۱۷] دور.

دنیاده بیر-بیرلاریگه من سнга دوست و آشنا دیب رفاقت ایتیپ یورگانلار قیامت کون بیر-بیرلاریگه دشمن بولورلار. مگر اول رفیقلار کیم تقوی و پرهیزگارلیک و عمل صالح یولیدین غملارینی ییب، زاد آخرت تیارلاگن بولسهلار، **الْأَخْلَاءُ يَوْمَئِذٍ بَعْضُهُمْ لِبَعْضٍ عَدُوٌّ إِلَّا الْمُتَّقِينَ** [الزخرف: ۶۷] آیتی بو سوزگا دلیل دور. امام مسلم مرفوعاً روایت ایتیپ دورلار، به تحقیق قیامت کونی الله تبارک و تعالی دیر: قنی اول کیشی لارکه خاص منی (جلالیم) اوچون بیر-بیرلارینی دوست توتویدورلار، بو کون الارنی اوز سایه مده سایه لانتورغای من بو کون منی سایم دین باشقه سایه یوقدور^۱. امام بخاری و مسلم روایت ایتیپ دورلارکه یئی خیل کیشی لارنی الله اوز سایه سیده سایه لانتورور، (شول یئی دین بیر) ایکی کیشی خاص خدا اوچون دوست لیک قلیب [اجتماع و افتراق لاریده] همه حالده انگا دوام ایتگان بولسهلار، بو آیت و حدیث لاردین معلوم بولدی که خاص الله اوچون بولگان دوست لیک قیامتده هم دوام ایتور^۲؛ اما غرض آلود آشنالیکلار شو دنیا ده ده جدالیکغه ایلانور.

کیلور نیزه بویی خورشید تابان خجالت تیری که غرق اول بیابان

بولور اوز حالیی بیرلان آدمیزاد کیلور کونگلیغه قیلغان ایشلاری یاد

هوا مس دیک قیزور، بیر هم تیموردیک غضب قیلگان کیشی بولغای کوموردیک

اگر حق یاپمسه جرم ایلاغان جای گواه لیک بیرگوسی بیل دست ایله پای

قباحت لیک عمل لار توشسه کوزگا علاجین کیم بیلور حضرت دین اوزگا

محمد کیم ایروور حق نینگ حبیبی معاصی دردی نینگ حاذق طبیبی

^۱ عَنْ أَبِي هُرَيْرَةَ قَالَ قَالَ رَسُولُ اللَّهِ -صلى الله عليه وسلم- « إِنَّ اللَّهَ يَقُولُ يَوْمَ الْقِيَامَةِ أَيْنَ الْمُتَحَابُّونَ بِحَالِي الْيَوْمِ أَظْلَهُمْ فِي ظِلِّي يَوْمَ لَا ظِلَّ إِلَّا ظِلِّي [۶۷۱۳ : مسلم].

^۲ عَنْ أَبِي هُرَيْرَةَ عَنِ النَّبِيِّ -صلى الله عليه وسلم- قَالَ « سَبْعَةٌ يُظِلُّهُمْ اللَّهُ فِي ظِلِّهِ يَوْمَ لَا ظِلَّ إِلَّا ظِلُّهُ الْإِمَامُ الْعَادِلُ وَشَابٌّ نَشَأَ بِعِبَادَةِ اللَّهِ وَرَجُلٌ قَلْبُهُ مُعَلَّقٌ فِي الْمَسَاجِدِ وَرَجُلَانِ تَخَابَا فِي اللَّهِ اجْتِمَعَا عَلَيْهِ وَتَفَرَّقَا عَلَيْهِ وَرَجُلٌ دَعَتْهُ امْرَأَةٌ ذَاتُ مَنْصِبٍ وَجَمَلٍ فَقَالَ إِنِّي أَخَافُ اللَّهَ. وَرَجُلٌ تَصَدَّقَ بِصَدَقَةٍ فَأَخْفَاهَا حَتَّى لَا تَعْلَمَ يَمِينُهُ مَا تُنْفِقُ شِمَالُهُ وَرَجُلٌ ذَكَرَ اللَّهَ خَالِيًا فَفَاضَتْ عَيْنَاهُ. » [۶۶۰ : بخاری]، [۲۴۲۷ : مسلم]



همه نفسی دیسه اول امتی دیر

بیلین همت قوریغه باغلب اول ایر

محمد امت مسکین اوچون زار

همه اوز نفسیگه بولسه گرفتار

تاپیلغانده نچوک جولان قیلور أم

اگر بولسه ایمه تورغان باله گم

محمد دور غریب امت اوچون داغ

مینگ انداغ آنه دین به راغ و کوبراغ

شفاعت شیر ی پستان کرم دین

آقار دریا بولور اول محترم دین

نصیب ایتکان او دریادین ایتار نوش

قیلور حق اذنی بیرلان هر طرف جوش

قالور انداغ اولوغ یم دین قوروغ فم

نصیبه ایتماگان فرزند آدم

بو قل لارنی دیگایمو امت اول شاه

کیشی بیلمس قیامت دشتیده آه

یوق ایرسه عاصی لارگه ایش بولور سخت

اگر امت دیسه خوش دولت و بخت

یوق ایرسه عاصی لارگه ایش بولور زور

اگر امت دیسه نور علی نور

غریب امت اوچون داغ ایردی والله

اوشل سلطان که داعیاً اِلِی الله

یاپار بدعت بیلان سنت جمالین

بو امت لار عجب زشت ایتدی حالین

قوروغ تیل بیرله امت میز دیمک دور

بهایم دیک ایشی ایچمک - بیمک دور

ییغیلغانده یمان و یخشی بنده

الهی لطف قیل مونده و انده

حبیبینگ دین نصیب ایتگیل شفاعت

الهی لطف قیل حسرتلی ساعت

بیراق ایتمه حبیبینگ قاره سیدین

آبیرمه یخشی لارنی آره سیدین

شرح: قیامت کونی آفتاب درخشان انسان لار اوستیده بیر نیزه بویی یقین کیلیب صحرای محشر خجالت تیریگه باتور، احادیث صحیحده اهل محشر هر کیم گناهیگه قراب بعضی لاری آشوقگچه بعضی لاری تیزه گچه بعضی لاری حلقوم گچه تیرگه باتماقلاری و بعضی لاری بالکل چومولوب کیتماقلاری کیلگان دور. روی البخاری



و مسلم، عن أبي هريرة، رضي الله عنه، أن رسول الله صلى الله عليه وسلم قال : يعرق الناس يوم القيامة حتى يذهب عرقهم في الأرض سبعين ذراعا ويلجمهم حتى يبلغ آذانهم. [بخاری : ۶۵۳۲] و روى مسلم عن الْمُقَدَّادِ بْنِ الْأَسْوَدِ قَالَ سَمِعْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ يَقُولُ «تُدْنَى الشَّمْسُ يَوْمَ الْقِيَامَةِ مِنَ الْخَلْقِ حَتَّى تَكُونَ مِنْهُمْ كَمِقْدَارِ مِيلٍ». قَالَ سُلَيْمُ بْنُ عَامِرٍ قَوْلَ اللَّهِ مَا أَذْرَى مَا يَعْنِي بِالْمِيلِ أَمْسَافَةَ الْأَرْضِ أَمْ الْمِيلَ الَّذِي تُكْتَحَلُ بِهِ الْعَيْنُ. قَالَ «فَيَكُونُ النَّاسُ عَلَى قَدَرِ أَعْمَالِهِمْ فِي الْعَرَقِ فَمِنْهُمْ مَنْ يَكُونُ إِلَى كَعْبِهِ وَمِنْهُمْ مَنْ يَكُونُ إِلَى رُكْبَتَيْهِ وَمِنْهُمْ مَنْ يَكُونُ إِلَى حَقْوَيْهِ وَمِنْهُمْ مَنْ يُلْجِمُهُ الْعَرَقُ إِلْجَامًا». قَالَ وَأَشَارَ رَسُولُ اللَّهِ -صلى الله عليه وسلم- بِيَدِهِ إِلَى فِيهِ. [مسلم : ۷۳۸۵] انسان لار هر قیسی سی اوز حالی بیلان بولوب دنیاده قیلگان (یخشی و یمان) ایشلاری ایسلاریگه کیلور و هوا مسدیک و بیر هم تیموردیک قیزیب الله غضب قیلگان کیشی نی جسدی کوموردیک قاب-قرا بولور، اگر الله بنده گناهی نی مغفرت ایتاکی بیرلان یاپمسه انی قول-ایاغ و باشقه همه اعضالاری و گناه قیلگان جای لاری گواهلیک بیرور انکار فائده ایتمس، چنانچه آیه، حَتَّى إِذَا مَا جَاؤُوهَا شَهِدَ عَلَيْهِمْ سَمْعُهُمْ وَأَبْصَارُهُمْ وَجُلُودُهُمْ بِمَا كَانُوا يَعْمَلُونَ [فصلت : ۲۰] (وباشقه بیر قنچه آیتلار) بو سوزگه دلیل دور. اگر قیامت کونی قباحتلیک یمان عمللار نامۀ اعمالده ثبت اولوب کوزگه کورونوب تورسه، رسول الله حضرتلاریدین باشقه ایننگ علاجینی کیم بیلور، چونکه اول ذات (محمد علیه السلام) الله نینگ حبیبی و گناه مرضی نینگ حاذق طیبی دورلار، اول جناب بیللارینی همت سلاهی بیرله محکم باغلاب همه انبیالار (وا نفسی^۱ دیب) اوزلارینی سوراگان حالده اول ذات (امتی دیب) غریب امتنی (عفو و مغفرتینی) سورارلار. [قور لفظی ترکی سلاح معنی سیده دور] و همه اوز نفسیگه گرفتار اولگان پلّده اول حضرت امت بیچاره اوچون زار ایرورلار، آنه سینی ایمه تورغان یاش باله اگر یوقالیب قالسه اول باله تاپیلغانده آنه سی قنداغ اطرافیده جولان ایتیپ پروانه وار ایلانور، مینگلارچه شونداغ آنه لار دین کوبراغ و یخشی راغ حضرت محمد ^{علیه السلام} غریب امت اوچون یوراکلاری داغ و بریان دور اول ذات محترم دین شفاعت سوتی کرم ایمچاگی دین دریا بولوب اول دریا حق تعالی اذنی بیرلان هر طرفگه جوش و خروش ایتیپ آقور، الله نصیب ایتگان [مؤمن] کیشی اندین ایچیپ بهره ور بولور. اما اندین نصیبه سی یوق [کم بخت] شونداغ اولوغ دریاسی شفاعت دین آغزی [نم لنامای] قوروق قالور. [یم] دریا معنی سیده. [فم] آغوز معنی سیده دور.

^۱ نفسی سوزیده گی (ی) سی یای متکلم دور، معنی سی نفسیم دیگنی دور. امتی معنی سی هم امتیم دیگنی دور.



افسوس که کیشی بیلمس قیامت صحراسیده اول ذات بو قُل لارنی امتیم دیرلارمو یا یوق؟ اگر امتیم دیسه لار زهی سعادت و خوش دولت و بخت دور، و اگر (خدا ناخواسته) امت دیماسه لار گنه کارلارگه ایش قتیغ بولور، اگر امت دیسه لار نور اوستیگه نور کوب یخشی و اگر دیماسه لار عاصی لارگه ایش کوچ بولور. الله نامیگه قَسَم که اول سلطان انبیاء خدا طرفیگه چقیرماقده غریب امت اوچون کونگوللاری داغ-داغ ایردی، اما بو امتلار (خصوصاً بو زمانده) یمان حالگه توشوب رسول الله سنتلاری جمالینی بدعت سیئه لار پرده سی بیرلان یاپیب ایشلاری (تورت ایاغلیغ حیوان کبی) ایچمک و ییمک و عیش و عشرت دور، قوروق تیل اوچی بیرله امت میز (و مسلمان میز) دیمک دور. الهی ایکی دنیا ده و خصوصاً محشرده یخشی و یمان بنده لارینگ بیغیلغان وقتده و حسرتلیک ساعتلارده لطف و مهربانلیک بیرله حبیبینگ (محمد علیه السلام) شفاعت لارینی بیزارگه نصیب ایتگیل و یخشی بنده لارینگ آره لاریدین آییلمس دین و دوستینگ پیغمبریمیز توب لاریدین و قاره لاریدین اوزاغ قیلماغیل.

جنت و دوزخ بیانیده

ایرور جنت و دوزخ حالی موجود	یراتیب دور انی خلقیغه معبود
کونگولغه سالمه ای عقلی پیاده	سیغار اول ایکی منزل قیسی جاده
اگر امر ایلاسه کونین بر پای	بولور بیر پسته نی پوچاغینه جای
کیرار دوزخ گه کافر قیته اولمس	عذاب سخت دین هرگز قوتولمس
همیشه قالمغای ایمان لی بنده	توتار آخر قولین ایمانی انده
اگر عفو ایتسه آثام کبائر	دیگیل جائز او دور غافر و ساتر
صغیره دین اگر توتسه خداوند	دیگیل کیم ایرک انینگ دور ای خردمند
اوزی غافر اوزی قادر خدا دور	قُلیغه هر نه حکم ایتسه روا دور
نعوذ بالله استحلل عصیان	آلور مؤمن کیشی دین نور ایمان

شرح: عقیده اهل سنت و جماعت شول که جنت فی الحال موجود دور، الله تعالی بو ایکی سینی (انس و جن) مخلوقلاری اوچون یراتیب دور. ای فکری قیسقه بنده، شونچه بویوک و اولوغلیگی بیرله اول ایکی منزل قیسی جایگه سیغار دیب کونگولگه کیلتورمه، اگر الله امر ایلاسه ایکی دنیا توروشیچه بیر پسته پوچاغیگه جای بولور.

تنبیه: اول) بو بیت اؤل کتابده اوتوب ایردی، بو بیرده تکرار واقع اولویدور.



دوم) قرآن کریمده جنت دوزخنی ذکر ایتیلگانه، **أُعِدَّتْ لِلْمُتَّقِينَ** [۱۳۳: آل عمران] متقیلارگه تیار و آماده قیلینگان، **أُعِدَّتْ لِلْكَافِرِينَ** [۲۴: البقرة] کافرلارگه آماده قیلینگان دییلگانی و احادیث معراجده رسول اللهنی جنت و دوزخنی کورگانلاری ذکری و حضرت آدم و حوا علیهما السلامنی جنتده توروب سونگره اندین چیقاریلگانلاری بو ایکی سینی حاضر بارلیگیغه دلیل دور. کافرلار دوزخگه کیرگاندین سونگره قیتیب ینه اولمس لار و قتیغ عذابدین قوتولمس لار، اما ایمان لیک کیشی دوزخده همیشه قالمغای، آخر انی ایمانی قوللاب دوزخدین قوتولغای.

تذیل: جنت و دوزخ اهل لاری همیشه و ابدی الار ایچیده قالماق لاری آیات و احادیثدین واضح معلوم بولور. اهل سنت و جماعت عقیده لاری شول دور، چنانچه آیه: **فَأَمَّا الَّذِينَ شَقُوا فِي النَّارِ لَهُمْ فِيهَا زَفِيرٌ وَشَهِيقٌ** [۱۰۶] **خَالِدِينَ فِيهَا مَا دَامَتِ السَّمَاوَاتُ وَالْأَرْضُ إِلَّا مَا شَاءَ رَبُّكَ** [۱۰۷: هود] و آیه، **وَأَمَّا الَّذِينَ سَعِدُوا فِي الْجَنَّةِ خَالِدِينَ فِيهَا مَا دَامَتِ السَّمَاوَاتُ وَالْأَرْضُ إِلَّا مَا شَاءَ رَبُّكَ** [۱۰۸: هود] و باشقه شونگه اوخشش آیت لار کیلگاندور، و جنتی لار جنتگه و دوزخی لار دوزخگه کیریب تمام بولگاندین سونگره الله امری بیرلان اولومنی بیر قوچقار صورتیده قیلیب جنت و دوزخ اراسیگه کیلتوروب انی سویوب سونگره منادی ندا قیلورکه: **[خُلُودٌ فَلَا مَوْتَ]** یعنی، بو بیرده همیشه بولینور و اولوم یوقدور، دیگانه؛ جنتی لار نهایت خرسند بولوب، اما دوزخی لار بی اندازه غمگین و خفه بولماق لاری حدیث شریفده مروی دور.

اگر الله گناه کبیره لارنی عفو ایلاسه جائزدور، چونکه غفار الذنوب و ستار العیوب دور، **إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ** [۴۸: النساء]. لا تَقْنَطُوا مِنْ رَحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا [۵۳: الزمر] آیتلاری بو سوزگه دلیل دور. اگر گناه صغیره دین بنده سینی مؤاخذه ایتسه هیچ چون و چراگه اورون یوقدور، چونکه **فَعَالَ مَا يَشَاءُ** و صاحب اختیار دور، اوزینی بیر صفتی غافر و بیر صفتی قادر دور، بنده سینی اوستیغه هر نه حکم ایتسه روا دور. لا يُسْأَلُ عَمَّا يَفْعَلُ وَهُمْ يُسْأَلُونَ [۲۳: الانبیاء] گناهنی حلال اعتقاد ایتماق دین خداگه پناه ایلتمه میز، هر کیم گناهنی حلال بیلیب انی ارتکاب ایتسه کافر بولوب نور ایمان دین ایریلور.

بولور انده همه مقصودی حاصل
الم دین حزن و غم دین ذره بولمس
کونگولگه کیچماگان عشرت لار انده
قیلورغه جمع بولسه قاف تا قاف
انی یخشی بیلور تنگریمنی ذاتی
الار اهلی بیلان هیچ فانی بولمس

بهشت ایچره کیشی کیم بولسه داخل
تیریک دور دائما اندین سونگ اولمس
همیشه عیش ایله عشرتده بنده
اگر جنت بیلان دوزخنی اوصاف
ادا بولمس ایکی منزل صفاتی
ایکی منزلنی وصفی سانی بولمس



کہ بولمس عرش و کرسی روح فانی

عقیدہ بول دور ای فرزند آدم

بیتیب دور شـارح اُوراد اُنی

فنا بولمس دیدی لوح و قلم ہم

شرح: ہر کیم جنتگہ کیرماقگہ موفق اولسہ، اول بیردہ ہمہ مقصودی حاصل و رضای الہی گہ واصل اولور و نی کونگلیگہ کیچماگان عیش و عشرت و خوشگذران لیک جنتدہ بولوب جنتی لار ہمیشہ عیش و عشرتدہ بولورلار، اگر جنت بیرلہ دوزخی تعریف و توصیفی اوچون کوه قافنی آرہ سیدہ گی ہمہ انسانلار بیغیلیب، الارنی توصیف ایتسہ لار، بو ایکی منزل اوصافی توگامس، ذات خداوندی انی یخشی بیلور، بو منزللارنی اوصافین سان و سناغی یوقدور، جنت و دوزخ و الارگہ کیرگان [دایمی] اہللاری بیرلہ ہمیشہ باقی قالب ہیچ فنا الارگہ طاری بولمس، شارح اُوراد بیتیب دورکہ، عرش و کرسی و لوح و قلم و روح فانی بولمس. عقیدہ صحیحہ شول دور محکم اوشلاغیل.

مناجات

منی آغشته قیلغیل خاک بیرلان
 بو سوزدین قیلماغیل بیر ذرہ مایل
 کریم و غافر و ستار آتینگدین
 جماعت اہل سنت قسم قیلدینگ
 اگر چندی کہ بولسک جرم پیشہ
 قیلور شیطان ملعون قصد ایمان
 عزیز جان اچیغی دین کم بولور عقل
 قیلور ہر یاندہ شیطان حیلہ و کید
 اورار تیرناغیمیز غہ اول لعین نی
 لحددہ، حشردہ، کوپروک اوتاردہ
 آیرمہ صدقیمیزنی ذاتیمیزدین
 منی آزغورماغیل دنیا و دین دہ
 قُلونگنی قیلماغیل رسوا و مأیوس
 شیطین مکری بیرلان یولدین آزدیم
 بہار و تیرہ ماہ و یاز و قیشدین

الہی اعتقاد پاک بیرلان
 دلیم صادق تیلیمگہ بولدی قایل
 خداوندا، اوزونگنی حرمتینگدین
 بو مسکین لارگہ مؤمن اسم قیلدینگ
 اوشل آت دین آیرماغیل ہمیشہ
 ملک کیلسہ جسددین آغالی جان
 قیلوردہ جان شیرین جسم دین نقل
 کونگول شہبازینی قیلماق اوچون صید
 مدد سن قیلماسنگ اول دم دہ یا حی
 خداوندا تیریک دہ، جان چیقاردہ
 جمیع بیردہ مؤمن آتیمیزدین
 ہمیشہ نفس ایلہ شیطان کمین دہ
 تیلایم بول ایا سُبوح و قدّوس
 خداوندا بینگیدیم، طرفہ یازدیم
 پشیمان من پریشان اوتگان ایشدین



کونگول ملکین مقام دردناک ایت

اویاتلیغ قیلماغیل دستار و فشدین

قبول ایتگای سن ای دارنده دین

تیلیم نی مینگ تیلیم قیلسم ایرور آز

قنی عذر آیغانیم یوز مینگیدین بیر

کیراک توزلارگه قویسم خوف ایله یوز

دیدى حق دور اوزى دانای اسرار

تیریم خجلت بیله آقسه تیریم دین

یمان ایشدین همه عضویم نی پاک ایت

ینه شرمنده قیلسمه قیته باشدین

مناجات ایتدی الله یار مسکین

تیلیم عذر ایغالی ای کاشف راز

اویاتلیغ من ولّی یا عالم السّر

ایمس من توز کرم خواننده ییب توز

تيله ایدیم تيله هر مطلبینگ بار

اوشل به خوف ایتیب بارور بیریم دین

شرح: الهی اعتقاد (بی شائبه) پاک اهل سنت و جماعت بیرلان منی جانیم نی آلیب، قبرگه کیرگیزیب، تفرأقه قوشوب (اولار وقتیمده ایمان دین آیینماغیل). دلیم راستگو، تیلیم اقرار ایتگان کلمه طیبه گه تصدیق ایتیب ایشانگان دور، منی بو سوز و اعتقاد دین باشقه طرفگه بیر ذره چه مایل قیلماغیل، اهلی اوزونگی (ذاتینگ) و کریم و غفار و ستار آتلازینگ حرمتیدین بو غریب بیچاره لارگه (که مؤمن و مسلم آتاب) اهل سنت و جماعت توبی دین بولماقنی قسمت و نصیب ایتدینگ، اگرچه روسیاه و گنهکار بولسکده، (الهی همیشه) شول آت دین آیینماغیل، مؤکل فرشته تندین جان آغالی کیلسه، شیطان ملعون ایمان قصدینی قبولور (جان چیقیشینی کمال قتیغ و اچیغ لیگی دین) جان شیرین چیقار پیتیده انساننی عقلی کم بولوب قالور، دل شهبازینی شکار ایتماق [و ایماننی آلماق] اوچون شیطان ملعون هر طرفدین کیلیب حيله و فریب ایلار. ای پروردگار حی و قیوم، اول دمده اوزونگ یاری قیلما سینگ، اول لعین تیرناغیمیزگه نی اوروب (آداب ایمانیمیزدین آیینار)، الهی تیریکیلکده، جان چیقارده و قبر و محشرده و صراط کوپروگی دین اوترده، بلکه همه بیرده بیزلارنی مؤمن آتیمیزدین و تصدیق قلبی نی ذاتیمیزدین آیینماغیل و جدا ایتماغیل، همیشه نفس و شیطان کمینده پایلاب تورگان دور، ایکی دنیاده منی راه راست دین آزدورماغیل. [نی] قامیش معنی سیده دور. ای همه عیب لاردین پاک و منزله پروردگاریم، بو قُلونگنی ایکی دنیاده (خلق ایچیده) رسوا و ناامید ایتمسلیگینگنی سندن تیلای من؛ خدایا! نفس و شیطان دین بینگیلیب (یول دین) طرفه اداشتیم، شیطان مکرری بیرله راه راست دین آزیب (ایگری یول لارگه کیردیم) (نفس و شیطان یولیده) پربشان لیک بیرلان اوتکان یمان ایشلاردین و (اوتکان عمرنی) بهار و یاز و کوز و قیش [بلکه غفلت و بطالت بیرله اوتکان انفاسیم] دین پشیمان من، الهی توبه منی قبول ایتیب همه اعضا لاریم نی گناه دین پاک ایلاب کونگول ملکینی درد و سوز (و عشق) مقامی ایت. قیته باشدین گناه گه آلوده قیلیب شرمنده قیلسمه و خلق اراسیده دستار [سله] و فش دین اویاتلیغ ایتمه. بیچاره الله یار مناجات ایتیب سنگا یالباردی، ای دین نی ساقل اغوچی ذات، انی تیلانگینی قبول ایتگای سن، ای کاشف راز، عذر تقصیرات ایغالی تیلیمنی مینگ تیلیم



[بولک] قیلسم آز ایرور [تیلیم لفظی بیرینچی و ایکینچی سی لسانیم و زبانیم معنی سیده دور، اوچونچی سی تیلماقدین بولک معنی سیده دور]. ای دانای راز، قیلگان تقصیراتیمنی یوز مینگیدین بیر یغہ عذر آیفانیم قنی؟ سنی آلدینگده شول اوچون اویاتلیک. پروردگاریم خوان کرمیده توزیب و احسان کوروب توروب شکر گذارلیکده توزوک و درست ایمسمن بو ناسپاس لیکدین قورقوب کیراک که تاغ و توزگه یوز قویوب چیقیب کیتسم (اؤلگی توز لفظی توزوک و درست معنی سیده، ایکینچی سی ملح و نمک معنی سیده، اوچونچی سی دشت و صحرا معنی سیده دور). تیلیم گه ایدیم هر مطلبینگ بولسه الله دین تيله و سوره. جواباً ایدی، سوراماق حاجت ایمس، الله اوزی دانای اسرار دور (اؤلگی تيله لفظی [تیلگه] نی مخفی لسان و زبانگه معنی سیده دور، ایکینچی سی [سوره و طلب قیل] معنی سیده تيله ماقدین آلینگان دور) [من دیک گنه کارگه] بارادیکان بیریمدین قورقوب و قیلگان ایشلاریم دین اویالیب خجالت تیری منی تیریم [پوستیم] دین آقسه یخشی راغ دور. اؤلگی تیریم لفظی تیر [عرق] ضمیر متکلم گه قوشولگان دور، ایکینچی سی جلد و پوست معنی سیده [ضمیر متکلم بیرلان].

مونینگ دیک یورگانینگدین اولگانینگ خوب
گناهینگ باره-باره حد دین آشیدی
نچوک جان سن، نچوک تن سن، نچوک ذات؟
گناهینگ آلدیده ارزنچه یوغ تاغ
یوزونگ قتیغ تیلینگ اچیغ دلینگ تاش
همای بختینگ اوز کعبینگ بيله بوم
قنی سن دیک گنه آستیده قالغان
یوباردینگ رشته طاعتنی قولدین
ریا بیرله اول ایشنی ایلادینگ هیچ
کوزونگ آج کاروانی قیلدیلار کوچ
ییدی خلق اوز غمینی سندین اوزگا
کیتارلار باقی اویگه کونده-کونده
کوتارمس سن خطرلیک اویقودین باش
سفر رختینی باغلارلار پس و پیش
یاتورسن نیچه رسوالیغ بيله حیف
کیتارلار خانه مقصدغه ناچار

اوتار دنیـــــاده الله یار معیوب
یمان نفسینگ سنی اوتدیک توتاشدی
بيله آلمام ایـــــا ناقابل اوقات
بهائم سن بشر دیوانه سن ساغ
مُخَنَّت سن مو ایر، بالغ موسن یاش
فعالینگ نامبارک طلعتینگ شوم
نه کیم عهدی که قیلدینگ بولدی یلغان
یراق توشتونگ نغو قربت لی یولدین
نه کیم قیلدینگ جهانده ایرته و کیچ
بیلینگنی باغلا محکم بولمه مفلوج
یاتیب غفلت قراسین سورمه یوزگا
مصاحب لار که هم عهد ایردی مونده
کورارسن قافله نینگ اوتکانین فاش
کوزونگ آلدیده گی بیگانه و خویش
ولی سن خمر غفلت دین بولوب کیف
اولوغ لاردین کیچیک لاردین به یکبار



یاتورسن مو هنوز ای عقلی کوتاه
 سنگا اصل وطن نی حکمین ایتسه
 نه قیلغای سن ولی بی توشه راه
 جمیع کاروانی بحر غمده
 کیرار یلغوز باشینگ اول اویگا ناچار
 قیزیل گل دیک یوزونگنی سولـدورورلار
 قرا بیر آستیده بیچاره بولغای
 دیمس فرمان دین آرتوق بیـرگینه قیل
 قنی اول دمده درمان کیش دیگانی
 نه قیلغای بنده حسرت سرشته
 وگر نه قی گه بیتـگای داد و فریاد

اگر سندی کچیک لار توتسه لار راه
 بناگه کاروان سلطانـی بیتسه
 اولوغ یولگه کیرارسن خواه ناخواه
 عجب یول عقبه دور هر بیر قدمده
 خصوصاً یولده بیر وحشتلی اوی بار
 آیریب کاروانـدین قوندورورلار
 عزیز جسمـنیگ که نعمت خواره بولغای
 یوز الوان بیرله سوز آغان سچوک تیل
 لحد قورتی اگر کیلسه ییگانی
 يتوشسه سورغالی ایگی فرشته
 مگر تنگری تعالی قیلغای امداد

شرح: (ناظم رحمه الله اوزلارینی [هضمًا لنفسه] پست اوروب یوقاریده گی ابیات لارنی رشته نظمگه تار تیب نصیحت ایتیب دورلار نه اول ذات، کوب متقی و متشرح ایردی لار).

ای کوب عیب و نقصان لیک الله یار سنی مونداغ یورگانینگدین اولگانینگ یخشی دور، سنی یمان نفسینگ اوت دیک توتاشیب شراره سی زیاد بولوب، باره باره گناه لارینگ حد دین آشتی، ای اوز وقت و زمانینی ناقابل و نالایق نچوک جان و نچوک تن و نچوک ذات سن، بشرمی سن یا حیوان، دیوانه می سن یا ساغ، من بیله آلمادیم گناهینگی کتـه لیگی آلدیده تاغ تربیچه یوقدور، [خنش] هیز می سن یا ایرکک، بالغ ییگیتی می سن یا یاش باله. یوزینگ (بی خیالیکدین) قتیغ، تیلینگ (بدگوی لیکدین) اچیغ، دلینگ (بی رحم و بی عاطفه لیکدین) تاش کبی دور، قیلگان ایشلارینگ نامبارک، طلعت [نامیمونینگ] شوم دور، بخت و طالعینگ هما قوشی اوز عملینگ و قیلگان تدبیرینگ بیله بوم کبی شوم و منحوس دور. (کعب: تخته نردنی اوینماق ده کیراک بولا دیگان آلتی رخ [مسدس] آشوغی دور) بو بیرده عمل و تدبیر دین کنایه دور. [هما] بیر افسانوی قوش دور که هر کیمگه سایه سی توشسه پادشاه بولور دیب زعم ایتورلار. [بوم] چغذ: بای اوغلی قوشی دور که اکثر ویرانه لارده بولوب انی مردم شوم و نحس بیلیم اوزیدین و آوازیدین تطیر و فال بد آلورلار، ناظم رحمه الله نیک بخت لیکنی هما لفظی بیرله و بد بخت لیکنی بوم لفظی بیرله ادا ایتیب دورلار. هر عهدی که (گناه قیلمس لیک اوچون) الله بیرله قیلغان ایردینگ انده ثابت قدم تورا آلمس دین یلغان بولوب سن دیک گناه آستیده باسیلیب قالگان قنی؟ سن نچوک الله که یقین قیلادیگان یخشی یول دین یراق توشوب رشته طاعتنی قول دین [مفت] قویوب یباردینگ، هر طاعتی که ایرته و کچ قیلدینگ انی هم عجب و ریا بیرله هیچ ایلا دینگ. بیلینگنی همت کمری بیرله محکم باغلاب



خدادین اوزگه یوق هیچ حاکم کار
 ثناسی بیرله سبز ایتسنگ تیلینگی
 بولوب بیر کاروان محشرگه یورسه
 بولور آخرغی سوداسی غمینده
 نه کیلتوردونگ نه تورلوک قیلیمشینگ بار
 بهایم قیلدیم و انسان یراتتیم
 نغو قیلدینگ پریشان نیتینگ نی
 قنی شکر ابتگانینگ مینگدن بیر نه

یقین بیلگیل مونی ای بندۀ زار
 نغو قُل لوقغه باغلا سَنگ بیلینگی
 لحد دین برچه آدم اوغلی تورسه
 ولیکن هر کیشی اوز ماتمینه
 خدا قیلسه ندا ای بندۀ زار
 نن و تیرینگده تاتلیغ جان یراتیم
 همیشه ایلا دیم تربیتینگی
 سنی سال دیم مسلمانلیغ بیرینه



اولوغ ذاتیم بیلورغه عالم ایتدیم
قنی آیغیل منگا قیلغان ایشینگنی
بو حسرتدین فغان ای رو سیه وای
مگر عفو ایلاغای داننده غیب

تمام اعضالارینگنی سالم ایتدیم
سوغاردیم آب نعمتدین تیشینگنی
نه بیرغای سن جوابین ای تن آرای
ایرور باشدین ایاغینگ برچه سی عیب

شرح: ای بنده عاجز مونی یقین بیلگیل که تمام عالمده الله دین باشقه هیچ حاکم مطلق و حقیقی یوقدورانی قُللیگیغه بیلینگنی باغلاب و حمد و ثناسی بیرله تیلینگنی کوکارتورسنگ قنداغ یخشی دور. قبردین همه بنی آدم توروب بیر کاروان بولوب محشر ساری یوروب هر کیم اوز مصیبت و ماتمیده و آخرگی سوداسی غمیده بولگانه الله تعالی طرفیدین ندا قیلینسه و سورالسه که: ای بنده عاجز منی حضوریمکه نیمه تحفه کیلتوردونگ؟ و قیلیمیش [عمل] لارینگ قنداغ دور؟ سنی بدنینگده سچوک جان یراتیم، چهاریا و حیوان قیلیمه دیم، انسان یراتدیم، همیشه رزق بیریب تربیت قیلدیم، نیمه که نیتینگنی پریشان قیلیب منگا توکل قیلمسدین هر طرفکه اوزونگنی اوردونگ و سنی مسلمانلیغ ییری دارالاسلامده یراتدیم و یا مسلمان آتہ-آنه دین وجودکه کیلتوردوم [بو مذکور نعمتلار اولوغ نعمتلاردین دور] بولارنی مینگدین بیرغیه شکر ایتکانینگ قنی؟ همه اعضالارینگنی صحیح و سالم ایتیپ اولوغ ذات و صفاتیمنی بیلماقکه دانا ایتدیم! تیشلارینگنی نعمت سوئی بیرلان سوغاردیم، بو قدر نعمتلار مقابلیده خاص منی اوچون (بی ریا) قیلگان عملینگ قنی؟ ای تن آرای بو سوالارکه نیمه دیب جواب بیوررسن (ای یوزی قرا) وای سنی حالینگه، بو حسرت و ندامتدین آه و فغانلار کوتاریلگای، باشدین ایاغینگ همه سی عیب و نقصان ایرور، مگرکه بو همه عیوبنی علام الغیوب عفو پرده سی بیرله یاپسه.

یمان لار یخشی لاردین ایریلینگ لار
یمانلار اورته سیده بی گمان من
یاپیپ قوشغای سعادت اهلیمه باز
خلایق ایچره فتنه باشی دورسن
ولیکن باطنینگ تزویر ایله حیل
ولیکن باطنینگده انچه یوق ترس
ولیکن باطنینگده ننگ و ناموس
عهدینگ نخلی هرگز بیرمادی بر
نهانده نفس ایتیگه مبتلاسن

ینه کیلسه ندا انیدین بیلینگ لار
مسلمان اوغلیده طرفه یمان من
یمانلیغنی مگر داننده راز
وگرنه سن جهان رسواسی دورسن
تیلینگده خلق ارا تسبیح و تهلیل
تیلینگده خلق ایچینده وعظ ایله درس
کییب سن خلق ارا فقرانه ملبوس
یانر خنثی موسن قولینگده یا نر
کورار کوزده عجب صوفی نماسن



گنه لارینگنی عفو ایتگای به یکبار

مگر رحمت بیلان دانای اسرار

نکولار اورته سیده ایلاغای یاد

اوشل غملیک کونگونلی ایلاغای شاد

شرح: ینه الله طرفیدین ندا کیلسه که بیلینگلار و آگاه بولونگلار، یمانلار (گنهکارلار) یخشی لاردین آیریلینگلار، وَاَمْتَاوُوا الْيَوْمَ أَیْهَا الْمُجْرِمُونَ [۵۹: یس]. مسلمان اوغلی ایچیده عجب یمانمن، یمانلار اراسیده بارلیغیمده شک و شبهه یوقدور، مگرکه عالم السر و الخفیات یمانلیغ لاریمکه پرده عفو یاییب نیکبختلار قطاریکه قوشسه، ورنه جهان اهلینی رسواسی و خلایق ارا فتنه باشی دورسن، تیلینگده خلق ارا سبحان الله و لَا إِلَهَ إِلَّا اللَّهُ دیمک دور، لیکن ایچینگده مکر و حيله و فریب توله دور [تزویر] یلغان سوزنی چرایلیک قیلیب کورساتماق و یلغاننی اوزیدین توقوماق و یلغان شهادت بیرماق و مکر و فریب معنی سیده کیلور [حیل] بکسر حاء مخفف حيله مکر و فریب معنی سیده دور. خلق ارا تیلینگده وعظ و نصیحت و درس دور، لیکن دلینگده اونچه خدادین قورقماق یوقدور، خلق ارا الباس فقیرانه کییب ولی باطنینگده ننگ و ناموس مرکوز دور. [ننگ] عیب و عار معنی سیده و ناموس بو بیرده خلق دین حرمت و عزت توقع قیلیمک معنی سیده دور، قولینگ و عهدینگده تورمای یانر سوزیدین [قایتار] خنثی [هیز] موسن ویا قولی و عهدیده ثابت قدم نر [ایرکک] موسن، عهدینگ خرما درختی هرگز حاصل بیرمادی، یعنی هرگز عهد و قولینگده ثابت تورمادینگ، اولگی [یانر] لفظی یانماقدین مأخوذ اولوب قایتار معنی سیده دور، ایکیچی سی [یاء] تردید ایله [نر] مرکب اولوب ایرکک و مرد معنی سیده دور [بر] بانینگ فتحی له حاصل و ثمر معنی سیده دور، کورونوشده [ظاهرده] عجب صوفی نما بولوب اما باطنده نفس ایت صفتکه مبتلاسن، (بو افعال منافقانه بیرله هرگونه عذابکه سزاوار سن) مگر پروردگار علام الغیوم اوز رحمتی بیرله همه گناه لارینگنی عفو ایتیب غمگین کونگول لارنی شاد ایلاسه و یخشی لار اراسیده محشر کونی یاد ایلاسه.

نعوذ بالله اول کیم حد دین آشر

کیشی تا شر قیلور سوداسی تاشر

عبث اوتکارماگیل اثنی عشرنی

بشر بولسنگ قوی افعال بشرنی

کوزونگ یاشی قنی ای مغزی یوق باش

یاشینگ یتکان سری فعلینگ سنی یاش

طمع بوئی کورونمای بوئیدین قاچ

قناعت معدنیگه آچ کوزونگ آچ

سورولمسدین برون سورگیل اوزونگنی

ساجیلمسدین برون ساچیل اوزونگنی

یازیلمای عقده لار یان یازغانینگدین

قازیلمای بیر سنگا قیت آرغانینگدین

یقانی توت اجل توتمای یقانی

بقادور دیمه عیش بی بقانی

نصیحت گوشه آلسنگ گوشه قیل جای

مکان ایتکان بیرنگدور مختلط لای

اوزین بیلگان قچان قالغای طلب دین

یانیب عیش و طرب دین ایتسه رب دین



شرح: انسان یمانلیک قیلگان ساری نفس و شیطان یولدین اوروب سوداسی تاشیب ینه گناه طرفیگه کیتور باره باره حددین تجاوز قیلیب ولی بالکل قاره بولوب آیه، **کَلَّا بَلْ رَانَ عَلَى قُلُوبِهِمْ مَا كَانُوا يَكْسِبُونَ** [۱۴: المطففین] گه مصداق بولوب قالماقدین خدادین پناه سورایمیز. اولگی تاشر لفظی [تاء] غایت و [شر] یماندین مرکب دور، ایکینچی سی تاشماقدین مأخوذ. انسان عاقل بولسنگ، آخر یمان لیکنه منجر بولادیگان ایشلارنی قویگیل، اون ایکی آی یعنی تمام بیلنی عبث و بیهوده اوتکارمغیل، اولگی بشر انسان معنی سیده عربی دور، ایکینچی سی مرکب ب [گه] معنی سیده و شر [یمان] معنی سیده دور. یاشینگ قریلیک و کیتیش ایامیگه یتوشگان ساری قیلیغینگ یاش باله لار قیلیغی دیک دور. ویا افعالینگ یاش و خام دور، ای بی عقل (قری لارگه مناسب خوف الهی دین توکولگان) کوزونگنی یاشی قنی، [یاشینگ] لفظی [یاش] سن و سال معنی سیده ضمیر مخاطب بیرله مرکب دور. ایکینچی یاش صبی و یاش باله معنی سیده و یا خام معنی سیده دور. یاشی لفظی آب دیده و دمع العین معنی سیده دور. آچ کوزونگنی قناعت کانیهه آچیب طمعنی هنوز بویی و قامتی مجسم بولوب کورونمای انی بوی و ایسی دین قاجغیل، آچ لفظینی اولگیسی جائع و گرسنه معنی سیده دور، ایکینچی سی آچماقدین امر دور، **إِفْتَحْ** و بازکن معنی سیده دور. اولگی بوی لفظی قد و قامت معنی سیده، ایکینچیسی هید و ایس و رائحه معنی سیده دور. (اولگاندین سونگره) اعضالارینگ ساجیلیب [پراکنده] بولمسدین ایلکاری اوزونگنی ساجیب **[موتوا قبل ان تموتوا]** گه عمل قیلیب نفسینگنی اولدوروب اولمسدین برون اولوک لار قطاریغه کیرغیل، و **حاسبوا انفسکم قبل ان تحاسبوا** گه عمل قیلیب محشر سوراغی و حسابی دین ایلکاری شو دنیاده اوز قیلگان اعمالینگنی محاسبه ایتیب تیکشیریب یورغیل، سنی اوچون قبر بیرری قازیلمای توروب خلاف شرع ایشلارنی ارتکاب ایتیب آزان و اداشگان لارینگ دین قیتیب توبه قیلغیل، اولگاندین سونگره قبرگه قویوش آلدیده کفن توگون لاری بیچیلمای توروب یولدین چیقیب یازغان لارینگ دین یانغیل و قیتغیل، عقده توگون معنی سیده دور.

عادت شولکه اولوکنی کفن لاکنده باش و ایاغ طرفیدین باغلاب قویورلار [قبرگه بارگونچه آچیلیب کیتماسون دیب] قبرگه قویگاندین سونگره توگون لارنی بییشیب قویورلار. عیش بی بقای دنیانی بقالیک و پایدار دیب گمان ایتماغیل، اجل کیلیب یقا و گریبان دین توتمای توروب یقانگنی توتوب الله گه توبه ایتیب تضرع قیلگیل، یقانی توت دیگانی توبه قیل دیماقدین کنایه دور. عرفده هر کیم قیلغان گناهی دین توبه ایتماق بولسه ایکی قولی بیرلان یقاسینی اوشلاب توبه قیلدیم دیر. ایکینچی یقا لفظی جیب و گریبان معنی سیده دور. بول هم اجلنی یتوشکانی دین کنایه دور، دنیاده مکان ایتیب تورگان بیرینگ عموماً ارالاش بلچیغ لای دور، یعنی بو دنیاده صفای عیش و سرور بی اندوه موجود بولماغی ناممکن دور، لهذا نصیحتنی قولاقعه آلسنگ بیر گوشه گه منزل ایتیب عزلت اختیار ایلاب عبادت پروردگارغه مشغول بول. اولگی گوشه لفظی «گوشه گه» نی مخففی «قولاقعه» معنی سیده دور، ایکینچی سی کنج و برچک معنی سیده، اما بو بیرده عزلت و خلوت اختیار ایت



معنی سیده دور، عیش و عشرت و سرور و طرب دین یانیب پروردگار دین رحمت و مغفرت و خیر دنیا و آخرت نی
سوراگیل، زیرا که اوزینی بنده عاجز و گنهکار بیلگان کیشی قچان طلبدین قالغای و آسوده یاتغای.

مصنفنی وصیت لاری

منی اوزگا اولوگ دیک قیلینگ اعزاز	من اولسم ای جمیع محرم راز
قیلینگ مندین بهایم جسمی دیک عار	خس و خار اوستیگه تشلاب توتونگ خوار
کفن ایلانگ چوروک پیراهنیم نی	بوساغه آستیغه تشلانگ تنیسم نی
اگر چندی که مردم ایلاسه سوز	منگا حیف ایتمنگیزلار توتماغان بوز
مذلت گرد و خاکین سیپسون اوتسون	نه کیم کیرگان و چیقغان تیپسون اوتسون
مبادا قالمغای سیز شوم لوغومغه	یویارینگ تیز بارا تورغان یولومغه
جنازم آرقه سیدین آتینگیز تاش	کوزونگیزدین چیقارمنگ قطره یاش
نه اوچون قیلما دینگ قُل لوغ احدگه	ایاغیم دین توتوب سودرانگ لحدگه
دعا و زاریغه سیزلار بولونگ یار	اگر چندی که من بولسم گنهکار
رحیما، مغفرت لیک بیر و بارا	دینگیز: پروردگارا، کردگارا
خطالار بابینی آچغان قُلونگنی	آلیب کیلدوک سنی قاچغان قُلونگنی
تیلی یوقدور بو قُلنی عذر ایتارگه	کیلیب دور حیلہ سی یوقدور کیتارگه
بویون سونماقدین اوزگا چاره سی یوق	گناهی کوب باقر رخساره سی یوق
وگر عفو ایلا سنگ پس پادشاه سن	اگر بیرسنگ جزا قادر خدا سن
اریغ ذاتینگ صفاتینگ حرمتیدین	الهی برچه آتینگ حرمتیدین
اگرچه قیلدی قُل لوغ رشته سین گم	بو قاچغان بنده گه قیلغیل ترخم
نصیب ایت آخرت نی راحتیدین	محمد آتلی دوستونگ حرمتیدین
جمیع یخشی لارنی شفقتیدین	همه اوتگان رسولینگ حرمتیدین
رخ عصیانه ثوب مغفرت سال	اگر چندی که بنده نگ دور بد افعال
رخ زرد و دل خونباری اوچون	محبت اهلی نینگ اسراری اوچون
شهیدلارینگ مبارک قانی اوچون	غزا قیلغان ایرانلار جانی اوچون
بیگیت لارنی دل مشتاقی اوچون	اولوغ لارنی سقالی آقی اوچون
یتیم لارنی کوزینی یاشی اوچون	عجوزلارنی آقارغان باشی اوچون



اسیر خلقینی آه سردی اوچون
 بو قاچغان قُلنی رسوا قیلماغیل حی
 بو قاچغان بنده دین اوگای جرایم

شکسته بیوه لارنی دردی اوچون
 اگر چندی که یوق ایلگیده هیچ شی
 نه بولغای بو دعا لار دین خدایم

شرح: ای همه زاریمگه محرم ذات لار، سیزلارگه وصیتیم شول که من اولسم اولو کیمنی باشقه اولوکلار دیک اعزاز و اکرام قیلمنگلار، بلکه جسدیمنی خس و خار اوستیغه تاشلاب انی خوار توتونگلار، حیوانات اولوم توگی دین چرکنگان دیک منی اولو کیمدین هم جرکینیب اندین عار ایتینگلار، تنیمنی بوساغه [آستانه] آستیغه تاشلاب و ایسکی چوروک کویلا کیمنی کفن قیلینگ لار، ینگی توتمغان بوز [کرباس] نی منگه حیف ایتمنگلار (اگرچه مردم سوز قیلیب عیب ایتسه لارده) بوز لفظی ترکی کرباس معنی سیده دور. (آستانه غه تاشلاب قویماق شو اوچون دور که) کیرگان چیقغان کیشی لار انی تیپیپ باسیب اوتوب خوارلیک تفراغینی اوستومغه سیپیپ اوتسونلار، بادیگان یولومغه تیزدین یوبارینگلار [مبادا] شوم لوغوم که قالمگای سیزلار، کوزلار ینگیزدین بیر تامچی یاش هم چیقارمسدین جنازه م آرقه سیدین تاش آتیپ ایاغیمدین توتوب قبر ساری سودراب آلیب بارینگلار و [واحد لاشریک] پروردگار ینگه نیمه اوچون قُل لوغ و طاعت قیلما دینگ دیب سرزنش قیلینگلار، (اگرچه من گنه کار بولسم ده) سیزلار الله دین دعا و زاری قیلیب طلب مغفرت قیلما قده یاری بیریب دینگلار، ای پروردگار کردگار، و ای رحیم بیر و بار، حضور ینگه قاچگان و سهو و خطا ایشیکینی آچگان قُلونگنی کیلتوردوک، بو قُل سنی آلدینگه کیلیب دور، قیتماقغه حیل و تدبیری یوقدور، گناهی کوب لیگیدین سنگا قراما قکه بیته یوقدور (شرم و حیا ایتور) و حکمینگ که بویون سونمکدین اوزگه چاره سی یوقدور، اگر قیلگان جرم و خطا لاریغه جزا بیرسنگ قادر خدا سن و اگر عفو ایتاگی بیرله یاپیب انی کیچیپ یوبارسنگ پادشاه بی نیاز سن، الهی همه آتلا رینگ و ذات و صفاتینگ حرمتیدین بو قاچغان قُلغه رحم و شفقت قیل (گرچه بو بنده قُل لوغ رشته سینی اوزوب طاعت و عبادت وسیله سینی قُل دین بیرگان دور) حضرت محمد ^[ص] آتلیغ حبیبینگ و همه اوتگان پیغمبرلارینگ و یخشی بنده لارینگ حرمت و شفقت لاریدین (اگرچه بنده ننگنی افعال و اعمالی یمان بولسه ده) عصیانی یوزبگه مغفرت چادرینی سالیب آخرت راحت لاریدین و جنت نعیم لاریدین نصیب ایتگیل، اهل محبت اسرارلاری و سرخ یوزلاری و پُر خون کونگولار اوچون و جهاد میدانیده کافرلار مقابلیده آت اویناتگان ایرانلار و مرد میدان مجاهدلار جانلاری و شهیدلارنی توکولگان مبارک قانلاری و آق سقال اولوغ یاشلارنی آق سقاللاری و ییگیتلارنی دل پرشوقلاری، قَری [کمپیر] خاتونلارنی باشلارینی آق ساچی و یتیم لارنی کوز یاشی (دلی سینوق) تول خاتونلارنی آه و دردی، محبوس و اسیرلارنی آه سردی اوچون (ای حی لایموت! گرچه بنده ننگنی ایلگیده بارگاهینگه لایق بیر تحفه سی بولمسه ده) بو قاچغان قُلنی رسوا قیلماغیل، نه بولغای که (و عجب ایمس که) بو دعا لار سببی دین و ذکر اولگان عزیزلار حرمتیدین، بو قاچغان قُلنی پروردگاریم همه گناه لارینی اوتسه. جرائم جریمه جمعی دور، گناه معنی سیده دور.



پیر کامل ایستامک بیانیده

طریق کعبه مقصوده یورسنگ
قولونگنی تاپشور اول هادی غه
خطرلیک بیرلارینی سانی یوق دور
هلاکت چاهی دور هر بیر قدمده
ولیکن هر قریشده بیر نهان گنج
مهیا دور قرقچی لار کمینده
سالور بوینونگنه ناگه دام تزویر
ایمس ممکن کیشی یتگوی سلامت
تنب ایر یخشی سین تاپشور قولونگنی
طریقت پیشه سی نینگ شیر ی بولغای
طمع لیک بولمسه هرگز کیشیدین
علوم باطنیده بولمسه ماهر
قوتولسه ماسوی دین لطف حی دین
تکبر بولمسه مقدار دانسی
بولوب قل لوغده ایتسه ماعبدناک
اوزین کم توتسه هر مؤمن کیشیدین
اوزی هم بیلیمسه فانی ایکانین
فنا بولغان کیشی هرگز دیمسدور
قچان عاقل کیشی بیرگای انگا پل
ایشانمسدور انگا هیچ مرد عارف
یتیب سن دیب انی شیطان یتیب دور
بیان ایتمک بیله قالغانینی شام
بیتار آخشام-صبا بو توشدین آفت
ولایت تختیغه باسغان ایمس گام
برونگی دین زیاده بولسه خوفی

کیل ای طالب بو دون دین یوز اوگورسنگ
قدم قویسنگ اگر بول وادی غه
عجب یولدور انی پایانی یوقدور
طلب قیلغان اوشل راه عدمده
عجب یولدور تمامی محنت و رنج
اوشل گنج نهان یاتقان زمینده
اگر بولماسه یول باشلاغوچی پیر
اگر بولماسه بیر صاحب کرامت
قچان هر پیر بیلور قوتلوغ یولونگنی
اوشل پیری که ایرنینگ ایری بولغای
تخلف قیلیمسه هیچ شرع ایشیدین
آلیب قولغه چراغ علم ظاهر
فنا بولسه تن و جان دین تولایدین
قایو ایرمیش فنا بولغان نشانی
اوزینی نفسینی اول بیلیمسه پاک
اگرچه بولیمسه فارغ ایشیدین
ایشیتیمسه کیشی هیچ من دیگانین
اوزی ایتسه فنا بولدوم ایمسدور
اوزی نینگ باشی نی ساتسه اوزی قل
اگر رو بیرسه هم بعضی مکاشف
انی کورگان بیلان اوزدین کیتیپ دور
بوتون نی توش بیلان توش قیلیمه ای خام
اگر کم بولسه کورمکدین مخافت
اوزی آیغان کیشی البتّه دور خام
اگر هر کیچه ده کوک بولسه طوفی



مبادا غره ئی توشسه کونگول گه
 بولور حالتلی ایر البتّه خاموش
 کوتارمس اون ولایت لیک خردمند
 دیمس هر کیمگه اسرار حقایق
 کیشی اوچکان بیلان سوی سماوات
 ولی اولدور چیقارسه ماسوی نی
 نبی تبعیتی دور رشته حب
 اگر فیل دیک ایرور منهی وگر قیل
 اگرچه کوب ایرور جود و سجودی
 اگرچه ظاهر و باطن دیسه درس
 انینگ دیک هادی غه قیلسنگ اطاعت
 گدای کوچّه درگاهی بولسنگ
 کیشی قیلسه خلاف حکم شرعی
 اگر سو اوستیده یورسه اوشل کس
 هواغه اوچسه مانند چبین دور
 کوران آرتوق ایمسدور کورماگان کم
 کیراک تابعگه متبوع مکمل
 کیراک کوب طالب ایچره بیر نکو رای
 علو همت ییگیت لارگه کیراک پیر
 اوشل جندی که حرب آلاتین آسر
 ساغ ایتر تیلبه نی پیر زبردست
 انینگ دیک هادی دین ایریلمه زینهار
 توشوب شاه ایلگینه بازی قاچار باز
 بو تعریف لارگه صادق بولسه پیرینگ
 ایرور نقصان اوزونگدین کورمه اندین
 پیرینگ فرمانیدین قیلسنگ تخلف

بو غره باشلاسه آفتلی یولگه
 اگر یتیلسه می هیچ قیلماغی جوش
 صدا چیقماس او نی دین باغلاسه قن «د»
 اگر تاپیلسه گنج اخفاسی لایق
 تورّع قیلمایین بولمس کرامات
 هوی دین دور طلب قیلماق هوی نی
 ورع قیلماق کمالات تقرّب
 ورع اصحابی ایتورلار حذر قیل
 کورونمس ذرّه چه عارف وجودی
 سقر آلدیده تورگان دیک قیلور ترس
 سعادت دور، سعادت دور، سعادت
 امید اول ملک دلنی شاهی بولسنگ
 انی جنّی دیگیل یا مرد صرعی
 دیگیل سو اوستیده چندان بولور خس
 انی هادی دیمه شیطان دین دور
 کیم اتقی بولسه عندالله اکرم
 اولوغ تن دین بولور پیدا اولوغ ظل
 یاروتمس مونچه یولدوز بولمسه آی
 کمان سیز اوچماغی کوب بولسه هم تیر
 اگر با سر یوروسه یاونی باسر
 قویون نینگ شورشین دریا قیلور پست
 شیطین شته لار ایریلسنگ ای یار
 بولور زاغلارگه بازی ای سرافراز
 ولیکن بولمسه روشن ضمیرینگ
 بولور البتّه سعی پیر من دیگان دین
 تأسف دور، تأسف دور، تأسف



شرح: ناظم ^{رحمه الله} بو ابیاتلارده طالب صادقگه طریقت یولیده پیر کامل مکمل و هادی متقی و متشرعن ی ضروری ایکان لیگینی و پیر قیسی اوصافلارگه متصف بولماغینی و یولدهگی مهالکینی کوبلیگی اوچون سیر الی الله یولیده ضرور بیر هادی نی ایتاگی نی اوشلاب انی هدایتیگه بناء عمل قیلماقنی توصیه ایتیپ دیرلار، کیل ای طالب صادق (طریقت و حقیقت یولینی ایستاب) بو دنیای دون (پست) دین یوزونگنی اوگوروب (قیتاریب) کعبه مقصود یولیغه یورسنگ و بو دشت پر خطرگه قدم قویماقچی بولسنگ اول قولونگنی بیر هادی (پیر) متقی و متشرعگه تاپشورغیل و انگا اطاعت قیل (سیر الی الله) طریقت یولی عجب اوزون یولدور، انی ایتاگی و پایانی یوقدور و خطرلیک بیرلارینی حد و حسابی یوقدور، شول کوزگه کورونماگان [راه عدمده] طلب قیلغوچی نی هر بیر قدمیده چاه هلاکت موجوددور، و بو یول عجب یولدور همهسی (کورونوشده) محنت و رنج بولسهده، لیکن هر بیر قریشده (مواهب الهیه و علوم لدنیه دین) بیر گنج نهانی بارلیگی محقق دور، اوشل گنج نهان بار جایده قراقچی اوغرلار (نفس و هوئی و شیطان) کمینده پایلاب تیار و آماده دورلار، اگر یول باشلاغوچی (یولنی کورگان و راه و چاهانی خوب بیلگان) هادی بولمسه ناگاه شیطان بونونگنه مکر و حیلّه توزاغینی سالیب یولدین آزغورور. اگر بو اوزون پر مهلکه یولده بیر صاحب کرامت پیر کامل همراه بولمسه بو یولنی آخریغه سلامت یتماغ امکان دین تشقاری دور، هر پیرلیک دعواسینی قیلغوچی قچان یخشی یولنی بیلیب سنی هدایت ایتیپ بیلور، ایرلارنی یخشی سینی تاپیب قولونگنی انگا تاپشوروب انابت قیل. (پیرینگ) ایرلارنینگ ایری (مردلارنی مردانه سی) و طریقت پیشه سینی شیر ی بولسون و هم باید پیر قوییدهگی اوصافگه متصف بولسون:

۱. شریعت حکمیدین هیچ بیر ایشده تخلف ایتماسون.

۲. هرگز هیچ کیمدین طمع ایتماسون.

۳. علوم شرعیهده کامل اولسون.

۴. علوم طریقت و تصوفده ماهر بولسون.

۵. تن و جان بلکه همه ماسوی الله دین (الله لطفی) بیرله فانی بولگان بولسون.

فانی بولغان کیشی نی نشانه و علامت لاری شولاردین عبارت دور:

۱. بیر دانه مقداری چه انده کبر بولمسه.

۲. اوز نفسینی [دائم اتهام ایتیپ] پاک بیلمسه.

۳. همیشه بنده لیکده بولوب [مَا عَبْدُ نَاكَ حَقَّ عِبَادَتِكَ] سنگا لایق عبادت قیلگانیمیز یوق دیسه.

۴. اگرچه اوز وظائف عبودیه سینی پوره ادا ایتیپ اندین فارغ بولمسهده هر مؤمن کیشی دین اوزینی کم

توتوب من دیگانینی هیچ کیم ایشیتماسه.

۵. فانی ایکانینی اوزی هم بیلمسه. زیراکه هر کیم اوزی فانی بولدوم دیسه اول کیشی فانی ایمسدور و

فنا مقامیغه یتگان کیشی هرگز من فانی بولدوم دیمسدور. مثلاً بیر کیشی بیراونی قلی بولگان حالدّه



اوزینی بازارگه ساتیشگه سالسه عاقل کیشی قچان انگا پول بیریب ساتیب آلور. زیراکه قُل تصرف دین مهجوردور. شونگه اوخشش انی فانی من دیگانی مقبول ایمسدور، زیراکه فانی بولگان کیشیده دعوی بالکل بولمس.

طریقت یولیده اگر بعضی کشف و کرامات یوز بیرسه، عارف بالله تاکه اول کشفات موافق شرع شریف بولمسه انگا ایشانمایدور و انگا مغرور هم بولمایدور، زیراکه عارف فنا مقامینی حاصل قیلگان بیر ذات دور، کشفات ایستماک خواهشات نفسانی دین دور، عارف اندین بری دور. [مکاشف بفتح شین مفاعلة بابی دین مصدر میمی دور، کشف معنی سیده، بو لغتده حجابی کوتاریلیشی نی ایتیلور، اما اصطلاح صوفیه ده حجاب آرقه سیده گی معانی غیبیه و امور حقیقیه گه وجوداً او شهوداً مطلع بولماقنی ایتیلور] کشف و کرامات کوروب (مقام بلندگه بیتدیم دیب) اوزیدین کیتگان کیشی نی خداغه بیتدینگ دیب شیطان انی زمامینی آلیب یتالاب دور [ویا] شیطان انی یولینی یوقاتیب اداشتوروب دور [ویا] شیطان انی باشیغه یتیب هلاک ایتیب دور، اُولگی [یتیب] لفظی یتماقدین مأخوذ وصول معنی سیده دور. ایکیچی سی یتالاماق [ویا] یتماق و یوقالماق [ویا] هلاک ایتماقدین کنایه دور، عرفده فلانی فلانی باشیغه بیتدی دییلور، [ای مرد خام] بو عزیز تون (کیچه) لارنی توش و خواب و خیال کبی کشفاتگه آلدانیب توش (چاشت) وقتی قیلیب عمر عزیزینگی تلف قیلمه [و آلدینگه کیلگان کیشی لارگه] انی بیان و حکایت ایتیب [اندین لذت آلماق بیرله] باقی قالغان کونونگی شام و کیچقورون قیلمه، اُولگی (توش) لفظی رؤیا معنی سیده دور. ایکیچی سی چاشت و ضحیٰ معنی سیده دور. اگر بو [کشفات] کورماقدین [نفس تلذذی دین علاوه] خوف الهی و خوف خاتمه کم بولسه [البته] آخشام و یا صباح (کیچه و یا ایرته) بو توش کبی کشفات دین آفت و ضرر بیتماگی حتمی دور. [بعضی انگا روی بیرگان کشفات و حالاتی بی مقصد صحیح] هر کیمغه اوزی ایغان کیشی البته خام دور و کمالغه بیتماغان و ولایت تختیغه قدم قویمغان دور، زیراکه مرد کامل هرگز من-من لیک قیلمس و اوزینی بیراوه بیلدیرمس، اگرچه کیچه لاری آسمانلارنی ایلانیب یورسه بایدکه الله دین خوی برونغی دین زیاده بولسه، زیراکه کورگان کشفات و حالات دین کونگولگه کبر و غرور توشوب مبادا بو مغروریت آفت لیک یول لارگه باشلاسه البته مرد عارف کامل صاحب حال خاموش و ساکت بولور، چنانچه بیتیلگان می (شراب) هیچ جوش اورمگای (قینماغای) ولایت لیک عاقل عارف کیشی (خاموش بولوب) بعضی کشفات و کرامات دین آغوز آچیب سوزلاب آوازینی چیقارمس، چنانچه [ئی] قموش ایچی قند باغلاسه اندین صدا (آواز) چیقمس و هم کامل کیشی بیر نااهلگه حقایق و اسرارنی اظهار ایتماس، چونکه بیر گنج و دینه تاپگان کیشی انی هیچ کیمگه ایتمای مخفی ساقلاماگی لایق، بلکه لازم دور. ورع و تقوی قیلمس دین کیشی آسمانلارده اوچوب یورسه اول اوچماگی نی کرامات دین سنا بولمس، زیراکه ولی اول کیشی دورکه ماسوی الله نی دلیدین چیقارغان بولسه. اما هواگه (یوقاریگه) چیقیب اوچماغنی طلب قیلکم، هوی و هوس و خواهشات نفسانی دین دور، اُولگی هوی لفظی نفس ایستگان نمرسه نی ایتیلور.



ایکینچی سی [اصلاً ممدود هوا دور، ضرورته قصر ایتیلگان دور] آسمان و بیر اورته سیده گی خالیگاه [جو]نی ایتیلور، حضرت پیغمبریمیزگه [اتباع] پیرولیک محبت رشته سی دور، ورع و تقوی قیلماق اول ذاتغه کمال تقرب غه سبب دور، آیه: قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ [آل عمران: ۳۱] بو سوز دلیلی دور. روع و تقوی لیک کیشی لار اگر نهی ایتیلگان نمرسه فیل دیک [کئه] ویا قیل دیک [کیچیک] بولسه، اندین حذر قیل و انگا یقین لامه دیرلار، چونکه گناه صغیره اصرار بیرله کبیره بولور، لهذا همه سینی ترک ایتماق لازم دور، عارف کامل نی اگرچه جود و احسان و سجود و عباداتی کوب بولسه ده اوز آلدیده وجودی ذره چه کورونمس، زیراکه [موتوا قبل ان تموتوا] که عمل قلیب فنا مقامیگه ایریشیب انده ذره چه نفس و هوا دین اثر قالمگان دور. اول ذات اگرچه علوم ظاهر و باطنده درس ایتسه هم دوزخ آلدیده حاضر تورگاندیک قورقوب تورور. شونینگ دیک پیر کامل و عارف عاملگه اطاعت ایته بویروغینی محکم توتوب خدمتیده بولسنگ سنگا سعادت اوستیگه سعادت دور، اگر اولده انی گدای کوچه درگاهی بولسنگ امید شول که آخر دل ملکینی پادشاهی بولوب مرادینگه بیتسنگ، هر کیشی کیم شریعت حکمیگه خلاف ایش قیلسه انی جئی (دیوانه) و یا صرع (توتقاغ مرضیگه گرفتار کیشی) دیگیل، زیراکه عاقل مسلمان خلاف شریعت بیر ایشنی ارتکاب ایتمس. [صرع] عربی، میرگی: فارسی؛ توتقانغ: ترکی دور، جن تاثیریدین و یا دماغ خللیدین ظهور کیلادورگان بیر کسل دور که بیهوش لیک بیرله توام دور. انداغ بی شریعت کیشی سو اوستیده چوکمسدین یورسه انی کرامت دیمه، چونکه سو اوستیده کوب خس و خاشاک هم یورور، و اگر هوا ده پرنده کبی اوچوب یورسه هم بی اهمیت دور، بو اوچوشیده چین ضعیف و خوارگه اوخشابدور، انی هادی و پیر دیمه، بلکه آدمالارنی یولدین اورادینگان شیطان دین دور. کشف و کرامات کورگاننی مرتبه و منزلتی آرتوق بولوب و کرامات کورماگاننی مرتبه سی کم ایمسدور، هر کیم پرهیزگارراق بولسه الله نزدیکه مکرم و محترم راغ دور و بو سوزگه إِنَّ أَكْرَمَكُمْ عِنْدَ اللَّهِ أَتْقَاهُمْ [الحجرات: ۱۳] دلیل دور. مرید تابعگه پیر متبوع مکمل کیراک، زیراکه اولوغ جئه و جسددین اولوغ ظل (کونلانکه) پیدا بولور، شو کبی پیر کامل و مکمل دین مرید کامل و مکمل وجودگه چیقور، کوب طالب و مرید اراسیده بیر پیر نکو رأی و مرشد کامل وجودی ضروری دور، الارنی تعلیم و تربیه لاری بدون مرشد ناممکن دور، همچنانکه علوم ظاهری بدون استاذ و بدون تعلیم قولگه کیلمس، علوم باطن هم بدون هادی و مرشد استحصالی ناممکن دور، چنانچه آسمانده شو قدر کوب یولدوز بولگان بیرله آی بولمسه یاروتالمس. عالی همت بیگیت لارگه (کورگن کیچیرگن تجربه کار) پیر و رهبر کیراک دور، چونکه اوق کوب بولگانی بیرله یای سیز [بی کمان] اوچماغای، و اوز-اوزیچه آتیلماغای. اول عسکرلارکه بدن لاریگه آلات حربیه آسیب یاو (دشمن) مقابلیده میدان جنگگه حاضر بولورلار، اگر سرکرده و باشلیق لاری بیرلان بولوب انی امری بیرلان یوروسه لار یاونی باسیب انگا غلبه قیلورلار، شو کبی مرید و طالب لار هم اسباب جنگ باطنی نی اوزلاری بیرله تیارلاب پیر و پیشوالاری باشلیغیده دشمن باطنی (نفس و شیطان هوئی) مقابلیده اوروشسه لار البته الارگه غالب اولوب مقصد اصلیکه نائل



اولورلار، ناظم ^{رحمه الله} بیگیتلارنی قدلاری رسالیکده اوقگه تشبیه ایتیب و پیرلارنی بیللاری بوکولگانلیگی سببی دین کمانگه تشبیه ایتیب دورلار. اولگی باسر لفظی [با] مع معنی سیده [سر] باش معنی سیده مرکب دور، ایکینچی سی باسماق دین آلینیب دشمننی باسیب ایاغ آستی قیلار معنی سیده دور [یاو] دشمن معنی سیده دور. پیر زبردست مرید دیوانه و علوم ظاهر و باطن دین بیگانهنی ساغه پتوروب کمالغه بیتکورور، چنانچه قویون و قتیغ یاغین دین پیدا بولگان شورش و توپالانگنی دریا پست قیلیب انگا غلبه قیلور، [تیلبه] دیوانه معنی سیده دور، انداغ (پیر زبردست) و رهبر سرمست دین زینهار ایریلماغیل و انینگ صحبتی نی غنیمت بیلگیل، مبادا انی غنیمت بیلمای صحبتیدین ایریلسنگ شیطانلار کوتونگا شته لاب تیپیپ یمان یولگه باشلاب کیتار، چنانچه قرچیغای قوشی پادشاه قولیگه توشوب مکرم و معزلیکیدین سونگره ینه قاجیب کیتسه زاغ و زغنلارگه اویونچاغ بولوب بی عزت بولور، شو کبی مرید هم مرشد کامل دین بهره ور بولوب توروب ترک صحبت ایتسه و یا باشقه مرشدگه بارسه هرگز کوکارمس و کمالغه یتمس، زیراکه درخت بیر بیرده کوکارور. اولگی بازی لفظی قارچیغای معنی سیده، ایکینچی باز لفظی [ینه] و تغین معنی سیده دور، اوچونچی بازی اویون معنی سیده دور. بو یوقاریده اوتکان تعریفلارگه پیرینگ تورموشی و احوالی برابر کیلسه لیکن سنی دلینگ روشن اولوب فتوحات حاصل اولمسه البته نقصان اوزینگ دین دور، قابلیت و استعدادینگ کم دور.

البتّه پیر من دیگان کیشی دین مرید تکمیلیده سعی و کوشش ضروری دور، لیکن فیض و فتوح الله قولیده دور، إِنَّكَ لَا تَهْدِي مَنْ أَحْبَبْتَ وَلَكِنَّ اللَّهَ يَهْدِي مَنْ يَشَاءُ [۵۶: القصص] بو سوزگه اشارت دور، پیرینگ فرمان و امریدین بیر سر موی تخلف ایتسنگ سنی حالینگغه کوب افسوس دور.

تنبيه: علوم ظاهر بی معلم و بی استاد قولگه کیلیشی غیرممکن لیگی کبی علوم باطن و تصوف هم بی مرشد و بی پیر کامل قولگه کیلیشی غیر ممکن دور، لهذا ناظم ^{رحمه الله} یوقاریده گی ابیاتلارده پیر کامل و مکمل اوصافینی بیان ایتیب طریقت یولیده مرشد و پیر کامل ضروری لیگی نی و بی مرشد هیچ کیم اوز اوزیچه طریقت مقاملارینی طی ایتیب بیلمسلیگی نی بیان ایتیب دورلار، حضرت خضر و حضرت موسی علیهما السلام قصه لاریگه تعمق نظری بیرله قرالسّه ناظم ^{رحمه الله} نی سوزلاریگه روشن دلیل لیگی ظاهر بولور [سورة کهف اواخریده دور!].

شراب محبتنی پیر کامل دین ایچماق کیراک

اوشل شربی که خلق اندین تاپار قرب
قیلور بیر مدّعادین اوزگانی محو
محبت اهلی نینگ آلدیده معدوم
نه قیلغای مال و ملک ماوراالنهر

کیل ای ساقی ایکاولان ایلالیک شرب
شرابی بیر که دل اندین بولور صحو
اگر فغفور چین دور قیصر روم
محبت جامی دین تابسه کیشی بهر



محبت گنجی باغ معرفت دور
 جمیع ایستگان مقصود اوشنده
 نه حاجت بیر یوزینی خانی بولسنگ
 بولور باطن کوزونگ محجوب اسرار
 قیلور البته کوز ملـکینی اوزگا

کونگول ملکی که بیر عالی صفت دور
 رضای حضرت معبود اوشنده
 انینگ دیک ملک نی سلطانی بولسنگ
 اگر خردل چه بولسه مهر اغیار
 نچوک کیم ذره چه خس توشسه کوزگا

شرح: ای ساقی جام محبت، و ای بیر کامل! کیل ایکاولان محبت شراییدین ایچیشایلوک، شونداغ ایچماغ که خلق انی سببی دین بارگاه الهی که یقین لاشورلار و تقرب حاصل قیلورلار. ای پیر، شرابی بیر که (شراب معمولی که خلاف) دل انی ایچماقدین اوزی که کیلیب (هرگز بیخود بولمسه) غبار و کدورت دنیویه و اخرویه نی دل صفحاتیدین پاک ایتیپ بیر مدعا (رضای الهی) دین اوزگا نمرسه لارنی کونگول لوحیدین محو ایللاسه. صحو عربی افاقه [ضد سُکر] معنی سیده دور. مَحو اوچورماق معنی سیده دور. همه آلدیده قدر و منزلت و جاه و عزت که ای که بولکن پادشاه لار و رؤسالار اگر چه مثل فغفور پادشاه چین و یا قیصر پادشاه روم دور، لیکن محبت اهلی نینگ آلدیده کالمعدوم دور، زیرا که هر کیم محبت جامیدین بهره بی تاپسه و شراییدین جرعه بی نوش ایتسه، ماوراءالنهر مال و ملکی نی نه قیلسون و تخت و سلطنتینی نه ایتسون [ماوراءالنهر] بخارا خیوه فرغانه مضافاتلاری که اطلاق اولور [دریا آرقه سی] معنی سیده دور. دل ملکی که بیر عالی صفت جای و محبت خزانه سی و معرفت الله باغی دور، معبودیمیز الله حضرتی رضاسی دل بیرله تاپیلور و جمیع ایستگان مقاصد که انی واسطه سیله ایریشولور انداغ (صفات لار که ای که بولمیش) دل ملکینی سلطانی بولسنگ تمام بیر یوزینی خان و پادشاه لیکه نیمه حاجت قالور، اگر دلین گده دانه خردل چه [آزگینه] الله دین اوز که مهری تاپیلسه باطن کوزونگ اسرار الهی دین محبوب و مستور اولوب بصیرت نی اول حجاب توسور، چنانچه ذره چه خس کوز که کیرسه البته کوزنی علالت که گرفتار ایتیپ انی کورماقینی اوزگا چه قیلور، شونکه اوخشش ذره چه غیر مهری دل که توشسه سبب حجاب اولور.

سالک قضاغه راضی و بلاغه صابر بولماقی کیراک

خریدار ایلگینه بیـرگیل پیا پی
 کونگول کویلاکینه یوقتورمغای گرد
 خلاف حکم محبوب ایتمغای هیچ
 رضا بیرماک مقام اعلاسی دیـرلار
 رضا جوینده هرگز بولمغای تنگ

کیل ای ساقی محبت جامیدین می
 خریدار اول ایرور جـز نیّت فرد
 قایو حالتده بولسه ایرته و کیچ
 بو یول نینگ برچه سین طی قیلغان ایرلار
 اگر باشیده یورسه آسیا سنگ



اگر هر کونده ایچسه زهر ایاغین
 کیشی کیم راضیلغ نامینده بولسه
 رضا ایوانیده تابغان کیشی جا
 اگر مغز دلینگ ایریلسه یا پوست
 سونار غم توشسه هم آزاده ایرگه
 خدا امریگه عاقل غم ییمسدور
 ایگم حکمیغه هر کیم بولسه ممنون
 بوتاغکه سورسه لار تشلاب او تاغدین
 اگر قن دور اگر مینگ قیلسه لار قین
 قایو حالت بیله جان بولسه تنده

سویوک لوک بنده سی چیتمس قباغین
 قیلور شکر اژدها کامینده بولسه
 دیمس وا باب آفت بولسه هم وا
 ییغینی ییغ اگر چین قُل سن ای دوست
 اوچار اوت توشسه خسدین خای بیرگه
 دیمس گردون قیلور گردون ایمسدور
 کوتارمس اون اگر باشین قیلور اون
 ثنادین اوزگه چیقمس عقلی ساغدین
 قچان توشگای چین ایرنینگ کونگیلغه چین
 بولور شاگر همیشه راضی بنده

شرح: ای ساقی (پیر کامل) محبت جام میی دین خریدار (طالب و مرید صادق) ایلگینه کیت-مه-کیت بیرگیل (پیا-پی) و (پی در پی) کیت-مه-کیت، آرقه-مه-آرقه معنی سیده دور. خریدار و طالب صادق اول کیشی ایرورکه بیر نیت فرد (خداغه تقرب حاصل قیلماق و انی رضاسینی ایزلامک) دین باشقه گرد اغیارنی کونگول کویلاکیگه یوقتورمغای و الله دین اوزگه نی دلگه هرگز کیتورمغای، ایرته و کیچ قیسی حالده بولسه محبوبی حکمیگه سیره [هیچ] خلاف ایتماغای، طریقت مقاماتینی عموماً طی قیلغان ذاتلار رضا مقامینی همه باشقه مقام لار دین اعلی و یوقاری دیرلار، اگر رضای الهی نی ایستگان کیشی باشیده تیگیرمن تاشینی یورغوزسه لار هرگز دل تنگ اولمغای سویوک لوک بنده هر کون دنیا قیغوسی و غم و اندوهی دین جام زهر ایچسه قباغینی چیتمس و پروا قیلمس [ایاغ] کاسه چوبی معنی سیده [قباغ] پلک چشم معنی سیده دور [قباغ چیتمس لیک پروا قیلمس لیک دین کنایه دور] هر کیم راضی لیغ آتی بیرله مسئی بولوب رضا مقامیگه یتوشگان بولسه اژدها کامی و آغزیده بولسه ده شکر قیلور. [اژدها کته ییلان نی ایتیلور] رضا ایوانیده جای تاپیب مقام ایتگان کیشی آفت و کلفت و مشقتلار ایشیگی یوزیغه آچیلسه ده وای دیمس و اظهار تضجر ایتمس [اولگی و لفظی وای نی مخففی دور، هر کیمگه درد و الم یتسه ایتور]، ایکینجیسی فارسی آچوق معنی سیده دور، اگر مغز دل کبی فرزند دل بندینگ و یا پوست بدن و لباس تن کبی خاتون و همسرینگ اولوب اندین ایریلسنگ، اگر چین قُل و بنده راضی بولسنگ، بیغلاماغنی بیغیب صبر ایتماغینگ کیراک، زیراکه قُلگه خواجه سی طرفیدین هر نه کیلسه انگه راضی بولوب بویون سونماقدین اوزگه چاره سی یوقدور. دنیا تعلقاتی دین وارسته و آزاده ایرگه غم و هم (قیغو) توشسه سونر



و کم کم پست بولوب یوق بولوب کیتار، چنانچه خس و خاشاک سیز بیرگه اوت توشسه اوچار [سونر پست بولار معنی سیده دور] عاقل کیشی الله امری و حکمی و قضاسی بیرلان باشیغه کیلغان ایشگا راضی بولوب هیچ غم بیمایدور، اگر پست و رذیل و دنی اولمسه بو ایشلارنی گردش فلک و دوران لیل و نهار قیلور دیمایدور، گردون (چرخ) و هر نمرسه که بیر محور اطرافیده ایلانسه و یا اوز گردیده چرخ اورسه و آسمان معنی سیده هم کیلور. ایکینچی سی [گر] مخفف اگر و [دون] پست و دنی معنی سیده مرکب دور، ایگم (الله) حکمیغه هر کیم راضی و اندین ممنون بولسه بیراو باشینی اون دیک ریزه ریزه قیلیب یوبارسه ده صداسینی چیقارمس، اولگی اون لفظی آواز و صدا معنی سیده، ایکینچی سی آرد و دقیق معنی سیده دور، اگر ایکینچی [اون] لفظی نی عدد دین [عشر] و [ده] معنی سیده دیسک معنی بیت [باشینی اون بولک قیلیب یوبارسه ده صداسینی چیقارمس] بولور، عقلی سالم راضی کیشینی او تاغ دین بو تاغکه تاشلاب سودراب عذاب ایتسه لار، انی آغز دین حمد و ثن دین اوزگه سوز چیقمس (هر ایگی تاغ لفظی کوه و جبل معنی سیده دور) [شارح درخت بوتاغی دیگانی مناسب کورونمایدور] اگر بیر کیشی قن [قُل] بولسه یعنی حقیقتاً اللهنی خاص قُلی بولسه انی قین و پانه قیلیب قیینه سه لارده قچان چین ایرنی و خاص بندهنی کونگلیغه چین توشگای و خاطری منقبض اولغای. اولگی قن لفظی عربی آته آنه سیدین قُل کیلغان کیشینی ایتیلور، ایکینچی سی بیر نوع قینماقنی ایتیلور که خراسان و بخارا اولکه لاریده سابقاً معمول ایردی مجرمی ایگی ایاغینی محکم باغلاب سونگره بیر یغاچ دین بولگان پانهنی انی اورته سیگه قاقماق بیرله انی اقرارگه مجبور ایتور ایردی لار، انی قین و پانه دیرلار، بو لفظ ترکی قینماق دین مأخوذ بولسه کیراک و یا خود قینماقنی ایتیلسه بولور، چین لفظی راست و صدق معنی سیده ایکینچی سی آژنگ و چوروک پیشانی معنی سیده دور [کونگولغه چین توشماغی دنی سیقیلیب منقبض اولماغیدین کنایه دور] به هر حال راضی کیشی جانی تنیده بولوب قیسی حالده بولسه همیشه شکر گذار بولور.

تنبيه: یوقاریده گی بیت مضمونیکه حضرت بلال مؤذن رسول الله نی اوائل حال لاریده چیک گان عذاب لاری مصداق بولوب بیلور، اول ذات بیر مشرک گا غلام ایردی لار، وقتی که مسلمان بولگان لارینی بیلدی انواع عذاب بیرله قینار ایدی تیمیر ساوتنی کییدیریب آفتاب گه یاتقوزوب قارنی لاریگه تاش باستوروب قویور ایردی اوز قوم لاری بوینی لاریگه ایپ باغلاب یاش باله لار قولیکه تابشورور ایردی لار، اولار کوچه لارده سودراب قیناب یورار ایردی لار، بول ذات شول قینماق لار آستیده همه وقت وردلاری [أحد أحد] (منی پروردگاریم یگه و یگانه دور) ایردی. آخر الامر حضرت ابوبکر صدیق رضی الله عنه اول ذاتنی ساتیب آلیب آزاد ایتدی لار. ای عزیز برادرلار،



مسلمان لیک آسان لیک بیرلان قولگه کیلگان ایمس، بو یولده مینگلار کیشی فداکارلیک، جانبازلیک، از خود گذرلیک ایتیپ، مال و جانلاری بیرله حصه آلیب دنیا عیش و عشرتینی او یاقغه قویوب اوزلارینی زحمات و مشقات گوناگونگه سالیب اعلاء کلمه الله اوچون همه لئاذدین کیچگانلار. باید بیزلار بو خیلده قیین لیک بیرلان قولگه کیلگان دین حق و عطیه الهی نی مفت قولدین بیرمای، و دهری و کمونیستلار سوزیگه قولاق سالمای بو موهبت الهی نی ساقلاماقدہ نهایت کوشش قیلیب فرزندلارنی مسلمان تربیه ایتیشده دقت ایتماغیمیز کیراک.

اولوغ یولدین اداشگان نیچه بی عقل	قیلور ایرلاردین اول یلغانچی لار نقل
کیشی کیم عاشق دیدار حق دور	محبت اهلی بیرله هم سبق دور
نه حاجت اوزگاچه طاعت لار اندین	بولور یوزی قرا مونداغ دیگان دین
بویورغانیغه هر کیم بولسه منکر	گمان یوق دور بولور البتّه کافر
اوشل خلقی که کوب بی عقل ایمیشلار	خدانینگ دشمنین عاشق دیمیشلار
دل و جان بیرله بولغان عاشق زار	خلاف حکم قیلمس ذرّه یی کار
بویورغان ایشلارین شادی و غمده	قیلور بیر دیک فراغتده، المده
اگر تولدورسه لار بیرنینگ یوزینی	قیزیل طلا بیلان سالمس کوزینی
بلا اوقی قده لسه اورمغای آه	قیلیچ باشیگه کیلسه بوزمغای راه
کیشی کیم قیلسه عاشق لیکنی لافین	قیلورمی هیچ معشوقین خلافین

شرح: شریعتنی اولوغ یولیدین و کتّه شاهراهی دین اداشگان بیر قنچه بی عقل یلغانچی لار بعضی ایرانلاردین نقل ایتورلارکه «هر کیشی عاشق دیدار حق و محبت اهلیغه هم سبق بولسه کفایه قیلور، اندین اوزگاچه طاعت و عبادت و نماز و روزهنی نیمه حاجتی بار» بو یلغان سوزنی سوزلاماق بیرله یوزلاری قرا بولور، زیراکه خدانی دوستلاری هیچ مونداغ سوزلارنی ایتمسلار، البتّه بو نقل لاری یلغان و بو سوز الارگه بهتان دور، الله بویورگان فرایضگه هر کیم منکر بولسه البتّه کافر بولوریده گمان یوق دور، شو سوزلارنی نقل ایتگان بی عقللار، فرایضنی ترک ایتگان خدانی دشمنی نی عاشق دیب نام قویبودورلار، دل و جان بیرله عاشق بولغان کیشی بیر ذرّه چه شریعت حکمیگه خلاف ایتمس، شادلیک و غمگین لیک و فراغت و الم آوانیده خدا و رسول بویورغان ایشلارینی بیر دیک قیلور، اگر بیر یوزینی قیزیل آلتون بیرله تولدورسه لار حقیقی عاشق انگا کوز قبه سی بیرله باقمس و التفات ایتمس، بلا اوقی کیلیب تنیگه قدلسه آه اورمغای، باشیغه قیلیچ کیلسه روشینی بوزمغای، هر کیم عاشق لیک لافینی اورسه معشوقینی بویورغانیگه خلاف قیلورمی؟ البتّه قیلمس.



حکایت

مسلمانینی یوز چوب اوردی بیر دون
دیدى بیر ناظرى قوب حاکمه بار
تن و جانیم چنان املاک رب دور
اوشل آزاده دین هیچ چیقمادی اون
بو ایدی حاکمیم حاضر دور ای یار
مقاصد ایستمک بیز دین عجب دور

شرح: بیر پست رذیل بیر مسلماننی (ناحق) یوز چوب اوردی، اما کلتک بیگان آزاده مرددین هیچ صدا چیقمادی، بو صحنه‌نی کوروب تماشا قیلیب تورگان کیشی؛ تور حاکم‌گا باریب عرض قیل! دیدی، جوابیغه منی حاکمیم حاضر و ناظر الله دور اوزی کوروب بیلیب تورویدور، چون تن و جانیم الله‌نی ملکی و انی تصرفیده دور، هر نه خواه‌لاسه قیلور، نفس خواه‌لاگان و ایستگان مقصدلار آرقه‌سیدین یورماق بیزدیک قُل کیشی‌دین جای تعجب دور دیدی.

کیل ای کونگول جهان سوداسیدین کیچ
جسد قالمسدین ایلگاری نفس دین
در توبه آچوقده ایسته مقصود
ایگیل تیزراق خدانینگ طاعتیگه
بیگیت لیکده عجب خوش خوف و زاری
کوزیدین یاش اگر قورقوب توکار یاش
مبادا توبه قیلمسدین برون راغ
اولومنی دایما یانینگده بیلگیل
اولومنی ساقی سین پیشانه‌ده بیل
اجل تارتیب تورو بدور یای ایله اوق
کوتاریبدور قیلیچ بیزگا سالورغه
بیلورسن یوق بو دنیانینگ بقاسی
تعجب موندین اوتمس جر لبینده
قدم دریا یوزیده روی خسده
سحر بولسه ندا ایلار فرشته
سنی خلق ایلاغان سلطان غالب
ایگامنی مغفرت دریاسیدور جوش
قدم غم کشورینه اورماغیل هیچ
هوا کوب قیلماغیل کیچگیل هوس دین
ایش اوتگان سونگ پشیمان دین نچوک سود
کیین قویمه بو دمنی ساعتیگه
یاغین لیک کیلسه خوش بیل نینگ بهاری
دُر رحمت بولور هر یاشیچه چاش
اجل کیلسه کیتارسن توبه سیز داغ
انی ایلگین گریبانینگده بیلگیل
لبینگنی دایما پیمانه‌ده بیل
یاشونور ییر قاچار درمانیمیز یوق
کیشی بیلمس قویارمو دم آلورغه
قدم باسقان بیرینگ جرنینگ یقاسی
بنی آدم هنوز اوز مطلبینده
هنوز اولاد آدم مینگ هوس‌ده
ایشیت ای آدم غفلت سرشته
همیشه بنده سیدین توبه طالب
عجب دور بنده سیدین غفلت آغوش



عجب‌دور بنده‌سیدین مـونچه قـاچماق
دل و جانینگ بیلان حضر تغه یانغیل
باشینگ کوب یوقاری قیلمه ایگیلگیل
اولوم چنگالیکه آخر توتولدونگ
قیلور بیر کون اولوم جانینگنی مجروح
کیت‌رسن بو جه‌اندین ایّهاالنّاس
سنگا یوقدور اولوم‌دین اوزگه چاره
توزوک یولغه یوروک اوزگا ره‌دین
انی سیندور مغیل نفس ایلاسه جهد
نه سود اول بولمسه جان و دلینگ‌دین
ینه قیلماسه توبه قیلغان آنی
تّه پایانه‌دور تایریلمه یانه
اگر تایب ایرورسن کیتمه تاییب
اگر چندی که عشرت میلی بولسه
اولوغی توبه‌دور سیندورمه گستاخ
مبادا بولماغای خشک آخر فصل
بولوب‌سن کیر ندّم دریاسیغه کیر

ایگام‌دین لطف و رحمت بابین آچماق
یاتورسن تابکی ایمدی اویالغیل
نه کیم قیلیمیش لارینگ‌دین توبه قیلگیل
اگر بیر اوستینی سلطانی اولدونگ
اگر تاپسنگ حیات حضرت نوح
اگر تاپسنگ حیات خضر و الیاس
اگر تاپسنگ تیریکیکنی دوباره
نه دور توبه دیمک یانمق گنه‌دین
خدا درگاهیده چون ایلادینگ عهد
اگر توبه دیمک چیقدی تیلینگ‌دین
دل و جان بیرله قیلغان نی نشانی
اگر چین یانه‌سن ترمش بو یانه
ندّم نورین کونگول دین قیلمه غائب
اولار بیر عهد ایله بیر خیلی بولسه
کونگول تصدیقی ریشه‌دور عمل شاخ
سینوغ شاخ ضربی بیرلان زخم آلیب اصل
جریمه چرکی بیرلان ظاهر و سرّ

شرح: ای کونگول جهان سوداسی و دنیا تجارتی‌دین کیچیب غم کشوری و قیغو ملک‌یغه هیچ قدم اورمغیل و متاع دنیا آرقه‌سیده بولماغیل جسد‌دین جان چیقیب نفس کیریپ چیقیش‌دین قالمس‌دین برون خواهشات نفسانی پی‌دین بولمای هوی و هوس‌دین بالکل کیچگیل توبه ایشیکی آچوقلیگیده و صحت حالتینگده توبه قیلیب الله‌دین همه مقصدلارینگنی سوراغیل و ایستاغیل جان سینه‌گه کیلیب غرغره حالتیکه بیتیب توبه ایشیکی باغلانیب ایش وقتیدین اوتکان‌دین سونگره پشیمان‌دین نیمه فائده؟ کوچ و قوت کیتمس‌دین برون طاعت و عبادت پروردگار طرفیغه تیزراغ ایگیلیب حاضرگی دمنی غنیمت بیلیب کین‌گه سالمغیل بیگیت‌لیک وقتیده خدادین قورقماق و گریه و زاری قیلماق قن‌داغ یخشی دور، بیل‌نینگ بهاری کوب یاغین‌لیک کیلسه نه قدر خوب‌دور، یاش کیشی خدادین قورقوب کوزیدین یاش توکسه و بیغلاسه ثواب دُری و رحمت مرواریدی هر یاشیچه و اندازه گریه‌سیچه بلکه انگا اون و یوز برابر چاش بولوب و خرمنلار وجودگه کیلور، اولگی یاش لفظی دَمع و آب دیده معنی‌سیده، ایکینیچی سی صبی نابالغ (یاش باله) معنی‌سیده دور و یا مونی ضدی یعنی اولگی سی صبی معنی‌سیده و



ایکینچیسى دمع معنی سیده بولسه هم درست دور، چاش خرمن معنی سیده دور. مبادا توبه قیلمسدین ایلگری اجل ایلچیسى کیلیب قالسه داغ حسرت بیرله بو دنیا دین بی توبه کیتارسن شو اوچون باید اولومنى همیشه یانینگده گی دیک و انی قولینی یقانگده گی دیک بیلماغینگ کیراک، اجل ساقی سینی آلدینگده و پیشاننگده و لبینگنى همیشه انی پیمانده سیده گی دیک بیلماغینگ کیراک، همیشه اجل کمینینگده یای [کمان] اوق [تیر] انی تارتیب پایلاب توروب دور، بیکنیش اوچون جای و قاجیش اوچون درمان یوقدور، بیزنى اورماق و گردنیمیزگه انی بیرله سالماق اوچون قیلچ کوتاریب توروب دور، نفس آلماقغه قویار قویماسینی کیشی بیلمس، بو دنیانی بی بقا و قدم باسقان ییرینگ جر یقاسی ایکانینی خوب بیلورسن، اما موندین تعجب راع نمرسه بارموکه، انسان اولوم جرینى لبیده توروب هنوز هم اوز مقصد نفسانی و هوئ و هوس آرقه سیده دور. ایاغی دریا یوزیده خس اوستیده زورغه تورگان کیشی دیک بولسه ده هنوز مینگ آرزو و هوس کیتیده سرگردان دور. سحر وقتى بولسه (الله امری بیرله) بیر فرشته ندا قیلور: ای آدم غفلت طبیعت ایشیت و بیل که سنی یراتگان و یوقدین بار ایلاگان خدای قادر و توانا همیشه بنده سیدین توبه قیلیب گناه لاری دین یانماقلارینی ایستار. عَنْ أَبِي هُرَيْرَةَ أَنَّ رَسُولَ اللَّهِ -صلى الله عليه وسلم- قَالَ يَنْزِلُ رَبُّنَا تَبَارَكَ وَتَعَالَى كُلَّ لَيْلَةٍ إِلَى السَّمَاءِ الدُّنْيَا حِينَ يَبْقَى ثُلُثُ اللَّيْلِ الْآخِرِ فَيَقُولُ مَنْ يَدْعُونِي فَأَسْتَجِيبَ لَهُ وَمَنْ يَسْأَلُنِي فَأُعْطِيَهُ وَمَنْ يَسْتَغْفِرُنِي فَأَغْفِرَ لَهُ [حدیث ۱۱۴۵ : بخاری، ۱۸۰۸ : مسلم]. ایگمنی رحمت و مغفرت دریاسی همه وقت خصوصاً سحر و قتلاریده قینماقده دور دعا قیلگوچی و مغفرت ایستاکوچی و سوراگوچی لارنى اختارور اما تعجب که بنده لار غفلت قوچاغیده یاتورلار، ایگم (الله) دین همه وقت مهربانلیک و رحمت و شفقت ایشیگینی آچماق بولسه ده بنده بی همت لارنى درگاه الهی و فیض نامنتهای دین مونچه اوزاق قاقماق لاری جای تعجب و مایه تأسف دور، تا قچانغچه غفلت اویقوسیده یاتارسن باید اویغانیب دل و جان بیرله درگاه الهیغه یانیب هر نه قیلگان گناه لارینگدین توبه قیلغیل باشینگنى (متکبرانه) یوقاری قیلمسدین فقیر و بیچاره لار کبی (متواضعانه) ایگیلیب گردنینگنى خم قیلغیل بیر یوزینی سلطانی و پادشاهی بولسنگده اولومدین قاجیب قوتولمس سن آخر انی چنگالیکه توتولوب اسیر اولورسن، اگر حضرت نوح علیه السلام حیاتلارینی تاپیب مینگ بیلدین زیاده عمر کورسنگ و یا حضرت خضر و الیاس کبی (عمر عادى انسان لار دین زیاده) تیریک بولسنگ و یا اولوب ینه [بالفرض] تیریلیب ایکینچی دنیا ده حیات کیچورسنگ، اولوم آخر بیر کون جانینگنى مجروح ایتیپ بو جهان کدورت نشان دین حسرت بیرله کیتورسن، سنگا بلکه همه گه اولوم جامیدین جرعه نوش ایتماقدین اوزگه چاره یوقدور.

تنبيه: حضرت خضر و الیاس علیهما السلام نى دنیا ده تیریک لیک لاری و نبوتلاریده اختلاف باردور، لیکن معتمد قول شوکه هر ایکى لاری حیات و پیغمبردورلار، بولار بیرده تیریک بولماقده مخصوص اولوب حضرت ادریس و عیسی علیهما السلام آسمانده حیات بولوشگه اختصاص لاری باردور، بولارنى نبوتلاری پیغمبریمیزنى خاتم



الانبیالیکلاریغہ منافی و تیسکاری ایمسدور، چونکہ بولار شریعت محمدیہ گہ اتباع و پیرولیک قلیب هرگز انی خلافيگہ ویا باشقہ بیر شریعتگہ مردمنی چاقیرمس‌لار، و هم نظرلاردین غائب اولگان حالده بعضی اوقات بعضی لیاقتی بار مخصوص ذاتلارگہ کورونوب مصاحب بولورلار و هر ییل حجگہ حاضر اولوب منی‌ده بیر-بیرلارینی ساچلارینی آلیب سونگره آیریلیب کیتورلار. چنانچه «فصل الخطاب» ده حضرت خواجه محمد پارسا بو ایکی ذاتنی اوامر و نواهی دین مبین اسلامنی خوب مراعات ایتماقلارینی و خلائقنی شریعت محمدیہ گہ چاقیرماقلارینی و الارنی تیریک‌لیکلارینی انکار ایتماقنی غایت جهل ایکان‌لیگینی و خاتم النبوت گہ مناقض اولور دیب نبوت‌لارینی انکارینی کم‌عقل‌لیک‌دین سناپ حضرت خضرنی کوب کسل بولوب تداوی ایتماقلارینی و نیچه بار خاتون آلیب فرزند کورگانلارینی و تیشلاری نیچه بار توشوب ینه چیقغان‌لیگینی بیان ایتیبدورلار. ابن حجر هیتمی فتاوی حدیثیه ده و عبدالوهاب شعرانی بعض مصنفات‌لاریده و امام مناوی «فیض القدیر» ده شونگه اوخشش سوزلارنی ذکر ایتیبدورلار.

ناظم رحمه الله توبه قیلماق نه دور دیب اوزلاری جوابیده دیب دورلار: اوزگا (یمان) یولدین قیتیپ توزوک و یخشی یولگه یورماک دور، و گناهگه توبه قلیب (الله درگاهیده) قیتیپ گناه قیلماق من دیب عهد قیلگان‌دین سونگره هر قنچه نفس و شیطان جد و جهد ایلاسه ده توبه و عهدنی سیندورمس‌لیک دور، اما توبه دیمک تنها تیل اوچی بیرله بولوب دل و جان دین بولمسه اندین نیمه فائده، دل و جان‌دین توبه قیلغان نشانه‌سی و علامتی شول‌که توبه قیلگان کیشی ینه اول ایشنی قیلمسه و انی ارتکاب ایتمسه. اگر گناه‌دین چین قیتیپ یانه‌سن بایدکه بویانگه (طاعت طرفیگه) ترماشغیل و محکم یاپیشغیل، ایاغینگ آستیده دوزخ اوتی یانیب تورویدور، تیریلیب انگه توشوب کیتمه.

تمثیل: حیات دنیا ده اگر خوب فکر قیلسنگ پل صراط شریعت اوستیده کیتیپ بارورمیز و انی آستیده جهنم تورور، اگر شریعت یولیدین چیقماق توغری یولده کیتسک اول کوپروک‌دین سلامت اوتوب جهنم‌دین قوتولوب جنتگه یتوشگان و رضای الهی‌گه ایریشگان بولورمیز. اگر [خدا ناخوaste] توغری یولدین چیقیب ایگری یولگه قدم قویسک ایاغیمیز تاییب دوزخگه توشماغیمیز محقق دور، پس شول دنیا ده هر کیم اوزینی قیسی یولغه باریب تورغانینی بیلسه بولور. اولگی [یانه] لفظی یانماقدین مأخوذ قیته معنی سیده دور، ایکینچیزی [یانگه] نی مخفی پهلوگه معنی سیده دور. اوچونچیزی می‌سوزد، و [بِتَوَقَّدُ] معنی سیده، تورتونچیزی ینه لفظینی اشباع ایتیپ یانه ایتیلگاندور، باز معنی سیده دور.

اوتگان گناه و یمان ایشلاردین ندامت و پشیمان‌لیک نورینی دل‌دین یوق قیلمه و همیشه نادم‌لیک صفتیغه متصف بول، اگر [حقیقتاً] گناه‌لاردین تایب (توبه قیلغوچی) ایرورسن، ینه تاییب کیتیپ گناهگه بولغانیب قالمه. اولگی تایب لفظی اسم فاعل توبه قیلغوچی معنی سیده، ایکینچیزی تاییلماقدین آلینب لغزش معنی سیده دور. توبه قیلغان بیر خیال و بیر فکر و بیر سوز کیشی اگرچه عیش و عشرت دنیاگه رغبتی و میلی بولسه ده توبه‌سینی



بوزمسدین بیر عهد ایله اولگونچه ثابت قدم بولور. دل تصدیقی ایمان درختینی ایلدیزی و ریشه‌سی دور، و اعمال صالحه انی شاخی دور، و اول شاخلارنی کتّه‌سی توبه شاخی دور، توبه‌دین قیتیپ گستاخ‌لیک قیلیب انی سیندوروب قویماغیل، زیراکه اول سینوغ شاخ ضربی بیرلان درختینی اصلی و توبی زخم آلیب مبادا آخر فصل و کیتار و قتده قوروب قالیب ایمان قولدین کیتماسون. جریمه گناه چرکی و آلوده‌لیگی بیرلان ظاهر و سر [تاش و ایچ] بیرله کیر بولوب سن بو چرک‌لارنی کیتکورماق ایسته‌سنگ توبه قیلیب ندامت و پشیمانلیک درباسیغه کیریب چومولوب اوزونگنی پاک ایتگیل، اولگی کیر لفظی چرک معنی‌سیده، ایکینچسی کیرماقدین امر دور، ادخل معنی‌سیده.

حکایت بی‌بی رابعه علیها رحمه

ایشتیگیل رابعه‌نینگ اشکین ای شاه	بیراونینگ چادری غه تامدی ناگاه
دیدی: یو چادرینگنی ای قرینداش	قیزیل قاندور کوزومدین ساچراغان یاش
او یاتلیغ عاصیه‌دین ای گزیده	بولوبدور قانه تبدیل آب دیده
اگرچه رابعه‌دور مَـرأه بالذات	ایرانلار قویدی لار تاج الرجال آت
اوزین سودراب حرمغه جانی بیرلان	یتوشدی ییتی ییلده یانی بیرلان
انینگ شأنیده‌گی کسب و کمالات	عدد دین دور بیرون اذواق و حالات
مونینگ دیک بیغلاسه انداغ نکو رأی	بیزینگ دیک روسیه‌نی حالیکه وای
همیشه ذوقیمیز عیش و کولوشگا	یتوشمس ایرته قیلغان توبه توشگا

شرح: بو حکایتنی ایشیتیپ اندین عبرت آلگیل که رابعه عدویه‌نی کوز یاش‌لاری (ناخواست) بیر خاتون چادریغه تامدی، رابعه انگا ای قرینداش، چادرینگنی یوبوب آغیل، زیراکه کوزومدین ساچراغان یاش قیزیل قاندور دیدی (و هم اوزینی عجب و ریادین ساقلاماق اوچون ایدی) ای خدانی برگزیده (تنلاگان) بنده‌سی گناه خوفیدین بو عاصیه (گنهکار)نی کوز یاشی قانگه ایلا نیب دور. [ناظم رحمه الله اول ذاتنی بعضی شرح حال‌لارینی بیان ایتیپ دیرلارکه] اگرچه رابعه رحمها لله ذاتاً مرأة (خاتون) بولسه‌لارده ایرانلار اول کیشیغه تاج الرجال لقبی‌نی بیریب شول آت بیرله تانیلگاندورلار، اول بی‌بی پیاده اوزی اوز جانینی سودراب ییتی ییلده یانی بیرلان یوروب حرمغه یتوشدی، اول باهمت خاتون‌نینگ شانیده‌گی کسب و کمالات و اذواق و حالات حساب‌دین تشقاری دور، انداغ نکو رای یخشی سیرت با تقوی کیشی مونینگ دیک قان بیغلاسه بیزلاردیک یوزی قرالارنی حالیکه وای دور. همیشه بیزلارنی ذوقیمیز عیش و کولوشگه دور، ایرته قیلغان توبه‌میز توش (چاشت) وقتیکه یتوشمای دور. دوزخ باشقه‌لارگه یراتیلگان و آسماندین خط برأت توشوب توغری جنتگه بارادیگان دیک خاطر جمع یورورمیز.



الهی لطف قیل من مبتلاغه
 یاتیب من یوز توبان ایستیغده سوساب
 قوروب قانیم ییتیب دور لبگه جانیم
 کرم بحریدین ای سلطان وهاب
 بذیات اهلی اطرافیمده دور پُر
 سعادت قوتین قیلسنگ عنایت
 بیریب سینمس عصای توبه قولغه
 تورع زادی بولسه قوینیمیزده
 یوروتوب یخشی لار کیزگان سبلنی
 مونینگ دیک ایشلار ای دانای اسرار
 کوتاریب من امید بیرله بیلاک نی
 ایرور جاوید لطفینگ بحری دور جوش
 اگرچه برچه ایشیم بولدی معیوب

توشوبدور من بیابان بلاغه
 کیشی یوقدور تاموزغای قطره آب
 توشوبدور بیرگه آغزیمدین زبانی
 عطا قیلسنگ منگا بیر جرعه آب
 امیدلیک من هنوز ای کاشف الضر
 رفیقیم بولسه توفیق و هدایت
 طلب دردی بیلان سالسنگ بو یولغه
 عبودیت طنابی بوینیمیزده
 رضا ملکیکه قوندورسنگ بو قُلنی
 سنگا آسان ایرور بیزلارگه دشوار
 خداوندا قبول ایتگیل تیلانکی
 ایرور بیز چون خطاگر سن خطا پوش
 منی عیبیمنی لطفینگ یاپماغی خوب

شرح: ناظم رحمه الله به طریق مناجات دیورلار: الهی من دیک نفس و هوی غه گرفتار و مبتلاغه لطف و عنایت قیل بیابان (صحرا) بلاغه توشوب قالب ایستیغده سوساب چنقاب یوز توبان (بیرگه قراب) یاتیب من بیر کیشی یوقکه آغزیمگه بیر قطره سو تاموزسه قانیم قوروب جانیم لبگه ییتیب دور، سوساماقدین تیلیم آغزیمدین آسیلیب بیرگه توشوبدور، ای سلطان وهاب نه بولغای که دریای کرم دین منگا بیر ایچیم سو عطا قیلیب بو تشنه لیکدین قوتقارسنگ ناظم رحمه الله یوقاریده گی اییاتلارده قحط الرجال لیکده قالب بیر صحبتیدین استفاده ایتگودیک کیشی لارنی یوقلیگی و محبت تشنه لیگینی توجه سوی بیله دفع ایتهدورگان کامل مکمل ذاتلارنی بولمگان لیکلارینی بیابانده تشنه سوساب قتیغ حالده یاتکان کیشی حالیکه تشبیه ایتیب دورلار. اگرچه اطرافیمده بذیات اهلی و فحش تیللی کیشی لار پُر (توله) دور، لیکن ای کاشف الضر هنوز هم سنی لطفینگ دین امیدوارمن که سعادت قوتینی عنایت قیلسنگ و توفیق و هدایت یولداشیم بولسه و توبه نی سینمس عصاسینی قولومغه بیریب طلب دردی و محبت شوقی بیرلان بو یولغه سالسنگ ورع و تقوی توشه سی بو یولده قوینیمیزده بولوب و قُل لیک طنابی بوینیمیزده بولسه یخشی ذاتلار یورگان یوللارگه بو قُلنی یوروتوب آخر انی رضا ملکیکه قوندورسنگ (ای دانای اسرار) مونداغ ایشلار بیزلارگه قیین سنگا آسان ایرور، امید بیرله بیلاکیم و قولومنی دعاغه کوتاریب من، خدایا تیلانکیمنی قبول ایت، لطف و جاویدینگ دریاسی همیشه قینماغده دور، بیزلار [بنده لارینگ گنه کار] خطا قیلغوچی میز، سن خطا پوش، ستار دورسن و بنده عیبینی یاپورسن، اگرچه



همه قیلگان ایشلاریم خطا و عیبلیک دور، لیکن لطفینگ منی عیبلا ریمنی یاپماغی یخشی دور [بذیات جمع بذیه: فحش سوزلارنی سوزلا غوچی معنی سیده دور، اما بو بیرده یمان سوزلارنی اراده ایتیپ دورلار] شارح مزیات دیب یخشی کیشی لار معنی سیده دیگانی غلط دور.

موعظه

کیل ای نفس آچماغیل کوز هر قیانه
میسر بولسه طلادین سنگا تخت
اگر بیرسه جهان سلطانلیغی دست
اگر رتبه نگ ایرور اعلائی آفاق
بو رفعت بیرله کوکنی کور همیشه
اگر چندی که اورنینگ بولسه افلاک
اگر دنیاده بولسنگ زور و بازو
طرف موری و سنده قوت فیل
اگرچه اول ایاغ آستیده دور خوار
تکبر قیلماغیل ای بی معانی
اگر آلدینگده گی قُل بولسه والی
برونغی حالِیغَه قیلمه نظاره
ایشانمه آته غه قالمه طلبدین
حسب فوق نسب دور ای نکو حال
قراچه اوغلی خواجه اوغلی دین کم
اگر صاحب نسب توز دور ایشیگا
اگر قیلسنگ سفر دار الحیاته
اگرچه نوح ایدی هادی انسان
اگرچه نوح اوغلین عرضین ایتتی

یوق ایرمیش اعتماد اوشبو زمانه
اوزونگدین پستگا زینهار آیماغیل سخت
کیشی اوز حالینی بیلماک کیراک پست
بیقیلغان خسته لارنی حالِیغه باق
یوزی دور بیر ساری ای یخشی پیشه
قویاش دیک اوپ توروب رخساره خاک
ولی انده قوروغ—لوغ دور ترازو
مسلمانلیغده انگا مرحمت قیل
خدا مخلوقی دور آغریتمه زینهار
فلانی اوغلی دور من دیب فلانی
کونگول نی کینه سی دین ایله خالی
انی تنگرم عزیز ایتسه نه چاره
سورالمسدور قیامتده نسب دین
ایپک توندین اوتار خوب ایشلاگان شال
معلم بولسه سیددین اوتار هم
نه سوز دور ایگی خصلت لیک کیشیگا
خوب آته بار دیمه تارمش خوب آته
توغوبدور انداغ ایردین نامسلمان
خدادین «لَیسَ مِنْ أَهْلِکَ»^۱ ایشیتتی

^۱ آیه ۴۶ - سورة هود.



اتا ایردی علی المرتضی غه
ولیکن بولمادی دین ده موافق
پیمبر شفقتی هم قیلمادی سود
تیکان دین گل چیقاردی زهر دین بال
تقی لوط نبی دور هـازر اوغلی
بو بیر سوز خلق ارا ایسکی مثل دور
انی کیم پوف دیدی سقالی کوییدی^۱
بیر ایسکی بیر دین آقدی ینگ چشمه
مونی غرق ایلادی ناگه کیلیب سیل
ولی مظلوم دیگان نی اجری آرتار
بارور جابر ایرور ای نفس جابر
سننی ایلنار زیانه تازیانه
گنه دین بیر نیچه کم بولگانی خوب

ابو طالب که عم دور مصطفی غه
کیچیک دین مصطفی غه ایردی مشفق
دیانت سیز اوشل کیم بولدی نابود
انینگ حکمیده دور ادبار و اقبال
خلیل الله ایدیـلار آزر اوغلی
حسود ایتگان کیشی دون و دغل دور
چراغینی که حق یاندوردی قویدی
خدانی صنعیدین کوردینگ کرشمه
انی بند ایتکالی آلدی بیـراو بیل
اگر تاری کیشی ظلم ایتسه تار تار
مسلمانی غه هیچ بولمه مکابر
توشورمه نفعی یوق رنجش میانه
تیریک یورگونچه ظالم اولگانی خوب

شرح: ای نفس ظالم کوزونگنی هر طرفه قراب آچیب زینت دنیاگه باقماغیل، چونکه بو تورت کونلیک دنیا اعتمادگه شایسته و اطمینانگه لایق ایمس، سنگا بیر یوزینی پادشاهلیگی و آلتون تخت میسر اولوب صاحب جاه و جلال اولسنگ باید تواضعنی پیشه قیلیب اوزونگدین مرتبه سی قویی کیشی لارگه زینهار قتیغ سوزلاماگیل و اوز حالینگنی همه دین پست کورغیل، چنانچه شیخ سعدی رحمه الله علیه دیب دورلار:

تواضع ز گردون فروزان نکوست گداگر تواضع کند خوی اوست^۲

اگر مرتبه و منزلته اعلای آفاق همه دین بلند بولسنگده بیقیلغان خسته و افتاده لار حالیغه باقغیل. [آفاق جمع افق] ناحیه و اطراف و جوانب معنی سیده دور. (ای نکو کار) آسمانی شو قدر بلندلیگی بیرلان کورگیل که همیشه بیر طرفیگه قراغاندور، اگرچه مقام و مرتبه ده جایینگ آسمان کبی بلند بولسه ده تواضع پیشه بولوب قویاش دیک ایرته توروب تفرغ یوزینی اوپگیل و باشینگنی خاک مذلتگه سوروب الله گه تقرب حاصل ایتگیل، اگر دنیا ده [بازوسی زور] قوت و قدرت ایگاسی بولسنگده ظلم پیشه بولمه، زیراکه او دنیا ده ترازوی عدالت خداوندی قوروغلوغدور و مظلوم حقینی ظالم دین آلیب بیرور، سنی طرف مقابلینگ مورچه عاجز [چملی]

^۱ اوشبو بیت فارسجه ایسکی بیر بیت ترجمه سی دور، شاعری نینگ کیملیگینی بیلمایمن، شاید ابوسعید ابوالخیر بولسه. فارسجه شعر منه شو:

هر آنکس پف زند ریشش بسوزد

چراغی را که ایزد بر فروزد

^۲ بخش چهارم، در نیایش خداوند، بوستان، سعدی.



کبی کمزور بولوب سن فیل کبی قوت لیک بولسنگ، مسلمانلیغ یولیده عدالت و انصاف و ترحم و شفقت شونی ایجاب ایتورکه، انگا مرحمت و شفقت ایتیب ظلم ایتماغدین اوزونگی ساقلا سگ اگرچه اول ایاغ آستیده خوار بولسه ده الله مخلوقی دور انی هرگز آغریتماگیل و غضب الهی دین قورقگیل.

(ای بی معنی) فلان بن فلانی من دیب تکبر قیلماغیل، و آته-بابالار بیرله فخر ایتماغیل، بالفرض قضای الهی دین آلدینگده گی قُل، والی و حاکم بولوب بلند مرتبه گه ایگه بولوب قالسه انگا اطاعت ایتیب کونگولنی انی کینه و عداوتی دین خالی قیلماق و ایلگار یگی حالیغه قرامس لیک کیراک، زیرا که انی تنگری تعالی عزیز ایتسه نیمه قیلیب بولور، و بنده نی قولیدین نیمه کیلور، ناظم رحمه اله بو نیچه بیتلارده نسب و حسب خصوصیده و نسب قیسی وقتده فائده بیرماغی توغریسیده بیر قنچه افاده ایتیب دورلار، آته نی فضل و کمالی و نسب و حالیغه ایشانیب طلب علم و استحصال اعمال و اخلاق حسنه دین قوروق قالماغیل، قیامت کونی (سنی آتنگ کیم ایدی دیب) نسبینگ دین سورالمس، بلکه عمل دین سورالور، حَسَب (فضل و کمال) که کیشیده موجود بولسه آته آنه لار واسطه سی بیرلان ایریشیلگان مفاخر نسب دین یوقاری دور، چنانچه یخشی ایشلانگان شال نفاست و ارزش و قیمتده ایپک دین توقولگان تون و چین دین اوتار [شال جون دین توقولگان تیکه و پارچه نی ایتیلور] اگرچه قراچه اوغلی [عامه خلق اوغلی] یعنی سید و شریف ایمس قرا خلق اوغلی [مرتبه و نسبده] خواجه و سید و شریف اوغلی دین کم بولسه ده قرا خلق اوغلی اوقوب علم اورگانیب معلم لیک درجه سیگه ییتسه، سید و شریف بی علم و کمال دین رتبه ده اوتار. اما صاحب نسب (سید و شریف) اوز ایشیگه توزوک بولوب عالم و عامل و فاضل و کامل بولسه، عالم ادنی نسب دین مرتبه سی بلندلیگده هیچ شک یوقدور، چونکه ایکی خصلت لیک کیشینی عالی منزلت لیگده هیچ سوز یوقدور. دارالحیات [آخرت] طرفیگه سفر قیلسنگ یخشی [عالم و عامل] آتم بار ایدی دیمس دین اوزینگی اعمال صالحه و اخلاق فاضله نگ اثریدین دنیاده آرتورکن یخشی آتگه تارمشمقانی نظرده توتگیل، اولگی [آته] لفظی پدر معنی سیده دور، ایکی نیچی سی [آتگه] نی مخفی دور. ناظم رحمه الله تنها نسب نی سعادت انسانیه ده [بدون مشیت و اراده خداوندی] هیچ تأثیری نی یوقلیگی نی بو بیتلارده افاده ایتیب دورلار، اگرچه حضرت نوح علیه السلام پیغمبر و هادی عالم انسانیت ایریدیلار، شونداغ ذات دین کنعان آتلی بیر نامسلمان فرزند توغولوب دور، همه مسلمانلار کیمه گه چیقکانه بیر طرفده اول چیقمس دین تورگانه حضرت نوح علیه السلام، يَا بُنَيَّ ارْكَبْ مَعَنَا وَلَا تَكُنْ مَعَ الْكَافِرِينَ [۲۴: هود] ای باله گینم بیز بیرله کیمه گه مین! و کافرلار بیرله بولمه، دیگانلاریده، تاغکه پناه آله من منی سودین ساقلایدی دیدی. حضرت نوح علیه السلام انی سوزینی رد ایتیب خدانی عذابیدین بو کون ساقلاگوچی یوقدور مگر خدا رحم قیلگانلار دیدیلار، سونگره دریا تولقونی آرهلارینی توسوب اول باله غرق اولوب کیتدی، طوفان سوی توکاب کیمه بیرگا توختاگان دین سونگره نوح علیه السلام پروردگاری ندا ایتیب، إِنَّ ابْنِي مِنْ أَهْلِي [۵: هود] دیب اوغوللارینی عرضینی ایتدیلار، لیکن الله طرفیدین، إِنَّهُ لَيْسَ مِنْ أَهْلِكَ [۶: هود] البتّه او سنی اهلینگدین



ایمس، جوابینی ایشیتیدیلار. قصه لاری تفسیرلارده مفصل دور. ابو طالب که رسول الله نینگ عمکی لاری و حضرت علی مرتضی نی آته لاری ایردی یاشلیک دین رسول الله گه مشفق و مهربان بولوب مشرک لار مقابلیده اول ذاتنی حمایه ایتماقده نهایت درجه ده کوشش ایتار ایدی، لیکن اول ذات دین ده موافق بولمادی، اسلامنی قبول ایتمادی، بی دین لیک بیرله (کافر لیک حالتیده) اوشل (ابو طالب) کیم نابود بولوب [اولوب کیتدی]، رسول الله نی شفقت لاری هم انگا فائده بیرمادی، إِنَّكَ لَا تَهْدِي مَنْ أَحْبَبْتَ وَلَكِنَّ اللَّهَ يَهْدِي مَنْ يَشَاءُ ۖ [القصص] آیتی نازل بولدی. مرض الموت ده رسول الله انی آلدیغه کیریپ ای عمکی بیر بار [لَا إِلَهَ إِلَّا اللَّهُ] دیگیل، تاکه من سینینگ اوچون قیامت کونی الله نزدیکه گواه لیک بیرای دیگان لاریده [ایمان کیلتوروشیگه اولوم دین قورقوشی باعث بولدی دیب] قریش منی عارگه نسبت بیرمسه لار ایدی، هر آئینه بو کلمه نی ایتماق بیرله کوزونگنی روشن قیلور ایردیم دیب جواب بیردی، بو حدیثنی مسلم و ترمذی و بیهقی و غیرهم روایت ایتیپ دورلار. اقبال و ادبار، سعادت و شقاوت تنها الله نینگ حکمی و قضاسی آستیده دور. تیکان لیک گل بوتہ سیدین هر قسم گل و غنچه لارنی چیقاریب و زهر لیک آری دین عسلنی وجودگه کیلتورور، شو کبی کافر دین مسلمان و مسلمان دین کافر پیدا قیلور، يُخْرِجُ الْحَيَّ مِنَ الْمَيِّتِ وَيُخْرِجُ الْمَيِّتَ مِنَ الْحَيِّ [۳۱: یونس - ۹۵: الانعام - ۱۹: الروم] بو سوزگه اشاره دور. ابراهیم خلیل الله آزر بت تراش اوغلی بولوب، لوط پیغمبر هازر اوغلی ایردی لار، الله بو ایکی لارینی نبوت مرتبه سیگه ایریش توروب ابراهیم علیه السلام نی خلت مقامیگه کوتاریب خلیلیم دیدی. الله نینگ اوز فضل و مرحمتی بیرله بیراواگا بیرگن دنیوی و اخروی نعمت لارینی کورالما ی حسد ایتکان و زوال نعمتینی ایستگان کیشی دون و دغل پست و حيله گر و مکار دور، بو سوز خلق اراسیده ایسکی دین قالگن ضرب المثل دور. [حُسُودُ بَظْمٍ حَا و سِين مَصْدَرٌ حَسَدٌ مَعْنَى سَيِّدُهُ دُور] حق تعالی یاندوروب قویگان چراغنی هر کیم اوچورماق قصیده پُف دیسه اوزینی سقالی کویوب شرمنده بولماقدین باشقه بیر نتیجه آلمس الله تعالی صنعی و ایجاد و تقدیری دین بو کرشمه و لطف و احساننی کوردونگ که بیر ایسکی اوزاغ ییل لار دین بیر نبوت و رسالت سویی انده آقما ی قوروب یاتگن حجاز تفراغیدین رسول آخر الزمان محمد علیه السلام نی مبعوث ایتیپ ینگ چشمه (بولاغ) نی آقوزوب قویدی، اول سونی بند ایتماغ و رسالت یولینی توسماغ و اول ذاتنی

وَحَدَّثَنِي حَرَمَلَةُ بْنُ يَحْيَى التَّحِيْبِيُّ أَخْبَرَنَا عَبْدُ اللَّهِ بْنُ وَهْبٍ قَالَ أَخْبَرَنِي يُونُسُ عَنِ ابْنِ شَهَابٍ قَالَ أَخْبَرَنِي سَعِيدُ بْنُ الْمُسَيَّبِ عَنْ أَبِيهِ قَالَ لَمَّا حَضَرَتْ أَبَا طَالِبٍ الْوَفَاةُ جَاءَهُ رَسُولُ اللَّهِ -صلى الله عليه وسلم- فَوَجَدَهُ أَبَا جَهْلٍ وَعَبْدُ اللَّهِ بْنُ أَبِي أُمَيَّةَ بْنِ الْمُغِيرَةِ فَقَالَ رَسُولُ اللَّهِ -صلى الله عليه وسلم- «يَا عَمَّ قُلْ لَا إِلَهَ إِلَّا اللَّهُ. كَلِمَةً أَشْهَدُ لَكَ بِهَا عِنْدَ اللَّهِ». فَقَالَ أَبُو جَهْلٍ وَعَبْدُ اللَّهِ بْنُ أَبِي أُمَيَّةَ يَا أَبَا طَالِبٍ أَتَرْغَبُ عَنْ مِلَّةِ عَبْدِ الْمُطَّلِبِ. فَلَمْ يَزَلْ رَسُولُ اللَّهِ -صلى الله عليه وسلم- يَعْرضُهَا عَلَيْهِ وَيُعِيدُ لَهُ تِلْكَ الْمَقَالَةَ حَتَّى قَالَ أَبُو طَالِبٍ آخِرَ مَا كَلَّمَهُمْ هُوَ عَلَى مِلَّةِ عَبْدِ الْمُطَّلِبِ. وَأَبَى أَنْ يَقُولَ لَا إِلَهَ إِلَّا اللَّهُ. فَقَالَ رَسُولُ اللَّهِ -صلى الله عليه وسلم- «أَمَا وَاللَّهِ لَأَسْتَغْفِرَنَّ لَكَ مَا لَمْ أَنُكِّ عَنْكَ». فَأَنْزَلَ اللَّهُ عَزَّ وَجَلَّ (مَا كَانَ لِلنَّبِيِّ وَالَّذِينَ آمَنُوا أَنْ يَسْتَغْفِرُوا لِلْمُشْرِكِينَ وَلَوْ كَانُوا أُولَى قُرْبَى مِنْ بَعْدِ مَا تَبَيَّنَ لَهُمْ أَنَّهُمْ أَصْحَابُ الْجَحِيمِ). وَأَنْزَلَ اللَّهُ تَعَالَى فِي أَبِي طَالِبٍ فَقَالَ لِرَسُولِ اللَّهِ -صلى الله عليه وسلم- (إِنَّكَ لَا تَهْدِي مَنْ أَحْبَبْتَ وَلَكِنَّ اللَّهَ يَهْدِي مَنْ يَشَاءُ وَهُوَ أَعْلَمُ بِالْمُهْتَدِينَ). [حديث ۱۴۱ : مسلم]



تبلیغ لاریگه توسقون چیلیک قیلماق اوچون بیراولار (کفار قریش) بیل آسیب اول رحمت و رسالت چشمه سینی کوموب یوقاتماغچی بولگانلاریده ناگاه بیردین سیل غضب الهی کیلیب بدر غزوه سیده اکثرلارینی هلاک ایتیپ چاه مذلتگه تیقدی و آخرالامر عربستان تفرافی مشرک لار و کافرلار وجودیدین پاک اولوب اسلام و توحید دینی او بیرده قورولوب تمام عالمگه یاییلدی. اگر کیمسه بیر تار مقدارچه (آزکینه) بیراوه ظلم ایتسه اول قیلگان ظلمینی سزاسینی تارتر و کورار ولی بالمقابل مظلوم و بیچاره نی اجر و ثوابی آرتر و زیاده بولار. اؤلگی [تاری] لفظی یای نکره بیرله ایپ معنی سیده فارسی دور، [تارتر] لفظی تارتماق دین مأخوذ دور، کوتارار [میکشد] معنی سیده دور. (ای نفس ستمگر) جزای عمل حقیلگینی بیلگان دین سونگره هیچ مسلمانغه مکابر و معاند و تیسکاری بولمه! آخر همه میزنی بارور جاییمیز برابر و (الله حضوری دور) [جا] مخفف جای، و [بر] یک و واحد معنی سیده، و [جابر] عربی ستمگر و ظالم معنی سیده دور. مسلمانلارغه معاند اولوب بی فایده آزرده خاطرلیکنی اورته گه توشورمه تازیانه و قمچین بیرله (ناحق) بیراولارنی اورماق آخر سنی زیان و ضررگه ایلنار و آلیب بارار. (تازیانه شلاق و قمچین معنی سیده دور، زیانه لفظی [زیانگه] نی مخففی دور، ضررگه معنی سیده) ظالم نی تیریک یورگانیدین اولگانی یخشی راقدور؛ چونکه گناهی کم بولوب مردم اوستیدین ظلمی کوتاریلور.

حکایت حجاج

مسلمانیه بیر کون ایدی حجاج	دعای خیر اوچون بیزگه قولونگ آچ
دعاغه قول کوتاردی اول نکو حال	دیددی یارب بو ظالم جانینی آل
دیددی حجاج اوشل مرد خداغه	نچوک باردی تیلینگ مونداغ دعاغه
دیددی حجاجه اول مرد نکو سیر	سنگا هم برچه مؤمن لارگه دور خیر
گناهینگ کم بولور اولسنگ اگر تیز	کیتار ظلمینگ الارنی باشیدین نیز

شرح: حجاج ظالم مشهور ثقفی بیر کون مسلمانیه منی حقیمگه دعای خیر اوچون قولونگی آچ دیددی، اول مرد نکو حال دعاغه قول کوتاریب ای پروردگار ذوالجلال بو ظالم جانینی آل دیددی، اول مرد خداغه حجاج نچوک مونداغ دعای بدغه تیلینگ باردی دیگانه، جوابیغه اول نکو رفتار اولماغینگ سنگا و همه مومن لارگه یخشی دور، چونکه اگر تیزراغ اولسنگ گناهینگ کم بولور و هم ظلمینگ مسلمانلار باشیدین کیتور و اوزاغ بولور دیددی.



حجاج‌نی مظالمی و انی سفاک‌لیگی و محبوس‌لارنی ایرکک-خاتون بیر جایده اوستی آچوق ایسیق-ساوقدین ساقلامایدیگان قماق‌خانه‌ده آچ-یلانغاچ ساقلاب انواع عذاب‌نی الار اوستیغه یوروتگانی کتب تاریخده مذکور و صحابه و تابعین دین کوب کیشینی اولدورگانی مروی دور.

کیل ای آزاده بول همت بیلان یار	طمع زندانیغه بولمه گرفتار
بیر ایگنه بولمسه دنیا ایشیدین	اور استغنا طمع قیلمه کیشی دین
خداینگ هر نه بیرسه قیل قناعت	کونگولنی قیلمه منت دین جراح
یوگورسنگ کونده بیر کودی اوچون چند	بخارا اولکه سیدین تا سمرقند
بدخشان دین کوتارسنگ یوز ساری تاش	بهاسی بلخ ایچینده بولسه بیر ماش
اگر باشی بیلان چه قازسه بنده	کوزی نینگ یاشی چه سو تاپسه انده
اگز قازسه اریغ کیپرک بیله مرد	انگا بیر خوشه جو قیلسه پرورد
بو محنت بیرله تاپسنگ پرچه نان	کیشی نینگ منتی دین اولدور آسان

شرح: ای آزاده طبع همت بیلان همیشه یار و رفیق اولغیل، طمع زندانیغه گرفتار اولوب طماع بولوب قالماعیل، دنیالیک نمرسه و انی اسبابیدین بیرگینه ایگنه (سوزن، ابرة) قدر شی بساطینگده بولمسه‌ده اوزونگنی استغنا طرفیگه اوروب هیچ بیر کیشیدین طمع قیلماغیل، خداوند متعال هر نه بیرسه انگا قناعت قیلیب طمع اثریده کونگلونگنی بیراولارنی منتی دین جراح بولوشیگه سبب بولمه، بیر کودی (بیر پول) اوچون نیچه بار بخارا اولکه سیدین تا سمرقند شهریغه یوگورسنگ و یا بدخشان ولایتی دین یوز اوستیغه قویوب تاش کوتاریب کیلسنگ، انی بها و قیمتی بلخ شهریده بیر ماش قدریچه بولسه ویا بیر کیشی باشی بیرله [اوزی تنها] بیر چاه (قدوق) قازسه و انده کوزباشیچه سو تاپسه ویا کیپرک (مژه) بیرله اریغ قازیب انی سویی بیرله بیر باش ارپه‌نی پرورش قیلیب کوکارتورسه بو یوقاریده ذکر ایتیلگان محنت و مشقت‌لار بیرلان بیر برده نان تاپیب ییماق بیراولارنی منتی نی (طمع اثریده) کوتارگاندین آسان‌راق دور. ناظم ^{رحمه الله} بو ایبات‌لارده طمع دین تحذیر و استغنا و آزاده‌لیکغه تشویق‌ده کمال مبالغه بیرله ترغیب ایتیبدورلار. خلص کلام شولکه، کوب محنت و مشقت بیرله بیر قوت لایموت قولگه کیلسه، طمع و رذالت یولیدین آسانلیک بیرله قولگه کیلگان انواع اطعمه‌دین مینگ درجه یخشی‌راغ دور.

[کیپرک] مژه معنی سیده دور، [کودی] شور دریادین چیه‌دورگان آق مونچاق کبی کته و کیچیک نمرسه‌نی ایتیلورکه سابقاً بخارا و خراسانده پول قطاریده یورور ایکان، و عوام آغزیده بو بیت ضرب المثل دور، بیت:

سخن از کون کودی میزند جوش اگر کودی نباشد هست خاموش



*** **

کیتار قدرینگ قدر دین هرگز آشمس

قیدیرغان بیرله رزقینگ قدری تاشمس

بو یورگانگه مخالف دور بویورگان

توکل گنجیدین ای یوز اوگورگان

کومولگان تیرمولوب تورگان دین آرتوق

الا بولگان الا یورگان دین آرتوق

کیشیگا ایگماگای همّت لی قُل باش

اگر تاش چیناسه ایلدین چیقیب تاش

شرح: قیدیرغان و رزق آرقه سیده هر طرفده یورگان و تلاش ایتگان بیله رزقینگ قدری (اندازه سی) تولوب تاشمس و زیاده بولمس و یا هر قنچه کوشش قیلیب آختارگان بیرله رزقینگ قدری [قازانی] تولوب تاشمس و کویامس، خلق آلدیده عزت و حرمتینگ و قدرینگ کیتار، لیکن قدر دین (تقدیرده یازیلگان و تقسیم ایتیلگان رزق دین) هرگز آشمس. [قیدیرغان] آختارگان و هر طرف یورگان معنی سیده. [قدری] بفتح قاف اندازه و مقدار معنی سیده و یا به کسر قاف [دیگ] و قازان معنی سیده. [قدرینگ] حرمتینگ و عزتینگ معنی سیده. [قدر] به فتحین تقدیر معنی سیده دور. ای توکل گنجی و خزانه سیدین یوز اوگوروب طمع گرداییغه چومولوب یورگان بو خیلده یوروشینگ خدا و رسول بویورگانیغه مخالف دور. اولگی بویورغان لفظی بیورماقدین مأخوذ امر ایتگان معنی سیده، ایکینجی سی [بو] اشاره و [یورغان] یورماق و روش و رفتار معنی سیده مرکب دور.

تنبيه: توکل کسب غه و کسب توکل غه خلاف ایمس دور، اکثر انبیاء علیهم السلام بیر کسب بیرله مشغولیت لاری قرآن کریم و باشقه کتاب لار دین بیلینور، چنانچه حضرت یوسف علیه السلام عزیز مصرگه خزانه دار و وزیرلیک بیرله مأمور ایردیلار، و حضرت داود تیمور دین ساوت و قلغان و باشقه نمرسه لار یساماق لاری - آیه: **وَأَلْنَا لَهُ الْحَدِيدَ [۱۰] أَنْ أَعْمَلَ سَابِغَاتٍ وَقَدَّرَ فِي السَّرْدِ [۱۱: سبأ] وَآيَةُ: وَعَلَّمْنَاهُ صَنْعَةَ لَبُوسٍ لَكُمْ [۸۰: الانبیاء]** دین معلوم اولور، و موسی علیه السلام قوی باقغان لاری قرآن کریم ده مذکور دور، و حضرت آدمی زراعت قیلگان لاری مشهور دور، و حضرت محمد صلی الله علیه وسلم حضرت خدیجه گه اجیر اولوب شامگه تجارتگه بارگانلاری و قوی باقغانلاری و بعثت دین سونگره جهاد بیرله مشغول اولوب «جعل رزقي تحت ظل رمحي» دیگانلارینی امام احمد ابن عمر رضی الله عنه دین روایت ایتیب دور، و اکابر صحابه کرامنی بیر کسب بیرله اشتغال لاری چنانچه حضرت ابو بکر صدیق و حضرت عثمان و عبدالرحمن بن عوف و غیرهمنی تجارت ایتگان لاری و اکثر انصارلار زراعت بیرله اشتغال لاری مروی دور. و هم حضرت مریم گه، **وَهْزِي إِلَيْكَ بِجِذْعِ النَّخْلَةِ تُسَاقُطُ عَلَيْكَ رُطْبًا جَنِيًّا [۲۵: مريم]** دیب اول عفیفه نی خرمانی سیلکیتماقغه بویورماغیده بیزلار اوچون رزق یولیده حرکت ایتماغه هدایت و ارشاد باردور، ورنه الله بی سیلکیتماغ اول محترمه نی آدیگه رُطْبَنی توشورماقگه قادر ایردی. حدیث: **لو**

^۱ (جعل رزقي تحت ظل رمحي وجعل الذلة والصغار على من خالف أمري). أخرجه الترمذی و صححه، صفحه ۱۰۸، جلد ۸، تفسیر قرطبی.



توکلتم علی الله حق التوکل لرزقکم كما یرزق الطیر تغدو خماسا وتعود بطانا^۱. رواه الترمذی. بو حدیثده هم حرکتکه هدایت باردور، زیراکه پرندگه رزق بیرماقدہ ایرته بیرلان قارنی آچ (رزق طلبیده) اوچوب کیتادی و کیچقورون قارنی توق قیتیب کیلادی دیدی، اگر بالکل کسب و کار و حرکت دین توختاماغ مراد بولسه ایدی، قوشنی اوچوب باریب کیلماغینی ذکر ایتماس ایردی. اما کاسب باید خاص اللهگه تکیه قیلیب قیلگان کسبیغه تکیه قیلماسون، انساننی پیس بولوب تیریسی الا-بولو بولماغی بیراولارنی مال و متاعیگه کوز آلایتوروب یورگانیدین و طمع ایتگانیدین آرتوق و یخشی دور، و یا پیس بولوب یورماق منافق لار کی ایکی یوزلامه یورماقدین زیاده و یخشی دور. بیراولار مال و منال و نان و طعامیگه طمع کوزی بیرلان قراب تیرمولوب تورگانیدین اولوب بیرگه کومولگان زیاده و یخشی دور. همت و غیرت لیک کیشی ایل - قومی دین تشقاری چقیب تاش چیناسه (کوب قتیغ لیک لارنی کورسه) ده یات کیشی لارگه باشینی ایگماگای و الار دین طمع قیلماگای، [تاش چیناسه دیگانی] کوب قتیغ لیک لارنی کورسه دیماغدین کنایه دور، ایکیچی [تاش] لفظی [بیرون و خارج] معنی سیده [ایچ] لفظی نینگ ضدی دور.

طمع بویی کورونمای بوییدین قاج
کیشیگه آیماگای ایر بنده سرنی
تیلانگان دین ایرور آسان تیلینگان
بو زر مهری بوزر دین نی کمالین
خلیل نینگ آته سی هم بولسه آزر

طمع نانینغه لب آچغونچه اول آچ
اگر قرنی بیرار تویماسه قرنی
طمع لیک سیله دین به دور سیلینگان
طمع قیلمه تاپارغه زر نگارین
کیشی نینگ مطلبی سیم بولسه یا زر

شرح: طمع بیرله قولگه کیلگان ناننی بیماغ اوچون لب آچغونچه آچلیکیدین اولغیل، طمع مجسم بولوب قد-قامتی کورونمای (طمع ظاهر و آشکارا بولمای) توروب انی ایسیدین قاجغیل. اولگی [آچ] لفظی آچماقدین مأخوذ فتح و باز معنی سیده دور. ایکیچی سی جائع معنی سیده (گرسنه) نی ایتیلور. اولگی [بویی] لفظی قد-قامت معنی سیده، ایکیچیسی ایس و راثحه معنی سیده دور. شول ایکیچی مصرع یوقاریده ۵۱۵ ینچی بیتده اوتگان ایدی، بو بیرده تکرار واقع بولوب دور. بو بیتده طمع دین اوزاغ بولماغه خیلی مبالغه بیرله توصیه ایتیلگاندور. اگر بیراونی قرنی (بطنی) و شکمی بیر قرن (یوز ییل) مدتیده بیرار بار طعام دین تویماسه، دایم آچلیک بیرله یوروسه ده مرد کیشی سرنی (رازینی) هیچ بیر کیشیگه ایمه گای و اظهار ایتمه گای، بلکه صبر ایلاگای. اولگی [قرنی] لفظی شکم و بطن معنی سیده، ایکیچیسی یوز ییل مدتی نی ایتیلور. بیراولارنی طمع

^۱ رواه فیض الباری شرح البخاری من حدیث ابن ماجه، صفحه ۱۳۰، جلد ۷. و هذا الحدیث مروی فی اکثر کتب الحدیث والتفسیر والفقہ.



اثربده قیلگان [سیله] صِلَة و عطیة لاریدین یوزنی تیربسی سیلینیب توشگانی یخشی راق دور، هر کیمدین گدالیک قیلیب تیلانگان دین ایتلاری تیلینیب بولک-بولک بولگانی آسان راق دور. سیله لفظی عربی صِلَة لفظینی تورکی ایتیلگانی دور. ویا سیلاماقدین مأخوذ نوازش و شفقت ایتماق معنی سیده دور، عرفده خواجه قُلینی سیلایدی؛ و مثل بار تانیماگانی سیلامس، سیلینگان جدا بولگان و سیلینیب توشگان معنی سیده [اصطلاحده شین بیرلان ایتیلور]. تیلانگان طلب ایتگان و گدالیک قیلگان معنی سیده دور. (تیلینگان) بولک-بولک بولگان و بولونگان معنی سیده دور. فارسی ده [قاش قاش شد] دیرلار. زر (آلتون) نگارین (محبوب و معشوقین) تاپماق یولیده طمع قیلیب اوزونگنی خوار ایتیب یورمه، چون بو زر (آلتون) مهر و محبتی، دین عمارتینی کمالغه بیتیشی دین مانع اولوب، بلکه انی بوزار و ویران ایتار. اؤلگی زر (آلتون) و نگار (معشوق و محبوب) معنی سیده دور. اؤلگی [بو زر] لفظی [بو] اشاره و [زر] آلتون معنی سیده، مرکب دور. ایکیچی [بوزر] ویران ایتار معنی سیده، بوزماقدین مأخوذ دور. انسان نینگ دنیاده غایه سی و تیلانگان مطلبی فقط سیم (کوموش) ویا زر (آلتون) تاپماق و دنیا جمعلماق بولسه اگرچه حضرت ابراهیم خلیل الله دیک پیغمبرنی آتیه سی بولسه ده یولیدین آزر و ادشار. [آزر] لفظی ادشار و یا زار معنی سیده دور.

تنبيه: دنیا مال و متاعی فی نفسه مذموم و یمان ایمسدور، بلکه انی محبتی و کیراکلیک جایگه صرف ایتمسدین و حقوق واجبه سینی ادا قیلمسدین بخل بیرله امساکی یمان دور. امام بیهقی حسن بصری دین مرسلأ روایت ایتیب دورلار، «حب الدنيا رأس كل خطيئة^۱» [حدیث ۹۹۷۴: شعب الایمان] یعنی دنیا محبتی همه گناه نینگ باشی دور. اما بیر کیشی حلال طریقه دین زراعت، تجارت و نوکری و باشقه مکاسب لاری بیرلان پول تاپسه و زکات و عشر و باشقه خیرات و صدقات نافله سینی ادا ایتسه و حلال یولگه خرچ قیلسه، او مال نَعْمَ المال الصالح مع الرجل الصالح [حدیث ۳۲۱۰: صحیح ابن حبان]، [۱۷۷۹۸: مسند احمد] قطاریده بولوب توشه آخرت و سبب رضای رب العزت دور. اما حرام و سود و شبهات دین تارتینمای مال توپلاسه و یا حلال دین مال تاپیب صدقات مفروضه سینی ادا ایتماسه و جایگه خرچ قیلسمه اول مال یُس المال اولوب آخرته سبب عذاب الهی اولور.

مصاحب بیلماگیل دنیا خصیمین نسیم معرفت ایسته، نه سیمین

ایماکلاب توشسه کیتسه ایت بيله پوست طمع قیلمه کیشی دین توشه ای دوست

^۱ هذا الحديث مروي في اكثر كتب الحديث والتفسير، منها: روح المعاني، تفسير ابن كثير، تفسير مظهری، مفاتيح الغیب، روح البیان، غرب القرآن، الحاوی، الدر المنثور، كتاب الكافي وغيرهم.



غرض دنیا بولوب ای آدمی زاد	عزیز عمرینگی هرگز قیلمه برباد
کیشی نینگ خدمتیده باغلاسنگ قول	جلاوینده یوگورسنگ بیر قدم یول
بو یورماکدین فنا کیچگانینگ آرتوق	بو نعمت دین زقوم ایچگانینگ آرتوق
ولیکن تیکسه خاص ایرنینگ جلاوی	سعادت دور دلینگ دردیغه داوی
انینگ دیک ایرنی درگاهینده قیش، یاز	عزیز عمرینگی اوتکارسنگ ایرور آز
اوشل ایرنینگ ایری کیم بی ریا دور	قدم تفراغی کوزگا توتیا دور
انینگ دیک بنده نی بولسنگ گداسی	نه دولت دور خدایم نینگ رضاسی
انینگ بیر دانه سی دور خرمن زر	دمی سو دور اول ایردین مشک و عنبر
سعادت لیک مرید اول حق رهینده	بولور یول باشچیسی نینگ درگهینده
نه رسوا پیر ایرور نفسی اوچون خوار	مریدی ایشیکینده یورسه اول زار
حیا یوق، شرم یوق هرگز الارده	بیتیک لیک هادی لاردین نسخه لارده
کیچه، کوندوزگه کیمنی قوتی یتسه	حرام ایرمیش اوزینی سائل ایتسه
نبی آیدی قیامت بولسه ای دوست	طمع گین نینگ یوزیده بولماغای پوست
بیلا دیسنگ بو سوزنی ایسته مشکوت	طمع بیرله کیچورگان حیف اوقات

شرح: دنیا اوچون مخاصمه و منازعه ایتیبنی آرقه سیده یورگان کیشی نی رفیق و مصاحب بیلماغیل، همصحب و رفیق بولگان کیشی دین معرفت نسیمی و رائجه سیننی ایستاقیل، نه اول کیشی نی سیمینی (کوموشینی) و دنیاسی نی. خصیم مخاصم معنی سیده. نسیم یا قوملیک شمال معنی سیده دور، ایکینچیلی [نه] نفی [سیمین] کوموشین معنی سیده. ای دوست ایاغ بیرله یورا آلمسیدین ایمگا گلاب یوروب ایاغ-قولنی ایت بیرله تیریزی توشوب کیتسه ده هیچ کیمدین توشه و زاد طمع قیلمه. [ایما گلاب] لفظی: ایمگا گلاب نی مخففی، یاش باله نی ایمگا چکلاب تورت ایاغلاب یورگانینی ایتیلور. فارسیده [چار غوک] دیرلار. ای آدمیزاد، سнга حیات دنیویده غرض کُلّی و مقصد اصلی دنیا بولوب هرگز عمر عزیزینگی شونی آرقه سیده برباد قیلمه، زیراکه دنیاگه



کیلماقدین غرض اصلی معرفت الله و آخرت توشه سی اوچون عبادت قیلماق دور، وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ [الذاریات: ۵۶] آیه سی بو سوزگه دلیل دور. دنیا اوچون بیر اهل دنیا خدمتیده قول قاووشتوروب انی آتی جلاویده شاطر بولوب اگرچه بیر قدم گینه یول یورسنگ و یوگورسنگ بو خیلده ذلت بیرله یورماقدین [فنا بولوب] اولگانینگ یخشی دور، بو خواری بیرله بیگان ناز و نعمت دین دوزخ زقومینی ییب و حمیمی نی ایچکانینگ آرتوق دور، لیکن خاص ایرلار و اولیاء الله لار و عالم کامل متقی پرهیزگارلار خدمتی میسر اولوب نیتینگ علم اورگانیش و خداگه تقرب بولسه بو ذاتلارنینگ آتینی جلاوی سнга تیکسه، البته بو سنی سعادتینگ و ایچکی علتلارینگه دوا دور، شونداغ ذاتلارنی درگاهلاریده قیش و یاز بلکه همه وقت عمر عزیزینگنی خدمت بیرله اوتکارسنگ آز ایرور. شولاردیک بی کبر و ریا ایرلارنینگ ایری (مردلارنینگ مردی) ذاتلارنینگ قدم باسقان تفراغی کوزغه توتیا دور. انداغ بندهلارنی ایشیکیده گدا بولسنگ قنداغ دولت دور، و الله نینگ رضاسی شونده دور، [داوی] ثلاثی مجرددین اسم فاعل دور، لیکن کتب لغتده دواء معنی سیده ثلاثی مجرددین فعل ذکر ایتمابدور، بلکه مفاعلة بابی دین: [داوی، یدای، مداواة] نی دواء معنی سیده ذکر ایتیبدور، البته ناظم ^{رحمه الله} بطریق غلط مشهور استعمال ایتمان بولسه لار کیراک. توتیا: سرمه [کحل] معنی سیده دور. اول ذاتلارنینگ بیر گینه دانهلاری بیر خرمن زر (آلتون) اورنیده، و بیر ایچیم سولاری مشک و ایفار و عبر دور. مرید با سعادت حقگه یتماق یولیده و معرفت الله حصولی طریقیده همیشه پیری و یول باشچیسی نینگ حضوریده و درگاهیده بولور، ناظم ^{رحمه الله} بعضی بی عقل طماع پیرلار خصوصیده بو بیتلارنی ایتیبدورلار. نفسی مرادی آرقه سیده خوار و زار مریدی ایشیکیده یورگان پیر قنداغ رسوا دور، طمعگه اورگانیب هرگز الارده شرم و حیا یوقدور، چونکه پیشوا و هادی لاریمیزدین کتابلارنی نسخه لاریده بیتیک لیک دورکه هر کیمنی بیر کیچه-کوندوزگه بیتگودیک قوت لایموتی بولسه اول کیشی بیراولاردین تیلانیب اوزینی سائل و گدالار قطاریغه قوشماغی حرام دور. حضرت پیغمبر علیه السلام بیر حدیثده قیامت کونی طمع گین نی یوزیده پوست بولماغای دیدیلار، بو سوزنی حقیقتینی بیلای دیسنگ «مَشْكُوةُ الْمَصَابِيحِ» نی اختاریب کورگیل. ایسیز عمر عزیز و وقت ذی قیمت که طمع بیرله کیچسه و بو یولده اوتسه. مَنْ سَأَلَ النَّاسَ فِي غَيْرِ فَاقَةٍ نَزَلَتْ بِهِ أَوْ عِيَالٍ لَا يُطِيقُهُمْ، جَاءَ يَوْمَ الْقِيَامَةِ بِوَجْهِ لَيْسَ عَلَيْهِ لَحْمٌ [حدیث ۲۰: تهذیب الآثار للطبری]، [۲۱: مسند عمر بن الخطاب]، [۳۲۵۰: شعب الایمان].

تنبیه: شارح اوز زمانه سیده گی شیخ لاردین شکایت ضمنی ده [سورة عَبَسَ نزولی دین ایلگاری] رسول الله نی بایلارنی سویماق و یخشی کورماقگه نسبت بیریب دور، شارحنی بو سوزی بالکل غلط و بی ادب لیک دور، زیرا که رسول الله قریش بایلاری و اشرافلارینی اسلام گه جلب ایتماق اوچون الار بیرله حسن خلق و سچوک تیل لیک



بیرله معاملہ ایتیپ اسلامگہ دعوت ایتور ایردیلا، رسول الله مقصدلاری (الار اسلامگہ کیلسه باشقه اتباعلاری هم آسان لیک بیرله مسلمان بولوب) دین نی تقویت تاپماغی ایردی، حاشا وکلا که رسول الله هوای نفسانی بیرله فقرالارنی خوار و اغنیاء و اشرافلارنی اعزاز و اکرام ایتکان بولسهلار، بلکه بول خصوصده اول ذاتدین ترک اولی صورتی ظهورگه کیلیب شول سبب دین عَمَسَ وَتَوَلَّى اَنْ جَاءَهُ الْاَعْمٰی [۱: عبس] سورده سی بیرله معاتب بولدیلا، از قبیل حسنات الإبراء سیئات المقرّین.

حکایت ثوبان

عجب مرد ایردی ثوبان اتقیاده اول آتلیغ ایردی بیر کون ایل پیاده
قولیدین بیرگه قمچین توشدی ناگاه توشوب آلدی انی اول کونگول آگاه
یارانلار ایـدی اول پاکیزه حلقه نه بولغای ایردی امر ایتسنگ بو خلقه
دیدى ثوبان: طمع دین بولمغای دیب آلیب بیرگیل دیماغنی کورمادیم ایب

شرح: حضرت ثوبان رضی الله عنه اصحاب کرام دین بولوب عجب بیر یخشی ذات ایردیلا، بیر کون اول کیشی آتلیغ باشقه همراهلاری پیاده یول بارور ایردیلا، ناگاه قمچین قوللاریدین بیرگا توشدی اول ذات دل آگاه اوزلاری بیرگه توشوب قمچیننی آلدیلار، اول خلقی پاک ذاتگه یانلاریده پیاده باریب تورگان رفقالاری بو کیشیلارگه قمچیننی آلیب بیرینگ دیسنگیز نیمه بولور ایردی دیگانلاریده، طمع دین بولماسون دیب آلیب بیرینگ دیماغنی ایب کورمادیم و لایق بیلمادیم، دیدیلار. [حلقه] لفظی حاء مهمله بیرله [خلقگه] نی مخفی بوغوز و حلقوم معنی سیده. اکیچینچیسی [خلقه] خاء معجمه بیرله [خلقگه] نی مخفی مخلوق معنی سیده دور. [ایب] لایق و مناسب معنی سیده دور.

محبت سیز کیشی دین قاحماق بیانیده

کیل ای طالب کوزونگ عبرت بيله آچ محبت سیز کیشی دین قوش بولوب قاچ
محبت اهلـی نی جویانی بولغیل اوشل کیم اوچرادى قربانی بولغیل
کیشی نینگ کونگلی کیم بیگانه بولسه ایرور دشمن اگر هم خانه بولسه



اگر فرزند شیرین دور ایرور یات	محبت سیز که بولدی هر قایو ذات
آتنگ بولسه ایرور بیگانه و غیر	محبت بولمسه هر کیمده ای خیر
قولینگدین کیلسه هیچ اولتورمه باریب	اقارب یورماسه کونگلی اقارب
انگا صرف ایت کوزونگنی یاغی بولسه	اگر بیگانه یی نینگ داغی بولسه
انینگ مهری قیامت توشه سی دور	جگربندینگ یوراکینگ گوشه سی دور
ایچورسه زهرانی بیلماک کیراک شهد	انینگ دیک یار ایله چون ایلادینگ عهد
اگر جان ایستاسه قیترماغیل قاش	تیلایسه بورکنی بیرمک کیراک باش
چیقیب بیر یانه تاپ بریان بغیرلار	اگر بولسون دیسنگ یینگیل آغیرلار
مونینگ دیک جاری بولدی عادت الله	قیلور صحبت اثار ای طالب راه
که اندین اوتسه نیچه کیچه - کوندوز	نه کیم توز کانیه توشسه بولور توز
نکولار جمعیدین ایریلمه زینهار	اگر چندی که ناقابل لیغینگ بار
بولور غرق سیاهی ایتهالانس	اگر چیقسه ایپکنی جمعیدین لاس
قویار مس آتینی خلق اوغلی درهم	اوزین قیلسه قایو مس نقره غه ضم
اگر کوب چشمه بیر بولسه بولور نهر	آلور صحبتده بیر - بیردین کیشی بهر
چاپار کوب توپدین ایریلگان قوشه باز	جماعتدین اوزونگنی قیلمه ممتاز
قایو ایریلسه اول تیشلار آنی	گلّه گه بوری چاپسه ای فلانی
قراقچی توپدین ایریلگان نی سنچر	یوروسنگ یگه دیو باشینگنی ینچر
ایرور رحمتدین ایریلغان شناع	خدانینگ رحمتی بولسه جماعت



بهایم دین زیاده جهلی بولغای

نه اول جمعی که غفلت اهلی بولغای

بوزر کوب صحبتینی بیر بد افعال

الارنینگ صحبتی بیل زهر قتال

برص بر روی و ناخن بولسه هم ننگ

کیراک صحبت ایلی بیر تن و بیر رنگ

ییلان دین بی ضرر بولمس ییل اندین

اگر کیلسه مضر نفرت قیل اندین

شرح: ای طالب راه حقیقت کوزونگنی (بیهوده هر طرفگه تشلا ماسدین) عبرت بیرله آچغیل، محبت سبز بی درد کیشی نی صحبتیدین قوش بولوب (تیزدین) قاچغیل، اهل محبت (دردلیک کیشی لارنی) همیشه آختارغوچی و طلب قیلغوچی و ایزلاغوچی بولوب قیسی بیرلاری که اوچراب یولوقوب قالسه، صحبتینی غنیمت بیلیب انداغ کیشینی قربانی بولغیل، اما هر کیم که (انده آخرت غمی و محبت دردی بولمسدین) دلی بیگانه بولسه، اگرچه بیر اویده اولتورگان همخانه بولسه ده سنگا دشمن ایرور، و بی محبت کیشی اگرچه فرزند شیرین دل بند و یا مهربان (پدر) آتنگ بولسه ده یات، بیگانه و غیر ایرور. [یات] بیگانه معنی سیده [اوز] نی ضدی دور. اقارب [خویش و قرینداش] آخرت یولیده محبت دردی بیرلان کونگلی آقارب یورمسه بیگانه لار کبی دور. علاجی بولسه قولونگدین کیلسه الارنی آلدیغه و صحبتیغه هیچ باریب اولتورماغیل. اولگی اقارب یقین قرینداشلار معنی سیده اقرب جمعی دور، ایکینچیزی ترکی آقارماق دین مأخوذ [سفید شده] معنی سیده دور. اگر بیگانه کیشی نینگ دلیده داغ و سوز و محبتی بولسه کوز یاغی دیک باقدر عزیز نمرسنگنی (اندین دریغ توتمسدین) انگا صرف ایتگیل. کوز یاغی عزیز نمرسه دین کنایه دور. شول کبی (اگرچه نسباً قرینداش بولمسه ده) جگر بندینگ و برادرینگ و جگر گوشه ننگ کبی دور، انداغ ذاتنی مهر و محبتی توشه آخرت و سبب حب الهی دور. وقتی که مونینگ دیک یار و رفیق ایله عهد محبت و مودت باغلا سنگ بو رشته نی استحکامیگه کوشش قیلیب مفت قولدین بیرمسدین انی بعضی جفانما ایشلاریگه صبر قیلماق کیراک دور، بالفرض قتیغ سوزلاب نصائح زهرینی ایچورسه [چون فوائدگه مشتمل دور] انی شهد (عسل) اورنیده بیلماک کیراک دور، اول کیشی دوفی کلاه تیلانسه باش بیرماق کیراک، اگر جان کبی عزیز نمرسه ایسته سه قاش قیتارمسلیک و خلاف ایتمسلیک کیراک. [بورک] بیر قسم اوزیکی دوفی معنی سیده دور. (قاش قیتارمسلیک) خلاف ایتمسلیک دین کنایه دور، گناه و غم و اندوه وزمینلیگی بینگیل لاب دنیا و مافیها قیغوسیدین اوزاققه بولای دیسنگ، بیر چیگه گه چیقیب خوف الهی دین بغری بریان، کوزی گریان لارنی تاپیب، الار بیرله هم صحبت بولوب بهره آغیل. اولگی [بریان] لفظی [بیر یانگه] نی مخفی، بیر چیگه و بیر طرفگه معنی سیده مرکب دور. ایکینچی [بریان] لفظی فارسی اوتده کباب



قیلینگان معنی سیده؛ [بغیر و بغر] کوکراک و دل معنی سیده. بو بیرده [بریان بغیر] دین عشق اوتیده دلی کویگان مراد دور. بو کویماق معنوی دور. ای طالب صحبت اثر قیلور و عادت الله شونداغ جاری دور، هر کیم یخشی لار صحبتیده بولوب الار که اقتدا قیلسه آخر الامر صحبتی انگا تاثیر ایتیپ، یخشی لار قطاریکه کیورور، چنانچه اصحاب کهف ایتلاری الار که ایرگاشیب یورماق سببی له نام نیک آتدوروب قرآنده نیچه جایده نامی ذکر اولدی، و اصحاب کرام رسول الله صحبتلاری اثریدین تاقیامت مسلمانلار که واجب الاحترام دورلار و نام نیک ایلله یادلانورلار، و هم مشاهد دور که توز کانیه و چشمه ساریکه هر ذی روح توشوب اولسه و یا اولوگی توشسه و نیچه کیچه-کوندوز اندین اوتوب توزکانیده قالسه، توزگا ایلانور، بو هم صحبت تاثیریدین بیر نمونه دور. بیر معدنی بولاق سوییده بو قدر تاثیر بولسه که بیر نمرسه نی عینی نی اوزگاریب باشقه شی که ایلانتورسه، اشخاص عالم، متصوف، زاهد، عارف لار صحبتیده نه قدر تاثیر بارلیگینی او ذاتلار صحبتیده کوب و قتلاز بولگان و الار دین استفاده ایتگان لار بیلور. ای طالب اگرچه ناقابل لیغ اثریده یخشی لار صحبتیغه لیاقتینگ بولمسه ده اوزونگی نکولار صحبتیغه قاتیپ الار جمعیتلاریدین زینهار ایریلماغیل، چنانچه اگر لاس ایپک ایچیدین چیقیب ایریلیب قالسه سیاهی دواتکه باتیریلور، شو کبی مبدا سن هم یخشی لار جمعییدین جدا بولوب معصیت لاییهغه باتیب قالماغیل [لاس] ایپکنی درشتی و یمانی دور که سیاهی دواتغه سالورلار. ضرب سکه وقتیده قیسی مسنی که کوموش که قوشولسه و سکه اورولسه اول مس قوشولگن کوموش آتینی مردم درهم و تنگه قویورلار، مس دیمسلار. انسانلار بیر-بیرلاریدین صحبتده بهره آلورلار، چنانچه کوب چشمه [بولاق] لار بیر بولوب قوشولسه نهر جاری بولور و اریغ لار ییغیلسه دریا بولور. کوپچیلیکده خاصیتلار باردور. قیسقه چه سوز شول که صحبتی تاثیر ثابت و محقق دور یخشی لار صحبتی یخشی یولگه باشلایدور و یمانلار قربتی یمان یولگه یوللار. مثله باردور: قزانگه یقین یورسنگ قراسی یوقار، یمانگه یقین یورسنگ بلاسی یوقار. شاعر ایتور:

عن المرء لا تسأل و سل عن قرینه فکل قرین بالمقام یقتدی^۱

یخشی کیشی لار جمعیتی و توپی دین اوزینگنی ممتاز و جدا قیلماغیل، چونکه قرچیغای کوبراق توپدین ایریلگن قوشغه چاپار و انی آلار، شو کبی گلّه قوی که بوری چاپسه قیسی قوی توب دین ایریلسه اول انی

^۱ هذا الشعر من عمر بن محمد البكري اليافي، أبو الوفاء، قطب الدين. هو شاعر، له علم بفقہ الحنفية والحديث والأدب. أصله من دمياط (بمصر) ومولده بيافا، في فلسطين. أقام مدة في غزة، وتوفي بدمشق.

ترجمه: اوشبو شعر محمد البكري اليافي اوغلی عمر، ابو الوفاء، قطب الدين دین دور. او شاعر دور، حنفی فقهی، حدیث و ادب علمی هم ایگه ایدی. اصلی وطنی مصرنینگ دمیاط شهریدین، توغیلگن بیرری فلسطیننینگ بیافا شهریده. بیر مدت غزة ده یشه گن و دمشق ده وفات ایتگن.



تیشلاب هلاک ایتار. (بو نصائح لارنی قولاقگه آلمای) جماعتدین ایریلیب یگه یورسنگ شیطان لعین یولدین آزغوروب باشینگنی ینچیپ هلاک ایتار. قراقچی و اوغری لار هم کاروان توپیدین ایریلگان کیشی نی نیزه بیرله سنچر و اولدوروب مالینی آلا ر وقتی که جماعت خدانی رحمتی بولسه رحمتدین ایریلماق کوب شنیع و قبیح دور. جماعتدین مراد اهل دل، عالم، عامل، عارف، متقی لار توپی دور، نه غافل لار توپی که جهالتده بهایم و چارپالاردین جهل لاری زیاده بولوب آیه: **إِنْ هُمْ إِلَّا كَالْأَنْعَامِ بَلْ هُمْ أَضَلُّ** [۴۴: الفرقان] گویا الارنی حقیده نازل بولگان بولسه الاردیك جهلة و غفله لار صحبتینی زهر قاتل بیلماق کیراک و اندین اجتناب ایتماق لازم دور، و هم بیلماق کیراک که اهل صحبت لار هم طبع، یکدل، یک رنگ، بیر مقصد آرقه سیده بیر تن و بیر بدن بولماق لاری کیراک، اگر صحبتده بیر بدفعیل، یمان [غیر منصرف] نا اهل بولسه مجلسنی بوزار و صحبتنی ساووتار. بیر تیرناغچه پیس لیک مردم اراسیده سبب ننگ و عارلیگی کبی صحبتده بیر نا اهل وجودی مجلسنی ساووتوب انی بی تاثیر بولماغیگه سبب بولور. اگر صحبتینگده بیر نا اهل، مضر کیشی کیلسه اندین نفرت قیلیب هم صحبت بولمه، زیرا که مضر کیشی بیلان کبی دور و بیلاننی بی ضرری بولمس؛ لهذا اوزونگنی اندین بیلگیل و اوزگیل و مصاحب بولماگیل. [بیلان] اولگی سی [حیه، مار] معنی سیده، ایکیچی سی [بیل] یعنی اوز. [اندین] از وی معنی سیده مرکب دور.

حکایت شیطان

باریب کیت ایت فلان فاحشلی بیرگا

دیدى بیر دیو حاسد یانه بیرگا

الار دور بیر-بیریگا رهبر نار

دیدى اول فرقه دین فارغ بول ای یار

ایمس حاجت که کیرسک رگ بیله پوست

بیلیب دور ظاهری دشمن لارین دوست

شرح: بیر شیطان حاسد انسان ینه بیریکه فلان فاحشه خانه گه باریب مکر و فریب ایتیپ، مردمنی یولدین اور، دیدی. جوابیغه ای رفیق اول فرقه دین خاطر جمع بول! الار بیر-بیرلاریگه دوزخ طرفیگه یولباشچی دورلار، الار ظاهری کورونوب تورگان دشمن لارینی دوست بیلیب دورلار. بیزارگه الارنی تامور و تیری لاریگه کیریب وسوسه قیلماقغه حاجت یوقدور، دیدی. بو حکایه دین هم صحبت بدنی یمانلیغی واضح و آچوق بیلندی.



دنیا دین تجرد حقیقہ

کیل ای سالک اوزونگنی یولغہ سالدینگ	اولوغ ہمت عصاسین قولغہ آلدینگ
اگر قالمای دیسنگ کیرگان یولونگدین	تجرد دولتین بیرمه قولونگدین
کیین گہ باقماغودیک بولسہ بندہ	بیتار مقصودیگہ تیز ایـز لاگندہ
اگر باقسنگ کیین بو تاغ و چولده	مبادا قالماغای سن اورتہ یولـدہ
مشقت بولمسہ سونغان بویونده	بہ اندین بولغانی بیرنینگ قویونده
عبادت بندہ نی منظوری بولسہ	بہ اول ایرنینگ اوییدہ حوری بولسہ
ولیکن ایتماسہ شہوت جدالیغ	کونگولغہ توشسہ قصد کدخالیغ
دیانت ایستگودیک نی طلب قیل	اگر تاپیلماسہ کنجیدہ خب قیل
اگر زنگی بچہ دور کوزلاری کور	او کیم مستورہ بولسہ بیل انی حور
اگر چندی کہ بولسہ بندہ زادہ	انی صاحب نسب دین بیل زیادہ
تیلینی اوزونی شرم و حیاسی	یوزی نینگ آقی دور ایرنینگ رضاسی
اوشل خاتون کہ نامحرم نظر دور	اگر شمس و قمر دور، ماچہ خر دور
اگر چندی کہ بزرگ زادہ دور اول	یقین بیل تورت ایاغلیک مادہ دور اول
اوشل خاتون کہ یاشورمس یوزینی	کہ نامحرم گہ کورساتور اوزینی
انی منع ایتمس ایردور بی حمیت	خلاصہ دہ ایرور مونداغ سَویت
بغیرت ایر ایرور راضی قضاغہ	یوبارمس اہلینی توی و عزاغہ
بولور راضی قرا بیرگہ تیقارگہ	قچان راضی بولور اویدین چیقارگہ



شرح: ای سالک وقتی که اوزونگی طریقت یولیغه سالیب و اولوغ همت عصاسینی قولگه آلیب بو اوزون یولگه قدم قویسنگ؛ و کیرگان یولونگدین مقصدگه بیتالمای کیین ده قالمای دیسنگ دنیا و خاتون دین تجرد دولتی نی قولدین بیرماغیل و خاتون آلیب دنیاگه گرفتار اولوب اوزونگی درد و غمگه قویماغیل، زیرا که سالک و مرید طریقت یولیده دنیوی علایق دین مجرد اولوب کیین و آرقه گه باقماغودیک بولسه ایزلاگان مطلوب و مقصودیغه تیز بیتار، اگر علایق دنیوی دین دل اوزالمای بو تاغ و چول کبی قیین یولده متردد اولوب آرقه گه باقسنگ، مبدا مقصدگه بیتالمای اورته یولده قالماسنگ، پیر و مرشد امری گه بویون سونغان سالک و مریده ریاضت و مشقت بولمسه و دنیانی ترک ایتمس دین بهره ور بولوب یورسه (هیچ مقصدگه بیتمایدور) اندین کوره اولوب بیر قوینیگه کیرگانی یخشی راغ دور. بنده سالک نی منظور نظری عبادت خداوندی بولماغی اول کیشی نینگ اوییده حور صفت خاتونی بولماغی دین یخشی راغ دور، ولی ریاضت قیلگان بیرله نفس اولمسه و شهوت سالک دین جدالیغ ایتمسه و کدخدالیغ (خاتونلیک بولماق) قصدی دلغه توشسه دیانت ایستایدیگان دنیا آرقه سیدین یورمایدیگان خانواده دین طلبگارلیک قیلیب اویلانگیل، اگر بو صفتده گی خاتون تاپیلماسه بیر کنج مسجده کیریب خپ عبادت قیلیب یاتگیل، اگر آله دیگان خاتونینگ زنگی بچه (قرا) کوزلاری کور بولسه اما عقیفه و مستوره بولسه، انی جنت حوری اورنیده بیلگیل، اگرچه اول خاتون بنده زاده (کنیزک) چوری بولسه، ولی باعت و دیانت بولسه، انی بی عفت و بی دیانت صاحب نسب و صاحب جمال خاتون دین زیاده بیلگیل و آرتوق کورگیل، زیرا که تیلینی اوزون لیگی اورنیده شرم و حیاسی باردور، یوزی نینگ آقلیغی جاییده ایرنینگ رضاسی دور، یعنی اول مستوره اگرچه صاحب نسب، تیلی اوزون خانواده دین بولمسه ده انی شرم و حیاسی (صاحبۀ نسبی) تیلی اوزونلیگی جایینی آلیب دور و هم قرا یوزلی چوری بولمسه ده ایرنینگ (انی عفت و دیانتی دین) رضاسی یوزینی آقلیغی اورنینه توتوبدور، اول خاتون که یوزی و عورتینی نامحرم لاردین ساقلامس لیک سببی دین نامحرم نظر بولوب نامحرم نظری انگا و انی نظری نامحرم گه توشسه، هر ایکی حالد اگرچه شمس و قمر دیک چیرایلیک بولمسه ده ماچه خر [اورغاچی ایشک] دور. اول خاتون صاحب نسب بزرگ زاده بولمسه ده بی عفت لیک، بی خیالیک سببی دین یقین بیل که تورت ایاغلیک حیوان اورغاچی سی دور اول خاتون که یوزینی یاشورمای و بیکیتمای نامحرم لارگه اوزینی کورساتیب بی پرده یورور، انی بو ایشدین منع ایتماگان ایرکک بی حمیت و بی غیرت دور، و کتاب خلاصه ده مونداغ ایرنی گناه ده خاتون بیرله برابر دیب دور. [سویت] سوئی مؤنشی برابر معنی سیده دور، غیرت و حمیت لیک ایر الله امری و قضاسی و شریعت حکمیگه راضی ایرور (چون بی ضرورت خاتون کوچه-کوبغه چیقماقی نامشروع دور) لهذا اهل بیتینی توی و عزاگه یوبارمایدور، حکمی آستیده گی خاتونلارنی اولسه لار

قرا بیر آستیگه [قبرگه] تیقماقغه راضی بولور، اما (بی موجب شرعی) اوییدین چیقماقلاریگه قچان راضی بولور.

غرض ای بنده لار ناظر بولونگ لار	یمان یول فرقه گه حاضر بولونگ لار
بنی آدمده بـــاردور بیر فریقه	توتارلار اوزلارین اهل طریقّه
الار شرع نبی نینگ دشمنی دور	الارنینگ آتی یعنی روشنی دور
الار اوزلاریگه عارف قویوب آت	اوقورلار عامی لارگه یخشی ایبات
ولیکن ایتیشور بیهوده معنی	اوزینی یولیغه سالماقغه یعنی
الارده بولمغای هیچ یخشی نیت	عیال و اهلیده بولمس حمیت
جمیع جانورلار توشسه کوزگا	حمیت لیک بولور تونغوزدین اوزگا
الارنینگ فعلی دور تونغوزگا اوخشاش	شریعت منکری دور آغزیغه تاش
الارنینگ فعلینی کیم یخشی بیلدی	بولوب کافر یانار اوتغه ییقیلدی

شرح: ایرلارنینگ غیرت و حمیتی باره سیده و خاتونلارنی حجابی و بیگانه لارگه نظر ایتماق و الارگه اوزینی کورساتماق دین منع خصوصیده سوزلاماقدین غرض شولکه باید مسلمانلار هوشیار بولوب، بعضی یمان یولگه یورگن و یولدن اداشگن فرقه لارگه بیلمای ایرگشماقدین اوزلارینی ساقلاسه لار. مثلاً مردم ایچیده [ناظم عصرلاریده] بیر فرقه باردورکه اوزلارینی اهل طریقت و صوفی توتارلار، الار شرع شریفگه دشمن دورلار، الارنی آتی روشنی دور، اوزلاریگه عارف بالله آت قویوب جاهل عامی کیشی لارگه یخشی قولاقغه یاقادیگان بیت و غزللارنی اوقوب اول بیتلارگه (یوللاریگه ترغیب اوچون) اوز ایچلاریدین چیقاریب بیهوده معنی ایتورلار. الارده هیچ یخشی نیت بولمغای، اهل و عیاللاریده حمیت و غیرت تاپیلماغای، کوزگه کورونگان همه جانورلارده حمیت و غیرت بولور، اما تونغوزده حمیت و غیرت بولمس. بو طائفه روشنی لار هم تونغوز کبی بی حمیت دورلار. آغزی لاریگه تاش و تفراغ بولسون، چونکه الار منکر شریعت دورلار، الارنینگ خلاف شرع ایشلارینی هر کیم یخشی دیب بیلسه، کافر بولوب یانار اوتگه ییقیلماقغه سزاوار اولور.

بولوبدور هم تقی بیر فرقه پیدا
بیغارلار پاره بوینی یوغان نی
اگرچه روشنی ایرماس بو اوباش
بیتیب دور بوالحسن اول یخشی بنده
بو آيغان فرقه نی ضال و مضل دور
اینانسون دیب تقی بیر نیچه بی عقل
خدانینگ دوستی بولسه خواجه احمد
شریعتده ایدی اول آفتابی
اوشل سلطان بیتیب دور بلکه انده
انینگ دیک فرقه ملعون خدا دور
بو ایشلار بی شک و ریب ای مسلمان
قایو ایردین که نقل ایتسه اول ایشنی
ولی بولسه اولوغ یولدین تیارمی
انینگ شأنینده یلغان دور بو افعال
ولی بیلمس میز اول آيغان کیشی نی
آلیب بارسه کیشی اهل و عیالین
حرام ایشنی که بیلسه طاعت انسان
برادرلار بیلینگ لار راه حق نی
قیامت کون قوشولسه جان ایله تن

آتی مؤمن ولی نفسیگه شیدا
سالورلار اورته گه قیز و جوانی
ولی بول ایش شریعت حکمیدین تاش
کتاب تنبیه الضالین ایچینده
شریعت اهلی بول ایلدین خجل دور
قیلورلار خواجه احمددین مونی نقل
قیلور مو هیچ مونینگ دیک بدعت بد
قالیب دور بیزگه اول ایردین کتابی
چیقار مونداغ فریق آخر زمانده
الارنینگ فعلی سنت دین جدا دور
اوشل قطب زمان دین ایردی یلغان
اینانمگ زینهار انداغ دیمیشنی
خلاف شرع پیغمبر ایتارمی
اگر چین بولسه ایرمس صاحب حال
قیلیب اوتکان ایکان شیطان ایشینی
کوتارور بی حمیت لیک وبالین
ایرور اول اعتقاد نامسلمان
توتونگ دشمن اوشل ایغان فرقنی
قوپار هر ایر اوزینی دوستی بیرلن



شرح: ینه فرقه پیدا بولوبدور آت لاری مؤمن و مسلمان ولیکن اوزلاری نفس و هوئی لاریگه عاشق و شیدا دورلار، و خواهشات نفسانی آرقه سیدین ایتدیک ایزغیب یورگاندورلار، بیر قنچه بوینی یوغان ییگیتلارنی مجلس لاریگه ییغیب قیز و جوان خاتونلارنی اورته گه سالیب اویناتورلار، اگرچه بو اوباش (فرومایه) لار مسلکده روشنی جماعه سیدین ایرمس لار ولیکن بو قیلگان ایشلاری شریعت حکمیدین تشقاری و انگا خلاف دور. شیخ ابوالحسن خرقانی رحمة الله علیه کتاب «تنبيه الضالین» ایچیده بیتیب دورلارکه شو ذکر ایتیلگن فرقه اوزی گمراه و باشقه لارنی هم یولیدین چیقارور، دیندار، متشرع کیشی لار بو ایل افعالییدین خجالت دورلار مردم سوزیمیزگه اینانسون دیب بیر نیچه بی عقل کیشی لار مونداغ خلاف شرع ایشلارنی سلطان العارفین خواجه احمد یسوی گه نسبت بیریب اول ذات دین نقل ایتورلار، اگر اول ذات خدانی دوستی (ولی الله) بولسه لار، مونداغ یمان بدعت و خلاف شریعتنی هیچ وقت قیلورلارمو؟ البته قیلمس لار، اول جناب شریعت و طریقتده آفتاب کبی همه گه فیض و برکتی بیتگان بیر کیشی ایردی لار، اول ذات دین بیزگه بیر کتاب یادگار قالگان دور [کتاب حکمت لاری مشهور دور] شارح «نجات الذاکرین» آتلیغ کتاب لارینی ذکر ایتیب دور، اول کتابده مونداغ فرقه آخرالزمان ده پیدا بولور دیب دورلار، و هم انداغ فرقه بی خدانی لعنتی گه گرفتار و قیلیمیش افعال لاری سنت رسول الله دین جدا و باشقه دیب ایتیب دورلار، ای مسلمان برادرلار! بو خلاف شرع ایشلارگه اوشل قطب زمان دین نقل ایتیب دورلار، بی شک و شبهه همه سی یلغان دور، و اول ذات دین باشقه قیسی بیر اولیاء الله دین بو ایشلارنی نقل ایتسه لار، هیچ اینانمگ و باور قیلنمگ و بو سوزلارگه قولاق سالمنگ که بالکل یلغان دور، ولی حقیقی اولوغ شریعت یولیدین تایمس و چیقماس و پیغمبریمیز شرع شریف لاریگه خلاف ایتماس، لهذا اول کیشی شائیده بو نقل ایتیلگان خلاف شرع ایشلار یلغان دور [بفرض محال] اگر اول کیشی حقیقه بو سوزلار چین بولسه، ولی و صاحب حال ایرمس، بو خیلده خلاف شرع سوزلارنی ایغان کیشی نی ولی دیب بیلمس میز؛ بلکه شیطان ایشینی قیلیب اوتکان و خلایقنی فریب بیرگان ایکان دیرمیز. هر کیم اهل و عیالین نامحرم لار آلدیگه و ذکر ایتیلگان مجالس لارگه آلیب بارسه و یوبارسه، بی حمیت و بی غیرت و دیوث لیک آتینی و گناهینی کوتارور. هر کیم ایرکک خاتون قوشولوب او یونگه توشماق کبی حرام ایشنی حلال و طاعت و عبادت بیلسه، البته کافر بولور؛ زیرا که حرامنی حلال بیلماق نامسلمان (کافر) لارنی اعتقادی دور؛ و هر کیم حلال قطعنی حرام و حرام قطعنی حلال دیب عقیده قیلسه، کافر بولور. ای برادر لار! حق یولنی بیلیب انی محکم توتوب یوقاریده ذکر ایتیلگن فرقه گمراه لارنی دشمن بیلینگ لار، زیرا که **حُبُّ فِي اللَّهِ وَبُغْضُ فِي اللَّهِ** شوندین عبارت دور؛ و قیامتده همه تیریلیب جان و تن قوشولگنده هر کیم [دنیا ده گی اوز دوستی بیرلان محشور اولار و اینینگ بیرله گوردین قوپار و تورار. **الْمَرْءُ مَعَ مَنْ أَحَبَّ** [حدیث ۶۱۶۸ : بخاری]، [۶۸۸۸ : مسلم]. بو سوزلارگه دلیل دور.



رسول الله الارگه اول کور بولسه، سیزده کوز بار دیدیلار. یعنی سیزلارنی هم نامحرمگه قراماغینگیز ناروا دور. بول واقعه آیت حجاب نزولی دین سونگره واقع بولگاندور. آیه: وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ ۝۳۱: [النور] بو حدیثنی تأیید ایتور، اوشبو حدیثنی امام ترمذی روایت ایتیبدورلار. ازواج مطهرات بیز مونداغلیگینی بیلماب ایدوک، دیب عذر و زاری قیلیب کوزلاریدین گهردیک یاشلارینی توکیدیلار. (ای بنده خاک) پیغمبر علیه السلام خاتونلارینی همه شبهه دین پاکلیکلاریده هیچ بیر شک یوقدور، لیکن رسول الله امتلاری گه تشریع اوچون الارگه عتاب قیلدیلار، آیه: إِنَّمَا يُرِيدُ اللَّهُ لِيُذْهِبَ عَنْكُمُ الرِّجْسَ أَهْلَ الْبَيْتِ وَيُطَهِّرَكُمْ تَطْهِيرًا [۳۳: الاحزاب] بو سوزگه دلیل دور.

توشوبدور ایـرلار احوالِ یمانه	تعجب فتنه لیک دور بو زمانه
بو سوزگه اولمادیم عامل اگر چند	خردمندا ایشیت مندین نیچه پند
ایرور آسان اول ایشدین قلعه آلماق	زمانه خاتونینی یولغه سالماق
اگرچه آلمه دور رخساری آلمه	اوزولماس سالمه نی بوینونگه سالمه
انی خوشلاب قبول ایتمه اوزون درد	دمی عیشی که بولغای آخری سرد
بلا بیرلان بولورسـن مبتلاغه	بلا دیب سالمغیل جانینگ بلاغه
اگر آلسنگ قبول ایتمه وبالین	مسلمان آلی بولسنگ آلمه آلین
نچوک تندور قیلور زن مدعاسین	قویوب تنگری تعالی نی رضاسین
دیمه خاتون، دیگیل دین نینگ کمالی	اگر بار آغانینگنی یخشی حالی
سچوک لفظی بیلان شاد ایتسه ایرنی	خوش اول زن بیلمسه بیهوده دیرنی
اونی چیقمس اونی ایتورغه بیر کون	اگر اون ییل اویدده بولمسـه اون
اگر یوز تیپسه قیترمس یوزینی	بیلور ایر آلدیده دادک اوزینی
توروب اویدین چیقارغه قیلماغای اوی	اگر اویسه کوزین کلفت بیلان شوی



اگر تنگ بولسه ایتور: بولسه بولسون	سرین فاش ایلامس گر غمدین اولسون
انی بیلگیل بو دنیانی بهشتی	اگر زن نینگ مونیگ دیک بولسه خشتی
عنایت گلشنی نینگ بادی دور اول	سرای آخرت نینگ زادی دور اول
نکودور نه کوچه کورسه، نه کویی	قرا دیمه قرا خوش فعل و خویی
بلادور جانینگه ماه سخن شور	غنیمت کور تاپیلسه خلقی خوش کور
دیگیل بو سنده دور بو سنده دور قل	ایلینگا توشسه مونداغ نازنین گل
قیزیل دیب آلمغیل بدخو قیز ایلگا	آقوزور آقلیغین گر کیلسه تیلگا
یماندین اوزگا هیچ کیلمس یماندین	یمان بولسه نعوذ بالله اندین
قولینگ باغلاغوچی ارغمچی سی دور	یمان خاتون شیاطین قمچی سی دور
کوزونگ کورمسگا شوم دیداری کیتسون	دو عالم ناری بولسه ناری کیتسون
اگر اول کیتماسه سن کیت آلیب باش	کوتاریب یورماغیل تاغدین آغیر تاش

شرح: ناظم ^{رحمه الله} اوز زمانه لاریدین شکایت ایتیپ بیر قنچه بیتنی سلک نظمغه تارتیب دورلار، اگر اول ذات بیزنی ۱۴ینچی قرن^۱ آخرنی و انده بولوب تورگان بی سترلیک، بی خیالیک لارنی کورسه لار، نیمه لار دیسه لار ایردی؟! بو زمانه میز عجیب فتنه و فسادلیک زمانه دور، انسانلار یمان احوالگه توشوب ایرلار خاتون مقابلیده قتیغ کونگه قالب دورلار.

اگرچه ایغان سوزومگه عمل قیلگوچی عالم و عامل بولماسمده (ای عاقل) مندین بیر نیچه پند و نصیحت ایشیتیب قولاقغه آلیب انگا عمل قیلغیل، بو زمانه خاتونین راه راستغه سالیب موافق شرع شریف انینگ بیرله گذاره ایتماق دین دشمن بیرله اوروشوب انی قلعه سینی فتح ایتیپ تصرفگه آلماق آسان دور (لهذا تجرد اختیار ایتیپ و کدخدالیکنی ترک ایلاب) اوزولمس ازدواج سالمه سینی و نکاح سیر تماغینی [و آله خورجینی نی] بوینونگه سالیب اوزینگنی اسیر ایتمه، آله دیگان خاتونینگنی یوزی آلمه کبی قیب-قیزیل بولوب

^۱ شارح نینگ مرادی قمری آی حسابی دور؛ میلادی و یا شمسی آی حسابی ایمس.



(نهایت چیرایلیک بولسه ده) انی نکاحینگه آلمه، باشینگی جنجالگه قویمه. اُولگی [سالمه] لفظی اوزون یغاچ باشیگه ارغمچینی سرتماق قیلیب ایننگ بیرله قاققاق آتلارنی توتولادیگان نمرسه گه استعمال اولور. ایکینچی سی سالماقدین نهی دور. ناظم رحمه الله انسان متاهل بولماق بیرله ذمه سیغه توشادورگان مادی و معنوی مسئولیت لار و آسان لیک بیرله عهده سیدین چیقیب بولمایدیگان تعهد و قید و قیودلارنی [اوزولمس سالمنی بوینونگه سالمه] دیب تعبیر ایتیپ دورلار. اُولگی [آلمه] لفظی [تفاح، سیب] معنی سیده و ایکینچسی آلماقدین نهی: مگیر [لاتاخذ] معنی سیده دور، بیر دم [بیر نفس] لیک بی بقا دنیا عیش و عشرتی که [اُولی گرم [ایسیغ] بولسه ده] آخری سرد [ساوغ] لیکغه ایلانادیگان [ازدواج] نی خوشلاب خاتون آلیب [بیر عمرلیک] اوزون دردسرنی و توگانمس غم و المنی قبول ایتمه، خاتون آلمس بلا [فرزند] وجودگه کیلیب چراغیمنی یاندورور دیب اوز جانینگی توگامس بلاغه سالمه! زیراکه فرزندنی ظاهری و باطنی تربیتی یولیده کوب بلالار بیرله مبتلا و تکلیف لارگه قالورسن. اُولگی [بلا] لفظی [باله، فرزند] معنی سیده. ایکینچی و اوچونچسی [بلاء] نی مقصوری غم و تکلیف معنی سیده دور. مسلمان [آلی] فرزند بولسنگ و نفسینگا کوچونگ بیتسه خاتون آلمه و انی [آلین] قولین قولینگ بیرله آلیب ازدواج ایتمه، اگر [نفس گا زورینگ بیتمای] شهوت غلبه قیلیب نکاحینگا آلسنگ ده انی احکام شرعیه گه خلاف قیلگان ایشلارینی [وبال] عذاب و سوء عاقبتینی (امر معروف و نهی منکر قیلمسلیک سببیدین) قبول ایتمه! چونکه قرآن کریم ده، الرَّجَالُ قَوَّامُونَ عَلَى النِّسَاءِ [۳۴ : النساء] و حدیث شریف ده، كُلُّكُمْ رَاعٍ وَكُلُّكُمْ مَسْئُولٌ عَنْ رَعِيَّتِهِ [حدیث ۲۴۰۹ : بخاری]، [۴۸۲۸ : مسلم]، [۲۹۳۰ : ابی داود]، [۱۷۰۵ : الترمذی]، [۴۴۹۵ : مسند احمد] و [۴۴۸۹ : صحیح ابن حبان] وارد بولگان دور، قنداغ کیشی دور که خدا و رسول امرینی ترک ایتیپ و الار رضالارینی بیر طرفگه قویوب خاتون مدعاسینی و ایننگ خواهشاتینی (ولو غیر مشروع بولسه ده) قبول قیلور؟ اگر نکاحینگا آلگان خاتونونگی یوروش و توروش و اخلاق و عادات و ادای فرایض و عبادتده یخشی حالی بولسه انداغ خاتوننی همسر و زن دیمه، بلکه دین نینگ کمالی و اوی نینگ جمالی و سبب رحمت و برکت دیگیل. اُولگی [آل] لفظی اهل، فرزند معنی سیده دور، ایکینچسی [آل] نی اشباع ایتیپ آل ایتیلگان دور، قول، دست، معنی سیده دور. یخشی خاتوننی علایم و خصائل لاری قوی ده ذکر ایتیلگان خلق لاردین عبارت دور:

۱. بیهوده سوز دیماقنی بیلمسه، یمان سوزلاب ایرنی آزرده قیللمسه.

۲. یخشی سوزلاب سچوک تیلی بیرله انی شاد ایتسه.



۳. [بالفرض] اگر اون بیل مدتیده اوییده پیشوروب بیگانی اون [آرد] بولمسه اونی [او خاتونی] بیراولارگه ایتماق و شکایت قیلماق اوچون اونی [آوازی و صداسی] بیرار کون هم چیقلمسه.
۴. اوزینی ایر آلدیده دادک [خدمتگار] بیلیب اگر یوز بار تیپیپ اورسه یوزینی قایتارمسه.
۵. اگر ایری کلفت و مشقت و عذاب بیریب کوزینی اویوب آلیب کور قیلسمده توروب انی اوییدین باشقه جایگه چیقماقغه اوی [فکر و اندیشه] قیلسمه.
۶. اگر غم و اندوه دین اولار حالتگه ییتسمده ایری سِرینی فاش ایلاماسه، اگر کوب تنگ بولسه و سیقیلسمه نیمه بولسه بولسون دیب صبر ایتیپ شکایت قیلسمه.

اگر خاتون نینگ اخلاق و اطوارینی خشتی و اساسی یوقاریده گی دیک بولسه، انداغ خاتوننی بو دنیانی جنتی دیب بیلگیل، اول خاتون آخرت سرایی نینگ توشه سی و عنایت گلشنی نینگ یاقیم لیک شمالی دور. اولگی اون لفظی [عشرة، ده] معنی سیده. ایکینچسی [آرد و دقیق] معنی سیده. اولگی اون لفظی اشارت، ایکینچسی آوازی معنی سیده ویا بالعکس بولسه هم بولور. اویسه لفظی کاولاسه معنی سیده. اوی دین لفظی مرکب: اوی [خانه] دین [از] معنی سیده، آخرده گی اوی لفظی فکر و اندیشه معنی سیده دور.

تنبیه: ناظم رحمه اللهی اون بیل اوییده اون بولمسه آوازی چیقمس و یوز تیپسه یوزینی قیتارمس و کوزینی اویسه اوییدین چیقارغه فکر قیلمس دیگانلاری خاتوننی کمال اطاعتینی نهایت مبالغه بیرله ادا ایتگانلاری دور، ورنه هیچ ایر ولو هر قنچه ظالم بولسه بو ظلم لارنی ارتکاب ایتمس، لیکن ایر و خاتون اراسیده بعضی ناملات لار اوتسه بایدکه خاتون صبر و تحمل قیلیب کانون بخت و سعادتینی اوز قولی بیرله بوزمسلیگی کیراک. چونکه تمام تکالیف حیاتییه و دفاعیه و وطنیه ایر اوستیده بولوب و حکومت باج و خراجی گه متحمل لیگی سببیدین ایرنینگ حقوقی شریعت محمدیه ده خاتون دین زیاده راغ دور، آیه: **الرِّجَالُ قَوَّامُونَ عَلَى النِّسَاءِ بِمَا فَضَّلَ اللَّهُ بَعْضَهُمْ عَلَى بَعْضٍ وَبِمَا أَنْفَقُوا مِنْ أَمْوَالِهِمْ** [۴: النساء] و آیه: **وَلِلرِّجَالِ عَلَيْهِنَّ دَرَجَةٌ** [۲۲۸: البقرة] و آیه: **يُوصِيكُمُ اللَّهُ فِي أَوْلَادِكُمْ لِلذَّكَرِ مِثْلُ حَظِّ الْأُنثِيَيْنِ** [۱۱: النساء] و آیه: **فَإِنْ لَّمْ يَكُنَا رَجُلَيْنِ فَرَجُلٌ وَامْرَأَتَانِ** [۲۸۲: البقرة] و حدیث، **لو كنت آمرأ أحدًا أن يسجد لأحد لأمرت المرأة أن تسجد لزوجها** [حدیث ۱۱۵۹: ترمذی] ایرنی خاتون دین مرتبه سی و حقوقی بلندلیگیگه دلالت قیلور و هم اول دین آخرکجه پیغمبرلیک منصبی و خلافت مرتبه سی ایرکک لارگه خاص بولگان لیگی و پادشاه لیک و رئیس جمهور لیک و وزیر لیک مرتبه لاری اسلام ده ایرکک گه خاص. اما باشقه طائفه لارده اغلب ایرکک لارده بولماغی و عسکرلیکغه اوخشش قتیغ وظیفه لار ایرکک لارگه خاص لیگی و هم خاتونلار گواهلگی ایکی خاتون بیر ایرکک اورنیده محسوب اولوشی



ایرکک لارنی عقل و فکر و قوتده خاتونلارگه برتر و یوقاریللیگی نی و خاتونلارنی ناقصات العقول لیگینی اثبات ایتور، چنانچه حدیثده ثابت دور، لهذا ایتیپ بیلامیزکه، خاتونلار حقوقده هیچ وقت ایرکک بیرله برابر اولوب بیلمس لار.

(انداغ اخلاق حسنه گه ایگه خاتوننی) رنگی قرا دیب عیلامه، بلکه انی فعل و خوبی گه قراغیل و نظر قیل، چونکه او بیده اولتوروب هیچ کوچه و کوپگه چیقمسه و تشقاری نی کورمه قنداغ یخشی دور. اولگی قرا لفظی سیاه معنی سیده، ایکینچسی قراماقدین امر دور [أَنْظُرْ] معنی سیده. [نکو دور] لفظی یخشی دور معنی سیده، کویی لفظی محله معنی سیده دور. صاحبۀ اخلاق نیک کوزی کور [اعمی] خاتون تاپیلسه انی غنیمت کوروب شکر قیلغیل. یوزی آی کبی چیرایللیک سوزی اچغ خاتون جانینگه بلادور یا سوز کا ولایدیگان خاتون جانینگه بلادور. اولگی [کور] لفظی کورماقدین امر [بین] و [أَنْظُرْ] معنی سیده دور. ایکینچسی [اعمی] نابینا معنی سیده [سخن شور] سوزی تلخ و یا سوز کا ولایدیگان معنی سیده دور. موداغ خوش خلق نازنین گل [ولو نابینا و عادم زیبایی ظاهری] قولونگه توشوب ازدواجیگه موفق بولسنگ انگا آیتگیل تاکه بو [اخلاق حسنه] سنده بار و موجود دور، بو قل بو سنده دور (بیر اوپوب خدمتگه حاضر دور) ویا یوزلارینگدین اوپوب اظهار رضائیت قیلغوچی و شکر ایتگوچی دور. یوزی قیزیل آلمه دیک و بدنی آق دیب بدخوی بداخلاق قیزنی قولونگه [نکاحینگه] آماغیل، زیراکه [یوزینی قیزیللیگی] و بدنینی آق لیگینی تیلگه کیلیب یمان سوزلاب کونگلونگنی مجروح ایتیپ آقوزوب یوبارار، و یمانلیک لاری سوی یخشی لیک لارینی یوب محو ایتار. اولگی [بو سنده] لفظی مرکب [بو] اشارت [سنده] [در تو]، [فیک] معنی سیده، ایکینچسی فارسی اوپادیگان معنی سیده دور. [قیزیل] لفظی [احمر] سرخ معنی سیده، ایکینچسی [قیز] دختر و [ایل] قول معنی سیده مرکب دور. اگر خاتون یمان بولسه شریعت حکمینی مراعات ایتماسه انداغ خاتون شریدین خدادین پناه تیلایمیز، زیراکه یمان بداخلاق کیشی دین یمان لیک و گناه کارلیک دین باشقه نمرسه وجودگه کیلمس و یوزه گه چیقمس، یمان بی حیا بداخلاق خاتون شیطان لارنی گناه طرفیگه اوروب هیداب آلیب بارادیگان قمچیسی و مردمی ایلینتیرادیگان توزاغی دور و قولونگنی باغلاب تسلیم شهوات و اسیر لذات ایتگوچی ارغمچیسی دور، حدیث: النساء حباله الشیطان. رواه الخرائطی والتیمی عن زید بن خالد الجهنی و ابو نعیم و ابن لال والدیلمی. یعنی خاتون کیشی شیطاننی توزاغی دور، بو سوزگه دلیل دور. اگر خاتون [بدخلق لیک، بی حیا و بی عفت لیک، و تیلی اچغ لیگی بیرلان] ایگی دنیا ناری [اوتی، دوزخی] بولسه فی الفور وقت اوتمسدین انی طلاق ایتیپ جوابینی بیرگیل، سنی حضورینگدین ناری راغ و اوزاغ راغ کیتسون، کوزونگ کورمسلیگی اوچون طلعت بد و



شوم دیداری کیتسون، اگر طلاق بیرگان بیرله اول کیتماسه، سن ترک وطن قیلیب باشینگنی آلیب بیر طرفگه چیقیب کیتگیل، انی نکاحینگده ساقلاب یورماق بیرله تاغدین آغیر تاشنی کوتاریب یورماغیل، اولگی [ناری] لفظی عربی [اوتی، آتشی] معنی سیده، ایکینچسی ترکی [اوزاق، بعید] معنی سیده دور.

حکایت

نکو ذاتیغه ایدی بیر نکو خوی ایرور سن بوالعجب منقادۀ شوی
 دیدی قصدیم منی تنگرم رضاسی بیتار بول اورته ده ایر مدعاسی
 ایکی طاعت میسر دور بیر ایشده نچوک سونمای بویون امر ایلامیشده

شرح: بیر یخشی خاتونگه بیر خوش خلق خاتون عجب ایرینگا مطیعه و بویون ایکگان سن، دیدی. جوابیغه منی مقصدیم بو ایشدین تنگرم (الله) رضاسی دور. بول اورته ده ایرنینگ مدعا و مطلوبی اوزی دین اوزی حاصل اولار و بیتار، بیر ایشده ایکی طاعت (ایکی ثواب) میسر بولسه قنداغ و نچوک ایریم و یا تنگرم امر ایلامیش و بیورمیش ایشگا بویون سونمای، دیدی.

رسول الله که متابعت بیانیده

کیل ای صوفی امید ایتسنگ صفادین قریش چیقمه طریق مصطفی دین
 عمل قیل اتکا قیلمای عمل گه توکل ایلاگیل عزّ و جل گه
 عمل قیلمای صفا بولمس کونگولده ایاغ سیز هیچ کیشی یورمادی یولده
 قچان قول سیز کیشی بولغای شناور شناور من دیسه هیچ قیلمه باور
 سالیب دور اهل سنت راه عامۀ بو یولدین چیقماغیل اوزگا مقامه
 دیمه توتدوم فلان بزرگ ایشینی کوره قویمه نبی نی قیلمیشی نی



رسول الله نینگ خاص امتی دور

اوشل بزرگ که صاحب همتی دور

اگر چندی که بولسه کوز بیلہ قاش

پیمبر قیلغانیدین قیلماغای تاش

ایمس طاعت قباحث دور قباحث

شریعت حکمی دین تشقی ریاضت

شرح: ای صوفی صفای وقت و حضور قلب دین امید ایتسنگ، حضرت محمد صلی الله علیه وسلم یوللاریدین بیر قریشچه (آزگینه) هم تشقاری چیقمه و قیلگان عملینگ که تکیه قیلیب سویانمای و انگا اعتماد ایتمای (خاص الله عز و جل فضلیگه تکیه قیلیب) عمل قیل، اعمال صالحه قیلمسدین انسان دلیده صفا و روشن لیک بولمس، چنانچه بی ایاغ هیچ کیشی یولده یوروب بیلمس و قولی یوق کیشی قچن سو اوستیده سوزوب بیلغای (قولی یوق کیشی) من سوزوب بیلان دیسه انی هیچ باور قیلمه و انی سوزی که ایشانمه (پیشوا و مقتدی و اماملاریمیزکه) اهل سنت و جماعت آتی بیرله تانیلیب دورلار، بیزلارنی شریعتنی کتّه یول و شاهراهی که سالیب یوللاب قویگان دورلار و ضروری عقائد و فقه کتابلارینی یازیب راه راستنی بیزلارگه کورساتیب قویگان دورلار، بو توغری کتّه یولیدین چیقیب باشقه ایگری یولغه باریب یولیدین اداشیب همیشه رسول الله که اتباع و پیرولیک قیلیب سنتلارینی ترک ایتمه، فلان بزرگ یولینی توتدوم و انگا پیرولیک قیلدیم دیب پیغمبر یولینی و سنتنی ترک ایتمه، اوشل اولوغ کیشی صاحب همت و عزم و رسول اللهنی خاص امتلاری و قرب و منزلتده کوز و قاشلاری کبی بولسه هیچ وقت پیغمبر علیه السلامنی قیلگان و بیورگان ایشلاریدین تشقاری بدعتنی قیلماغای و ارتکاب ایتماغای، زیراکه شریعت حکمیدین تشقاری ریاضتلار (صوم وصال و ترک حیواناتگه اوخشش ایشلار) طاعت و عبادت ایمس، بلکه قباحث اوستیگه قباحث دور.

تنبیهان [ایگی تنبیه]

اول: قرآن کریم و احادیث نبویهده مؤمنلارنی عمل صالحگه ترغیب و یمان ایشلاردین ترهیب وارد بولگان دور، اکثری آیاتده ایمان بیر عمل صالحنی توأم ذکر ایتیلگان دور، مثلاً: الَّذِينَ آمَنُوا وَعَمِلُوا الصَّالِحَاتِ [۳۰: الجاثیة]، قَدْ أَفْلَحَ الْمُؤْمِنُونَ [۱] الَّذِينَ هُمْ فِي صَلَاتِهِمْ خَاشِعُونَ [۲] وَالَّذِينَ هُمْ عَنِ اللَّغْوِ مُعْرِضُونَ [۳] وَالَّذِينَ هُمْ لِلزَّكَاةِ فَاعِلُونَ [۴: المومنون] و شونگه اوخشش آیتلار قرآن کریمنی کوب جاییده کیلگان دور. و حدیثده: اعْمَلُوا فِكْلٌ مُسَرَّرٌ لِمَا خُلِقَ لَهُ [حدیث ۴۹۴۹: بخاری]، [۶۹۰۳: مسلم]، [۲۱۳۶: ترمذی]، [۱۳۴۸: مسند احمد]، [۲۸: مسند البزار] و



[۸۸۱ : مسند الطیالسی] و شونگه اوخشش حدیثلار کوبدور، لهذا سرنوشت ازلی گه تکیه قیلیب عمل قیلمای اولتورماق کمال جهالتدین دور. چونکه تمام انبیاء و اولیالار اولگونچه عملگه ادامه بیریب فرائض و واجبات و سنننی جاییده ادا ایتگان دورلار.

ثانی: بعضی احادیثده رسول اللهنی بیر نیچه اصحابلاری رسول اللهنینگ کیچهلاری قیلادیگان اعماللاریدین سوراب اوز دللاریده اول عملنی آز کوروب باز هم اوزلاری خداوند رسول اللهنی همه گناهلارینی مغفرت ایتکاندور، بیز اول ذاتگه قچان بیتوشه بیلورمیز دیب، هر قیسیلاری بیر نمرسهنی نذر ایتدیلار، بیرلاری هرگز خاتونگه یقینلامای من، ینه باشقهلاری همه وقت روزه توتورمن، و ینه بیرلاری کیچهلاری اوخلامسیدین عبادت قیلورمن دیگانلاری سمع مبارکغه بیتکانه، من بیر کون روزه توتهمن، بیر کون توتمایمن، کیچهسی عبادت قیلمهمن و هم اوخلایمن و خاتون آلورمن دیگانلاری مروی دور^۱.

شوندین معلوم بولدی که، شریعتده یوق ریاضتلار: عمری روزه توتماغلیک و صوم وصال (سورونکه اورتهده افطار قیلمسیدین روزه توتوش) و ترک حیوانات (جانلیک نمرسهدین حاصل اولگن نمرسهدین پرهیز ایتیپ بیمسلیک) و شو کبی بدعتلار طاعت و عبادت مشروعه دین ایمس، بلکه بدعت شنیعه قطاریده دور.

عمل قیلماق اوچون کیرسنگ بو یولده کیراکدور شمع علم البتّه قولده

قرانغوده قدم قویسنگ یازارسن اگر کوز بولمسه یولدین آزارسن

ایرور چونکه عجائب پر خطر راه قدم قویسنگ ایاغ آستیده دور چاه

توزوک یول دیب قدم اوترو سالورسن قدوقغه توشکانینگ بیلماق قالورسن

کوزونگ گر بولمسه ای عقلی هوشیار عصا کش سیز قدم هیچ قویمه زینهار

اگر عالم سوزین خوب بیلسه عامل انی عامی دیمه ای مرد کامل

^۱ أنس بن مالك ، رضي الله عنه ، يقول جاء ثلاثة رهط إلى بيوت أزواج النبي صلى الله عليه وسلم يسألون عن عبادة النبي صلى الله عليه وسلم فلما أخبروا كأنهم تقالوها فقالوا وأين نحن من النبي صلى الله عليه وسلم قد غفر له ما تقدم من ذنبه وما تأخر قال أحدهم أما أنا فإني أصلي الليل أبدا وقال آخر أنا أصوم الدهر ، ولا أفطر وقال آخر أنا أعتزل النساء فلا أتزوج أبدا فجاء رسول الله صلى الله عليه وسلم فقال : أنتم الذين قلتم كذا وكذا أما والله إني لأخشاكم لله وأتقاكم له لكني أصوم وأفطر وأصلي وأرقد وأتزوج النساء فمن رغب عن سنتي فليس مني. [حديث ۵۰۶۳ : صحيح بخاری] و [۳۱۷ : صحيح ابن حبان].



قولا قغه آلماغای عالم سوزینی

او دور جاهل بیلیم مرشد اوزینی

تامورسیز شاخه سو بیرماک نه فائد

دیانت بیخی دور علم عقائد

لباسی بولدی تقوی، میوه سی حال

بو محکم توب شجر نینگ شاخی اعمال

چیقارور هادی علمی رهنما دور

عجب اصلی که فرعی فی السماء دور

تایب کیتسنگ سنی حولینگا وای

بدون علم اگر قویسنگ انگای

چیقیب شاید ییگای سن میوه حال

ایلینگا دامن هادی علم آل

اوزاتور ایلگین اثممار سماغه

عجب دور بیرده گی تورگان عمی غه

شرح: تصوف و طریقت یولیکه عمل قیلماق اوچون کیرماقچی بولسنگ البتّه علم شمعی و چراغی قولینکده بولماغی ضروری دور، چونکه بو یولغه بی نور علم قرانغوده قدم قویسنگ یازارسن، اگر علم کوزی بولمسه و شریعت شاهراهیده یورماسنگ یولدین آزیب اداشارسن، زیراکه طریقت یولی عجایب سیرخط یولدور، قدم قویسنگ ایاغ آستیده هر بیر قدمده چوقورلار باردور، قولینکده علم چراغی بولمسه توزوک یول دیب توغریکه قدم قویوب چوقورکه توشگانینگنی بیلماق قالورسن. ای عاقل هوشیار، اگر علم کوزی سنده بولماق جاهل و عامی بولسنگ بی عصاکش (بی هادی و بی مرشد و بی پیر کامل) زینهار هیچ بیر قدم بو یولغه قویمه. اگر عامی عامل، عالم سوزینی ایشیتیب یخشی قولا قغه آلیب توشونوب بیلسه، انی عامی دیمه، بلکه عامی و جاهل اول کیشی دورکه اوزینی مرشد و پیر بیلیم عالم سوزینی قولا قغه آلماغای و جهالتکه غرق یورگای. اسلام دینیده علم عقائد دیانتنی بیخی و اساسی و ایلدیزی دور، هر مسلم اول عقیده سینی درست قیلماق فرض دور، اندین سونگره عمل دور. بی ایلدیز شاخه که سو بیریب تربیه قیلگاننی فائده سی یوقلیغی کبی اعتقادنی اهل سنت و جماعت عقیده لاریکه بناءً درست قیلماق توروب قیلگان عمل صالحنی فائده سی یوقدور، بو توبی و تاموری محکم ایمان درختی نینگ شاخی عمل صالح دور؛ و پوستی که [انی لباسی کبی دور] تقوی و پرهیزگاریک دور؛ و انینگ میوه و ثمره سی حال دور، ناظم رحمه الله بو قوییده گی بیت بیرلان آیه: **أَلَمْ تَرَ كَيْفَ ضَرَبَ اللَّهُ مَثَلًا كَلِمَةً طَيِّبَةً كَشَجَرَةٍ طَيِّبَةٍ أَصْلُهَا ثَابِتٌ وَفَرْعُهَا فِي السَّمَاءِ** [۲۴: ابراهیم] که اشاره قیلیب دورلار. (کلمه طیبه) که اساس ایمان و اعتقاد دور مانند درخت طیبه دورکه اصلی و تاموری بیرده ثابت و محکم و شاخلاری آسمانده [کوب بلند] دور، اول درخت اوستیگا انی میوه سیدین بیماق و استفاده آلماق اوچون هادی (راهبر) چیقارور، اول راهبرنی



علمی رهنمائی دور، اگر (بی راهبری هادی عالم) اوز-اوزبنگچه بدون علم اول درخت اوستیگه چیقهمن دیب ایاغ قویسنگ و تاییب کیتیپ بیقیلسنگ وای سنی احوالینگا. بایدکه قولونگا علم هادی سینی دامن (ایتاگی)نی آلیب اول درختگه چیقغیل، شایدکه انگا چیقیب حال میوه سیدین ییب مقصودگا ییتگای سن. اساس ایمان بولگان علوم عقاید و علوم فقهیه دین بی خبر جهالت ییریده تورگان کورغه عجبکه، آسمان میوه لاریگه قول اوزاتور. انسان اول تاکه علوم شریعتنی بیلمسه طریقت یولیگه کیریپ بیلمس و اندین بهره ور بولمس، شریعت و طریقت بیر-بیریدین جدا ایمس.

میسردور منگا حالت سروری

ضعیفی ایتسه بی فقه ضروری

نچوک تفسیرینی بیلگای اول انسان

اوقوی بیلماسه ظاهر لفظ قرآن

نچوک قالدی کورونمای قشر ظاهر

اگر مغزین آلیب دور مرد طاهر

ملذذ دور انینگ هم مغزی هم پوست

ایرور دین علمی چون زرد آلو ای دوست

ولی بولغایمو قیلغان ترک فرضی

برادرلار بو دور بو قُلنی عرضی

یمان دور طرفه نادان لیکنی شینی

ایرور فقه ضروری فرض عینی

نچوک بولغای ولی تینگلا عرائض

بو ترک اوزره بولور ترک فرائض

بولور اول اکبر آثامه عائد

اگر اول بیلماسه علم عقائد

ولی بیلمه اگر کورسنگ کشوفات

انینگ دیک تیلبه کس دین ای نکو ذات

ولی بیلمس انی مرد سخن رس

یوموب کوز اویقوده کورگان بیله کس

دیگیل آت دین توشوب بولدی پیاده

بو کورمکدین اوزین کورسه زیاده

توشار سرکش لی قُلنی بویینیگه غُل

برونگی حالی دین قیلدی تنزل

بولور کورگان سری قوقونچی بسیار

نه یخشی یار اوزین کورسه گنهکار

کورونمس ذره چه عارف وجودی

اگرچه بولسه کوب پنهان سجودی



رضای حق انینگ مقصودی بولسه

حیا و علم و حلم و جودی بولسه

ریادین بولمسه کونگلیده بیر خس

انینگ اخلاصی قل لوق بولسه و بس

قولین تابشورسه هادی رضاغه

جمیع ایشلارین سالسسه خداغه

شرح: بیر علمده ضعیف جاهل کیشی ضروریات دینیهدین بولگن علم فقهنی بیلماسمده (علم قالنی اوقوماگان بولسمده) علم حال سروری منگا میسر و حاصل دیسه انگا ایشانمه و باور قیلمه، چونکه لفظ ظاهر قرآن کریمنی اوقوب بیلمسه انی تفسیر و تأویلینی نچوک بیلگای، اگر اول مرد پاک طینت قرآننی باطنی و مغزینی آلگان بولسه انینگ معنی ظاهری نچوک انگا کورونمای و بیلینمای قالدی؟ زیراکه علوم دینییه زردآلو [اوروک] غه اوخشش انینگ هم مغزی [باطنی] و هم پوستی [ظاهری] ملذذ و خوش طعم دور، قرآن کریمنی تاکه معنی ظاهری سینی بیلمسه معنی باطنی سینی بیلمس. ناظم ^{رحمه الله} یوقاریدهگی اییاتلار بیرله بعضی عوام صوفی نما جاهل پیرلارنی سوزلاریگه اشاره قیلیبدورلار. الار بیز قرآننی ظاهری بیرله ایشیمیز یوق، باطنیگه عمل قیلورمیز:

ما برون را ننگریم و قال را

ما درون را بنگریم و حال را

و شونگه اوخشش خلاف شریعت سوزلار، الاردین ظاهر بولور و جاهل مریدلاری هم الارنی خلاف شریعت قیلگان ایشلارینی و ایتکان سوزلارینی بی استثنا قبول ایتورلار [نعوذ بالله من ذالک]. باز ناظم ^{رحمه الله} سوزلاریگه دوام بیریب دیرلارکه بو قلنی عرضی سیزلارگه شولکه فرض عین بولگن علومنی اوقومسیدین ترک فرض قیلیب یورگان جاهل کیشی ولی بولورمی؟ علم عقائدین سونگره ضروری علم فقه هم فرض عین و انی بیلماق لازم دور، و نادانلیک و جهالتنی شینی (خنک) لیگی و یرامس لیگی طرفه (شگفت آور) یمان دور. بو فرض عین بولگن علوم دینییه و ضروریه نی ترک قیلماقگه علاوه جهالت سببی دین کوب ترک فرضلار وجودگه کیلور، مونداغ جاهل تارک فرض قنداغ ولی بولور، منی عرضیمنی خوب قولاق سالیب تینگلایل و دقت ایتکیل، اگر مرشدنما کیشی علم عقائدنی بیلمسه چونکه عقائد ضروریه نی بیلماق فرض عین دور، بو بیلمس لیگی کوب کتّه گناهلارگه باعث و عائد اولور، انینگ دیک فرض عیننی ترک ایتگان تیلبه (دیوانه) کیشی دین اگر کشفات و کرامات کبی ایشلارنی کورسنگده، انگا اعتقاد ایتمه و انی ولی الله بیلمه البتّه استدراج دور. (تیلبه) مجنون و دیوانه معنی سیده دور. وهم اول جاهل کوز یوموب اویقوده هر خیل کشفات و کراماتگه اوخشش توشلارنی کورگان بیله (سوزگه بیتو کیشی) مرد سخن رس انی ولی دیب بیلمس، اگر بو خیلده



استدراج‌نما کشفات‌نی کورماق بیرله اوزینی باشقه‌لاردین زیاده و مقامینی بلند کورسه، انداغ کیشینی آت‌دین توشوب پیاده بولدی و اولگی حالیدین تنزل قیلدی و مقامی پست بولدی دیگیل، البته سرکش و نافرمان قُلمی بونی‌غه [غُلّ] بوغاو توشار، هر وقت اوزینی گنه‌کار کوروب کشفات و کرامات کیی نمرسه‌لارنی کورگان سری‌الله‌دین قورقونچی [خوفی] زیاده بولگان کیشی قنداغ یخشی کیشی‌دور. ناظم رحمه الله یوقاریده‌گی ابیات‌لارده پیر جاهل‌لار خصوصیده تکرار تاکید ایتیپ انداغ علوم دینیّه و فرض عین‌دین بیخبر جاهل پیرلارنی اگرچه الاردین بعضی کشف‌نما ایشلار کورونسه‌ده الارنی ولی بیلمس‌لیک کیراک دیب تاکید ایتماق‌لاریگه باعث اول کیشی‌نی زمان‌لاریده و بو زمانه‌لارده‌گی ابا عن جد مرشد‌لیک‌نی میراث قیلیب آلیب اگرچه اوزی جاهل و عامی بولسه‌ده آتّه-باباسیدین قالگن مریدلارنی زرخرید قُلمی دیک بیلیب هر بیل الار اوستیگه مرید اولاب باریب جبراً و کره‌ا الاردین پول و مال جمعلاب یورگن پیرنمالار و جاهل ایشان‌لاردین خلق‌نی آگاه ایتماق و باخبر قیلماق بولسه کیراک، چونکه ایکی رکعت نمازنی فرائض و واجبات و سنن‌نی بیلیب علی وجه السنه ادا ایتالماگن کیشی و ذات و صفات خداوندی‌دین بی‌خبر جاهل قنداغ مرشد بولوب مردم‌نی هدایت قیلور، مرشد کامل و عارف قوییده‌گی صفت‌لارگه متصف بولماقی کیراک:

۱. اگر انی پنهانی نماز و روزه و باشقه اعمالی کوب بولسه‌ده انی وجودی ذرّه‌چه کورونماسه.
۲. حیا و علم و حلم و جود و کرم بیرله متصف بولسه.
۳. تمام اعمالیده رضای حق‌تعالی انینگ مقصودی بولوب و خداغه مخلص و خالص قُل‌لیک و بنده‌لیک مطلوب بولوب بیر خس‌چه عجب و ریا انی کونگیلیده بولسه.
۴. همیشه دینی و دنیوی مهمات و ایشلارینی خاص خداغه سالیب الله طرفیدین نیمه‌که باشیغه کیلسه راضی بولسه، شو اوصاف‌لار کیلمده موجود بولسه انی عارف کامل دیسه بولور.

امید اولدورکه جنت بولسه قصری	امام اهل سنّت شیخ بصری
ولیکن تنده ایردی کشف و دیدی	انینگ بار ایردی بیر عامی مریدی
اوزی تاپدی انی اول شیخ الاسلام	مریدی کیلمادی بیر نیچه ایام
منگا اسرارینگ آغیل ای نکو حال	دیدی قیلماق اوچون اول عامینی آل
ییتارمن لحظه‌ده ایوان عرشی	دیدی هرگه که خفتن کیلسه قرشی



ملائکدین بولوب عرش ایچره ممتاز	خدا بیرلان اوزون شب ایتنه من راز
دیدى بارسنگ اوشل منزلگه چون باد	بو مسکین آتینی هم ایلاگیل یاد
ینه کیچه که اول منزل گه بیتدی	حسن آتین تیلیگه جاری ایتدی
بوزولغان کوردی عرش دلکشایین	نجاست خانه یی ده کوردی جایین
یقین بیلدی مونى شیطان قلیب کید	قیلور ایرکان انی هر کیچه سی صید
انابت قیلدی باریب قیته باشدین	میسر قیلدی علم آتلیغ قویاشدین
بوزار باطل نی توز عالم نی آتی	فکیف اول بیرده حاضر بولسه ذاتی
اریغ علم و عمل دور رهبر حال	بو ایگی بال ایله اوچقان ایچار بال
اگر بولماسه علمینگ ای سبک سیر	بیلور بالینگ و بالینگ برچه سی خیر
اگر بیلسنگ نکو افعال بددین	نعوذ بالله انداغ معتق—ددین

شرح: حضرت شیخ حسن بصری رحمة الله علیه که امام و پیشوای اهل سنت و جماعت و تابعی دورلار، و الله فضلیدین امید شول که جنت او یلاری اول کیشی نی قصر و منزل لاری بولگان بولسه کیراک، اول ذاتی بیر عامی مریدلاری بار ایردی، انی وجودیده بعضی کشف و کراماتگه اوخشش نمرسه لار بارلیگی معلوم بولور ایردی، اول مرید بیر نیچه کون شیخ حضورلاریگه کیلمادی، اول شیخ الاسلام انی آختاریب تاپیب اول عامی نی ایل قیلماق اوچون ملائم سوز بیلان ای یخشی حال صاحبی (نه اوچون نیچه کوندین بیر کیلماگانینگنی) اسرارینی ایغیل دیدیلار، اول مرید جواباً ایدی، هر قچن نماز خفتن وقتی بولسه و منگه قرشی (رو-برو) کیلسه بیر لحظه ده عرش ایوانیگه بیتیب فرشته لاردین ممتاز اولوب خاص عرش ایچیده جای آلیب اوزون کیچه لارده خدا بیرلان راز و نیاز ایتورمن، بو سوزنی ایشیتگاچ امام انگا ینه اول منزلگه شمال کبی تیزلیک بیرله بارسنگ من کبی مسکین بیچاره آتینی یاد ایلاگیل دیدی لار، ایرته کیچه سی مرید اول جایگه بیتکانده حسن بصری رحمة الله آتارینی تیلیگه جاری قیلدی، اوشل آن عرش دلکشاسینی بوزولغان و تورگان جایینی نجاست خانه ده کوردی و یقین بیلدی که انی شیطان آلداب هر کیچه شکار قیلور ایرکان اول مرید جناب شیخ آلدیلاریغه باریب قیته باشدین انابت و توبه ایتیب اول ذات حضورلاریده اوقوب علم آتلیغ نمرسه نی حاصل قیلدی که، یاروغلیک و ضیاده آفتاب



کبی ایردی. (ای برادرلار) یخشی عالم، عامل و متقینی آتی باطل ایواننی بوزار بولسه، اگر اول بیرده اول عالم‌نی ذاتی و اوزی حاضر بولسه قنداغ بولسه کیراک، علم و عمل پاک و خالص و بی‌شائبه حال طرفی‌گه رهبر ایرور، بو ایکی بال [قنات] علم و عمل بیرله اوچقان کیشی بال [عسل] خالدین ایچار، اولگی بال [قنات] پر معنی سیده، ایکی‌نچیزی عسل [شهد] معنی سیده‌دور. ای سبک‌سیر [ای بی‌تمکین] اگر علمینگ بولمسه و بو یولگه بی‌علم قدم قویسنگ بالینگ [دلینگ] و بالینگه [سوء عاقبتینگه] باعث نمرسه‌لارنی همه‌سینی یخشی دیب بیلور و یخشی-یمان‌نی تنها علم بیرله امتیاز ایتسه بولور، اگر شریعتده ممنوع، یمان ایشلارنی بعض بیرینی یخشی دیب و حرام‌نی حلال دیسه بول کوب یمان و قریب کفر دور، مونداغ یمان اعتقاددین خدادین پناه سورایمیز.

بو حکایت‌دین علم عقائدنی ضروری‌لیگی و استاذ و راهبر و پیر کامل‌نی طریقت یولیده لازم‌لیگی معلوم بولدی. اگر بو مریدنی علمی بولسه هرگز شیطان فریبی‌نی بیمس ایردی. چونکه رؤیت خداوندی بو دنیاده [پیغمبریمیز حضرت‌لاریدین] باشقه کیشی‌لارگه حالت یقظه‌ده بیریلماگان دور، چنانچه حضرت موسی علیه السلام، رَبِّ ارْنِي أَنْظُرُ إِلَيْكَ [۱۴۳: الاعراف] دیب رؤیت خداوندی‌نی سوراگان‌لاریده، لَنْ تَرَانِي [۱۴۳: الاعراف] جوابینی ایشیتدی‌لار، پیغمبر مرسل‌گه بیریلماگان نمرسه بیر عادی کیشیگه نچوک بیریلسون، اما رؤیت منامیه مختلف فیه دور، بعضی‌لار تجویز و بعضی‌لار منع ایتیب دورلار.

موعظه

کیل ای عاقل بویورسنگ عقلینگ ایشگا	اوزونگ‌دین کیتماگیل دانا دیمیشگا
اگر بالا چیقیب کیتسنگ اوزونگ‌دین	ییقیلغای سن تاییب بیرگه یوزونگ‌دین
اوزین دانا کوروب کبر ایلاماقدین	نه چابک‌لار ییقیلدی‌لار ای‌اغدین
اگرچه هر کیچه دل مخزنینه	باقرسن کوب توروب کوب‌تورمه سینه
اگر چندی‌که بولسنگ قطب‌الابرار	دیگیل نی دانشیم نی دانشیم بار
نهال محنتینگ بیرسون دیسنگ بر	رضای حق اوچون علم ایت میسر



قچان بولغای چراغینگی ضیاسی

اگر یاغینگ ده بولسه گل ریاسی

حقیقت اول کیشی نی حالی ایرمس

اگر حالی ریادین حالی ایرمس

قراچین کوز بیله مصحف یوزینه

اوقور بولسنگ اوق اور نفسینگ کوزینه

شرح: کیل ای عاقل! عقلینگی ایشگا بویوروب عجب و کبر و ریا کبی اخلاق ذمیمه دین اوزاغ بولغیل و مردم بول کیشی فاضل عالم دانا دیمیشلاریگا نفسینگ قووانیب باد کبر و عجب بیرله شیشیب اوزونگدین کیتماغیل، اگر بلند مقام و مرتبه ایگاسی بولوب یوقاری لاب باده غرور بیرله مست اولوب اوزونگدین کیتیب (بیهوش اولسنگ) تایلیب بیرگه یوزینگ بیرله ییقیلغای سن، اوزینی عاقل و دانا توتوب کبر ایلاماغ سببی دین: قدر چابک [چاقان] کیشی لار ایاغدین ییقیلیب خوار و ذلیل اولدیلار، اگرچه هر کیچه ریاضت لار تارتیب کوب مدت لار دل مخزنی و گنجینه سی که باقیب (مراقبه ده) تورسنگ ده بو عملینگا قووانیب و انگا مغرور اولوب عجب و کبر بادی بیرله سینهنه نگی کوپتورمه (شیشیرمه) و اوزینگنی باشقه لاردین یوقاری کورمه. اولگی کوب توروب لفظی مرکب بسیار ایستاده معنی سیده، ایکی نچسی [مه پندان و شیشیرمه] معنی سیده دور. اگرچه ابرار لار یخشی لار اولیاء الله لارنی قطبی و همه لارینی سرکرده سی بولسنگ ده (باید اوزونگی پست و خوار توتوب) نه منی دانشیم [علمیم] و نه بیر دان [چه] ایشیم [علمیم] بار دیگیل، زیرا که بنده علمی الله تعالی علم قدیمی جنبه سیده هیچ و دریادین بیر قطره هم ایمس. و عمل هم الله خلقی و ایجاد ی بیرله وجود که کیلیب تنها بنده کاسب دور، وَاللّٰهُ خَلَقَكُمْ وَمَا تَعْمَلُونَ [۹۶: الصافات] بو سوز که دلیل دور، لهذا علم و عمل قابل فخر و کبر و غرور ایمس. قطب لفظی کوب معنی ده کیلگان دور و بیرده همه اولیاء الله لارنی باشلوغی و سرکرده سی دین عبارت دور که، تمام عالمده بیر کیشی بولور، انی غوث هم دیرلار.

تنبيه: کبر و غرورنی یمانلیگی خصوصیده آیت و احادیث لار وارد بولگان دور، چنانچه باعث ملعونیت و مردودیت شیطان کبر و غرور ایردی، قصه سی قرآن کریم نی نیچه سوره سیده تکرار ذکر ایتیلگان دور. و ابن ماجه حضرت ابی هریره رضی الله عنه دین روایت ایتیب دورلار: من تواضع لله درجة رفعه الله حتى يجعله في عليين ومن تكبر على الله درجة وضعه الله حتى يجعله في أسفل السافلين [حدیث ۱۱۷۴۲: مسند احمد] یعنی، هر کیم خاص خدا اوچون تواضع و فروتنی قیلیب اوزینی پست توتسه، الله انی مرتبه سینی حتی علیین (طبقه بالایی بهشت) که قدر بلند ایتور و هر کیم کبر ایتیب (اوزینی باشقه لاردین بلند توتسه) خداوند انی ذلیل و پست و خوار ایتور، حتی اسفل سافلین که قدر. و هم حدیث قدسی ده ابو داوود، ابن ماجه، ابن حبان حضرت ابی هریره



رضی اللہ تعالیٰ عنہ دین روایت ایتیب دورلار: قَالَ اللَّهُ عَزَّ وَجَلَّ: الْكِبْرِيَاءُ رِدَائِي وَالْعَظَمَةُ إِزَارِي فَمَنْ نَارَعَنِي وَاحِدًا مِنْهُمَا قَدَفْتُهُ فِي النَّارِ [حدیث ۴۰۹۲ : ابو داود]، [۴۱۷۵ : ابن ماجه]، [۵۶۷۱ : صحیح ابن حبان] یعنی اللہ تعالیٰ دیب دور: اولوغ لیک و کبریاء منی ردائیم دور و عظمت و بزرگ لیک منی ازاریم دور (یعنی بولار منگا مخصوص صفتلاردور) اللهنی بیر آتی متکبر دور و بیر نامی عظیم دور. هر کیم بو ایکی صفت [عظمت و کبریا] ده منگه منازعه قیلیب اوزینی بو صفتلار بیرله توصیف ایتسه انی آتش دوزخگه تشلارمن، کبر مذمتیده سوز کوبدور، لیکن شولگینه گه اکتفا ایتدوک، محبتینگ نهالی [کوچاتی] بر [حاصل] بیرسون دیسنگ و قیلگان ریاضتینگ ثمره بیریشلیگینی ایستاسنگ خاص رضای حق تعالیٰ اوچون تحصیل علم ایتگیل، اما مناصب عالیگه بیتماغ و عالم نامی بیرله تانیلماغ و مردمی عزت و احترامیگه ایریشماغ و دنیا تاپماغ کبی اغراض فاسدهلارنی مدنظرینگده توتماگیل، زیراکه بو نمرسهلار الله قولیده دور، اگر خواهلاسه بیرور، اگر تحصیل یولیده یاغینگده گل ریاسی (نیتینگده اغراض فاسدهلار) ارالاش بولوب (خالصاً لله بولمسه) علمینگ چراغینی قچان ضیاً و روشنلیگی بولور و اول علم دین مردم قچان بهره ور بولور، اگر کیمسه نینگ حالی و قیلگان اعمالی ریا مرضیدین خالی بولمسه یعنی قیلگان ایشی خالصاً لله بولمسدین ریا آلود بولسه، اول کیشی هنوز شریعت احکامینی بجا قیلمدور، لهذا مقام حقیقت اول کیشینی حالی و مقامی و صفتی ایرمس [حالی] حاء مهمله بیرله صفت و هیئت معنی سیده [خالی] حاء معجمه بیرله بوش و تهی معنی سیده دور. طلب علم ایتیب اوقوماقچی بولسنگ اول نفسینگ کوزیگه اوق اوروب انی کور قیلیب خواهشات نفسانینی آلدینی توسوب نیتینگنی یخشیلاب سونگره چین [حقیقت] کوزی بیرله مصحف [قرآن] و باشقه کتابلار یوزیگه قراگیل [اوقور] لفظی اوقوماقدین مأخوذ دور، ایکینچسی [اوق] تیر [اور] بزن معنی سیده مرکب دور. ناظم رحمه الله بو ابیاتلارده طلب علمگه کیرماقدین اول نیتنی یخشیلاماق و بعضی بوزوغ مقاصدلاردین اوزینی ساقلاماگه ترغیب ایتیب دورلار.

نه کوب جادل یوگورتوب جادل اولسه

محقق عالم اول دور عادل اولسه

بیقیتسنگ یا بیقیلسنگ دور زبون حال

جدل دین قال که قیل اوستیده دور قال

تل آشه کیلگان اولتورمس تلاشه

وجودینگ عقبه سی ایرمس الاشه

نه اول علمی که بولغای خلق اذاسی

اوقوردین دور غرض تنگری رضاسی

یانیب توتمه هـوا بادیه زینهار

یانیب کیلگانه محنت شمعی ای یار



شرح: عالم محقق اول کیشی دور کیم، عدالت صفتی بیرله متصف بولوب حق قیسی طرفده بولسه انگا تابع اولسه نه او کیشی کیم کوب جای و هر طرفگه دلینی یوگورتوروب [حق انی جانب مقابلیده لیگینی بیلیب توروب] مجادله و مناظره ده بولسه. اؤلگی [جادل] [جا] مخفف جای [دل] قلب معنی سیده مرکب دور، ایکینچی سی جدل دین اسم فاعل مجادله و مباحث معنی سیده دور. مجادله و مناظره و مباحثه دین قال [توخته] که قال [سوز] گا بناء قیلینگان مناظره و مجادله قیل اوستیده تورگان نمرسه دیک بی ثبات نهایت نازک دور، غالب اولوب خصمنی بیقیتسنگ و یا مغلوب اولوب اندین ییقیلسنگ، هر ایگی حالتده حالینگ زیون و خوار و ناتوان سن، زیراکه مناظره و مباحثه ده باید نیت حقنی تاپماغ بولماغی کیراک، نه مقابلنی الزام ایتیب انی شرمنده قیلماق، چون صورت بالاده نیت صحیح ایمس، لهذا هر ایگی صورتده گنه کارلیک باردور. اؤلگی [قال] لفظی قالماقدین امر توخته [بمان] معنی سیده، ایکینچی سی سوز معنی سیده دور. قیل موی معنی سیده دور، قیل اوستیده دور دیگان لاری کوب نازک دور دیماغدین کنایه دور، وجودینگنی طریقت یولیده گی عقبه سی الاش [جغ] نی قمرلایب قیل و قال و مجادله و مناظره گه وقت عزیزنی صرف ایتماق ایمس، بلکه بو یولده نفس و شیطان و هوی گه ایرگشماقدین وجودگه کیلادیگان کوب عقبات و دوانلار بارکه، سالک باید الاردین اوتسون، بو کوتل لاردین آشیب نفس و هوی نی ایاغ آستی قیلیب ایزیب کیلگان کیشی هر کیمسه بیرله مناظره و مجادله قیلیب، تلاشب، تارتیشیب اولتورمس. عَقَبَه کوتل دوان معنی سیده، الاش جغ سویاگی. تل لفظی عربی تیپه و کوب توپلانگان تفراغ معنی سیده دور، [آشه] آشماقدین مأخوذ [اوستیدین اوتوب] معنی سیده. ایکینچی سی تلاشه تلاشماقدین مأخوذ مجادله معنی سیده دور. غرض علم اوقوماقدین الله تعالی رضاسینی تاپماق دور، نه اول علم تحصیلی که مجادله و مناظره بیرله خلق آذاسیغه سبب بولسه [ای رفیق!] کوب محنت و مشقتلار بیرله حاصل اولگان علم شمعی یانیب، یاروتوب کیلگنده انگا عمل قیلماقدین یانیب [قیتیب] هوی و هوس بادیغه توتوب انی اوچوروب تویماغیل که جهالت قرانغولیغیده قالورسن، اؤلگی یانیب لفظی یانماقدین مأخوذ روشن بولوب معنی سیده، ایکینچی سی قیتیب معنی سیده دور.

بولای دیب صدر مجلس قان قیلور صدر

زمانه خلقی اکثر طـالب قدر

یوراک قانی بیـــــلان آثاری قانی

اوقوبدورسن اگر خالص معـــــانی

ایاغینگ باسمه ایگری کور کیشیدین

اگر قیلدینگ میسر علم ایشیدین

کوروب اوتغه اوزین سالماق نچوک ضرب

بیلیب اوز دشمنینگنی قیلما دینگ حرب



موافق علميگه قيلسه ايشينى — ديگيل ارباب علم انداغ كيشينى

تورّع شهريده اى — كيراك دور البته قارى و قارى

شرح: اكثر زمانه ميز خلقى طالب عزت و قدر و منزلت دورلار، همه دين يوقارى اولتوروب صدر مجلس بولاي ديب يوراك بغربنى علم اوقوماق بيرله قان قيليب زحمت چيكورلار. اولگى صدر لفظى يوقارى معنى سیده، ايکينچيسى يوراک و کوکراک معنى سیده دور. اگر کتابلار معنى سینی يوراکنى قان قيليب خالصاً [باشقه مقصدسيز] اوقوگان بولسنگ و نيتينگ صحيح بولسه انى زهد و تقوى تواضع کبی آثارى علايمى قنى؟ اولگى قانى لفظى [خونى] معنى سیده، ايکينچى سى [قنى] نه بيرده معنى سیده دور. اگر اوقوب علم حاصل ايتسنگ جاهل کور کيشى لاردىک اياغينگنى ايگرى باسيب شريعت يوليدىن تشقارى چيقمه، زيراكه عالم مقتدى دور، انى قيلگان ايشيگه همه ايرگاشور، شو اوچون، **زَلَّةُ الْعَالَمِ زَلَّةُ الْعَالَمِ** (ملانى تاييلماغى و اداشماغى عالم اهلىنى تايماغى و اداشماغى) ديب دورلار. علم اوقوب نفس و هوئ و شيطان کبی ايچكى اوز دشمن لارينگى بيليب و تنيب توروب، الار [خواهشاتيگه مخالفت يولى] بيرله محاربه قيلمادينگ و بو قوى دشمن لارنى اولدوروب جهاد اکبر ثوابينى آلمادينگ، بو زور دشمن لارنى کوروب بيليب توروب الار مقابليده مجاهده ايتمسدين انسان اوزينى اوتگه سالماغى قنداغ ايشدور، عالم و عاقل هرگز بو ايشنى قيلمس تا اولگونچه بو دشمن لار جهادى دين توختامس، حديث: **رجعنا من الجهاد الأصغر إلى الجهاد الأكبر، قالوا وما الجهاد الاكبر، قال جهاد القلب ذكره في الاحياء و نسب [مخرجه] العراقى الى البيهقى من حديث جابر و قال هذا اسناد فيه ضعف.** وقال السيوطى روى الخطيب فى تاريخه من حديث جابر قال، قدم النبى عليه الصلوة والسلام من غزاة لهم فقال عليه السلام قدمتم خير مقدم و قدمتم من الجهاد الاصغر الى الجهاد الاكبر، قالوا وما الجهاد الاكبر، قال مجاهدة العبد هواه. انتهى [موضوعات ملا على قارى، ص ٤٠]. هر كيشى كيم عملىنى اوقوگان علميگه موافق و مطابق قيلسه، انداغ كيشينى ارباب و اصحاب علم دين ديگيل و علماً قطاریده سناگيل (اى مرد عامل) ورع و تقوى و پرهيزگارليک شهريده و اعمال صالحه و رياضت بابيده البته قارى و عالمى وقارى و ثبات و تمکينى کيراک و لازم دور، يعنى علماء لارگه باشقه صفات محموده دين زياده وقار و تمکين و ثبات و استقامت خصائل لارى بيرله متصف بولماغلارى لازم و واجب دور، چونکه پيشوا و مقتدى دورلار، [قارى] لفظى قرائت دين اسم فاعل اوقوچى — و حافظ قرآن معنى سیده [وقارى] ياي نسبت بيرله بردبارى، سنگينى و تمکين معنى سیده دور.



ایگی حدیث ترجمه سی

بیتیب دور جامع مشکوة ایچینده	نبی دین سوردی بیر سورغوچی بنده
یمانلارنی یمانئ قیسسی انسان	جوابین بیرمادی انگا اوشل آن
اوج ایغان سونگ جوابین بیردی آنی	یمان عالم یمانلارنینگ یمانئ
تقی ایدی اوشل همراز محبوب	ایرور خوبنینگ خوبی هم عالم خوب
دیدئ پیغمبر عالم غه هادی	ایرور دوزخده بیر شدتلی وادی
جهنم کونده تورت یوز قتله اندین	پناه ایستار خدای ذوالمنن دین
اوشل وادینئ جُب الحزن اتادی	ریالیک قاری لار جایئ او وادی
خداوندا یراق ایتگیل ریادین	آبیرمه صدق و اخلاص و ضیادین

شرح: کتاب «مشکوة المصابیح» ایچیده بیتیب دور، امام دارمی مسنیده احوص بن حکیم آتہ سیدین روایت ایتیب دور، پیغمبر علیه السلام دین بیر سوراغوچی سوردی که، یمانلارنی یمان راغی کیم و قیسسی کیشی دور؟ رسول الله دفعهتاً اوشل آنده جوابینی بیرمادیلار، اوج بار سوراگان دین کیین یمان عالم یمانلارنی یمانئ دور دیب، جواب بیردیلار. ینه اول محبوب الهی یخشی لارنی یخشی راغی هم عالم دیدیلار^۱. امام ترمذی و ابن ماجه ابو هريره رضى الله عنه دین روایت ایتیب دورلار، هادی امم و رهبر عالم رسول اکرم صلی الله علیه وسلم ایدیلار، دوزخده بیر یمان وادی و چوقور باردور، دوزخ هر کون تورت یوز قتله (بار، مرته) انی شریدین خدای ذوالمنن دین پناه ایستار، اوشل چاهنی آتی جُب الحزن یعنی غم قدوغی دور، عملی ریالیک قاری و عالم لارنی جایئ اوشل چاه دور^۲.

خدایا بیزلارنی ربادین اوزاق قیلیب صدق و اخلاص و ضیادین آبیرماغیل.

^۱ عن الأحوص بن حکیم عن أبيه قال: سأل رجل النبي صلى الله عليه وسلم عن الشر فقال لا تسألوني عن الشر واسألوني عن الخير يقولها ثلاثاً ثم قال الا ان شر الشر شرار العلماء وان خير الخير خيار العلماء. [حدیث ۳۷۰ : دارمی]، [ص ۶۰۴، ج ۱، مشکوة]

^۲ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: تَعَوَّدُوا بِاللَّهِ مِنْ جُبِّ الْحُزْنِ، قَالُوا: يَا رَسُولَ اللَّهِ، وَمَا جُبُّ الْحُزْنِ؟ قَالَ: وَادٍ فِي جَهَنَّمَ، تَعَوَّدُ مِنْهُ جَهَنَّمُ كُلَّ يَوْمٍ أَرْبَعٍ مِائَةِ مَرَّةٍ، قِيلَ: يَا رَسُولَ اللَّهِ، مَنْ يَدْخُلُهُ؟ قَالَ: أَعَدَّ لِلْقَرَاءِ الْمُرَائِينَ بِأَعْمَالِهِمْ، وَإِنَّ مِنْ أَبْغَضِ الْقَرَاءِ إِلَى اللَّهِ، الَّذِينَ يَزُورُونَ الْأَمْوَءَ. [حدیث ۲۳۸۳ : ترمذی]، [۲۵۶ : ابن ماجه]



ریاضت و زهدغه ترغیب و کبر و هوادین ترهیب

کیل ای زاهد قولونگدین بیرمه طاعت	زیاد ایت طاعتینگ ساعت به ساعت
اویاغلیغ پیشه قیل خوف ایت طمع دین	ریاضت ایله تقوی و ورع دین
فراغت بیرله هیچ عاشق یاتارمی	کیشی راحت ایلین عاشق اتارمی
اگر قُل خواجه سین جوینده بولسه	یاتارمی یولده عاشق بنده بولسه
یگیل کم کیچه تورماغدین بیسنگ غم	بولور ایش کم اگر کوب تولسه اشکم
اریغ جسمینگ اگر بولسون دیسنگ ساغ	سناچ آغزین سن آج البتّه کمراغ
ایگام عهد ایتسه فاطلبنی تجدنی	قویارمی بنده لار بو جهد و جدنی
ریاضت میوه سی دور مثل یناغ	اگرچه ظاهری شخ، باطنی یاغ
معیشت اولی نرم، آخری قهر	ییلان نینگ تاشی یومشاغ دور، ایچی زهر

شرح: کیل ای زاهد طاعت رشته سینی قولدین بیرمسدین ساعت به ساعت عبادتنی کویاتورماغه کوشش قیل، سحرلارده اویاغلیکنی اوزینگه همیشه پیشه و عادت و کسب قیلیب، طمع دین قورقغیل و تقوی و ورع یولیدین ریاضت ایلاغیل، زیراکه بی تقوی و ورع ریاضت بیهوده دور. هیچ عاشق کیشی فارغ البال اوخلاب یاتارمی؟ هیچکیم راحت اهلینی عاشق اتارمی؟ اگر بنده خواجه و مالک حقیقی سینی طلبیده و اختارماقده بولوب عاشق هم بولسه، مرادیکه بیتمس دین یولده یاتارمی و کیچه لاری اوخلامی؟ اگر کیچه لاری توروب عبادت قیلماق غمینی بیسنگ طعامنی کم ییگیل، زیراکه قارن (شکم) کوب طعام ییب تولسه ایش (عمل) کم و عبادت آزاولور. اولگی ایش کم لفظی: ایش [کار] عمل [کم] آز معنی سیده مرکب دور، ایکی نچسی قارن معنی سیده فارسی دور، اگر جسم پاکینگ ساغ و سلامت بولسون دیسنگ و مزاجینگ علالتینی ایستماسنگ، البتّه سناچ [قارن] آغزینی سن طعام ییماغ اوچون کمراغ آچگیل [سناچ] مشک معنی سیده، قارننی مشک گه تشبیه ایتیب سناچ دیب دورلار. ایکی نچسی سن [تو] آچ [باز کن] معنی سیده مرکب دور.

تنبيه: اهل تصوف لار تورث نمرسه نی ولایت رکنی دیب دورلار:



۱. صمت: بیهوده سوزدین آغیزنی ساقلاماق.
 ۲. عزلت: اهل دنیا و غفلت اهل صحتیدین اوزینی بیر چیکه‌گه آلماق.
 ۳. جوع: به‌قدر ضرورت ییماغ و ایچماغ.
 ۴. سَهَر: [اویغاغلیک] به‌قدر ضرورت اوخلاب اکثر اوقات خصوصاً سحر وقتلاریده بیدار اولماغ.
- بو توروت رکنی عمده و اساسی آچلیک دیب دورلار، بعضی ذاتلار بو رکنلارنی ایکی بیت ضمنیده بیان ایتیبدورلار:

الولاية قسم — ارکانه ساداتنا فيه من الابدال

ما بین صمت و اعتزال دائماً والجوع والسهر النزه العالی

ایگام الله عهد و وعده ایتیب فاطلبنی تجدنی (منی ایزله تاپاسن) دیسه، بنده خاصلار بو جد و جهد و سعی و کوششنی قویارلارمی و ترک ایتارلارمی؟ ایگام لفظی ترکی [صاحبیم] معنی سیده‌دور. فاطلبنی تجدنی لفظی بیرله حدیث قدسی منی نظریمگه توشمادی، هر کیم تاپسه شو بیرگه کیرگیزسون^۱. ریاضت میوه‌سی و عبادت ثمره‌سی ینغاغ (چهارمغز) گه اوخشایدور، اگرچه ظاهری پوستی شیخ (قتیغ) بولسه‌ده باطنی ایچی مغزی لذیذ و یومشاغ یاغلیک‌دور، ریاضت هم ظاهرده نفس‌گه قتیغ کورونسه‌ده عاقبتی محموددور. [معیشت] عیاشلیک، خوش گذران لیک، ابتداده نفس‌گه یاقیم‌لیک و یومشاغ کورونسه‌ده آخری و عاقبتی قتیغ و قهر الهی‌گه باعث‌دور. ییلان‌گه اوخشاش‌که تاشی [اوستی، تشقریسی] یومشاغ، ایچی زهر‌دور.

تنبیه: رسول اکرم صلی الله علیه وسلم اولگون‌لاری‌گچه ریاضت بیرله اوتدی‌لار، اکثر اوقات آچ یورور ایردی‌لار و ارفه اونونی ایلامس‌دین نان قیلیب بیر ایردی‌لار، آی‌لار اوایلاری‌ده قران قویولمس ایردی، بعضی اوقات کمال آچلیک‌دین قارنی‌لاری‌گه تاش باغلاب یورار ایردی‌لار، باید مسلمان‌لار اول ذات‌گه اتباع ایتیب، بیراز نفسنی ریاضت طرفی‌گه سوق بیرماقلاری کیراک، خصوصاً بیز مهاجرلار‌گه الزم و اوجب دور‌که عیاش‌لیک‌غه فرو کیتمای وطنده‌گی باشیمیزدین اوتگن قتیغ‌لیک‌لارنی اونوتمای بیراز نفس جلونی تار‌تیب یورماغیمیز کیراک، الله تعالی مهاجرلار‌گه قرآن کریم‌ده قیلگان وعده‌سی‌گه کامل وفا قیلیب همه جایده الار‌گه کوب کینگ‌چیلیک‌لار و یشاماق

^۱ يَقُولُ اللَّهُ تَعَالَى: يَا إِبْنِ آدَمَ أَطْلُبْنِي تَجِدْنِي فَإِنْ وَجَدْتَنِي وَجَدْتُ كُلَّ شَيْءٍ وَإِنْ فُتِكَ فَاتَكَ كُلُّ شَيْءٍ وَأَنَا أَحَبُّ إِلَيْكَ مِنْ كُلِّ شَيْءٍ. (ص ۱۹۸، ج ۶، تفسیر ابن کثیر)، (ص ۱۲۶، ج ۱، الخلاصة فی شرح حدیث الولی، إعداد: علی بن نایف الشحود)، (ص ۱۲، ج ۴، جامع العلوم والحکم محقق، تألیف: الإمام الحافظ الفقیه زین الدین أبی الفرج عبد الرحمن بن شهاب الدین البغدادی ثم الدمشقی الشهیر بابن رجب المتوفی سنة (۷۹۵ هـ)).



اوچون وسیع بیرلار و الوان نعمتلارنی بیریب قویدی و همه‌میز نعمت خداوندیگه غرق اولوب قالگنمیز و شاهانه حیات کیچیرماقده‌میز، کاشکی بو نعمتلارنی شکرینی مینگدین بیرینی ادا قیلسک ایردی، الله اوزی توفیق عنایت ایتیپ راه راستگه هدایت ایتسون، آمین.

شکر تولدورسه شاید قلبیگه حی	بیلینگی باغلاغیل خدمتگه چون نی
یوره‌ک قان باغلاسه لعل آتانور تاش	ریاضت خاکیغه هر کیچه اور باش
بلند اوی ایسته‌سنگ نفسینگ کوزین اوی	بیلور عاقل بودون نی سجن بدبوی
قویوب‌سن باشینگا بالین وبالین	توشاب قالین یاپیب طاعت جمالین
مگر بولغای ایگیلمس گردنی خم	تیلہ نفسینگ تیلہ طاعتگه کم-کم
ولیکن بولماگیل طاعتگه مغرور	کوزینگدین ایله غفلت اویقوسین دور
تکبر قیلماگیل اصلینگنی قیل یاد	اگرچه بولسنگ اهل علم زهاد
بیغی و زاری دور آدمنی حالی	تکبر ایلاماغ شیطان فعالی
عزازیل دیک اولوغ توتمه اوزونگنی	ریاضت بیرله هم آچسنگ کوزونگنی
تکبر قیلماگیل بولغیل خدا ترس	اگر بیرنی یوزیگا ایلاسنگ درس

شرح: نی دیک بیلینگی خدمت اوچون باغلاغیل؛ شاید پروردگار حی قیوم (قند بوروغ کبی) قلبینگه شکر تولدورسه ریاضت تفرایغه هر کیچه باشینگنی اوروب عبادت قیلیب خوف الهی‌دین یوراک بغرینگنی قان قیلغیل، تاشنی ایچی قیزاریب یوراکنی قان باغلاشی بیرلان [تاش آتینی قویوب] لعل آتینی اوزیگه آور، عجب ایماس‌که ریاضت کیمیا اثریدین شو کبی وجودونگ تفرای طلاگه مبدل اولوب مقبول درگاه الهی بولسه، عاقل کیشی بو دنیای دون [پست]نی بدبوی [سسینگ] محبس [قماقخانه] بیلور، جنت قصر عالی‌لارینی و یخشی منازلینی ایسته‌سنگ نفسینگ کوزینی اویوب همیشه انکا مخالفت قیلیب ریاضتلار چیکگیل. حدیث شریفده امام احمد، مسلم، ترمذی و ابن ماجه ابوهریره رضی الله عنه دین روایت ایتیپ‌دورلار: **الدُّنْيَا سِجْنُ الْمُؤْمِنِ وَجَنَّةُ الْكَافِرِ** [حدیث ۸۲۷۲ : مسند احمد]، [۷۶۰۶ : مسلم]، [۲۳۲۴ : ترمذی]، [۴۱۱۳ : ابن ماجه] یعنی، دنیا مؤمن کیشی‌نی



قماقخانه‌سی و کافرنی جنتی دور. اُولگی [اوی] خانه و منزل معنی‌سیده، ایکینچیسی اویماقدین امر [کاولا] معنی‌سیده دور، استراحت جایینی قالین توشاب [سالیب] و بال یاستوغینی باشینگه قویوب غفلت اویقوسی بیرله طاعت و عبادت جمالی اوستینی یاپیب سن و عبادت دین یوز اوگوروب سن، نفس سرکش و خیره سر و حروننی کم-کم طاعت طرفیگه و عبادت جانبیغه تیللاگیل و طلب قیل؛ شایدکه انی ایگیلمس [یوغان] گردنی ایگیلیشگه کیلسه و طاعتگه خم بولسه. اُولگی [تیلله] لفظی [خیره سر] حرون معنی‌سیده، ایکینچیسی امر تیلله‌ماقدین مأخوذ، طلب قیل معنی‌سیده دور. غفلت اویقوسی کوزونگدین اوزاق قیلیب طاعت و عبادتگه مشغول اولسانگده انگا مغرور اولمه و عجب و کبرگا گرفتار اولمه، اگرچه عالم و عامل و زاهد و عابد بولوب همیشه طاعتده بولسنگده کبر ایلاماسدین اصل خلقتینگنی نیمه‌دین‌لیگینی یادینگا آلیب اویلاگیل [اصلینگ بیر قطره آب منی دور] کبر ایلاماغ شیطان ملعون ایشی دور، آدم خاکی‌نی حالی و صفتی گناهیگه توبه قیلیب بیغلاماق و زاری قیلماق دور، اگرچه ریاضت و طاعت بیرله باطنی کوزونگنی آچیب معرفت حاصل قیلسنگده عزازیل [شیطان] دیک اوزونگنی اولوغ توتوب کبر ایلامه، اگر علامه بولوب تمام بیر یوزی مردمیغه درس ایتماقگه قادر بولسنگده خدادین قورقغیل و تکبر ایلاماغیل.

تذیل: قرآن کریم‌نی کوب سوره‌لاریده شیطاننی سجده‌گه امر اییلگاندکه کبر ایتیپ اوزینی اولوغ توتوب سجده قیلماگانی؛ و من آدم دین یخشی‌راغ من، منی اوتدین خلق ایتدینگ و آدم‌نی لای دین یراتدینگ، دیگانی مذکور دور. بالعکس حضرت آدم علیه السلام بیر زلة [لغزش] اوچون، رَبَّنَا ظَلَمْنَا أَنْفُسَنَا وَإِنْ لَّمْ تَغْفِرْ لَنَا وَتَرْحَمْنَا لَنَكُونَنَّ مِنَ الْخَاسِرِينَ [۲۳: الاعراف] دیب کوب بیغلاب زاری قیلیب یالبارگانلاری و آخر دعا لاری اجابت اولوب خلافت زمین اول کیشیگه بیریلگانی معلوم دور. بیز باله‌لاریگه آته سنتینی قیلیب، گناه‌گه آلوده بولگاندکه، توبه و استغفار ایتیپ بیغلاماق و عذر و زاری قیلماق لایق و مناسب دور.

سنى كبرگان يولونگ طرفه اوزاغ دور	اراده سانى يوق بند و توزاغ دور
عجب يولدور اراده كوب خطر بار	كىشى بيلمس چبين ييتگايمو شونقار
كىشى بيلمس بو عمان آستيده فاش	جواهر پاره قيمت بارمى يا تاش
هميشه بنده دین دور زارى قيلماق	نه حد دور باشینی يوقاری قيلماق
تواضع ليک بولوب توتگیل اوزینگ کم	شجر کیم میوه‌لیک بولسه بولور خم



ثمرسيز بولدى كوردونگى مى انى فاش

تيرهك اول كيم كوتاردى يوقارى باش

قدم تفراغى كـوزگه توتيا دور

كىشى كيم خاكـره دور بير يا دور

صبا چىقسه بولور عالمدين اوستون

كىتار دمده تولاي دين پست اوتار كـون

گهر بولسنگ تاقيلسنگ تاج مردم

نه بولغاي قطره ديك قيلسنگ اوزينگ كم

بويوكغه آقماغاي بحر اولسه هم پر

اگر فيض ايسته سنگ قيلمه تكبر

يمان كويدور تكبر كويدور آنى

اگر توتسنگ طريق مصطفىنى

طلب بازاريده كيرمس شماره

آغير توتدى اوزينى سنگ خاره

بهاسى دور خريدار آلدیده پر

كيچيك بيلدى اوزينى حالينى دُر

بيغار گرداب اكثر خار و خـسنى

ايگرميش جذب حق اشكسته كسنى

درست اخلاص بيرله بولمغاي خم

اگر نفسينگ هميشه توتماسنگ كم

شرح: سنى بو كيرگان يولينگ (طريقت يولى) عجب اوزاغ يولدور منزل مقصودغه ييتيش اورتە سيدة حد و حسابى يوق (شيطان و نفسنى) بند و توزاغ لارى باردور عجب قورقونچلى يولدور، آراده كوب خطرلار باردور هيچ كيم بيلمایدور كه منزل مقصودگه چين كى ضعيفلار ييتگايمو، يا شونقار كى قولى لار؟ و هم كيشى بيلمایدور كه (بنده سالک قسمتیده) ظاهراً بو دريای عمان قضا و قدر الهى آستیده (سعادت و کاميابلىكنى) باارزش و قدر و قيمت گوهر پاره لارى بارمى؟ ويا (خدا ناخواسته) (شقاوت و ناکاملىكنى) بى ارزش و بى قدر و قيمت تاشلارى، خاتمه مستور و قضا و قدر غالب دور، لهذا (هر قنچه سالک صاحب عبادت و رياضت و کرامت بولسه ده) عذر و زارى قيليب درگاه الهى گه سيغينماق انى ايشى دور، و کبر ايله باشينى يوقارى قيلماقغه انى نيمه حد و قدرتى باردور. [چين] لفظى ذباب، مگس معنى سيدة، [شونقار] عقاب [بورگوت] گه اوخشش تيز پراق قوش دور كه انى پادشاه لار شكار [آو] اوچون ساقلایورلار، نهايت كمياب دور، هر قنچه فضل و کمال ايگاسى بولسنگ ده اوزينگنى كم توتوب متواضع بولگيل، چونكه ميوه ليک درختنى شاخلارى خم بولوب [ايگيليب] تورور، اما تيرهك درختينى ظاهر و هویدا [فاش] كوره سن كه باشينى يوقارى کوتارب باشقه درختلاردين بويى اوزايگان سببلى، بى حاصل و بى ثمر بولوب قالدی. هر کيم متواضع، بى ریا، خاکسار بولسه،



انداغ کیشینی باسگان تفرای کوزگه توتیا [سرمه] دور. آفتابنی کورمایسن موکه باتیب کیتار وقتیده همه نمرسه دین پست بولوب باتور؛ اما صباح گه چیقیشی ده همه عالم اوستیده بولور. [توتیا] سرمه معنی سیده [صبا] مخفف صباح دور، ای سالک! نه بولغای که یامغور قطره سی صدف آغزیغه توشوب گم بولوب کیتگان دیک سن هم خلق ارا گمنام لیک و تواضع و تذلل اختیار ایلا سنگ، شایدکه قطره ناچیز گوهر بولوب، پادشاه لار تاجیغه تاقیلگان دیک سن هم خلق اراسیده رفعت و عزت و قدر و منزلت تاپیب باشلارغه کوتاریلسنگ، اگر فیض رحمت الهینی سنی جانینگه آقیشینی ایسته سنگ کبر قیلمه، زیرا که دریا اگرچه پُر [توله] بولسه ده یوقاریگه قراب آقمس، باران رحمت هم بلند بیرده توختامس، اگر رسول الله یوللارینی و اول ذات سنتلارینی اوшла سنگ، تکبر کویی [یولی] یمان کوی دور، انی تواضع و تذلل بیرله کوی دورغیل و یوق قیلغیل. [کوی] یول معنی سیده [کوی دور] امر کوی دورماقدین [بسوزان] معنی سیده دور. سنگ خاره قتیغ و وزمین لیگی بیرلان اوزینی آغیر توتوب [فخر و غرور ایتدی] شونینگ اوچون طلب بازاریده و خریدار آلدیده پر قیمت نمرسه لار قطاریگه کیرمای، حسابدین تشقاری قالدی، اما بالعکس دُر اوز حالینی کیچیک بیلیم تواضع ایلادی، لهذا خریدار آلدیده بهاسی پُر [توله] و قدر و قیمتی کوی دور، سو گردابی [ایلانمه سی] خار و خشکنی توپلاگن کبی جذبۀ الهی دلی سینوق عاجزلارنی اوز حضور یغه توپلار، اگر نفسینگی همیشه کم توتوب اخلاص درست و صحیح بیرله بولماسنگ، انی گردنی خم بولوب طاعتگه ایگیلماغای.

حکایت

عزیزی کاملی نی جاہلِ خام	قبیحه لفظی بیرله بیردی دشنام
توتوب سقالینی اول مرد خوشخوی	دیر ایردی اوز تنی گه ای خُنک روی
سنینگ رسوالیغینگی ایرته و کیچ	اوزوم آیغانغه باور قیلما دینگ هیچ
بو مؤمن دین ایشیتیب کیلتور انصاف	نکولار اهلی من دیب اورماغیل لاف
انا انصاف، انا خُلق، ای برادر	اوزونگی عیبینگا سن یاپمه چادر
اگر سن قیلماسنگ نفسینگ شکستی	بیتار سقالینگا هر کونده دستی



شرح: بیر جاهل خام بیر معزز کامل ذاتنی یمان الفاظلار بیرلان سوکدی، اول خوش خلق کیشی اوز سقالینی توتوب اوزیگه خطاب قیلیب ایتور ایردی که ای یوزی ساووق، سنی رسوالیغینگنی ایرته و کیچ اوزوم آیغانیمغه هیچ باور قیلما دینگ و ایشانما دینگ، حالا اوز صفتینگنی بو مؤمن دین ایشیتیب انصاف قیل و یخشی لاردین من دیب لاف اورماغیل (ای برادر) انا انصاف، انا خُلق، بو خیلده بولورسن اوز عیبینگ که پرده یاپماغیل، اگر ریاضت بیرله نفسینگ که شکست بیریب گردنینی ایگماسنگ، هر کون سقالینگا مردم قولی بیتیب بی عزت و بی وقار ایتار.

توکل بیانیده

طریق کعبه مقصودینگا کیر	کیل ای عاشق کونگولنی ایلاگیل بیر
توکل ایلا اوزگه پیشه قیلمه	نچوک بولغای دیبان اندیشه قیلمه
عجب ایرمس قراتاش آشی بولسه	توکل بندهنی یولداشی بولسه
عجب یوق جزره لار ^۱ بازاری بولسه	اگر همت کیشینی یاری بولسه
توکل قیل، توکل قیل، توکل	بیتار آخر توکل ایلاگان قُل
طلب قیلگانینگا یتکورماق اندین	ایرور بیر اختیار جزوی سندین
چیقار هر گوشه دین خضر و الیاس	اگر توتسه خدا قُل خاطرین پأس
قیلور مشفق کورونگان هر کیشینی	اگر بیتکورسه مولا قُل ایشینی
الار ^۲ اورتاسیده پیدا بولور یول	اگر لطف ایلاسه بوستان بولور چول
زیان یتمس امان ایتسه خداینگ	اوتارده اژدر آغزین سورسه پایینگ

^۱ جزره: جزیره نینگ مخفی دور، اگرچه شارح رحمه الله جزیره حالیده کیلتورگن ایکن لار، اما او حالدده شعر وزندن چیقه دی؛ شاید ناظم رحمه الله هم مین دیگن دیک جزره حالیده، یعنی عامیانه تلفظیده قوللنگن دورلار.

^۲ بعضی نسخه لارده (الاو) دیب کیلگن.



شرح: (کیل ای عاشق) کونگولنی محبوب یگانه (الله) گه متوجه ایتیب کعبه مقصودینگ یولیغه کیرغیل (بو اوزاغ یولده) نچوک [قنداغ] بولغای دیب فکر و اندیشه قیلمه و متردد بولمه، خاص اللهنی اوزیگه توکل دین باشقه ایش قیلمه، چونکه بو یولده توکل بندهنی یولداش و رفیقی بولسه عجب ایرمس که قرا تاش (خدا امری بیرلان از روی کرامات) انی آشی و بییدگان طعامی بولسه اگر بو یولده همت کیشینی یاری بولسه عجب ایرمس که هیچکیم یوق جزیره لار انی بازاری بولوب الوان نعمت انده تاپیلسه، الله گه توکل ایلاگان قُل مراد و مقصودیگا آخر یتار، لهذا همیشه توکل بیرله بولگیل (خداوند بنده گه بیر اختیار جزوی بیرگاندور) لهذا سندی طلب قیلماق و الله دین سوراگان مطلوبینگا بیتکورماق. اگر الله تعالی قُلینی پاس خاطرینی توتوب اول بنده منظور نظر الهی و مشمول نعم لایتناهی بولسه، بو اوزون یوللارده انی هدایتی اوچون حضرت خضر و الیاس علیهما السلام کبی اولیاء الله لار هر گوشه و کنار دین چیقور، اگر مولایمیز (الله) قُلینی مرادیغه بیتکوروب ایشینی بیتکورماقچی بولسه، بو یولده کورونگان هر کیشی نی انگا مشفق و مهربان قلیب قویور. اگر الله تعالی بنده سیغه لطف ایلاسه چول و بیابان لار انینگ اوچون بوستان بولوب و الار اوتاسیده یورماق اوچون یول پیدا بولور [بعضی نسخه لارده «الاو» کیلگان دور، یعنی آتش و اوت اراسیده یول پیدا بولور]. یول دین اوتارده کته ایلان آغزیگه سورکانیب تیگیب اوتسه، پروردگارینگ سنی امان-ایسن ایتسه هرگز زیان بیتمس.

ایگم قُم دیدی بول قم دین بولوب چست	محبت قمقمیدین قیل اوزونگ شست
بوزوغ بیرده یاتیب بولمس ایشینگ به	مَکَانًا طَیِّبًا فَآذْهَبْ بِعُونِهِ
اگرچه سنده بولسه اهل و فرزند	یراتیب دور الارنی هم خداوند
اوزی بیردی الارغه جسم ایله جان	بیرور البته جان بیرگان خدا نان
عزیز جان چیقماسه قالب لاری دین	کمایمس نعمت حق لب لاری دین
سناغلیغ عمر دین تا جان توگانمس	یقین بیلگیل آغیز دین نان توگانمس
اگر دریا توبینده بولسه جاینگ	بهانه بیرله بیتکور گای خدایینگ
غرض هر قیده ای فرزند آدم	سناغلیغ روزی هرگز بولمغای کم
کیشی نینگ بولسه مونداغ اعتقادی	انگا بوستان ایرور هر قیسی وادی



شرح: ایگم (الله) قُمْ [تور] دیب امر ایتدی، بول قم دین (بول امر سببیدین) یاتگان غفلت اورنیدین تیزلیک بیرله قویوب (توروب) محبت قمغانی سوی بیرله اوزینگی شستشو قیلیب گناه آلوده لیگی دین پاک ایتغیل. اولگی قُمْ [قیام] دین امر [تیکه تور] معنی سیده، قمقم عربی قمغان معنی سیده دور. ناظم رحمه الله [ایگم قُمْ دیدی] دیگانلاری، وَقُومُوا لِلَّهِ قَانِتِينَ [البقرة: ۲۳۸] و يَا أَيُّهَا الْمُزَّمِّلُ [۱] قُمْ اللَّيْلَ [۲: المزمل] آیت لاریگه اشارت بولسه کیراک، اهلی بوزوغ و فاسد شهرده [عالم و کامل و متقی لار دین خالی بیرده] و یا دارالحرب لیگی سببی دین احکام شریعت جاری ایمس جایده مقیم اولوب دینی ایشینگ یخشی بولمسه، هر ایگی حالد هه ترک وطن ایتیب الله تعالی کمک و یاری سی بیرله کفر و شرک دین پاک دارالسلام گه هجرت ایتیب بارگیل.

تنبيه: وطن دین چیقیب باشقه جای لارگه مسافرت ایتماغ نیچه قسم دور:

۱. فقهاء کرام ذکر ایتگان شرایط موجود اولماغی بیرلان اوز تورگان مملکتی دارالحرب اولوب شعائر اسلام اظهاری ممنوع اولسه، بو حالد قدرتی بیتکان کیشی لارگه اوز مملکتینی ترک ایتیب بیر مملکت اسلامیکه هجرت ایتماغی فرض دور.

۲. تورگان جایی دارالاسلام بولسه ده اما فرض عین بولگن عقائد و مسائل ضروریه تعلیمی اوچون بیر عالم تاپیلماسه، بو صورتده هم باشقه بیر شهر و یا مملکتگه تعلّم اوچون مسافرت لازم و ضروری دور.

۳. شو کبی اوز وطنیده امراض باطنیه [ریا، عجب، حسد، حب دنیا، کبر، بغض و عداوت] نی علاج ایتیب نفس و شیطان و هوّ غوائل لاریدین انساننی قوتقارگودیک بیر پیر کامل، مکمل و عالم و عامل و متصوف تاپیلماسه بو حالد هه شو اوصاف لارگه متصف بیر هادی بار جایگه مسافرت [من باب مالا یتیم الواجب الا به فهو واجب] واجب دور.

۴. علوم ضروریه تحصیلی دین سونگره باشقه علوم اکتسابی اوچون مسافرت ایتماغ (اوقویدورگان علمیکه قراب) یا مستحب یا مباح یا مکروه یا حرام دور، اگرچه سنی اهل و عیال و فرزندینگ بولوب الارنی اعاشه سی گردنینگده بولسه هم فرض عین بولگن هجرت و مسافرتنی ترک ایتمه و باله-چقم نیمه ییب گذاره قیلور دیب فکر ایتمه، زیراکه الارنی هم خداوند رزاق اوزی یرایتیب دور و الارغه جسم و جان بیریدور البتّه جان بیرگان پروردگار نان و رزق هم بیرور تاکه عزیز جان لاری قالب (جسد) لاریدین چیقماسه حق تعالی انواع نعمت لاری لب لاریدین کما یمس و آرایمس، سناغلیغ و حسابلیک عمر اوتوشی بیرلان جان بدن دین چیقیب توگانمسه و خلاص اولمسه یقین بیلگیل که بنده نی آغزیدین نان توگانمس و تمام اولمس، اگر جایینگ دریا توییده (آستیده) بولسه الله تعالی رزقینگی بیر بهانه بیرله بیتکورگی



و سنی ضایع ایتماگای، بو سوزلارنی تاکید بیرله تکراریدین غرض شولکه [ای آدم اوغلی] هر قایده بولسنگ [ازلده یازیلیب قویگان] رزق و روزی هرگز کم بولمغای، آیه: نَحْنُ قَسَمْنَا بَيْنَهُمْ مَعِيشَتَهُمْ فِي الْحَيَاةِ الدُّنْيَا وَرَفَعْنَا بَعْضَهُمْ فَوْقَ بَعْضٍ دَرَجَاتٍ [الزخرف: ۳۲] بو سوزلارگه دلیل دور، هرکیم نینگ اعتقادی شونداغ بولسه هر قیسی وادی [دره و سیلخانه] و چول انگا بوستان کبی دور.

وجودونگ خار و خاشاکی قالین دور	یالینسنگ هم هوا اوچمس یالین دور
مینیب همت بُراقین چیق قالین دین	یالین محکم توتوب ساچرات یالین دین
ییتیب دور سال عمرونگ ای تبه حال	توگل سالی مقصد بحرینه سال
کیریب جان بحرینه ای نفس ظالم	دیمه سالم منی ییتگایمو سالم
ییتار-ییتماس لیگی دور حکم ربده	ایرانلار شرطی دور اولماق طلبده
توگل نی قلیب ای آدمی زاد	یوگورگیل کعبه مقصوده چون باد
کیریب یولغه کوروب اعلام و آثار	اوزون بُردیب گمان بُر بولمه زینهار
بو بارماقده اگر بارماق سالور شیر	قچان قیتار توگل ایلاگان ایر
خطر دین اهل همت خیره بولمس	اگر ایل تیره توتسه تیره بولمس
توگل دین کیشی کیم آلسه بهره	قچان زهره اورار غرق اولسه زهره
ییمه روزی غمین هیچ بیرده ای یار	کیم اسرارینگ بیلور اول یخشی اسرار
خداغه قیلسه هر کیم خوب توگل	نه بیرده بولسه ضایع بولمس اول قل

شرح: سنی وجودونگنی خار و خاشاکی (اخلاق ذمیمه و اوصاف ناپسندیده لاری) قالین [ضخیم] دور، و انی آستیده باسیلیب قالگان دورسن، هوئی و هوس اوتی هم هر قنچه انگا یالینیب یالبارگان و ایلنگان بیرله اوچمایدورگان یالین [الانکه] دور، خاموش اولمایدورگان اوت دور (اگر بولاردین قوتولماق ایسته سنگ) همت و غیرت براقیگه و شجاعت آتیگه مینیب (سنی وجودینگنی بالکل باسیب قاپلا ب یاتکان) قالین [سطبر] لیک



صفات و اخلاق ذمیمه‌نی ترک ایتیب چیقغیل و توبه و استغفار ایله صفات ذمیمه‌نی حمیده‌گه ایلاتورغیل و اول براق یالینی [بوییده‌گی ساچینی] محکم توتوب هوا و هوس یالینی [الانگه‌سی] اوستیدین ساچراتیب [آتلاتیب] اوتوب کیتیب اندین قوتولغیل. اولگی یالینسنگ لفظی یالبارسنگ معنی‌سیده، ایکینچی یالیندور لفظیده‌گی یالین اوت الانگه‌سی معنی‌سیده، اوچونچیسى آت بوییده‌گی یالی و ساچی معنی‌سیده، تورتونچیسى الانگه معنی‌سیده‌دور. ای حالی تباه، عمرونکی اکثر ماه و سال‌لاری غفلت و معصیت بیرله ییتیب‌دور و ضایع اولوب‌دور، حالا قالگان آزینه‌سینی غنیمت ییلیب توکل سالی [کیمه] کشتی‌سینی مقصد دریاسیغه سالیب دُر مطلوب‌نی قولغه کیلتورماقغه اورونغیل و قالگان عمرنی هم عبث اوتکارمغیل، بو توجیه‌ده بیت لفظی ضایع اولدی و یوقالدى معنی‌سیده بولور، چنانچه عرفده فلان نمرسه ییتدی دیرلار، اما [ییتیب]‌نی یای مماله بیرله اوقوساک معنی [ای تبه حال] سال عمرونک قری‌لیک ایامیغه ییتیب‌دور و یا سن و سالی‌نگ پخته بولوب بیر جایگه ییتیب‌دور، حالا قالگینى غنیمت بیل دیب توجیه ایتسه بولور. اولگی سال سنه و بیل معنی‌سیده، ایکینچیسى درخت‌لار شاخیدین توقولگان بیر اوی برابریده کشتی دورکه، کیچیک دریالاردین حمل و نقل اوچون استفاده ایتورلار [سال بزبان یونانی کشتی را گویند] غیاث اللغات. اوچونچیسى سالماقدین امردور [تشلا و بیافگن] معنی‌سیده‌دور. (ای بنده نفس ظالمگه گرفتار) وقتیکه جان بحرینه و مطلوب دریاسینه کیرسنگ (مذبذب بولوب) منی بو دریاغه تشلاگان سالم [کیمه‌چم] ساحل مقصودگا سالم و درست ییتگایمو دیب شک و تردیده بولمه [اولگی سالم سال لفظیگه میم ضمیر قوشولگن، ایکینچیسى سلامت‌دین اسم فاعل دور] چونکه سالکنى مطلوبغه ییتار-ییتمسلیگی پروردگار حکمیده دور، اما ایرانلار و مرد میدان‌لار شرطی طلب یولیده اولماقدور، ای سالک توکل قیلگان حالینگده کعبه مقصود طرفیغه شمالدیک یوگورگیل یولغه کیریب بعضی آثار و علایم‌لارنى کوروب زینهار اوزون بیابان ایکان دیب گمان‌بر بولوب یولدین قیتماغیل، بو بارماقده اگر شیر چیقیب بارماق [پنجه] سالسّه و انگا حمله ایلاسّه الله گا توکل ایتگان کیشی قچان یولدین قیتار. اولگی بر لفظی عربی [ضد بحر] بیابان معنی‌سیده‌ور، ایکینچیسى [گمان‌بر] مثل نامه‌بر گمان ایتکوچی معنی‌سیده‌دور. اولگی بارماق لفظی مصدر [رواح] معنی‌سیده، ایکینچیسى پنجه معنی‌سیده‌دور. همت و غیرتلیک کیشی بعضی مقصود یولیده پیش کیلگان خطر‌دین خیره [حیران و عاجز] اولمس، ایل و قومی بو یولده تیر ملامتگه توتسه خاطری تیره و مکدر اولمس. اولگی تیره لفظی [تیرگه]‌نی مخفی‌دور، اوقگه معنی‌سیده، ایکینچى سی مکدر معنی‌سیده‌دور. توکل گنجی‌دین بهره آلگن کیشی بلا زهریگه چومولوب قالسه قچان زهره اورار و قورقار. اولگی زهره لفظی کیسه زرداب [اوت] تلخه معنی‌سیده. اما بو بیرده قچان زهره اورار دیگانی [قچن قورقار و خوف ایتاردین کنایه‌دور] ایکینچیسى آغو [سم] معنی‌سیده غرق اولسه زهره دیگانی بلا و مصیبت‌لارگه گرفتار



اولسه دیماغدین کنایه دور. ای رفیق هیچ بیرده رزق و روزی غمینی ییمای اوزیگا توکل قیل، اول ذات کیم سنی پنهانی اسرار و رازلارینگنی بیلغوچی دور، او یلامگان جای دین رزق بیتکوروب سنی یخشی روشده اسراماق و ساقلاماقنی بیلور. اولگی اسرار جمع سر راز نهانی معنی سیده، ایکینجیسی ترکی ساقلار معنی سیده دور. هر کیم اللهغه یخشی روشده توکل تام ایتسه قیسی بیرده بولسه اول قُل ضایع بولمس، وَمَنْ يَتَوَكَّلْ عَلَى اللَّهِ فَهُوَ حَسْبُهُ [۳ : الطلاق] آیتی بو سوزگا دلیل دور.

حکایت عبدالله بن مبارک

مبارک اوغلی بیر کون آزغشیب راه	عجائب سوساغانده کوردی بیر چاه
کیچوردی کونگلیده تاپیلدی مطلوب	اگر دلو و رسن بولسه ایدی خوب
اوشل دمده بیر آهو کیلدی سوساب	تاشیب چیقدی قدوقنی آغزیغه آب
اول ایچکان سونگ اوشل شه باردی چه گه	بیتارییتماس ده اول سو توشدی ته گه
دیددی یارب بیرورسن آهوگه آب	منگا بیرماس سن ای سلطان وهاب
ندا کیلدی اوشل وجه حسن گا	دلینگ کیتدی سنی دلو و رسن گا
اوشل آهوکه کوردونگ چیقدی برگا	توکل قیلما دی منن دین دگرگا
ایشیتدی بو ندانی بولدی بیهوش	ایچیدین قلزم ذوق ایلادی جوش
محبت جامی هول قیلدی تماغین	تیریکیلیکه اونو تدی سوساماغین
ایدی اولده هم ایبر اتقیاده	یوز انچه همتی بولدی زیاده

شرح: حضرت عبدالله بن مبارک [شاگرد امام اعظم] بیر کون یول اداشیب قتیغ سوساغانلاریده بیر چاه کوروب کونگولاریدین اوتدی که مطلوب [سو] تاپیلدی، لیکن ارغمچی بیلان سطل بولسه یخشی بولور ایدی، اوشل آنده بیر آهو (کییک) چنقاب کیلدی، فی الحال سو قدوق آغزیگه تاشیب چیقدی، اول ایچیب بولگان دین سونگره اول جناب قدوق آغزیغه بیتار-بیتماس سو قدوق آستیغه توشوب کیتدی (بو حالنی کوروب متاثر اولوب) دیدیلار،



ای سلطان و هاب پروردگاریم کییک غه سو بیرورسن منگا بیرمس سن؟ اول حسن وجه گه هاتفدین ندا کیلدی که سنی دلینگ ارغمچی و سطل گه کیتدی، اما کورگان کییک دشتگه چیقغانده مندین باشقه گه توکل قیلما دی، بول ندانی ایشیتیب بیهوش بولدیلار، ایچلاری دین ذوق دریاسی جوش اوروب محبت جامی تماغلارینی هوللادی، تیریک لیکده سوساماغنی اونوتدی لار، اول ذات اولده هم اهل تقوی لارنی اولوغ لاری دین ایردیلار، اما بو واقعه دین سونگره همتلاری یوزلارچه زیاده بولدی.

من مسکین توکل بابیـده داغ	توشوبدور همتیم کوندین زبون راغ
همیشه نفس زشتیم مبتلاسی	منینگ دیک بارمو هیچ مؤمن بلاسی
الهی بحر همت دین قیلیب سیر	من خنشی غه ایرلار نشئه سین بیر
ایرور من عقلی یوق، ادراکی یوق قُل	نه تمکین بار، نه همت، نه توکل
گله باقدیم گله قیلیم کیشی دین	کورار من برچه اوز نفسیم ایشیدین
بو مؤمن لار ایچیده بیر بلامن	بوزوق یول دین چیقالمای مبتلامن
بولوب من غرق بحر اضطرابه	خراب اولمیش توشوب نفس خرابه
ایرور کونگ لومده کوب راز نهانی	یوزوم یوقدور توروب ایتور غه آنی
اوزونگ سن عالم السرّ الخفیّات	معین دور سنگا مجموع نیّات
اگر قیتار مسنگ راییم وراً دین	قوتولمس من مونینگ دیک ماجرادین
اگر چه سانی یوق بو قُل گناهی	گرفتار غضب قیلیمه الهی

شرح: ناظم رحمه الله بو قصه دین نکته تارتیب اوز نفسلاری گه خطاب قیلیب دیرلار که، من مسکین توکل بابیده داغ حسرتده کویارمن، چونکه همتیم کوندین کونگه زبون راغ و پستلاب بارور، همیشه یمان نفسیم مبتلاسی دورمن، مسلمانزاده لار ایچیده من دیک یمان یوقدور. الهی همت دریاسیدین منی سیراب قیلیب، من دیک (ایر یا خاتونلیگی نامعلوم) خنشی گه ایرلار و مردلار نشئه و حیاتی بییگیل، من بیر عقل و ادراکی یوق قُل ایرورمن، منده نه تمکین و نه همت و نه توکل بار، گناه لایبغه باتدیم، بو خصوصده هیچ کیم دین گله قیلیب اوفکه لامس من،



بلکه مونی اوز نفسیم ایشیدین کورورمن، بو مؤمنلار ایچیده بیر بلامن، بوزوق یرامس یولدین چیقالمای انگا مبتلا و گرفتارمن. اؤلگی [گله] لفظی [گلگه]نی مخفی لایگه و بلچیقگه معنی سیده، ایکینچسی اوپکه لاماق معنی سیده دور. دریای اضطراب و ترددگه چومولوب کیتیمن و نفس ایشک صفتیم گناه سویغه توشوب بلچیقی غه باتیب حالی خراب اولمیش. اؤلگی خراب لفظی عربی تباه و ویران معنی سیده، ایکینچسی [خر، ایشک] و آبه [آبگه، سوگه] معنی سیده مرکب دور. ایشکنی عادتیی سودین قورقوش دور. ناظم رحمه الله نفسلارینی اعمال صالحه دین اوزینی کیینگه تارتیب و تذبذب کورساتماقینی سوگه توشگان ایشکگه تشبیه ایتیب دورلار. کونگلمده کوب راز نهانی و اسرار پوشیده لار باردور، اما انی سنی حضورینگده توروب ایتماقغه و اظهار ایلاماقغه (گناهیم کوب لیگیدین) یوزوم یوقدور و حیا ایتورمن، لیکن اوزونگ عالم السر و الخفیات سن رازنی ایتماقگه حاجت یوق دور، همه دلده گی نیتلار و اسرارلار سنی آلدینگده معین و معلوم دور، اگر اوزونگدین باشقه دین راییمنی قیتاریب اوز طرفینگه جذب ایتماسنگ مونداغ تردد و تذبذب ماجرالاریدین قوتولمسمن، اگرچه بو قلنی گناهی سانی و سناغی یوقدور، الهی غضبینگا گرفتار قیلماغیل و گناهلارینی رحمت سویی بیرله یوغیل.

درویش لیک بیانیده

کیل ای درویش اگر درویش اتانیدیـنگ	طریقت اهلی نیک اندیش اتانیدیـنگ
اگر آتینگ خلاف بنده لیک دور	قیامت کون نچوک شرمنده لیک دور
قوروغ آت ایله اوتکان حیف اوقات	اویاتغیل بولمه مغرور قوروغ آت
قوروغ یورمه قوروغ دست اجلده	سالور ناگه گمان ایتمس محلده
اوزونگدین کیتمه اخلاص عوامه	سیونمه نامه کیلمای یخشی نامه
کیشی روده کیریـب گر یورسه روده	قچان واصل بولور دُر شهـوده
سوانی نفی ایکانین ایلا اثبات	توکل بحرینه بات ای کونگول بات
نه بولغای قولغه کیلسه دُر مقصود	وگر نه سوده یورگاندین نچوک سود
کونگول حق فیضیگه بولسون دیسنگ چاک	که اوّل مرتبه حلقینگنی قیل پاک



بیمه ذرّه حرام آغشته نان دین	بولور چاهی نجس بیر قطره قان دین
اگر آش منهی بولسه کوز یوموب آش	وگر نه تانگلا قارنینگدین چیقار تاش
ایرور خردل چه منهی زهر قاتل	قیلور بیر قطره می خم سونی باطل
حرام آز بولسه هم کوبدور یمانی	سمانی بولسه هم بیلگیل سم آنی
بیتیک لیک شرعه ده ای لابس دلُق	فرائض اعظمی دور پاکیی حلق
قایو طاعتگه اول مرضای رب دور	یقین بیل قوّت لقمه سبب دور
کفایه شعبیده بول هم بیتیلدی	رسول الله سوزیدین نقل ایتیلدی
اریغ سیز لقمه بیرله قیلسه طاعت	قبول ایرمس اوشل قیلغان عبادت
خدائی منعینی نفس ایستگانده	اگر بیر ذره سین ترک ایتسه بنده
عبادت لار که بولغای انس و جن دین	بو ایغان بنده لیک افضل دور اندین
اگر ترک ایتسه ذره شبهه ای یار	دیدى یوز حج دین آرتوق ای نکوکار
رساله ابولیت ایچره مـذکور	نبی دین قیلدی نقل اول معدن نور
لباسیده حرام آغشته بولسه	اوشل آغشته سی بیر رشته بولسه
اوشل تون بیرله اوتکارگان نمازی	دیدى مقبول ایمس اول بحر رازی
صیام ایله اگر چه اوتسه کونلار	قیام ایله کیچورسه برچه تونلار
ریاضت بیرله اوتکارسنگ بهر کیف	اریغ بولماسه لقمنگ محنتینگ حیف
مناهی رنگیدین آشینگ بویاغلیغ	بویاغلیغ آش ایله حیف او یاغلیغ
فرائض اعظمین قیلغان کیشی ترک	محبت بویینی قایدین قیلور درک



ایگردینگ حلقه شبهه سالمه حلقه	آتینگ چیقدی عبادت اهلی خلقه
آچیلسون ایچ دیسنگ پاک ایچ همیشه	کونولسون تن دیسنگ زهد ایله پیشه
دیگیل اولدور حمیم ای مرد حالی	اگر آغزینگده دور بالی و بالی
بولور کوب وعده لیک عیدینگ وعیدینگ	اگر منهی ایمس بولسه بعیدینگ
گرفتار اولماغیل رنج الیمه	اگر قیلسه کیشی لیمه ولیمه
یقین بیل لخچه اوت دین بتر دور	طعامی کیم اگر انده خطر دور
انی نعمت دیمه، دی زهر زقوم	اگر بولسه حرام اول لقمه شوم
جحیم آستیده بیتکان بیر درختی	نه دور زقوم ایروور تعذیب سختی
بیگاننی قارنی قینارمس قزان داغ	جمیع زهر هرگز بولمس انداغ
علاجین تاپماغای بیچاره بولغای	ایچی نینگ باری پاره-پاره بولغای
اوشل شرمنده لیک لاردین امان ایت	الهی کونگولومیزنی بی گمان ایت

شرح: ای درویش! اگر درویش و اهل طریقت و نیک اندیش ناملاری بیرلن اتاندینگ، بایدکه بو ناملارگه موافق عملینگ هم بولسون، اگر بو آتلارینگ قیلادیگان عملینگ و بنده لیگینگ غه خلاف و تیسکاری بولسه یعنی (آتینگ، صوفی، اهل طریقت) یخشی آتلار بولوب عملینگ یمان ایشلار بولسه، قیامت کونی اهل محشر حضوریده بو عملی نفاق ظاهر بولسه قنداغ شرمنده لیک دور، حیف اوقات لار و ایسیز عمرلارکه (بی عمل) قوروغ آب بیرله اوتادی، قوروغ آتغه مغرور بولماغلیک دین اویاتگیل و حیا قیلگیل. خشک و خالی (بی عمل) قوروغ یورمه و حالا یاش من قریلیک ایامیده طاعت قیلورمن دیب طول املگه گرفتار اولمه، زیراکه اولوم یاش و قریگه باقمس و اجل قولیده همه وقت قوروغ سیرتماغی تیار و آماده دور، او یلاماگان و گمان ایتماگان محله بیردین ناگهان بوینونگا سالیب قبر طرفیگه آلیب بارور، یاش و قری لیکغه قرامایدور. اولگی اوچ بیرده گی [قوروغ] خشک و خالی معنی سیده تورتونچیسی قاققاق آتلارنی اوشلاماق اوچون بیر یغاچ باشیگه ارقان دین سیرتماغ قیلینگان نمرسه نی دیرلار. مردم عوامنی اخلاص و اعتقاد قیلیب پیریم و ایشانیم دیگانلاریگه اوزونگدین کیتیپ



مغرور اولمه تا قیامت کونی آتینگا یخشى نامه اعمال کیلمسیدین (بو دنیاده) سیونمه. اولگی نامه [نامه] نى مخففی دور، آتگه و اسمگه معنی سیده، ایکینچیسى [مکتوب] معنی سیده دور. کیشی دریاگه کیریب انی یوزیده یورسه و آستیغه چوکماسه قچان در شهودگه بیتیشار، یعنی طریقت بحریمه کیرگان کیشی ریاضت ایتماى (یوزلامه) آتیغه صوفی بولوب یوروب جانینی خطرگه سالمسیدین قچان مشاهده گوهرینی قولغه کیلتورغای. اولگی [روده] لفظی [رودگه، دریاگه] معنی سیده، ایکینچیسى [روی ده] نى مخففی یوزیده و اوستیده معنی سیده دور. ریاضت یولیده کلمه طیبه لَا إِلَهَ إِلَّا اللَّهُ نى ورد ایتیب جمیع ماسوی الله نى نفی (کالعدم) ایکانینی و پروردگاریمیز (الله) واجب الوجودگه وجود مطلق مسلم لیگینی اثبات ایله و ماسوی نى کالعدم لیگی معلوم بولگاندین سونگره وجود مطلق ایگاسی الله جلّ جلاله گه اعتماد ایتیب بات راغ توکل دریا سیغه باتغیل و چومگیل، شایدکه در مقصود قولغه کیلسه، ورنه سوده یورگاندین نیمه فایده حاصل اولور. اولگی [بات] لفظی امر باتماقدین [چوم] معنی سیده، ایکینچیسى [زود] معنی سیده دور، سوده لفظی فی الماء معنی سیده و سود لفظی فایده معنی سیده دور. ناظم رحمه الله، سوی نى نفی... الخ مصرعی بیرله کلمه طیبه گه [که اولی نفی، آخری اثبات دور] اشاره ایتیب دورلار و اهل تصوفلار بو کلمه نى تیل و دل بیرله کوب ایتماقگه ترغیب ایتورلار، چونکه حدیث شریفده: أَفْضَلُ الذِّكْرِ لَا إِلَهَ إِلَّا اللَّهُ [حدیث ۳۳۸۳ : ترمذی]، [۳۸۰۰ : ابن ماجه]، [۱۸۳۴ : المستدرک علی الصحیحین للحاکم] وارد بولگان دور، دلنی فیض و فتوح و واردات و مواهب الهیه گه آچیلسون دیسنگ همه ایشدین اول حلقینگنی پاک قلیب، بیر ذره چه حرام قوشولگن طعام دین بییمه غیل! چونکه قدوق (هر قنچه سوی کوب بولسه ده) بیر قطره قان انی ایچیگه توشماغی بیرله سوی نجس (پلید) بولوب بولغانور، شونگا اوخشش انسان وجودی هم حرام نمرسه ییماقدین بولغانیب دلگه قرالیک پیدا اولور. اگر ییماق اوچون کیلتورولگان آش و طعام شریعت طرفیدین نهی ایتیلگن و شبهه لیک بولسه انگا نظر سالماى کوزینگنی یوموب آشگین و آتلانگین، اگر شونداغ قیلمسیدین (اندین بیسنگ) تانگلا قیامت کونی الله قدرتی بیرله بول بیگان آشینگ قارینگدین تاش بولوب چیقیب باعث ازدیاد عذاب اولور، آیه: وَقُودُهَا النَّاسُ وَالْحِجَارَةُ [۲۴ : البقرة - ۶ : التحريم] بو سوزگه دلیل دور. اولگی آش لفظی مطلق طعام معنی سیده، ایکینچیسى آشماقدین امر دور، [آتلا] و اوستیدین اوت معنی سیده. خردل دانه سیچه کیچکینه شریعتده نهی ایتیلگان نمرسه زهر قاتل دور، اندین اجتناب ایتماق لازم دور، اگرچه آزگینه بولسه ده انی تاثیر بدی کوب دور، چنانچه بیر قطره می [شراب] عرق بر خم توله سوگه توشسه انی حرام و نجس ایتیب استفاده دین چیقاریب باطل ایتور، حرام نمرسه اوزی کم گینه بولسه ده انی تاثیر کوب دور، اگر بییدگان طعامینگ سمانی [بودنه] بولسه، اما حرام یولدین قولگه کیلسه، انی زهر قاتل بیل. سمانی عربی



بودنه معنی سیده، سم عربی زهر معنی سیده [آنی] اشاره دور. ای صوفی لار لباسینی کییگان کیشی شرعة الاسلام کتابیده بیتیک لیک دور که تمام فرضلارنی اولوغ راغی انسان حلقینی حرام دین ساقلا ماغدور، قیسی بیر طاعتگه مرضای الهی نی تاییب مقبول درگاه اولودور، یقین بیل که انی مقبولیتی که لقمه حلال قوتی سبب دور. امام شعبی نی کفایه آتلیغ کتابلاریده رسول الله سوزلاریدین نقل ایتیب بیتیلگاندور که، ناپاک لقمه ییب انی قوتی بیرله طاعت قیلسه اول قیلغان عبادتی مقبول درگاه الهی بولمایدور (و هم شول کتابده دور) الله منع ایتگان نمرسه نی نفسی ایستاسه (انی قیلماقغه قدرتی ییتیب توروب) اگرچه ذرچه آز گناهانی ترک ایتسه و ارتکاب ایتسه، بو قیلغان ایشی و بنده لیگی همه انس و جن دین صادر بولگن عبادت لار دین افضل و ثوابی کوب راغ دور. (و هم شول کتابده دور) خدادین قورقوب بیر کیمسه ذرچه شبهه لیک نمرسه نی ترک ایتسه بو ایشی نینگ ثوابی حج ثوابیدین آرتوغراق دور. رساله امام ابولیت سمرقندی ده حضرت رسول الله صلی الله علیه وسلم دین نقل ایتیب دور که، هر کیم نی لباسیده اگرچه بیر ایپ مقداریچه حرام ارالاش بولسه [اول اسرار الهی نی درباسی دیب دورلار که] اوشل تون بیرله اوقوگان نمازی درگاه الهی ده مقبول اولمس، کیمسه نی کونلاری روزه بیرله و تونلاری نمازده قیام بیرله اوتسه، بهر حال عمرینی ریاضت بیرله اوتکارسه، لیکن طعامی حلال پاک بولمسه، انینگ تمام قیلگان محنتی حیف و ایسیز دور، شریعتده نهی ایتیلگان رنگ لار بیرله ییدیلگان طعامینگ بویاغلیغ و ارالاش بولسه، یعنی طعامینگ حرام و شبهه بیرله آلوده بولسه، بویاغلیغ [سیر روغن] آش ایله که [آلوده دور] حیف اویاغلیغ و ایسیز قیلگان عبادت و یا بویاغلیغ [بویانگلیغ] بو خیلده حرام آش قوتی بیرله حیف اویاغ بولوب قیلگان عبادت، و یا بویاغلیغ [بو طرف لیک] بو دنیالیک حرام ارالاش آش بیرله حیف اویاغلیغ [او طرف لیک] او دنیا [آخرت] ایشینی قیلماغلیک دیسه هم بولور، اولگی بویاغلیغ لفظی رنگ لانگان و مصبوغ معنی سیده، ایکی نیچیسی نیچه توجیه کوتارور:

۱. [بو] اشارت [یاغلیغ] سیر روغن معنی سیده مرکب دور.
۲. [بو] اشارت [یاغلیغ] اصلاً [یانگلیغ] جناس و تخفیف اوچون نوننی گافگه قوشوب غین تلفظ ایتیلگن، [بو خیلده بو قسم] معنی سیده دور.
۳. بو یاغلیغ [بو طرفلیغ] معنی سیده.
- او یاغلیغ لفظی ایکی توجیه نی کوتارور:
۱. مخفف اویاغلیغ [بیدار لیک] معنی سیده.
۲. او یاغلیغ [او طرف لیک] معنی سیده.



فرض لارنی اولوغی بولگان حلقی پاکلیکنی ترک ایتگان و حلال و حرامنی فرق ایتماگان کیشی محبت بویینی [ایسینی] قایدین درک قیلور و احساس ایتور!؟ (ای درویش) خلق ارا آتینگ اهل عبادت و صوفی دیب چیقدی و مشهور اولدی و حلقه ذکر توزاب مردمنی اطرافینگا جمع لادینگ، بایدکه پرهیز ایتیب شبهه لیک نمرسه لارنی حلقینگه سالماسنگ. اولگی حلقه حاء مهمله بیرله ذکر اوچون (حلقه کبی) مردمنی گرد اولتورماقلارینی ایتیلور. ایکینچسی حاء مهمله بیرله [حلقه گه] نی مخفیفی دور، [بوغوزگه] معنی سیده. تنینگ طاعت و عبادتگه کونولسون و عادت لانسون و ایگیلسون دیسنگ محبت دنیانی دلینگدین چیقاریب زهدنی اوزینگا پیشه و کسب ایلاغیل، ایچیم و قلبیم و ارادات الهیه گه آچیلسون دیسنگ همیشه حلال پاک دین ییگیل و ایچگیل. اولگی ایچ لفظی ضد [تش] درون معنی سیده، ایکینچی سی ایچماقدین امر [إشرب] معنی سیده دور.

تنبيه: حلقه ذکر سنت دور، بو خصوصده کوب حدیث لار کیلگان دور، چنانچه امام مسلم و ترمذی و نسائی حضرت معاویه رضی الله عنه دین روایت ایتیب دورلار: رسول الله صلی الله علیه وسلم [بیر کون] اصحاب لارینی حلقه لاری اوستیغه چیقیب بو بیرده سیزلارنی نیمه اوتقوزدی؟ دیگانلاریده، [جواباً] بیزلارنی الله اسلام گه هدایت و انی بیزلارگه عطا قیلگانی اوچون ذکر و حمدین ایتیب اولتوروب میز دیدیلار، رسول الله قسم بیریب سورادیلارکه، سیزلارنی شوندین باشقه نمرسه اوتقوزگانی یوق دیدیلار. رسول الله دیدیلار، من سیزلارگه البتّه تهمت یوزیدین قسم بیرگانیم یوق، بلکه حضرت جبرئیل علیه السلام کیلیب خبر بیردی که، هر آئینه الله عزّ و جلّ سیزلارنی بو حلقه لارینگیز بیرلان فرشته لارگه مباحات قیلادی^۱. و امام بزار حضرت انس رضی الله عنه دین روایت ایتیب دور، هر آئینه الله تعالی نی [بیر یوزیده] کیزیب یورادیگان فرشته لاری بار، الار حلقه ذکر اختاریب یورورلار، الحدیث^۲. و بعضی حدیث لارده مجالس الذکر لفظی کیلگاندور.

^۱ حَدَّثَنَا أَبُو بَكْرِ بْنُ أَبِي شَيْبَةَ حَدَّثَنَا مَرْحُومُ بْنُ عَبْدِ الْعَزِيزِ عَنْ أَبِي نَعَامَةَ السَّعْدِيِّ عَنْ أَبِي عُثْمَانَ عَنْ أَبِي سَعِيدٍ الْخُدْرِيِّ قَالَ خَرَجَ مُعَاوِيَةُ عَلَى حَلَقَةٍ فِي الْمَسْجِدِ فَقَالَ مَا أَجَلَسَكُمْ قَالُوا جَلَسْنَا نَذْكُرُ اللَّهَ. قَالَ أَلَلَّهَ مَا أَجَلَسَكُمْ إِلَّا ذَاكَ قَالُوا وَاللَّهِ مَا أَجَلَسْنَا إِلَّا ذَاكَ. قَالَ أَمَا إِنِّي لَمْ أَسْتَحْلِفْكُمْ تَهْمَةً لَكُمْ وَمَا كَانَ أَحَدٌ يَمْنُرُنِي مِنْ رَسُولِ اللَّهِ -صلى الله عليه وسلم- أَقَلَّ عَنْهُ حَدِيثًا مِنِّي وَإِنَّ رَسُولَ اللَّهِ -صلى الله عليه وسلم- خَرَجَ عَلَى حَلَقَةٍ مِنْ أَصْحَابِهِ فَقَالَ «مَا أَجَلَسَكُمْ». قَالُوا جَلَسْنَا نَذْكُرُ اللَّهَ وَنُحَمِّدُهُ عَلَى مَا هَدَانَا لِلْإِسْلَامِ وَمَنْ بِهِ عَلَيْنَا. قَالَ «أَلَلَّهَ مَا أَجَلَسَكُمْ إِلَّا ذَاكَ». قَالُوا وَاللَّهِ مَا أَجَلَسْنَا إِلَّا ذَاكَ. قَالَ «أَمَا إِنِّي لَمْ أَسْتَحْلِفْكُمْ تَهْمَةً لَكُمْ وَلَكِنَّهُ أَتَانِي جِبْرِيلُ فَأَخْبَرَنِي أَنَّ اللَّهَ عَزَّ وَجَلَّ يُبَاهِي بِكُمْ الْمَلَائِكَةَ». [حدیث ۷۰۳۲ : مسلم]، [۳۳۷۹ : ترمذی]، [۵۴۲۶ : نسائی]

^۲ قال رسول الله صلى الله عليه وسلم: إن لله ملائكة سياحين في الأرض، فإذا وجدوا قوما يذكرون الله نادوا هلموا إلى بغيتكم. [۹۱۴۶ : مسند بزار]



قیسقه چه سوز شولکه حلقه ذکر همه سی مشروع دور، برابر دورکه انده قرآن کریم اوقولسون ویا ذکر ایتیلسون و یا تعلیم و تعلّم ایتیلسون، بعضی عالم لارنی حلقه بدعت دیب منع ایتیشلاری اوزی بدعت دور.

اگر آغزینگده و بال و عذاب الهی که سبب حرام یولدین قولگه کیلگن عسل بولسه و انی ایچسنگ، اگرچه ظاهراً اول تاتلی و شیرین دور، (ای مرد شیرین) سن انی دوزخ حمیمی و قیناغ و اچّیغ سوی دیب بیلگیل، چون آخر حرام ییماق و ایچماق دوزخگه آلیب بارور. [بال] عسل شهد معنی سیده، و بال عذاب معنی سیده، حالی حلودین اسم فاعل شیرین معنی سیده دور؛ ویا حال لفظی که یای نسبت گیرگان دور، یعنی [ای صاحب حال کیشی] اگر منهیات شرعیه سندین اوزاغ بولمسه و اوزونگنی یمان ایشلاردین ساقلاماسنگ، انی باره سیده و خصوصیده کوب وعده لار کیلگان عید کبی خوشلیک کونلارینگ سنی حقینگده وعیدگه ایلا نیب و خوشلیکلارینگ خفه لیکنه مبدل اولور، اگر کیمسه [لیمه] نوع ملامتگه باعث ولیمه [توی] قیلسه مثلاً انده ساز و سرود بولسه و یا شراب و باشقه منهیات بولسه و یا خاص معتبر و بای کیشی لارنی خبر قیلگان بولسه، او خیلده توبگه باریب رنج و عذاب الیمگه گرفتار اولماغیل. لیمه لفظی عربی اصلی [لِوْمَة] و اونی یاگه قلب ایتیلگن [لیمه] بولگن، [لَا مَ : يَلُومَ] دین نوعنی افاده ایتوچی مصدر دور، ولیمه ضیافت توی معنی سیده دور. بیر طعامی که حرام و شبهه لیک بولوشیدین انده خطر بولسه یقین بیل که الاونی لخچه سیدین یمان راقدور، قنداغ که اوتدین اوزونگنی ساقلایسن، انداغ طعام دین هم اوزونگنی ساقلایگیل. اگر اول لقمه شوم و منحوس حراملیگی معلوم اولسه، انی نعمت الهی دیمه گیل، بلکه زهر و زقوم دیگیل، زقوم نیمه دور؛ دوزخ آستیده بیتگان و کوکارگان بیر درخت دورکه دوزخی لارگه قتیغ عذاب آله سی دور و نهایت اچّیغ دور، دنیا ده گی همه زهرنی اچّیغلیگی انی اچّیغلیگی دیک بولا آلمس، اندین ییگان دوزخینی قارنی مس قازان دیک قینار، انی ایسیغلیگی دین ییگان کیشی نینگ ایچیده گی اعضا لاری پاره-پاره بولغای، انی علاجینی تاپمسدین بیچاره و عاجز بولغای.

الهی عقیده میزنی شک و تذبذب دین ساقلاب دلیمیزی بی گمان ایتیپ یقین که یقین لاشتور؛ او شل قیامت صحراسیده شرمنده لیک لاردین امان و ایسان ایت! آیه: **إِنَّ شَجَرَةَ الزُّقُومِ [۳] طَعَامُ الْأَثِيمِ [۴] كَالْمُهْلِ يَغْلِي فِي الْبُطُونِ [۵] كَغَلِي الْحَمِيمِ [۶]** : الدخان دلیل دور.

تنبيه: توی و ولیمه که اغنیاً و معتبر لارنی خاص ایتیپ فقراً و مساکیننی بالکل قویما سلیک و توق کیشی لارنی چاقیریب آچلارنی منع ایتیشدین احادیثده نهی کیلگان دور، چنانچه امام ابو هریره رضی الله عنه دین روایت ایتیپ دورلار، رسول الله ایدیلار، طعام لارنی یمانی ولیمه طعامی دورکه انگا کیلگان کیشی نی منع ایتیلور و کیلماگان و ابا ایتگان کیشی لارنی انگا چقیریلور... الحديث. و طبرانی و دیلمی ابن عباس رضی الله عنهما دین



روایت ایتیب دور، یمان طعام ولیمه طعامی دورکه انگا توقلار چقیریلور و آچلارنی اندین منع ایتیلور^۱. بو یمان عادت بیز مهاجرلارده باردور، الله اوزی اصلاح ایتسون، آمین!

حکایت امام احمد حنبل و بیر بیوه زن

ایشیتگیل احمد حنبل گه بیر یوم	دیددی بیر بیوه زن ای هادی قوم
چراغیم یوقدور اصلا ای اولوغ نرخ	اوگورور ایردیم آینی باریده چرخ
فرو کیتدی جهان ایوانیدین ماه	خلیفه اوتدی مشعل بیرله ناگاه
انینگ روشن لیگیده چست و چالاک	اوگوردوم بیر-ایکی یول چرخیم ای پاک
منگا اول رشتیم ای قطب زمانه	جواب ایغیل حلال اولغایمو یا نه؟
امام ایدی بو غفلت عالمینده	نچوک زن سن مونینگ دیک دین غمینده
ضعیفه ایدی ای مقبول وافی	منی همزادیم ایردی بشر حافی
ایشیتدی بشر آتین کوزدین توکوب آب	دیددی سیزگه روا یوق ای دُر ناب
انینگ دیک مرأه نی تفراغی ای مه	بیزینگ دیک یوزمینگ ایرنی قانیدین به
دریغا ایر آتین بولغاب یوروبمیز	عمامه بیر عبث چولغاب یوروبمیز
لچک آرتوق بیزینگ دستاریمیزدین	ایرانلار عار ایتور کـرداریمیزدین
هوس بازاریده ای میلی کوب نفس	ییمک بیرله قیلیب سن گردنینگ غفس
سنگا سود ایلامس بو جسم ورمینگ	قیلیب شر مینگ بیرار کیلمس مو شرمینگ
بولوب شرمنده لیک دریاسیده غرق	یمان و یخشینی فرق ایتماگان فرق

^۱ عَنْ أَبِي هُرَيْرَةَ، قَالَ: "بُئْسَ الطَّعَامُ طَعَامُ الْوَلِيمَةِ يُدْعَا إِلَيْهَا الْأَغْنِيَاءُ، وَيُتْرَكُ الْفُقَرَاءُ، وَمَنْ دُعِيَ إِلَى وَلِيمَةٍ فَلَمْ يُجِبْ فَقَدْ عَصَى اللَّهَ وَرَسُولَهُ"، مَا أَنَا قُلْتُهُ. [۶۲۵ : طبرانی].



شرح: بو قصه‌نی ایشیتگیل که امام احمد حنبل آلدی لاریگه بیر بیوه خاتون کیلیب (ای هادی قوم) ای اولوغ ذات اصلاً اویده چراغیم یوقدور، آیدین ده چرخ اوگورار ایردیم، جهان ایوانیدین آی باتیب پستگه توشوب کیتدی، شول اثناده ناگاه خلیفه چراغ مشعلی بیرله اوتوب قالدی انی یاروغیده تیزلیک بیرلان بیر-ایک یول چرخیمنی ایلاتنوروب ایپ اوگوروب آلدیم (ای زمانه‌میز اولوغی) اول اوگورگان ایپ منگا حلال بولورمی یا یوق؟ جواب بیرینگ دیدی. جوابیده حضرت امام بو غفلت عالمیده قنداغ خاتون سن که مونچه دیننی غمیده قالب سن دیگان لاریده، اول ضعیفه جواباً (ای مقبول همه) بشر حافی منی بیر آنه دین توغمه برادریم ایردی، دیدی. امام بشر حافی آتلارینی ایشیتیب کوزلاریدین یاش توکوب، ای دُر خالص مونداغ بولسه سیزگه روا ایرمس، دیدیلار. یعنی پرهیزگارلیکده سیزنی مرتبه و منزلتینگیز بلند، شو اوچون اول ایپ سیزگه حلال ایمس! ای اولوغلیک دعوی قیلوچی! انداغ خاتوننی چوریگان تفراغی بیزلاردیک یوزمینگ ایرککنی بدنیده یوروب تورگان قانیدین یخشی دور، یعنی انداغ خاتونلارنی اولوگی بیزلارنی تیریکیمیزدین یخشی دور. [مه] اولوغ معنی سیده، [به] یخشی معنی سیده دور. افسوس که ایرککلیک آتینی بولغاب یوروبمیز، باشیمیزگه بیهوده و عبث عمامه [دستار] سلّه [چولغاب] اوراب یورویمیز، بیزنی بو سلّه‌میزدین خاتونلارنی رومالی آرتوق دور؛ و قیلار ایشیمیزدین ایرانلار و مردلار عار و ننگ ایتورلار [لچک] رومال، قیقچه، لاکی، هر بیرنی اصطلاحی باشقه دور. ای هوی و هوسلیک جایلارگه بارورغه میل و رغبتی کوب کیشی کوب طعام بیماک و کوب شراب ایچماک و کوب عیش و عشرت قیلماک بیرله گردننگنی یوغان قیلیب سن، اما مونی یخشی بیلگیل که، آخرتده بو سیمیریب شیشگان جسمینگنی سنگا فائده‌سی تیکمس، بلکه اندین ضرر متحقق دور، مینگلارچه گناه و یمانلیکلارنی قیلیب یوروب بیرار بار حیا و شرمینگ کیلمایدی می؟ شرمنده و خجالتلیک دریا سیغه چومولوب و گناهگه باتیب هنوز یخشی و یمان یولنی فرق ایتیب اجراتمه‌گان باش قنداغ بی مغز باش دور. غفس یوغان معنی سیده، ورم شیش معنی سیده نظمه سکون را بیرلان دور سجع اوچون، اولگی [شر مینگ] لفظی [شر] یمان و [مینگ] هزار معنی سیده مرکب دور، ایکینچسی شرم و حیا معنی سیده و [نگ] خطاب بیرله مرکب دور. اولگی [فرق] مصدر جدا قیلماق و ایرماق معنی سیده، ایکینچسی [فرق سر] باش اورته‌سی معنی سیده دور.



موعظه

کیل ای عابد اوزونگنی ایلاغیل خاک	حرام و شبهه دین حلقینگنی قیل پاک
آچوق قول لیک، کشاده یولی بولغیل	مروت لیک، ملایم سوزلی بولغیل
بو خصلت لار موافق بولسه سنده	امید اول دور خداییم دیسه بنده
مسلمان اوغلیده بولسه سچوک تیل	آلیب کیلسه بولور بیر قیل ایله فیل
سچوک لفظی بیلان مرد خردمند	سالور زور اژدهانی آغزیغه بند
سچوک تیل بولسه قیسی محترمغه	سالور کوک داغینی زیر قدمغه
سچوک لفظی بیلان بی حرب و بی ضرب	بیراونی کیلتورورلار شرق دین غرب
بو ایرلار آلمایین بیر ایگنه قولغه	سالورلار نیچه گمره لارنی یولغه
سچوک تیل دور عجب گنج معظم	عطا قیلغان بیلان هیچ بولمغای کم

شرح: ای عابد، نفسینگنی اولدورروب اوزونگنی خاکسار ایلاغیل و متواضع بولغیل و شبهه و حرام دین حلقینگنی پاک ایلاغیل، قولی آچوق (سخاوتمند) یوزی و پیشانه سی باز، خوش خلق، مروتلیک و ملایم سوزلی بولغیل، بو خصال حمیده لار همه سی برابر سنده تاپیلسه امید شولکه الله سنی بندهم دیسه و قُل لیکغه قبول ایتسه، اگر بیر مسلمان زاده نی سچوک [تاتلی] تیلی بولسه، بیر قیل [موی] کبی اینگیچکه و نازک نمرسه بیرله فیل دیک کته بیر حیوان وحشی نی تارتیب زیر کنترول غه آلیب کیلسه بولور، ویا بیر قیل [بیر سوز] بیرله فیل کبی اولوغ حیوان نی زیر تاثیرگه آلیب کیلسه بولور، مرد خردمند [عاقل] کیشی افسون و دعا اوقوب دم سالیب زور کته اژدهانی آغزیغه بند سالیب اوزیغه مطیع و رام قیلور، چنانچه بو همه گه معلوم و مشاهد دور، ایلان بازلار ایلان نی تحت تاثیرگه آلیب و اسیر ایتیپ مردمگه کورساتیب یورارلار، بیر محترم معزز عالم نی سچوک تیلی بولسه و ادعیه و عزایم دین باخبر بولسه آسمانده گی (هواده گی) جن و شو کبی نمرسه لارنی ایاغ آستیغه توشوروب تحت تسخیرگه آلسه بولور، و اوروشمسدین و اورمسدین تنها شیرین تیل بیرلان بیراوانی شرق دین غربگه (اوزاق بیرلاردین) کیلتورور، بو سچوک تیل لیک ذاتلار بیر ایگنه کبی اسباب قولگه آلمسدین [کوب زحمت و مشقت



چیکمای [تنها توجه بیرله کوب یولدین اداشگان گمراهلارنی یولگه سالورلار، خلص کلام شولکه، سچوک تیل اولوغ گنج و توگامس خزانهدور، هر قنچه صرف ایتگان و بیرگان بیرله توگاماگای و کم بولماگای.

دیمه حرفی که بولسه بی معانی	اگر تیل هرزه بولسه سن تیل آنی
کلید گنج معنی کیم زبان دور	انگا بیر نقطه کوب اولسه زیان دور
اگر سوز جانه پیدا قیللمسه سوز	انی سوز دیمه گیل ای مجلس افروز
قیلور قتیغ تکلم اون ایشینگ چپ	سوزونگ تیکلاب کونگول بوزغونچه تیکلب
اگر سویسنگ اولوغلارنی ایشینی	نبات ایت تیل نه بات آغریت کیشینی
ساقو آيغونچه ای خلق زمانه	زبانہ خوفیدین مهـر ایت زبانه
چو نعمان مهریده بول ایردی مکتوب	قُلِ الْخَيْرَ وَالْأَفْسُكُتِ ای خوب
ساقو سوزدین بولور ایمان قرانغو	ضرردین اوزگا یوق دور نفع بیر مو
بهر جایی تیلینگی ساقلا زینهار	کیشی تیلنی یمانیدین بولور خوار
یمان تیل گاهی سرغایتور یوزونگی	توبان باشینگی تیلورتور کوزونگی
یمان تیل ایکی عالمده ضرر دور	گاهی عصیان گهی خوف و خطر دور
یمان تیل شوملیغیگه جان غه اورغای	گاهی جاندین اوتوب ایمانغه اورغای
مسلمان اوغلیغه یخشی قیلیق قیل	تیلنگی خوش چرایینگی ییلیق قیل
آغوزدین ساچ بیرینده دُر معنی	اگر بولماسه خاموش ایله یعنی
اگر بولماسه سنده سوزگه یتماک	نه دولت دور سکوت ایتماک، ایشیتماک
ایشیت اما قایو سوز بولسه بهراق	قولاقینگه انی حلقه قیلیب تاق
قولاق سالمه ولی بی معنی سوزگه	ایشیتسنگ قوب او بیردین اوزگه بیرگه



قولا ق، کوز دین، قولونگ دین، پالارینگ دین سوارار تینگلا تمام اعضا لارینگ دین

ایشیتسنگ نفعی یوق سوز ای نکو ذات انی هیچ گوشه آلمه گوشه چیق بات

کیشی سنچیق سوز ایتسه سن چیق اندین یماندین قاج، یماندین قاج، یماندین

شرح: بی معنی، بیهوده سوزنی سوزلاما غیل، اگر تیلینگ هرزه گوی، یاوه سرای بیهوده بولسه، انی تیلیب بولک- بولک قیلغیل و شریدین قوتولغیل. اولگی تیل لفظی زبان [لسان] معنی سیده، ایکینچیسى تیلماق دین امر دور، بولک-بولک قیل معنی سیده دور. معانی گنجی نی کلیدی [آچقوچی] زبان دور، بی زبان دلده گی سوزنی اظهار ایتماک محال دور، اما انگا بیر نقطه چه کیراک لیک دین آشوقچه سوز کیریب قالسه زبان و خسرانگه سبب دور، ویا خود زبان لفظیگه بیر نقطه قوشولسه زبان بولوب قالور. اگر کیشی نی سوزی و سخنی مردمگه تاثیر ایتیپ جانلاریگه سوز و گداز [کوبوش] پیدا قیلماسه، ای مجلس افروز انی سوز دیمه گیل. اولگی سوز لفظی سخن و گپ معنی سیده، ایکینچیسى کوبوش معنی سیده دور. قتیغ سوزلاماک اونگ ایشینگى چپ و بولادیگانى بولمس قیلور، تیک و درشت سوزلاب بیر اولارنى کونگلینی بوزوب خفه قیلگونچه لیبنگنى تیکیب سوزلاما غیل. اولگی تیکلاب لفظی [یاتوقنى ضدی] تونگ درشت ایتیپ معنی سیده مرکب دور، ایکینچیسى [تیک] تیکماق دین امر دور [لب] شفه معنی سیده مرکب دور. و تیک لب! سوزلامه دیگان دین کنایه دور. اگر اولوغ ذاتلارنى توتگان یول و قیلگان ایشلارینی سویسنگ و یخشی کورسنگ، تیلینگى نبات قندی دیک تاتلی و شیرین ایت و هیچ کیمنى تونگ سوزلاب تیز آغریتیب کونگلینی آزرده قیلیب قوبمه. اولگی نبات شکر دین قیلینگان مشهور شیرینی دور، ایکینچیسى [نه] نهی [بات] تیز معنی سیده مرکب دور. ای بو زمانه خلقی! [ای انسانلار] ساوق سوزلاگونچه و مردمنى دلینی آزرده قیلگونچه دوزخ اوتی الانگه سیدین قورقوب تیللارینگه مهر سکوت اوروب بیهوده سوزلار دین اوزلارینگى ساقلاسنگلار یخشی دور. اولگی زبانه اوت شعله سی و الانگه سی معنی سیده، ایکینچیسى [زبانگه] مخففى تیلگه و لسانگه معنی سیده دور. مقتدی و امامیمیز حضرت امام ابوحنیفه نعمان رحمه الله مهرلاریده **قُلِ الْخَيْرِ وَالْأَفْصَکُ** یازوغ ایردی، یعنی (یخشی سوزله ورنه سوزلامه) باید اول ذاتگه اقتدا قیلیب یخشی سوزلاب بی فایده یمان سوز دین اوزیمیزنى ساقلاساک - زیراکه ساوق و یمان سوز دین دل قرا بولوب ایمان قرانغولاشور، ضرردین اوزگه بیر موی قدریچه منفعتی یوق دور، هر جای و هر مقامده تیلینگى ساقلاب زبنهار یمان سوزلامه. چونکه انسان تیلینی هرزه و یمانلیگیدین خوار و ذلیل اولور، تیل یمانلیغی گاهی قوم و قبیل آلدیده یوزونگى سرغایتوروب، الارگه احتیاج و خجالت قیلور و گاهی باشینگى



قویی و کوزینگنی الار قولیغه تیلمورتورور، قیسقچه سوز شولکه یمان سوز ایگی عالمده ضرردور، گاهی سبب عصیان و گاهی باعث خوف و خطر دور، و انی شوملیغی گاهی انساننی جانیه اوروب عمریدین برکت تاپمسدین تمام عمری غم و اندوه بیرله اوتگای و گاهی جانیدین تجاوز قیلیب ایمانیغه اورغای و آغزیدین چیقغان یمان کلمه لار و کفر سوزلار ایمانینی خطرغه سالغای. شونینگ اوچون مسلمانلار مقابلیده یخشی قیلیق قیل و سچوک و یخشی تیل بیرله سوزلاب و چیرایینگ و یوزونگنی الارگه خلق خوش بیرله ایللیق و ایسیق کورساتگیل، موقع و جاییده آغوزدین دُر معینی ساجیب مردمگه پند و نصیحت قیل، اما اگر سوزنی موقعی بولمسه خاموشلیک اختیار ایتیپ سکوت ایتگیل، چونکه عالم و عاقل شولدورکه، موقع شناس بولسه جاییکه قراب سوزلاسه و جاییده سکوت ایتسه، اگر [بی علم و فضل لیک سببی دین] سنی مردمگه وعظ و نصیحت ایتیپ سوزلاشگه ییتمکگه لیاقتینگ بولمسه عالم لارنی سوزینی قولاق سالیب ایشیتیب و سکوت ایتماق قنداغ یخشی دولت دور، سوزلارنی ایشیتیب اما یخشی راق و ضروری راق سوزنی قولاقینگه ایسیرغه بلدان قیلیب تاقیب آلیغیل، یعنی اول سوزنی خوب قولاغینگده ساقلاب یادینگدین چیرماغیل، اما بی معنی و بیهوده سوزگه قولاق سالمسدین قیسی بیرده و هر مجلسده لایعنی بیهوده سوز ایشیتسنگ فوری او بیردین قوپوب [توروب] اوزگه بیرگه کیتگیل، چونکه تانگلا قیامت کونی الله تعالی قولاق، کوز قول، ایاغ بلکه تمام اعضا لارینگدین قیلگان ایشلاریدین سورار و الار شهادت بیورلار، چنانچه آیت لارده کیلگاندور، لهذا هر بیرده بی فایده سوز ایشیتسنگ انی قولاقغه آلمسدین انداغ مجلس لاریدین تیزلیک بیرلان اوزونگنی بیر گوشه گه آلیغیل و بیر چیکه گه چیقغیل. اولگی [گوشه] لفظی [گوشه] نی مخففی قولاقگه معنی سیده، ایکینچسی چیت و چیکه معنی سیده دور. اگر کیمسه سنگا قتیغ تیگادیگان سنچیق سوز ایتسه انی صحبتیده تورمسدین سن چیق غیل و مجلسنی ترک ایتغیل، سنگا تکرار تاکیدکه یمان آدم صحبتیدین قاچغیل. اولگی [سنچیق] لفظی سنچیلادیگان و قتیغ تیگادیگان معنی سیده، سنچیلماقدین مأخوذ دور، ایکینچسی [تو برای] و [أُخْرَجَ أَنْتَ] معنی سیده مرکب دور.

سنگا جاهل کیشی بحث ایتسه ای جان

نصیحت قیلدی فرزند یغه لقمان

مگر بولغای جهالت خمردین ساغ

جواب آلیغیل انگا شیرین و یومشاغ

بولور آغان سری جهلی زیاده

اگر نفع ایتماسه قیلمه اعاده

سکوت ایتمک دور اندین سونگ جوابی

انگا سود ایتمس ایماغ صوابی



شرح: حضرت لقمان حکیم فرزندلاریغہ نصیحت قیلدیلا رکه، ای جان بلام جاهل کیشی سنی بیرله مباحثه و مناظره ایتسه انگا شیرین و یومشاغ جواب بیرغیل، شایدکه جهالت خمیرنی مستلیکیدین ساغاییب یولگه کیلسه، اگر سوزینگ نفع ایتمای اول کیشی جهلیدین یانماسه، انگا قیتیپ سوزلامه و مباحثه گه ادامه بیرمه، چونکه تکرار آیغان سری جهلی زیاده بولور، توغری و صواب سوزنی ایتماق انگا فائده قیلماسه و اوز خطاسیغه اصرار ایتسه اول کیشی جاهل و احمق دور، انی جوابی سکوت دور.

ایگی مؤمن بیر - بیرغہ خیر قیلماق بیانیده

کیل ای مؤمن همیشه خوش عنان بول	مسلمان بولسه هر کیم مهربان بول
آچیلغای سن انی کورگاندہ گل دیک	تواضع ایله خدمتگار قُل دیک
سریغ یاغ دیک انگا بولغیل ملایم	سچوک لیکنی عسل دیک ایلا دائم
توت اول دوستونگنی سوت اوستیده قیماق	عزیز جانینگ چه کورغیل بلکه بهراق
خدانینگ بو یروغیدین تایسه ناگاه	برادر لیغ اوشل دور قیلسنگ آگاه
برادر جسمیگا جان دیک یوگورسنگ	تلف بیرله اول یولدین اوگورسنگ
اگر چندی که قیلسنگ مهربانلیغ	سنی آیغان سوزونگ بیلسه یمانلیغ
تلف بیرله اول کیم بولمسه توز	سچوک لیک رشته سینی ایلگیدین اوز
تیلینگ زخمی بیلان قیلغیل جراحت	اویالیب شاید ایتگای استماع
اگر تیل زخمی انگا قیلمسه کار	قولونگدین کیلسه قیلغیل ضرب ناچار
بولارنینگ برچه سی دور مهربانلیغ	ترحم دور انگا ایرمس یمانلیغ
بو سعی ایتگان بيله هیچ بولمسه توز	کورارده آشنالغ رشته سین اوز
ولی باطنده بول شاغل دعاغه	انی احوالینی سالغیل خداغه



کیشی کیم بولسه مؤمن لیکده موصوف	ایرور واجب او قُل غه امر معروف
کوزی یوق مؤمنی بارور ایدی راه	نظر قیلدینگ انینگ آلدیده دور چاه
خبردار ایتماسنگ اول دور خیانت	قایو انصاف ایرور قیسی دیانت
فغان و داد اوشل بینا قولیدین	اگر قیتارماسه دوزخ یولیدین
کیشی یاپسه قدوغ اوستیغه چادر	نچوک دیرسن انینگ دیک نی برادر
ولیکن امر معروف ایلاغان مرد	اوزی بولغای عمل لیک صاحب درد
اگر آمر ایمس راسخ ایشیگا	قچان تاثیر ایتار اوزگا کیشیگا
بیزینگ دیک شرمی یوق انصافی یوق جسم	باشیده مغز معنی یوق قوروق اسم
ایشیمیز دور ریا و حيله تزویر	قیلور آیغان سوزیمیز کیمگه تاثیر

شرح: ای مؤمن، همیشه خوش جلو بولغیل، سرکش بولماغیل و هر کیم مسلمان بولسه انگا رؤف و مهربان بولغیل، انی کورگانه آچوق یوز بیرله استقبال ایتیب گل دیک آچیلیب قُل و خادم دیک انگا تواضع بیرله پیش کیلغیل، انگا ملایم لیکده سریغ یاغ دیک و همیشه سچوک و شیرین لیکده عسل کبی بولغیل، اول مؤمن دوست و برادرینگی سوت اوستیده گی قیماق دیک محترم توتوب انی عزیز جانینگچه بلکه اندین یخشی راق کورغیل، ناگاه اول برادرینگ خداوند بویروغیدین تاییب نافرمانلیک قیلسه دوست و برادرلیک وظیفه سی شولکه انی قیلگان سهو و خطاسیگا ملتفت و آگاه ایتیب اول برادر جسمیگه جان دیک یوگوروب یخشی سوز و تلفت و مهربانلیک بیرله انی یمان یولدین قیتارسنگ، اما اگرچه مهربانلیغ بیرله نصیحت قیلیب آیغان سوزونگی [کمال جهالت دین] یمانلیغ دیب بیلسه و مهربانلیک بیرلان یخشی یولگه کیلیب توزوک بولمسه سچوک تیل لیک و شیرین سوزلیک رشته سینی و ایپی نی انی قولیدین اوزوب قتیغ سوزلاب تیلینگ زخمی بیرلان دلینی مجروح ایتکیل، شاید اوایل ب سوزینگ که قولا سالتسه [استماع لفظی افتعال بابیدین مصدر اولوب تای ضمیر خطاب فارسی قوشولگاندور، قولا سالتماق معنی سیده دور] اگر تیل بیرله قیلگان زخم انگا کارگر واقع بولوب خطاسیدین قیتامسه، ناچار اگر قولونگدین کیلسه انی اورغیل! بو ایشلار همه سی (اگر بیلسه) انگا مهربانلیغ دور و ترحم و شفقت دور، انگا یمانلیغ ایمس دور، بو قدر سعی و کوشش ایتگان و نصیحت و امر معروف قیلگان



بیرله احوالی توزالیب یخشى بولمسه کوچه-کوی ده کورگاندده و مجالس لارده ملاقی بولگاندده آشنالیک رشته سینی اوزوب حُبُّ فی الله و بُغْضُ فی الله که عمل قیلگیل، ولیکن ایچینگده انی حقیده دعای خیرکه مشغول اولوب انی قالگان احوالینی اللهنی اوزیغه سالیب بالکل انگا تفویض ایلگیل، شایدکه خداوند اوزی راه راستکه یول لاسه، چونکه هدایت الله قولیده دور، هر کیم مسلمان آتی بیرله مسمی و مؤمن لیک بیرله موصوف بولسه اول کیشیکه امر معروف و نهی منکر ایتماق واجب و لازم دور، یعنی امر معروف و نهی منکر تنها عالم لارکه واجب ایمسدور، بلکه همه مؤمن لارکه (علی قدر حال) بیلگانیچه لازم دور، چنانچه حدیث شریفده، مَنْ رَأَى مِنْكُمْ مُنْكَرًا فَلْيُغَيِّرْهُ بِيَدِهِ فَإِنْ لَمْ يَسْتَطِعْ فَبِلِسَانِهِ فَإِنْ لَمْ يَسْتَطِعْ فَبِقَلْبِهِ وَذَلِكَ أَضْعَفُ الْإِيمَانِ [حدیث ۱۸۶ : مسلم]، [۱۱۴۷۸ : مسند احمد] امام احمد و مسلم و غیرهما عن ابی سعید روایت لاری بیرله کیلگان دور و آیات قرآنی ده امر معروف و نهی منکرکه امر و ترغیب کوب جایده کیلگان دور و حدیث، کُلُّكُمْ رَاعٍ وَكُلُّكُمْ مَسْئُولٌ عَنْ رَعِيَّتِهِ [حدیث ۲۴۰۹ : بخاری]، [۴۸۲۸ : مسلم]، [۲۹۳۰ : ابی داوود]، [۱۷۰۵ : ترمذی]، [۴۴۹۵ : مسند احمد]، [۴۴۸۹ : صحیح ابن حبان] وارد دور، لهذا همه مسلمان لارنی اوز مقام و منزلت و علم و کمال لاریکه قراب اوز اوایلاریده و قیشلاق و شهرلاریده مسئولیت لاری باردورکه اوز باله-چقه لارینی و خویش و قوم لارینی و اهل محله و شهرلارینی یخشى ایشلارکه ترغیب و یمان ایشلار دین ترهیب ایتسه لار و قومی اعتلاسی بو ایشکه باغلوغ دور. ناظم رحمه الله بیر نیچه امثله بیرله اوز سوزلارینی توضیح و روشن ایتیپ دیرلار: بیر اعمی [کور] کیشی یولده بارور ایردی، کوردینگکه انی آلدیده چاه باردور و اگر بی خبر انگا توشسه مجروح و یا هلاک اولور، بیلیب توروب انی خبردار ایتماسنگ خیانت بزرگ اولدور، بو ایش قیسی انصاف و قنداغ دیانت دور، شونکه اوخشش جاهل و عامی لار کور کبی دور و عالم لار کوزلیک [بینا] لارکه اوخشار، داد و فغان و آه و افغان اول بینا [عالم] قولیدین، اگر مردمنی امر معروف و نهی منکر ایتیپ دوزخ یولیدین قیتارمسه، اما بیر کیشی قُدوغنی آغزیغه چادر یاپیب مقصد و نیتی انگا بیرار کیشی بیلمسیدین توشوب کیتسون و انی ایچیگا بیقیلسون بولسه انداغ کیشی نی قنداغ برادر مسلمان دیرسن، چونکه حدیثده، الْمُسْلِمُ مَنْ سَلِمَ الْمُسْلِمُونَ مِنْ لِسَانِهِ وَيَدِهِ [حدیث ۶۴۸۴ : بخاری]، [۱۷۱ : مسلم]، [۱۸۱ : صحیح ابن حبان]، [۲۴۸۳ : ابی داوود]، [۲۶۲۷ : ترمذی]، [۸۹۴۱ : مسند بزار] کیلگاندور، لیکن امر معروف و نهی منکر ایلای دیگان کیشی اوزی اوشل ایشگا عامل و انده ثابت و راسخ بولمسه قیلگان امر معروفی باشقه لارکه قچان تأثیر ایتار، بیزکه اوخشش بی شرم و بی حیا و بی انصاف جسم لار و باشیده مغز معنی یوق قوروق عالم و ملا اسمیکه قانع کیشی لارکه (همه میزنی ایشیمیز ریا و حيله و تزویر دور) قیلگان امر معروف و آیغان سوزیمیز کیمکه تأثیر قیلور.



کوزنی حرام دین یومماق بیانیده

کیل ای بنده اگر ترسنده بولسنگ	کوزونگنی ساقلاغیل هر قنده بولسنگ
قویی بولسون همیشه نقطه چشم	مبادا بولمغای بالا توشوب خشم
نظر قیلغونچه بد ای نفس معیوب	توشوب کوز نقطه سی کور بولغانی خوب
سعادتلی نظر بولسه قدمده	تجـاوز ایلاغاچ بولسه ندمده
اگر قان چشمه بولسه چشمه ای مه	خطرلیک بیرگا توشگان دین ایرور به
نه خوش دور دیده ترسنده بولسه	وگر نه کاسه سیدین کنده بولسه
خطر دین یوم کوزونگ اعلان و خیفه	نچوک کیم یومدی قورقوب بوحنیفه
یوراکیم صاف ایرور دیب اورماغیل لاف	الارچه بولمغای سن کیلتور انصاف
قرارینگ قویماسنگ ایلتیب قرارینگ	آلور شیطان زمام اختیارینگ
بقاسیز معصیت لارگه بقاسیز	نچوک اوز جانینگیزگه اوت یقاسیز
بناگه توشسه نامحرم بو کوزگه	ایکینچی باقماغیل زینهار او یوزگه
ایکینچی چونکه شهوت دین خطر دور	«نهایه» کیم کتـاب معتبر دور
دیدي کیم باقسه نامحرم یوزیگا	قویارلار تانگلا قورغاشیم کوزیگا
بیتیب دور شرعه ده اول صاحب بذل	کیشی کیم قیلسه نامحرم بیله هزل
ایننگ هر بیر سوزیگا ای خردمند	بولور دوزخده تامینگ ییلغه چه بند
اگر اول التزام ایتسه حـرامه	ینه اول نسخه ده تارتیلدی خامه
قیامت کون که دار و گیر ایتارلار	انی شیطان بیله زنجیر ایتارلار
لعین شیطان که بولغای دشمن شخ	ایننگ بیرله بولور مدخول دوزخ



«خلاصه» و «خزانہ»، «شرح اوراد»	بیتیب دور بلکه چندین نسخه ده یاد
جوان خاتون که نامحرم ایمنش دور	سلام ایتمک انگا مانع دیمیش دور
بیریب بولمس جواب ایتسه سلامی	ایرور عورت انی صوت و کلامی
جوان خاتون که عورت بولسه آواز	قباحت دور کیشی کیم بولسه دمساز
غرض ای آدمی ساقلا اوزونگنی	که نامحرم سری سالمه کوزونگنی
که نامحرم ساری باقغونچه بی قیل	به اول کیم کوزلارینگنه تارتسه لار میل
بو دنیا میلی اوتگای بیر زمانده	قیامت میلی دین توتغای امانده
قیامت کون عجب شدتلی کوندور	گنهکار آدم اوغلی سرنگون دور
قیزار کوب فرق سر ایسیغده چون طاس	بولور سرگشته چون پروانه دیک ناس
تیگار اوت دیک ایاغ آستیده تفراغ	بولور یون دیک زمین اوستیده گی تاغ
بولور کوب خلق اوزینی جانیدین سیر	بو غم دین تاکه کودک لار بولور پیر
یاشورماق بولسه قیسی روسیاه لیک	ایلیک سوزلاب ایاغ بیرگای گواه لیک
تمام اعضالارینگ دعوی قیلور لار	خلاق آلدیده رسوا قیلور لار
او کون دعوی سینی هیچ دفعی بولمس	پشیمان بولغای اما نفعی بولمس
انینگ دیک واقعه لاردین بورون راغ	اوزونگنی ایلا غفلت خمریدین ساغ
پشیمان بولسنگ اول قیلیمیش لارینگدین	دل و جان بیرله تانسنگ ایشلارینگدین
نه بولغای کیم قبول ایتسه خداییم	قیامت شدتین قیلسه ملایم
قایو قلنی خداییم قیلسه ممنون	بولور یول باشچی سی پیغمبر اول کون



فرشته لار کونگول بیرگوی دمام

باشیغه سایه بولغای عرش اعظم

او کون نینگ اوتکانین بیلمای قالورلار

عنایت نامه سین قولغه آلورلار

بو قلنی ایلاغیل اول کوندین آزاد

الهی ایلا مخلص لار بیلله یاد

شرح: ای بنده! اگر خدادین قورقسنگ، هر قیده انگا قراماغ نامشروع نمرسه لارگه باقماغدین کوزونگنی ساقلای، همیشه کوزونگنی نقطه نظری قویی بولسون، مبادا یوقاری توشوب قراماغی نمرسه لارگه قراب باعث خشم و غضب الهی بولماسون، (جنبه ادبی سی شولکه) چشمی آستیدهگی نقطه سینی آلیب یوقاریغه قویولسه خشم بولور، بیر آز اوزگاریش بیرله چشم جایینی خشم اشغال ایتور، ای عیبی کوب انسان یمان کوز بیرله نامشروع نمرسه لارگه قراغونچه کوزنی نقطه دیده سی یعنی نینگی و مردمکی آقیب توشوب کور بولغانی یخشی دور (جنبه ادبی سی) کوز لفظیدهگی زا نقطه سی توشسه کور لفظی ظاهر بولور بیر نقطه بدل بولوشی شونچه تغییرگه سبب اولور، نظر با سعادت همیشه قدمغه قراغان بولور، اگر ناخواست قدم دین تجاوز ایتیپ باشقه نمرسه گه قراب قویسه، ندامت و پشیمان لیکده بولور، خواجه گان طریقه نقشبندیه قدس الله ارواحهم دین بعضی کلمات موجز و جامع منقول دور: «نظر بر قدم، هوش در دم، سفر در وطن، خلوت در انجمن» هر بیر کوب معینی افاده قیلور، (ای اولوغ ذات) اگر قان چشمه کبی کوزگه تولوب انی بینالیکدین محروم ایتسه، کوز ساغ بولوب خطرلیک [شرعاً ممنوع] بیرلارگه توشگانیدین و قراگانیدین یخشی راق دور. اولگی چشمه لفظی بولاغ معنی سیده، ایکینچسی [چشمگه] نی مخفی کوزگه معنی سیده دور، یا بالعکس بولسه هم صحیح دور. سنده [دیده تر] [هول کوز] بولسه قنداغ یخشی دور، یعنی الله خوفیدین بیغلاب هول بولگان کوز سنده بولسه قنداغ یخشی بولور، ویا سنی دیده ترسندنگ [قورقادیگان کوزینگ] بولسه قنداغ یخشی دور، یعنی خداوند متعال عذابیدین قورقار کوزینگ بولوب، بو خوف سببیدین راه راستگه یورسنگ قنداغ یخشی دور، اولگی توجیه گه قراگنده ترسند لفظی [تر] هول [سند] در تو [فیک] معنی سیده مرکب دور، ایکینچی توجیه گه قراگنده [ترسند] قورقادیگان معنی سیده دور، و اگر کوزینگ مونداغ بولمسه (یعنی الله خوفیدین بیغلاب هول بولمسه) ویا الله عذابیدین قورقادیگان بولمسه [کاسه سیدین اوزولوب بیرگه آقیب توشکانی یخشی دور] خطرلیک ناروا نمرسه لارگه قراماق دین کوزونگنی آشکار اوقوب یومغیل، چنانچه حضرت امام ابو حنیفه رحمه الله قورقوب کوزلارینی یومدیلا، نقل ایتورلارکه، امامنی بیر شاگردلاری امرد چیرایلیک ایردی، درسگه کیلگنده



انی یوزیگه قرامای تدریس ایتور ایردیلا. اعلان لفظی آچماق و اظهار ایتماق و بیر نمرسه‌نی آشکارا قیلماق معنی سیده‌دور، خیفه لفظی خَاف یَخَاف دین مصدر قورقماق معنی سیده‌دور. منهی نمرسه‌لارگه نظر سالماقده شهوت بیرله قرامسمن یوراکیم صاف و پاک دیب لاف اورمغیل اوزینگ انصاف قیلغیل که کوزلارینی ساقلاب اوتگان حضرت امامگه اوخشش ذات‌لارچه بولالمس‌سن، پس بیهوده نظر دین اوزونگنی ساقلابیل، سن اگر قرارینگ و آرامینگ ایلتیپ نامحرم‌لارگه قرارینگ و نظر سالماغینگنی قویماسنگ، شیطان زمام اختیارینگ و جلونینگنی قولیغه آلیب سنی فواحش طرفیغه سوق بیورور، اؤلگی قرارینگ لفظی قراماغدین مأخوذ نظر سالماغینگ معنی سیده‌دور، ایکی‌نچیسى عربی قرّ یقرّ دین مصدر گاف خطاب بیرله مرکب آرامینگ معنی سیده‌دور، لذتی بی‌بقا، زودگذر گناه و معصیت‌لارگه باقه‌سبز و قرایسبز، بو تیزدین توگایدیگان لذت فانیه‌نی اختیار ایتیب قنداغ اوز جانینگیزگه اوت یاقیب عذاب دائمی‌نی تیلاب آلورسبز، چونکه عاقل کیشی بو ایشنی قیلمس. شاعری ایتور: «لاخیر فی لذة من بعدها سقر»^۱ اؤلگی بقاسبز آلورسبز، بی‌دوام و بی‌بقا معنی سیده‌دور، ایکی‌نچیسى نظر ساله‌سبز و قرایسبز معنی سیده‌دور، نامحرم خاتون و یا امرد خوشروی دفعه‌تاً ناگاه کوزگه توشسه و کورونسه فوراً کوزونگنی اندین قیتارغیل، ایکی‌نچی انی یوزیگه باقماغیل، چونکه ایکی‌نچی باقماقده خطر شهوت باردور، لهذا ممنوع‌دور. کتاب نه‌ایه شرح هدایه کیم معتبر کتاب‌لاردین دور، انده ایتیب‌دور: نامحرم‌نی یوزیگه [شهوت بیرلان] نظر سالسه قیامت کونی کوزیگه قورغاشیم‌نی ایریتیپ قویورلار. صاحب بذل و کرم شرعة الاسلام کتابینی ایگاسی بیتیب‌دورلارکه: هر کیم نامحرم خاتون بیرله هزل و مزاح قیلسه هر بیر سوز و کلمه‌سیغه دوزخده مینگ ییل بندی و محبوس قالور، اگر اول کیشی حرام‌نی التزام ایتسه، یعنی زنا قیلسه (ینه اول «شرعة الاسلام» نسخه‌سیده یازیلیمیش‌که) قیامت کونیده پروردگار امری بیرلان فرشته‌لار دار و گیر [توختات و اوشلا] فرمانیغه عمل قیلیب انی مجرم‌لار قطاریده اوشلاب شیطانگه قوشوب زنجیر بیرله باغلاب اول دشمن سخت بیرله دوزخگه کیرگوزورلار، «خلاصة الفتاوی» و «خزانة الفتاوی» و «شرح اوراد» بلکه باشقه نیچه کتاب‌لار نسخه‌سیده یازیب‌دورلارکه، نامحرم جوان (یاش) خاتونگه سلام قیلماق ممنوع‌دور، اگر اول سلام بیرسه انگا جواب بیریب بولمس، چونکه خاتون کیشی سوزی و آوازی عورت‌دور، لهذا اینینگ بیرله یات کیشی‌نی دمساز و هم‌کلام بولوب سوزلاشماغی درست ایمسدور. (ای انسان عاقل!) بو قدر بو خصوصده سوزنی چوزوب تاکید ایتماقدین غرض شولکه، باید اوزونگنی و کوزونگنی نامحرم طرفیغه

^۱ ترجمه: لذت‌نینگ کینیده سقر بولسه، او لذتده خیر یوق.



نظر قیلماقدین و ایننگ بیرله همنوا بولماقدین ساقلایغیل، چونکه نامحرمگه قراگونچه کوزلارینگه میل تارتیب کور قیلسه لاریخشی راغدور، بو دنیا میلی نی عذابی بیر ساعتده اوتار، الله قیامت میلی عذابیدین ساقلاسونکه، ابدی دور. [میل] بیر تیمور سیخ دور که انی لخرجه اوت قیلیب (قدیمده) مجرم لارنی کوزی مقابلیده یقین توتوب تورار ایردیلا، تاکه کوزنی نورینی آلیب کور قیلور ایردی، قیامت کونی عجب قتیغ کوندور مجرم و گنهکار انسان باشی قویی و شرمنده دور، آفتاب یقین قیلیب ایسیغده انسان باشی طاس دیک قیزار، آدم لار پروانه [کفلک] دیک سرگشته و سرسان بولورلار و حیران و سرگردان یورورلار. [طاس و تاس] مس کاسه معنی سیده دور، ایاغ آستیده گی تفراغ کمال ایسیغدین اوتدیک تیگار بیر یوزیده تاغلار جون دیک تیتیلیب توزوب کیتار، آیه: **يَوْمَ يَكُونُ النَّاسُ كَالْفَرَاشِ الْمَبْثُوثِ [٤] وَتَكُونُ الْجِبَالُ كَالْعِهْنِ الْمَنْفُوشِ [٥]** : القارعة] بو سوزگه دلیل دور، کمال عذاب قتیغلیغیدین کوب گنهکار انسان لار اوز شیرین جانلاریدین تیوب بیزار اولوب یاش باله لار او کون غمیدین قری بولورلار، آیه: **يَجْعَلُ الْوِلْدَانَ شِيبًا [١٧]** : المزمل] بو سوزگه دلیل دور، قیسی بیر کیشی اوزینی یوزی قرالیگی [گنهکارلیگی] نی یاشورماقچی و بیکیتماقچی بولسه قول و ایاغی سوزلاب انی خلافیگه گواهییک بیورورلار، بلکه تمام اعضالاری انی اوستیغه دعوی قیلیب خلاق حضوریده انی رسوا و شرمنده قیلورلار، او کوننی دعواسی بو دنیا دعواسیگه اوخشامس و انی دفعی هم بولمس، اولکون قیلگان لاریدین پشیمان بولور، اما بو پشیمانلیکنی نفعی بولمس، آیات: **يَوْمَ تَشْهَدُ عَلَيْهِمْ أَلْسِنَتُهُمْ وَأَيْدِيهِمْ وَأَرْجُلُهُمْ بِمَا كَانُوا يَعْمَلُونَ [٢٤]** : النور]؛ **حَتَّى إِذَا مَا جَاؤُوهَا شَهِدَ عَلَيْهِمْ سَمْعُهُمْ وَأَبْصَارُهُمْ وَجُلُودُهُمْ بِمَا كَانُوا يَعْمَلُونَ [٢٠]** وَقَالُوا لَجُلُودِهِمْ لَمْ شَهِدْتُمْ عَلَيْنَا قَالُوا أَنْطَقَنَا اللَّهُ الَّذِي أَنْطَقَ كُلَّ شَيْءٍ [٢١] : فصلت] بو سوزگه دلیل دور. اولوب مونداغ واقعه لار باشغه کیلمسیدین ایلگاری اوزونگی غفلت شرابی مستلیغیدین ساغایتوروب اوتکان قیلیمیش لارینگدین پشیمان بولسنگ و قیلگان یمان ایشلارینگدین قیتیبتوبه قیلسنگ (عجب ایمس) و شایدکه پروردگار مهربانیم توبه نگی قبول ایتسه و آخرتده قیامت قتیغلیگینی سنگا ملایم قیلسه، الله تعالی قیسی قُلینی فضل و احسانی بیرله ممنون ایتسه اول کون یولباشچیسو و شفیع و هادیسو حضرت پیغمبریمیز رسول الله بولورلار، عرش اعظم انی باشیغه سایه بان بولور دمبدم هر نفس فرشته لار انگا دلدارلیک بیریب کونگیلنی کوتارورلار، عنایت نامه الهی (نامه اعمال) نی قولغه آلیب او کوننی نیمه بولوب اوتکانینی بیلمای قالورلار، الهی بیزدیک عاصی لارنی قیامت کونی مخلص و متقی بنده لارینگ بیرله و الار قطاریده حشر ایتیبت الار بیرله یادلاگیل، خصوصاً بو غریب قُلنی اول کوننی شدتیدین آزاد ایتگیل.



حکایت بایزید بسطامی علیه الرحمه

قريغان پله سیده شیخ بسطام	اوزیدین ساعتی کیتتی بیر آقشام
اوزیگه کیلدی ایرسه آیدی اصحاب	نغو بولدونگ مونینگ دیک ای دُر ناب
دیدى بالغ بولور حـالتده بیر راه	کوزومگه بیر جمیلـه توشدی ناگاه
یانیب بار دگر سالدیم نـگاهیم	چیقیب ایردی ایسیم دین اول گناهیم
ایسیمگا توشدی حـالا اول نظاره	یوراکیم بولدی قـورقوب پاره-پاره
مبارک آغزیدین کوب تامدی قانی	اوشل خوف ایله آخر چیقـدی جانی
مونینگ دیک ییغلاسه انداغ نکو رای	بیزینگ دیک روسیه نی حالـیغه وای
همیشه ذوقیمیز عیش و کولوشگا	ییتوشماس ایرته قیلغان توبه توشگا
اوتار دنیا ایشین توتدوک مقدم	گنه آینوقسه کوب قورقونچی میز کم
خداوندا، اوزونگ سن عالم غیب	من مسکینده دور هیچ سانی یوق عیب
گناهی بی نهایت بنـده دور من	بوکوب شر منده چون شرمنده دور من
عبث بیرله قولوم دین کیتتی وقتیم	عمل مهرین یاشوردی ابر مقتیم
جریمم بی عدد بولسه اگر چند	حجاب مغفرت یاپ ای خداوند
یووب رحمت بیلان وجهیم قراسین	نصیب ایت برچه نعمتلار سراسین

شرح: حضرت شیخ بایزید بسطامی رحمة الله علیه بیر آقشام قریغان پله لاریده بی هوش بولوب اوزلاریدین کیتدیلا، هوشلاریگه کیلگاندین سونگره اصحابلاری نچوک مونداغ بیهوش بولدینگیز، ای دُر خالص و پاک دیب سوراگانلاریده جواباً بلاغتگه ییتار وقتیمده بیر یولی ناگاه کوزومگه بیر چیرایلیک خاتون توشدی، قیتیپ ینه انگا قرا دیم، اول گناه ایسیمدین چیقیب ایرکان حالا اول ایسیمگه توشوب قورقونچیدین یوراکیم پاره-پاره بولدی، دیدیلار. مبارک آغزیلاریدین کوب قان کیلیب اوشل قورقونچ بیرلان آخر جانلاری چیقـدی، انداغ نکو رای یخشی



ذات مونداغ ییغلاسه لار، بیزلاردیک گناه بیرله یوزی قرالارنی حالیغه وای دور، بیزلارنی ذوقیمیز همیشه عیش و عشرت و مزاح و کولوشگه دور، ایرته بیرلان قیلغان توبه میز توش وقتیکه بیتمای سینور، تورت کونلیک اوتار دنیا ایشینی آخرت ایشیدین مقدم توتدوک، اینوقسه گناه کوب و قورقونچیمیز آزدور. [اینوقسه] خصوصاً معنی سیده دور. خداوندا اوزونگ عالم غیب و دانای اسرارسن! من بیچاره ده حد و حسابی یوق عیب لار باردور، گناهینی انتهای یوق بنده نگ من بوکوب یمانلیک لار منده بارلیگی اوچون شرمنده و خجالت دورمن، اولگی شرمنده مرکب اولوب [شر] یمان [بد] معنی سیده [منده] در من و [فی] معنی سیده دور، بیهوده و عبث یورماق بیرله عمروم اوتوب وقت عزیز قولوم دین کیتدی، عمل آفتابی ضیاسینی گناهیم بولوتی قارانغولیگی یاپدی و یاشوردی [مقت] قتیغ یمان کورماق معنی سیده، اما بو بیرده گناه معنی سیده دور، چونکه گناه سبب مقت الهی دور. ای خداوند مهربان، اگرچه گناهیم بی عدد و بی حساب بولسه ده الار اوستیغه حجاب مغفرت یاپیب ستر ایتغیل و رحمت سوی بییرلان یوزیم قراسینی یووب برچه نعمت لارینگ سره و یخشی سینی منگا نصیب ایتگیل. [سره] یخشی و خالص و پاکیزه معنی سیده دور. ناظم ^{رحمه الله} اشباع ایتیپ [سرا] دیب دورلار ویا [سرا] اوی و یا کته اوی معنی سیده، مراد جنت اویی بولوب معنی سی (همه ناز و نعمت لار انده تاپیلادیگان جنت سرایینی و اویینی منگا نصیب ایتگیل، دیب توجیه ایتسه بولور).

خدانی نعمت لاری غه فکر ایلاماق بیانیده

کیل ای آزاده واقف بول کون—گولغه	کونگول یول باشچی دور قربتلی یولغه
تفکر نینگ قوشین هیچ قیلمه غافل	پلغده بولمغای تا بیض—ه دل
تفکر مرغی دائم بولسه دم سـاز	امید اولدور که اندین اوچسه شهـباز
انینگ دیک باز ایلینگغه ایلاسنگ قید	کونگول قوشلارینی قیلسه بولور صـید
کونگول هر که صلاحیت ده بولسه	تاپار بنده قایو نیت ده بولس—ه
همه اعضا رعیت دور کونگول شاه	امانلیغ بولغوسی شاه عدلی دین راه
اگر سلطان اوزی قیلسه یمان لیغ	قچان بولغای رعیت ده امان لیـغ
کونگول جوش ایتمسه کوز بولمغای نم	چیقارمو سو قروقغه تاشماسه یـم



نظرگاه دور کونگول بیر بولسه هرگاه	ایشیتگان سن انی دل دور نظرگاه
قچان لایق بولور انداغ شرف—غه	یوگورسه اول کونگول کیم هر طرفغه
تمامی معرفت دور گنج ح—ق دور	کونگول درسینی دیرلار خوش سبق دور
تلطف دین دیدی سورمه بو بیر دین	کونگول درسین سوال ایتدیم بیر ایر دین
اوزونگنی یخشی لارگه قاتمه گونچه	بیله آلمنگ بو شربت تاتمه گونچه
تیریک ایرمس اگر چه بولسه جانی	اگر آنی اونوتسه بن—ده آنی
دوام اولدور دوام ایتسام تذکر	کونگول برچیده غفلت علتی پُر
آغیز دین چیقسه غفلت بیرله یعنی	اوشل دمنی ندم دیر اهل معنی
قچان بولغای مونینگ دیک یخشی پیشه	کونگول انده همیشه قیل همیشه

شرح: ای دنیا محبتی دین آزاده دلینگه واقف و آگاه بول، چونکه دل الله گایقین قیلادیگان یولگه باشلاغوی و راهبر دور. تفکر و مراقبه قوشینی هیچ وقت دل حضانتی دین غافل و بیخبر قیلمه مبادا اول یومورته سی (تخمی) پلغده بولوب خراب اولماسون. (پلغده) گندیده (فاسد) معنی سیده فارسی دور. تفکر تاووغی دل اوستیده همیشه دمساز، همدم، مراقب بولسه امید شولکه اوشل تخمدین شهباز قوشی وجودگه کیلیب اوچماقغه باشلاسه. ناظم ^{رحمه الله} دلی بیر تخمگه تشبیه ایتیپ و تفکر و مراقبه نی انی حضانت و تربیه سیگه اوخشاتیب دورلار و حضانتی دین غفلت بیرله انی فاسد بولماغینی تاووغ بی پروالیگی بیرله تخمنی پلغده بولوشیگه، و اگر تامدت معینه یخشی مراقبت و حضانت ایتیلسه، دل بالکل زنده بولماغینی تاووغ تخمنی یخشی باسکانده اندین چوچه تیریلیب چیقماقیغه تشبیه ایتیپ دورلار. انینگ دیک شهبازی صید ایتیپ قولغه کیلتورسنگ و باغلا سنگ اول قوش بیرله دل قوشلارینی شکار قیلسه بولور و مردم اهلینی اوزیغه جذب ایتیپ تارتسه بولور. انساننی دلی وقتیکه صلاح یولیده و همیشه یاد خداده بولسه اول بنده قیسی نیتده بولسه انگا بیتور و تاپور، چونکه باشقه همه اعضاً بمنزله رعیت و دل بمنزل پادشاه دور، پادشاه عدالتیدین یوللار امانلیک و تینچ بولور، شو کبی



دل یخشی یولده صلاحیتده بولسه، باشقه اعضالار انگا قراب یخشی یولده و صلاحده بولورلار، اما اگر پادشاه اوزی اوغری باشی بولوب یمانلیغ قیله باشلاسه رعیت بیچارهده قچان امانلیغ و تینچلیک دین اثر تاپیلور، شونگه اوخشش دل هم یمان وادی ده بولسه باشقه اعضالار هم انگا تابع بولوب همه سی گناه قیلماقغه باشلار، و صلاح اورته دین کیتار. دل جوش اوروب قیناماسه کوز نم بولمغای و بیغی کیلماغای، دریا تاشماسه قروق دشتلار که سو چیقماغای، دلنی نظرگاه حقلیگی اوتکان عزیزلار سوزلاریدین ایشیتگان سن، اما دل هرگاه نقطه نظری بیر بولسه و خاص الله یادیده و ذکریده غرق بولسه نظرگاه حق دور، ولی اول دلی که هر طرفگه یوگوروب تشنت نظرگه گرفتار اولسه انداغ اولوغ شرفگه قچان لایق دور و نظرگاه حق بولماق، اندین کوب اوزاق دور. ناظم ^{رحه} الله طریقت و تصوف یولیده دلنی خاص الله گه متوجه بولماغینی حصولی یولینی و انی خاص اهل اللهلار بیرله هم صحبت بولماق و ذکرگه دوام ایتماق بیرله قولغه کیلماغینی بو ابیاتلارده ذکر ایتیپ دورلار، دل درسینی عارفلار کوب یخشی سبق و اینگ اعلیٰ درس بیریب دورلار، چونکه معرفت الله و ذکر اللهگه متعلق دور، لهذا اشرف دروس دور، همه سی به تمامه معرفتگه متعلق بولوب گنج و خزانه حق تعالی دور. بیر مرد حق دین دل درسی دین سوال ایتدیم، از روی لطف و مهربانی بو بیردین سورامه، دیدی (چونکه سوز بیرله تعریف ایتیپ بیلدیرماق ممتنع دور). بو شربتینی مزه سی تاتماگونچه و اوزونگنی یخشیلار و اهل اللهلارگه قاتماگونچه و قوشماگونچه بیله آلمایسن، خلص کلام شولکه، اگر بنده آنی و لحظه یی اللهنی اونوتوب یادیدین چیقارسه و غافل بولسه، اگرچه جانی تنیده بولوب تیریک بولسه ده اولوکلار قطاریده دور. اولگی آنی لفظی اندک زمان و لحظه و وقت معنی سیده، ایکینچیزی الله تعالی گه اشارت دور، اصلی آنی دور، اشباع ایتیپ آنی ایتیلگان دور، دل برجی و قلعه سیده غفلت علتی پُر و توله دور، بو علت دین توزالماق اوچون منی دوا و دارویم شولکه همیشه اللهنی (اگرچه تکلف بیرله بولسه ده) ذکر و یاد ایتسم اهل معنی و متصوفلار اوشلدم و نفسنی باعث ندامت و پشیمانی دیرلارکه، آغوزدین غفلت بیرله چیقسه. اولگی دوام مخفف (دواییم، دارویم) معنی سیده، ایکینچیزی دایم و همیشه معنی سیده دور. دم نفس معنی سیده، ندم پشیمانی معنی سیده دور. ای شه دلنی همیشه الله یادیده قیلماق قصیده بولغیل، ذکر اللهگه اوخشش یخشی ایش و کسب قچان موجود بولغای. اولگی همیشه لفظی دایما و همه وقت معنی سیده، ایکینچیزی (هم) قصد معنی سیده (ای شه) بیرله مرکب دور، ویا (هم) غم معنی سیده یعنی دلنی همیشه الله یادیده قیلماق غمیده بولغیل دیب توجیه ایتسه بولور.



بندۀ مؤمن عشقده حریص بولماغی کیراک

کیل ای صادق حریص عشق حق بول	کونگول یارانای بیرله هم سبق بول
اگر کیزسنگ طریق معرفت نی	میسر ایلاسنگ تورلوک صفت نی
مقامات حقیقت ایلاسنگ طی	کونگولده بولماسه جز خَلَّت حـی
بورونگی دین زیاده در طلب بول	اگر دریالار ایچسنگ خشک لب بول
بو یول نینگ چونکه هیچ پایانی یوق دور	اگر بیتدیم دیسنگ امکانی یوق دور
دیگیل هر لحظه اَللّهُمَّ زِدْنِی	دیدى حق چونکه فَاطْمَةُ تَجِدْنِی
طلب امرین ایشیتسه بنده رب دین	اوزین بیلگان قچان قالغای طلب دین
نبی دین یوق کیشینی قربی بالا	انى آیدی حبیبیم حق تعالی
انگا هم ایدی حق قُلْ رَبِّ زِدْنِی	قویارمی اوزگالار بو جهد و جدنی
سچوک جان شربتی تا بولسه لبدده	کیراک کیم بنده سی بولسه طلبده
بیلینگنی قوتی بارده آلیب بیل	کونگول باغین سوغار اوتماى توروب سیل
بیتار یول یورگانی حالا که حالینگ	یوروی کور بیر کونی کیتگای مجالینگ
یورورگا بولمسه وقتی که درمان	ایمکله قالماسون تا ایچده ارمان
ایمکلار قوتی هم کیتسه قولدین	اوزونگنی سودره هرگز قالمه یول دین
بیتوشمس سودره یورگا هم مجالینگ	کوزونگ تیک یولغه تا بیتگونچه حالینگ
کوزونگ هم اوتماسه بولسون کونگولده	بو مطلب بیرله جان چیقسون بو یولده
اگر مونداغ طلبده چیقسه جانینگ	اولانسه باقی اویگه جسم فانینگ



امید اول دور خداییم دیسه بنده تیلاگان مقصدینگنی بیرسه انده

شرح: ای طالب صادق حق تعالی عشقی و محبتیده حریص بول! اهل دل اهل طریقت متصوفلار بیرله هم درس و هم سبق بول! اگر راه معرفتنی تماماً کیزیب و تورلوک صفت و رقم-رقم احوالارنی حاصل قیلسنگ و مقام حقیقتنی تمام یوروب طی ایتیب دلینگده خدای حی قیوم محبتیدین باشقه نمرسه بولمسه هم ایلگار یگیدین کوبراق طلبده بول، اگر بحر محبت سوییدین دریالار ایچسنگده قوروغ لب بول و طالب زیاده، چونکه بو یولنی هیچ آخری و ایتاکی و پایانی یوقدور، اگر مقصودغه ییتدیم دیسنگ، انی امکانی یوقدور، کیشی تا اولمسه ییتمس، شونینگ اوچون هر آن، **اللَّهُمَّ زِدْنِي دِيْبَ طَالِبٍ زِيَادَةً بَوْلَغِيْلٍ**؛ چونکه حق تعالی، **فَاطْلُبْنِي تَجِدْنِي**، یعنی منی طلب قیل و آختار تاپارسن دیدی. بنده طالب پروردگاریدین طلب امرینی یعنی **أُطْلُبْنِي** ایشیتسه اوزینی بیلگان کیشی قچان طلبدین قالغای، هیچ کیمنی الله گه قری پیغمبردین زیاده و بلند ایرمس، الله تعالی اول ذاتنی حبیبیم دیدی. الله تعالی قرآن کریمده اول ذاتگه خطاب قیلیب، **وَقُلْ رَبِّ زِدْنِي عِلْمًا** [طه: ۱۱۴] یعنی ای محمد، آغیل، خدایا علمیمنی زیاده قیل، دیدی. شو اوچون باشقه افراد امتلار معرفت حصولیده بو جد و جهد و کوششنی قوبارلارمی؟ البته قویمسه لار کیراک، تاکه جان تنده و انی شیرین شربتی لبده بولسه بنده سیغه لازم که طلب یولیده بولسه، اما یاشلیک وقتی و جوانلیک ایامیده گی خداجوی لیکنی کوب فضیلتی اولوغ دور، لهذا بیلینگنی قوتی بارلیک وقتیده همت بیلینی قولغه آلیب باران رحمت سیلی بیرله کیلگان سو اوتوب کیتمای توروب دل باغینی سوغاریب آل و دلینگنی یاد خداغه مشغول ایلا. حالاکه یول یورگالی حالینگ و درمانینگ ییتادور، یوراکورغیل و طلب آرقه سیده بولغیل! آخر قریب بیر کون مجالینگ و قوتینگ کیتیب وقتی که طلب یولیده یورماقگه درمان و قوت بولمسه تورت ایاغلاب (ایمکلاب) یور، تا ایچینگده ارمان قالماسون، اگر ایمکلار قوتی هم قولدین کیتیب یاتیب قالسنگ، اوزونگنی بیرگه سودراب مطلبگه بارماقغه کوشش قیل و هرگز یولدین قالمه. اگر سودرالماقغه هم قوت و مجالینگ ییتماسه تا حالینگ ییتگونچه کوزونگنی یولغه تیکیب شوقده بولغیل، اگر کوزونگ بی نور اولوب اوتمای کورمای قالسه، باید اول طلب شوقی دلده بولسون، تاکه شو مطلب یولیده جان چیقسون، **لَا يَكْلَفُ اللَّهُ نَفْسًا إِلَّا وُسْعَهَا** [البقرة: ۲۸۶] اگر بو یوقاریده ایتیلگان طریقه بیرله طلب یولیده جانینگ چیقسه و جسم فنا پذیرینگ آخرتنی باقی اوییگا اولانسه و ییتوشسه، امید شولکه خداوند کریم بندهم دیب آخرتده تیلاگان مقصدینگنی بیرسه و دیدارینی کورساتسه.



تنبيه: اُطْلُبْنِي تَجِدْنِي لفظیده حدیث قدسی منی نظریمدین اوتما دی^۱، لاکن شیخ عبدالقادر جیلانی گه منسوب بیر قصیده ده [أَنَا الدِّيَانُ فَاطْلُبْنِي تَجِدْنِي***أَنَا السُّبْحَانُ فَاطْلُبْنِي تَجِدْنِي] وباشقه مصرع لاریده هم تکرار فَاطْلُبْنِي کیلگان کوردوم، لاکن سندینی کورمادیم، هر کیم تاپسه بو بیرگه الحاق ایتسون.

مؤمن بنده کیراک کیم دایم خوف و رجأ ده بولسه

کیل ای خائف اولومنی یادین ایتگیل	کیتار منزلنی استعدادین ایتگیل
لَبْن تیرمای توروب مرقد لبین خلق	قویارسن مو تفکر بابینی غلـق
یغیب هیمه وهیمه قیلمای انـده	یاتیب سن اوستیده غفلتلی بنـده
اولومنی اوقی تورغان دور سویانیب	ایوانیب اورتمای قاچغیل اویانیب
ایوانمسدین برون اور تانسنگ ای قُل	مبادا بولماغای کل ایشالارینگ کل
بورونغه بار غم ایسمای بورونراغ	اوزونگنی قیل هوس سکرانیدین ساغ
یاپوشمسدین برون سونگا کینگه پوست	اولوم بیرله اوزونگنی ایلاغیل دوست
یقین بیل کیمنی کوبراق ایلاسنگ یاد	بولور دوستونگ سنی ای آدمیـزاد
بیلور هر آدم اوغلی بولسه اویغاغ	وطن نینگ اصلی دور بیزلارگه تفراغ
یقین بیلغیل جهان پر خطر غـه	کیلیب میز نیچه کون سودا ایتارغه
بیتوشگاچ اوشبو شهر محترفـگا	یاییلدی کاروانی هر طرفـگا
اوزین بیلگان لاری کیم یولگه سالدی	حَیَل سیز نقد عمرین قولغه آلدی

^۱ اگرچه اونگده هم کورساتدیک، ینده مناسب کیلتوریشنی مناسب کوردیک، يَقُولُ اللَّهُ تَعَالَى: يَا ابْنَ آدَمَ اُطْلُبْنِي تَجِدْنِي فَإِنْ وَجَدْتَنِي وَجَدْتُ كُلَّ شَيْءٍ وَإِنْ فَتُك فَاتَكَ كُلُّ شَيْءٍ وَأَنَا أَحَبُّ إِلَيْكَ مِنْ كُلِّ شَيْءٍ. [ص ۱۹۸، ج ۶، تفسیر ابن کثیر]، [ص ۱۲۶، ج ۱، الخلاصة فی شرح حدیث الولی، إعداد: علی بن نایف الشحوذ]، [ص ۱۲، ج ۴، جامع العلوم والحکم] محقق، تألیف: الإمام الحافظ الفقیه زین الدین أبی الفرج عبد الرحمن بن شهاب الدین البغدادي ثم الدمشقي الشهير بابن رجب المتوفى سنة [۷۹۵ هـ]



میسر قیلدیلار طاعت قماشین
 سفر رختینی باغلاب قیلدیلار رست
 کیرار لار یول لاریغه خرم و شاد
 کورار بول فانی اوینی باغ خندان
 اونوتقای لار اوشل کیلگان دیارین
 کونگول بیرگای هوس بیرله هوی گه
 مینگ الوان جلوه بیرلان آلداری آنی
 سیونگان دین کیرار شیطان اویونغه
 یوگورتور سرمه غفلت کوزیغه
 تطف بیرله دیر ای آدمی زاد
 بو کون گر بولمسه تنگلا قیلورسن
 ادا قیلغای جمیع نقد عمرین
 بیرور رخصت قاشیدین چست و چالاک
 دیگای بیزار ایرورمن سن دیک ایردین
 اورار شته انی دنباله سیغه
 انگا اصل وطن نی حکمین ایتگای
 کیتارغه توشه پیدا قیلغانیم یوق
 قچان مهلت قویار لار بیر نفس گه

اوروب یخشی دکانلار اوزره باشین
 قیلیب سودالارینی چابک و چست
 قچان یوک قوی دیسه تیار ایرور زاد
 ولیکن کارواندین بعضی انسان
 کوروب یخشی انی نقش و نگارین
 قولاق سالغای تغنی و نواگه
 عجب مکاره دور دنیای فانی
 اوشل مکاره کیم سالسه قویونغه
 کیرار انسان انی یلغان سوزیگا
 گهی اویغانیب اوینی ایلاسه یاد
 آشوقمه بیر کونی سودا قیلورسن
 بو آل ایله اوشل مکاره دین
 ادا قیلغاچ بساط عمرینی پاک
 اورار سیلی و دیر کیتگیل بو بیردین
 نظر قیلمس فغان و ناله سیغه
 امیر کاروان اول دمده بیتغای
 فغان ایلار کیتارنی بیلغانیم یوق
 فغان سود ایلامس اما او کس گه



چیقارورلار جهان بی بقادین

قویولمای ایرکیغه سودراب بقادین

کیتار اصلی وطنکه دست خالی

کیین قیتای دیسه بولمس مجالی

باشینگدین آنچه اوتکان ماه و سالینگ

بو دور ای آدم اوغلی حسب حالینگ

ییمه شیطان ملعون شته سینى

قولاقغه تیقمه غفلت لته سینى

سویوب من ديب کوزونگا قم قویوبدور

سیونمه گر سنى دنیا سویوبدور

ازلدین دشمن جان بیلگیل آنى

کیمه کورساتدى بول فانی وفانی

شرح: ای قورقوچی بنده! اولومنى یادلاب و آخرتنی ایسگا آلیب کیتار منزلنی استعدادین ایتیپ انگا تیارلیک کورگیل (سن اولوب) مرقدینگ و قبرینگ لیبگا مردم خشت تیرمای توروب تفکر و تذکر ایشیگینی بیرکیتیپ قویارسن مو؟ اولگی لَین لفظی خشت معنی سیده، ایکینچیسى کناره معنی سیده دور، گناه اوتونینی بیغیب سن، غفلتلی بنده انی یانیب کویدوروشیدین قورقمای و وهیمه قیلمای انی اوستیده یاتیپ سن. هیمه اوتون، هیزم معنی سیده، وهیمه لفظی لغت عامیانه دور، صحیحی واهمه دور، معنی سی بو بیرده قورقوش (خوف) معنی سیده دور، اولومنى اوقی کمانیغه سویانیب سنى طرفینگا آتماق اوچون تیار و آماده تورگاندور، اول سنى طرفینگا قراب آتیلیب یانیب کویدورمسدین برون غفلت اویقوسیدین اویغانیب قاجغیل و توشه آخرتنی تهیه قیلغیل، غفلت اویقوسیدین اویغانمسدین توروب و زاد آخرتنی تهیه قیلماسدین ایلگاری اجل دامیغه گرفتار و انی اوتیغه یانسنگ، مبدا همه قیلگان ایشلارینگ و طاعت و عبادت لارینگ (نعوذ بالله بی ایمان اولماق سببی له) کل دیک توزوب هَبَاءٌ مُّتُورًا [۲۳: الفرقان] بولماسون. اولگی اویانیب لفظی (او) اشارت (یانیب) یانماقدین آلینگان دور، آتش گرفته معنی سیده، ایکینچیسى اویغانماقنى مخففی بیداری معنی سیده دور، اولگی کل لفظی عربی (همه) معنی سیده، ایکینچیسى ترکی (رماد) خاکستر معنی سیده دور، قریب (پیر اولوب) اولومغه یقین لاشیب بورونغه غم شالی ایسی کیرمای توروب هوی و هوس مستلیگی دین اوزونگنی ساغ ایتگیل و غمینگنی بیگیل. اولگی بورون لفظی بینی (انف) معنی سیده، ایکینچیسى ایلگاری (مقدم) معنی سیده دور. اولوب پوست بدنینگ سونگا کینگه یاپوشمسدین ایلگاری اولومنى کوب یاد ایتماق و عمل صالح قیلماق بیرله اوزونگنی اولوم بیرله دوست ایلاغیل، چون یقینی و واقعی بیر امر مشاهد دورکه انسان کیمنى کوبراق یاد ایلاب انی ذکر و فکریده بولسه، بالاخره انگا تاثیر ایتیپ اول هم دوستلیک رشته سی بیرله باغلانور و هم عاقل کوزی



آچوق بیدار کیشی بیزلارگه وطن اصلی تفرغ لیگینی آخر اولوب بیر آستیغه کومولوشیمیزنی بیلور، آیه: مِنْهَا خَلَقْنَاكُمْ وَفِيهَا نُعِيدُكُمْ وَمِنْهَا نُخْرِجُكُمْ تَارَةً أُخْرَى [هه : طه] بو سوزگه اشارت دور. ناظم رحمه الله قوییدهگی ایباتلارده انسانلارنی بو دنیاگه کیلیب کیتیشینی بیر جماعه سوداگرلار بیر شهرگه سودا-ساتوغ اوچون مؤقتی باریب سوداسینی قیلیب ینه اوز وطنیگه قیتماغیگه تشبیه و تمثیل ایتیب دیرلار: مونى یقین بیلکه، بو پر خطر و اندوه دنیاگه دائمی تورماق اوچون کیلگانیمیز یوق، بلکه بیر نیچه کون آخرت سوداسینی ایتماقغه سونگره انگا قیتماقغه کیلیبمیز، کاروان اهلی بو کسب و کار شهریکه بیتوشگاچ هر طرفگه یاییلیب ایکیگه بولوندى، بیر طائفه سی کیم الارنی الله اوز فضل و احسانی بیرله راه راستگه هدایت ایتیب و الار اوزلارینی عبودیت و بندهلیک بیرله تانیب و بیلیب دورلار. حیل سیز (بی توختاو) عمر اقچه سینی قولگه آلیب آخرت متاعینی ساتادیگان یخشی ذاتلار (انبیاء، علماء، اولیالار) دکانلاریغه باشینی اوروب طاعت قماشى و متاعینی میسر ایتیب قولگه کیلتیریپ تیزدین چابک لیک بیرله سودالارینی قیلیب سفر رختی و اسبابینی محکم باغلاب درست قیلیب قویدیلار، قچانکه قافله باشی یوکونگنی اولاغ اوستیغه آرت و یوکل و قوی دیسه زادلاری تیار و توشه لاری آماده دور، یوکلارینی آرتیب یوللاریغه شاد و خرم کیرورلار. (محترف لفظی فتح رأ ايله کسب و کار جایى و محلی معنی سیده، بعضی نسخه ده مقترف بول هم عین معنی نی افاده قیلور، و رُست محکم معنی سیده دور) اما ایکینجی طائفه و کاروانی لاردین بعضی کیشی بول دنیای فانی نی باغ خندان و انی نقش و نگارینی یخشی کوروب و انگا فریفته بولوب (آلدانیب) اصل کیلگان وطن لارینی و نیمه اوچون یراتیلگان لارینی اونوتگای لار و ایسیدین چیقارگای لار و دنیادهگی نغمه و عاشوله و یخشی آواز لارگه قولاق سالیب و هوی و هوسگه کونگول بیریب نفس شیطان دامیغه گرفتار اولغای لار، بو دنیای مکاره عجب فریب گر دور، مینگ خیل جلوه بیرله و رقم-رقم کورونوش ایله الارنی آلدار، اول مکاره بیرار کیشینی آلداب اوزیغه نایل ایتیب و ازدواجیغه طالب و راغب قیلیب قوینیغه سالیب و انی بالکل دامیغه ایلنتورسه شیطان لعین سیونگانیدین اویونغه کیرار و انسان انی یلغان سوزیغه (آلدانیب) کیرار و غفلت سرمه سینی انی کوزیغه یوگورتوروب بالکل اویقوغه سالار، گاهی اگر اویغانیب آخرت اویینی یاد ایللاسه، انگا تلطف و مهربانلیک بیرلان دیر ای آدمیزاد کوب آشوقمه و شاشولمه حالا وقت دور آخر بیر کون سودایینگنی قیلورسن، بو کون بولمسه ایرته گه قیلورسن! بو خیلده سراپگه اوخشش تگی یوق سوزلار و بی اساس وعده لار بیرله انی آلداب یوروب آخر اول مکاره انی عمه سرمایه عمرینی ادا قیلیب و بساط زنده گانی سینی پاک-پاکیزه (بالکل توگاتیب سونگره تیزلیک بیرله آلدیدین رخصت بیریب قاولار و شفالاق بیرله اوروب بو بیردین کیتگیل و سندیک ایردین بیزار ایرورمن دیر؛ و انی ناله و افغانیغه نظر قیلمسدین انی آرقه سیغه شته لاب تیار. (شته) تَشْدَى-لَه ایاغ بیرله تیمماغ معنی سیده دور. اوشل دمده امیر



کاروان (عزرائیل علیه السلام) بیتیب کیلیب انگا اصل وطنگه قیتماق حکمینی ایتگای اول بیچاره من کیتیشیمنی بیلگانیم یوق و کیتماق اوچون زاد و راحله پیدا قیلغانیم یوق دیب آه و فغان و زاری ایلار، اما اول کیشیگه فغان و ناله فائده قیلمس و قچان انگا بیر نفس تاخیرگه مهلت قویارلار، و انی یقاسیدین سودراب، اوز اختیارگه قویمای جهان بی بقادین انی بزور چیقارورلار، اگر کیین قایتای دیسه مجال و قوتی بولمسلیک سببی دین ناچار وطن اصلیکه دست خالی (بی توشه) کیتار. (ای بنی آدم) سنی حسب حالینگ بو دنیاده شو کبی دور و باشینگدین آنچه اوتکان آی و ییل لارینگ شونگا مطابق دور، لهذا باشینگه بو ایشلار کیلمس دین ایلگاری قولاقغه غفلت لته سینی تیقمس دین نصیحت ایشیتیب عمل صالح قیل و شیطان ملعونگه آلدانیب آخرده انی شته سینی بیمه غیل، اگر دنیوی ایشینگ بر اوج اولوب و دنیا سنگا یوز کیلتورسه، زینهار منی دنیا سو بوبدور و یخشی کوروبدور دیب سو بونمه و خوشحال بولمه. سنی اول مکاره سو بوب من دیب آداب کوزونگا غفلت قمینی قویوب کوزونگنی ایشدین چیقاریب کورالمایدورگان قیلیب دور. (ای برادر) بول دنیای فانی کیمگه وفا قیلدی که سن و من گه قیلسه، انی باید سن دشمن جانی ازلی بیلماغینگ کیراک. اولگی سو بوبدور یخشی کوروبدور معنی سیده، ایکینچیزی هم شول معنی ده دور.

عمر نینگ فانی لیگی بیانیده

کیل ای مؤمن یقین بیلدینگ کیتارنی	حساب عمر بی سامان اوتارنی
اوتار دنیا اوچون بولمه گرفتار	اولومسه ییغماغیل مانند گفتار
اگر دنیاگه حرصینگ بولسه فج سن	نجاستنی ییغارغه کالهمج سن
ایسیز عمرینگ نجس ییغماغ رهینده	قالورسن بیر کونی آخر تهینده
اورامچی دیک همیشه تار ایتارسن	قناعت سیز لیگینگ اظهار ایتارسن
قیلورسن رشته جانینگ بيله قید	مگس دیک، موردیک قیلماق اوچون صید
سپورسه صاحب خانه به یکبار	اورامچی هم کیتار هم صید و هم تار
قالیب سن تنگه دیب احوال تنگه	مشقتلار باشینگه رنگه رنگه



یوگورمه جیفه کوب ییغماقغه ییل، آی	بولای دیب بای بساطینگ بیرماگیل بای
یقین بیلگیل مونى ای صاحب حال	حریص ایرمس زیاد ایتگان بیله مال
حریص اول دور اگر دنیای فانی	ییغای دیسه محبت بیرله آنی
اگر بولسه کیشیده مال سهلی	کونگول بیرسه ایرور دنیانینگ اهلی
بساطیده بیر ارپه قرصى بولسه	ایرور دنیا ایلی گر حرصی بولسه
کیشی نینگ کونگیلیده بو فانی بولسه	ایرور دنیا ایلی بیر دانی بولسه
اگر بیر قلده یوز خروار زر دور	اگر بولماسه مهری بی ضرر دور
اگر مینگ کوزه طلا توشسه کوزه	قچان دولت بیلور اهل دل اوزه
قایو دور مهری یوق ایرنینگ نشانی	بویورغان جایيغه صرف ایتسه آنی
دیهه مهریم یوق اما توتسه محکم	ایرور یلغانچی اول فرزند آدم
کیشی مالی که بی احسان ایمسدور	خدانینگ فضلی دور دنیا ایمسدور
دیمه دنیا چراغ آخرت دور	خدایم دین نشان مغفرت دور
بضاعت بولسه هم کم ایله انفاق	اوزوم دور برگی کم زردین سچوک راق
کیراک اهل کرم خلق ایتکالی جمع	اوزیدین دمبدم کم ایتسه چون شمع
کیشینی اعتقادی بولسه سالم	دیمس گور و کفن لیک دور بو مالیم
نی غم ایمانلی قلنی اولگانیده	تنیده بولمسه اوچ گز تنیده
سلامت اولسه ایمانی بیلان کس	اگر عاری کومولسه عاری بولمس
کرملیک بنده سی گر بولسه چولده	ایچار سو بولمسه بیر ذره قولده



هلاکت پله سیغه بیتسه حالی

قوپوب اولتورغالی قالمای مجالی

قیلور یرمینی صرف اوزگا بنده

اگر کوز یاشیچه سو تاپسه انده

دریغ ایتمس انی یار دگردین

تاپیلسه لقمه جان و جگردین

بولور خاک آغزیده بلکه بولور تاش

کرم لیک بنده گا یلغوز بیگان آش

بولور قان آغزیده بلکه بولور زهر

شکر نوش ایتسه یلغوز تابماغای بهر

کورار شربت چه بلکه آب کوثر

قرا سو ایچسه لار ایگی برادر

سچوک بیلگای عسل دین بلکه جان دین

ایگی همدل ییسه بیر لقمه نان دین

آلور تنور ایچینده آب رویین

کیشی نان دیک قیلور احسانده خویین

توشار خلق آغزیغه احسانی آنی

قزیل یوزلیک بولوب چیققان زمانی

شجر میوه دین آلدین کورساتور گل

کولوب مهمان قاشیغه چیقغین ای قل

انی هم جایغه قیلماق کیراک صرف

اگر احسان ایتار بولسنگ ایشیت حرف

زراعت ایلامه شوره زمین نی

بیلیب بیر جایغه کد یمین نی

بورینی بیر تاریغه بیرمه یاری

یمان بیرگه انی صرف ایتمه باری

شرح: ای مؤمن یقین بیلورسن که بو دنیاده هیچکیم باقی قالمس دین آخر اجلی بیتکانده آخرت طرفیغه سفر قیلیب کیتار و بی سر و سامانلیک بیرلان اوتادیگان نیچه کونلیک خواب و خیال کبی عمر حسابینی هم بیلدینگ! لهذا بو دنیای فانی و اوتارگه دل باغلاب گرفتار اولوب محبت قیلمه! و گفتار کبی اولومتوک ییغماقغه عمر عزیزینگی صرف ایتمه. (اولومسه لفظی اولومتوک کبی حرام اولوب قالگن حیوانلار جثه سیغه استعمال اولور) و کتفار عربیده ضبع، ترکیده دولته دییلور، بوری کبی بیرتقوچ حیوانلاردین دور. اگر دنیا توپلاماقغه حرصینگ کوب بولسه فج (دنی و پست) سن، نجاست و پلیدینی ییغماغده همج قونغوزیغه اوخشای سن، ایسیز عمرینگ و حیف حیاتینگ که پلیدی و چتل ییغماغ یولیده اوتار، آخر بیر کونی اول نجاست آستیده قالیب اولورسن. (همج) لفظی عربی پشه و پست کیشی و احمق نی ایتورلار، لاکن اصطلاح ماوراءالنهرده تیزک توپلای دیگان



قاره قونغوزنى ايتورلار، انى عادتى تيزكنى يومالاتيب اوييگه آليب بارور اويىنى آغزى تارليگى سببى دين ايجيگه آليب كيرالمسدين اول بيرگه توپلار، اكثر انى تگيده باسيليب قاليب هلاک اولار. ناظم رحمه الله اهل دنيانى جمعلالگان مالينى اولگانده اوزى بيرله آليب كتالمسليگى و اول مال حرصى آخر سبب هلاکى بولوشينى اولومتوک ييغادىگان کفتار و نجاست توپلاى ديگان قاره قونغوز حالىگه تشبيه ايتيب دورلار، بو ايکسى کمال حرص بيرله نجاستنى اويى آلدیگه توپلاب و انى ييماقگه (کوپينچه) موفق اولماى رنج و مشقت تارتيب اولوب کيتار. اهل دنيا هم شولار کبى جيفه دنياى حلال، حرام دين توپلاب و فرض بولگان زکوتينى بيرماى وصله رحم قيلماى بير کون قجاة اولوب حسرت بيرله قبرگه کيتار و مالى قالار و حضورينى ورثه لارى کورار و حساب و عذايىنى اول بيچاره تارتار، نعوذبالله من ذالک. اى برادر! هميشه اورگامچى دىک (دنيا قولغه کيلتورماق اوچون) شکار يوليغه تار دام ايتورسن و توزاق قويورسن و بى قناعتليکينگنى آشکارا قيلورسن، رشتنه جانينگ بيله قيد و بند توزاتورسن و توزاق قويورسن، تاکه مگس (چيىن) و مور (چملى) دىک عاجز بى قوت حشرات لارنى صيد ايتسنگ و الارنى دامينگگه سالسنگ، اما (بيردين بيرى) يکى يکباره صاحبخانه اويىنى سپورسه همه قيلگان محنت ضائع اولوب اورگامچى و هم شکار و همده تار اورتادين کيتار. شو کبى شونچه حرص بيرلان مردمنى فريب بيريب آلداب توپلاگان دنيادين هميشه تمتع ايتيب قالماى سن، اجل ييتگاج صاحبخانه (الله جل شانه) دنيا اويىنى سپوروب (سنى وجودينگدين پاک ايتيب) ظلم بيرله جمعلالگان مال و متاع لارينگى هر کيم لارگه نصيب ايتگاي و حساب و کتابى سнга باقى قالغاي، تنگه و طلا تاپامن و دنيا جمع قيلامن ديب تنگ و تار احوالگه قاليب سن بو يولده رنگ-برنگ مشقتلار و تورلوک زحمتلار باشينگگه کيلماقده (اى بى خرد!) دنيا جيفه سيني ييغماقغه آى و ييللار و هفته و کونلار يوگوروب باى بولاي ديب بار بساط و سرمايه ننگى باى بيريب يوتقوزوب قويومه. اولگى تنگه لفظى درهم معنى سیده، ايکينچيسى (تار) و (ضيقلیکگه) معنى سیده دور، اولگى باى غنى معنى سیده، ايکينچيسى يوتقوزماق و قولدين بيرماق معنى سیده دور. بساط بو بيرده سرمايه معنى سیده دور، سرمايه عمردين کنايه دور، يعنى باى بولامن ديب قولونگده گى عمر عزيزينگى (ضائع قيليب) باى بيريب قويومه، قوييده گى ابيات لارده ناظم رحمه الله کيمنى اهل دنيا و حريص ديب ايتيلادى و او قنداغ کيشى دور، بيان ايتورلار. (اى صاحب حال) مونى يقين بيلگيل که بير کيشينى مالى کوب بولسه انى حريص و اهل دنيا دييلمايدى، هرکيم دنياى فانيى محبت و حرص بيرله جمع لاسه و ييغسه اول کيشى حريص و اهل دنيا دور، اگر بير کيشينى آزگينه مالى بولوب انگا دل بيريب محبتى بولسه اول اهل دنيا دور. (سهل آسان معنى سیده، اما بو بيرده کم و آزين کنايه دور) بيراونى بساطيده بير ارفه نانى بولوب، اگر انگا حرصى و محبتى بولسه اهل دنيا دور، خلص کلام شول که هر کيم نينگ کونگليده بو دنياى فانى محبتى و حرصى جاي آلگن بولسه، اگرچه دنيا ليک وجهيدىن بير



دانی بولسه (ویا بولمسه ده) اهل دنیا دور، اگر بیر قُل نینگ یوز خروار (ویا زیاده) زر و آلتونی بولسه، اما دلیده انی مهری بولمسه بی ضرر دور و اول کیشی اهل دنیا ایمسدور و یا بیر اهل دل (اهل الله) کوزیگه مینگ کوزه طلا توشوب انگا مالک اولسه انی قچان دولت بیلور و انگا قچان مهر قویور، بلکه انی جای جایگه خرج قیلور. اولگی کوزه سو ایدیشی مشهور دور، ایکینچیسى (کوزگه) نی مخفی چشمگه معنیه دور. دنیانینگ مهر و محبتی یوق کیشی نینگ نشانه و علامتی قیسی دور؟ مالی نینگ شریعت بویورغان جایگه صرف ایتسه و زکات و صدقاتینی پوره بیرسه (مهری یوقلیگیغه علامه دور) بیر کیشی دنیا مهری و محبتی منده یوق دیسه، اما جایگه صرف ایتسدین محکم توتسه اول کیشی یلغانچی دور، هر کیم نینگ مالی کیم احسان دین خالی بولمسه (و صدقات واجبه و نافله سی ادا ایتیلسه) اول مال دنیای مذموم ایمسدور، بلکه خدانی فضل و احسانی دور، انداغ مالنی دنیا دیمه! اول چراغ آخرت و الله طرفیدین نشانه رحمت و علامه مغفرت دور.

تنبيه: ناظم ^{رحمه الله} تقریرلاریدین معلوم بولدی که دنیا بالذات یمان ایمسدور، بلکه انگا حرص قویماق و محبت ایتماق و نامشروع ییرلار دین جمعلاماق و خدا و رسول بویورگان جایلارگه صرف ایتمای باسیب اولتورماق یماندور، اگر انسان نی نیتی برکسب حلال قیلیب اهل و اولادینی نفقه سینی تاپماق و سوال دین سقلانماق بولوب و زکوة و خیراتینی مستحق کیشیلارگه بیرسه و انی محبتی و حرصی دلیده بولمسه بو خیلده دنیا مذموم ایمسدور، بلکه، **نِعْمَ الْمَالُ الصَّالِحُ مَعَ الرَّجُلِ الصَّالِحِ** [۳۲۱۰ : صحیح ابن حبان]، [۱۷۷۹۸ : مسند احمد] تحتیگه داخل دور، بضاعت و مالینگ کم بولسه هم الله یولیده قدرتینگ بیتکانیچه اتفاق ایله و توگاب قالور دیب غم ییمه (چونکه خدای متعال بیرینگه ییئی یوز بلکه مضاعف عوض بیورور، آیه: **مَثَلُ الَّذِينَ يُنْفِقُونَ أَمْوَالَهُمْ فِي سَبِيلِ اللَّهِ كَمَثَلِ حَبَّةٍ أَنْبَتَتْ سَبْعَ سَنَابِلٍ فِي كُلِّ سُنبُلَةٍ مِثْلُ حَبَّةٍ وَاللَّهُ يُضَاعِفُ لِمَنْ يَشَاءُ** [البقرة: ۲۶۱] بو سوزگه اشارت دور) زیراکه برگی کم رز (تاک) نی اوزومی سچوک راق و شیرین راق دور، شو کبی مال کم دین خدا یولیده بیرماقنی ثوابی کوب راق دور. اهل کرم کیشی لار مردمنی اطرافیغه توپلاماق اوچون شمع کبی اوزیدین دمبدم کم قیلماغی کیراک و احسانی الارغه جاری بولماغی لازم. انساننی اعتقادی خدانی رزاقلیکیغه صحیح و درست بولسه، قورقمسدین مالینی خدا یولیده بیورور، منی بو مالیم گور و کفن لیگیم دور دیمس، چونکه مؤمن و مسلمان بنده نی اولگانیده انی تنیده اوچ گز تنیده (بوز) بولمسه نیمه غم دور. اولگی تنیده بدنیده معنی سیده، ایکینچیسى توقولگان نمرسه معنی سیده، اما بو بیرده بوز مراد دور، چونکه کفن نی آق نمرسه دین قیلورلار. بیر کیشی ایمانی بیرله سلامت اولسه اگر انی قبرگه یلانغاچ کومولسه انی اوچون هیچ عار و ننگ ایرمس، بلکه انی عاری و گناهی تیریکلارغه متوجه دور. کرملیک کیشی چول و بیابانده بولوب قولیده بیر قطره ایچماق



اوچون سو موجود بولمسه توروب اولتورماقغه و حرکت قیلماقغه مجالی و قوتی قالمای حالی هلاک بولوشی پله سیغه و وقتیغه بیتسه شو حالده اگر کوز یاشیچه (آزگینه) سو تاپسه یرمینی باشقه بیر چوللاگان کیشیگه صرف قیلور و یا بیر لقمه نان جگر و جانددین عزیز کوب مشقتلار بیرله قولگه کیلسه انی ینه باشقه رفیقی دین دریغ ایتمس و مضایقه قیلمس، خلص کلام شولکه، کرم لیک کیشیگه یلغوز بیگان آش و نانی انگا لذت بیرمایدور و آغزیده تفراغنی چیناگانددیک بلکه تاشنی ییگانددیک بولور و یلغوز شکرددیک شیرین نمرسه نی بیسه، اندین بهره ور بولمسددین آغزیده قان بلکه زهر اولور، ایگی برادر و رفیق (باشقه طعام یوقلیگی دین) (قرا سو [خالص سو] ایچسه لار انی شربت شیرین بلکه آب کوثرچه کورارلار ویا الار بیر لقمه نان بیسه لار انی عسلددین بلکه جانددین کوره شیرین راق بیلورلار. باید انسان خلق و خویینی احسان و کرم بابیده نان دیک کیلسه و صاحب ایثار اولسه، چونکه نان تنورده محبوس و اوت قیزیغی بیرله معذب بولسه ده اوز آبرویینی آلور و ساقلار و تنورددین قیزیل یوزلیک بولوب چیقغان زمان احسانی خلق آغزیغه توشار. عادتده تنورده نان یوزیغه سو سپورلار نان چیرایلیک بولسون و یوزی قیزارسون دیب. ناظم شونگه اشارت قیلیب دورلار. (ای برادر) مهمان قاشیغه کولوب چیقغیل درخت کبی که میوه دین ایلکاری گل کورساتور، احسان و کرم قیلماق بولسنگ منی سوزوم و حرفیم نی ایشیت و نصیحتیم نی قولاقغه آل مشقتلار بیلان تاپگان پول و مالنی جایگه صرف قیلماق کیراک و مستحق کیشی لارنی تاپیب بیرماق لازم، عرق جبین و کدیمین بیرله تاپگان پولنی جایگه بیلیب بیرگیل و ناجایه خرج ایتیپ و غیر مستحق کیشی لارگه صرف ایتیپ شوره زار ییرنی زراعت ایلاب اندین حاصل آلامگان کیشی دیک قیلگان احسانینگ اجریدین محروم قالمه، مالینگنی بهر حال یمان بیرگه و یمان کیشیگه صرف ایتمه و بوری کبی بیرتقوچ یمانلارنی بیرتاریغه و مردمنی اذیت قیلاریگه یاری بیرمه. کدیمین دست رنج (قول زحمتی) و باری لفظی بهر حال، القصه معنی سیده کلمه تقلیل دور.

نفس شوم بیانیده

کیل ای کس بولمه اکنون تابع نفس	سولور اخشام صبا بو گردن غفس
همه طاعتلارینگ خوبی و صافی	یقین بیلسنگ ایرور نفسینگ خلافی
قویار کج لیکغه دائم نفس بد یوز	قچان او توز یانار یالبارسنگ اوتوز
ایرور نفسینگ دماغی طرفه ییل لیک	قچان ایل لیک قیلور یالبارسنگ ایل لیک



اوزونگ پست ایلاسنگ نفسینگ زبردست	باشینگ چیناب سالور چون اشتر مست
برونغه باد کبر ایسمای برون دین	بروندوق سال انگا قوپمای اوروندین
ریاضت بندیغه برگیست ایاغین	کوتارمه باشیدین تقوی تیاغین
ییقیلیب قالماغودیک بیر یمیشنی	زیاده ایلا کم-کم قتیغ ایشنی
قویوب اندازه حالیچه یوکنی	عبادت یولیغه کوندور بو لوکنی
بو محنت بیرله اول اماره دون	نه بولغای مطمئننه بولسه بیر کون
سیمیز کوب قیلمه بو تیشلاک ایتینگنی	قوتوروب یارمغای ناگه بیتینگنی
ایلان نینگ اسرادینگ نیچه ییل آنی	اولوغ بولغان ساری اوستی زیانی
اوتوب دور قول بیلان بوینین توتاردین	خطر دور کوچ قیلیب باشینگ یوتاردین
ییتیپ دور قویغالی کوکسین یوزونگا	کیمه دیرسن اوزونگ قیلدینگ اوزونگا
دلا قوب حالی هم توتمه اوزونگ سست	بیلینگ گه باغله همت فوطه سین رست
توکل سیفی نی صدق ایلگینه آل	قیل ایچنی خالص اندین سونگ قیلیچ سال
تعجب بیلمه فضل بی بهادین	خلاص ایتسه مونینگ دیک اژدهادین
غرض مونداغ عدونی قیلمه فربه	اگر کیلسه قولونگدین قطع سر به
سیمورسه نفس اگر ایچماک یمکدین	یوز آنچه ایت آلور یخشی دیمکدین
ینه یوقاری اوتمکدین بیورور بهر	بو نفس جاهله دنیای بد قهر
اوتور من دیب اوتارده بولماغیل شاد	اوتونگ دیدی اوتونگ آلغای بو جلاد
کیشی بیلسه رضا شهدینی ذوقین	بیلور بیردیک مجالس تحت و فوقین



تورار اوز حالیده بسیار و کـــمده
یوروشین بوزمغای هیچ شاد و غمده
کیشی کورسه خدادین جز و کلنی
بیلور خیریت اول عزت و ذلنی
ایرور حالاکه باب توبه مفتوح
یمان نفسینگنی قیلغیل تابع روح
اگر نفسینگ سنی بیتمیش باشینگدین
نه بولغای فائده بیتمیش یاشینگدین
اگر نفسینگ مرادین ایستامک سن
اگر سکسان گه عمرینگ بیتمسه سکسن
ازل کوندین اگرچه خوفی یوق سن
اگر توقسان گه بیتمسنگ کونگلی توقسن
ازل دین قیلسه کیمنی کونگلینی ریش
دیگای اون بیش یاشین کوب بلکه اون بیش

شرح: ای برادر حالاکه یاشینگ بیر جایگه باردی نفسگه پیرو بولمسدین انی تبعیتی دین اوزونگنی ساقلا، ایرته و کیچ اولوم پیکی یتوشسه بول یوغان گردنلار سولوب قیزیل یوزلار سارغایور، همه طاعتلارنی یخشی و صفاسی یقین بیلسنگ نفسینگ خلافیده ایرور، چونکه نفس هیچ یخشی یولگه باشلامس، اگر ظاهری یخشی بولسه باطنیده یمانلیک مرکوز اولور، لهذا همه وقت نفسگه مخالفت ده بولماق جهاد اکبردور، امام بوصیری رحمه الله علیه قصیده بردهده ایتورلار:

وخالف النفس والشيطان واعصهما وان هما محضاک النصح فاتهم

یمان نفسینگ همیشه ایگریلیکغه یوز قویوب و کجرولیکغه منهمک دور، اگر اوتوز بار یالینیب یالبارسنگ و اصرار ایتسنگ هم قچان او توزوک یولغه یانار و قایتار. اولگی اوتوز لفظی (او) ضمیر غائب نفسگه راجع (توز) توزوک یخشی و درست معنی سیده دور، ایکینجیسی عدد ثلاثون (سی) معنی سیده، یانار قیتار معنی سیده دور، نفسینگ دیماغی عجب ییللیک دور و باد کبر ایله تولوب دور، انگا ایللیک بار یالینیب یالبارسنگ هم قچان سнга ایل لیک قیلور و مطیع اولور، بلکه سرکش لیکغه ادامه بیورور (ییل) لفظی باد شمال معنی سیده. اولگی ایل لیک لفظی (ایل) اهل (اوز) معنی سیده و (لیک) لفظی ترکیده نسبت اوچون مستعمل دور، ایکینجیسی عدد خمسون (پنجاه) معنی سیده دور. نفسینگ نی بویروغینی همه سینی قیلیب انی آمر و زبردست و اوزونگنی مأمور و زبردست و مطیع و فرمانبردار ایلاسنگ آخرالامر مست تیوه کبی باشینگنی چیناب سالیب سنی هلاک ایتور، شونینگ اوچون نفس تیوه مزاجینگ بورنیغه کبر شمالی بیتمای و مست و غرور اولمسدین ایلکاری انی



بورنیغه (اورنیدین قوپمای و تورمای توروب) بوروندوق یغاچینی سالیب اوزینگه مطیع ایلاماقغه کوشش قیل (بُروندوق) تیوهنی بورنیینی تیشیب انگا اوتگازیلادیگان یغاچ دور، انگا ایپ باغلاب تیوهنی تارتورلار. و ریاضت بندی بیرله بو نفس سرکشنی ایاغینی محکم باغلاب و تقوی تیاغینی باشیدین کوتارمه و انگا بییمیشینی بیقیلیب قالماغودیک و اولماغودیک بیریب انی اوستیگه قتیغ ایشنی و ریاضت و عبادت شاقه‌نی کم-کم زیاده ایتیپ کوتارگانچه و اندازة حالچه یوک قویوب بو تیوه قوی هیکل کبی نفسینگ نی طاعت و عبادت یولیغه سالیب انی ریاضتگه کوندورگیل! اول نفس اماره بالسوء بو خیلده کوشش و محنتلار بیرله شایدکه بیر کون نفس مطمأنه لیکغه ایلانسه [لوک فارسی تیوه قوی هیکلنی ایتیلور.] خواهلاگان طعامینی بیریب بو تیشلاگوچ ایتینگنی سیمیرتورمه، مبادا قوتوروب بیتینگنی یارمغای و هلاکینگا سبب بولمغای (ناظم رحمه الله نفسنی اول قوتلیک مست تیوهگه سونگره قوتورگان ایتگا و قوییدهگی ابیاتلارده بیلان و اژدهاگه تشبیه ایتیپ دورلار) بیلان کبی ضررلیک نفسینگنی نیچه بیللار باقیب اسرادیگ و ساقلادیگ، اولوغ و کته بولغان ساری انی ضرری اوسوب کویاییب باردی و قول بیلان بوینیینی توتوب نظر آستیده ساقلاش وقتیدین اوتوب باره باره زوراییب و کوچاییب کته بولوب باشینگنی یوتوب هلاک ایتماغیدین خطر بار، بو دشمننی عاجز کوروب بی پروا بولماغینگ اثریده کوکسینی یوزونگه قویماق درجه سیغه بیتیب دور و زهر سالماق خطری قوی دور، بو حسرتنی کیمگه دیرسن و کیم دین شکایت قیله سن اوزونگا اوزونگ قیلدینگ، ایشنی وقتیدین اوتکاردینگ. [بیلان] حیة [مار] معنی سیده، (بیل) سنه معنی سیده دور، (آنی) فارسیده (اورا) معنی سیده دور. ای صاحب دل! حالا هم وقتی دور اوزونگنی سست توتمسدین غیرت قیلیب اورننگدین قویغیل و تورغیل و همت بیل باغی بیرله بیلینگنی محکم باغلاغیل و توکل قیلیچینی صدق (راستی) قولیغه آل و ایچینگنی (دلینگنی) غل و غش، حسد و کینه و شولار کبی اخلاق ذمیمه دین صاف قیلیب اندین سونگره نفس کافرگه قیلیچ سالیب جهاد اکبرنی شروع قیل. اولگی قیلیچ لفظی (قیل) بکن معنی سیده قیلماقدین امر دور و (ایچ) درون (باطن) معنی سیده مرکب دور. ایکی نچسی سیف (شمشیر) معنی سیده دور. فضل و مرحمت بی بها (بی حساب) بی قیمت الهی دین مومینگدیک اژدها دین خلاص ایتماغینی تعجب بیلمه و اوزاغ کورمه، بو قدر سوزنی چوزوب تاکید ایتماغیدین غرض شولکه مونداغ دشمننی فربه قیلمه (سیمیرتورمه) اگر قولونگدین کیلسه باشینی اوزوب اولدورگانینگ و انی شریدین بالکل قوتولگانینگ یخشی راغ دور، اگرچه نفس یخشی ایچمک، یخشی کیممک، یخشی بییمک دین سیمورسه ده آدم لارنی بو کیشی کوب یخشی آدم عالم فاضل و غیره سوزلاریدین انگا یوز برابر سیمورور، روایت آلور و هم دنیای بدقهر بو نفس جاهلگه مجلس لارنی یوقاری سیگه اوتماک بیرله بهره بیرور و نفس موندین لذت آلور مجلسنی توریگه و یوقاری سیگه اوتورمن دیب بو اوتماغده شاد و خرسند بولماگیل،



سنی یوقاری اوتونگ و مجلس توری سیزنی جایینگیز دیب خوب شیشیریپ توروب کبر و هوی گه مغرور ایتیپ آخر هلاک ایتیپ قارنینگنی یاریپ اوتونگنی آغای و مقصودیغه بیتگای. اولگی اوتونگ لفظی بگذرید معنی سیده امردور، ایکینچسی (اوت) تلخه (حراره) معنی سیده (نگ) خطاب بیرله مرکب دور. هرکیم که مقام رضانی حاصل قلیب انی عسلی دین تاتگن بولسه اول کیشی مجلس لارنی قویی و یوقاری و آستی و اوستینی بیر دیک بیلور. سنت رسول الله که مطابق قیسی بیرده جای تاپیلسه اولتورور و مالی کوب بولوب حالت غنا روی بیرسه و یا حالت فقرکه دچار اولوب دنیا سی کم بولسه بیر حالده تورور، و شادلیک و غم یوز کیلتورگانه متانت کورساتیب هیچ یوروشینی بوزمغای و سبک سرلیک و بینگیل لیک قیلماغای چونکه هر کیم آز و کوب جزء و کلنی بلکه همه ایشنی الله دین کورسه، اول کیشی قضاء و قدر الهی اثریده باشیگه کیلگان عزت و ذلت همه سین خیر دیب بیلور، (ای برادر!) حالا که آفتاب غرب دین طلوع ایتمای و جانینگ حلقومگه کیلیب غرغه حالتیگه بیتمای توبه ایشیگی آچوقلیگینی غنیمت بیلپ یمان نفسینگنی روحگه تابع ایتیپ، انی مطمأنه ایتماقغه اورونغیل، اگر نفسینگ هوا و هوس و یمان یوللرگه باشلب و خواهشاتیکه سنی تابع ایتیپ، باشینگکه بیتیب هلاکت که یقین لاشتورگان بولسه سنی موسفیدلیکغه بیتیب بیتیمش یاشینگدین نیمه فایده. اولگی بیتیمش لفظی هلاک ایتیمش معنی سیده عرفده فلانی فلانی نی باشیگه بیتدی دییلور، یعنی انی هلاک ایتدی، ایکینچسی سبعون (هفتاد) معنی سیده عدد دور. اگر تمام عمرینگده خواهشات نفس آرقه سیده و هوی و هوس کیتیده یوروب همیشه نفس مرادینی ایستماقده بولسنگ اگر موی سفید اولوب قریب عمرینگ سکسانگه بیتسه ده مثل سگ (ایت) سن، چونکه ایت هم نفسی آرقه سیده سرگردان دور، هر ایکی لارینگنی ارالارینگده قرق یوقدور. اولگی سکسن ثمانون (هشتاد) معنی سیده، ایکینچسی (سک) ایت یا کلب معنی سیده و (سن) تو معنی سیده مرکب دور. اگر ازله لوح المحفوظ که یازیلگان سرنوشتینگدین خوفی یوق بیغم سن و خاتمه نیمه بولوری دین قورقمای بی پروا یورورسن، اگر توقسان یاشگه بیتسنگ و اواخر حیاتگه یقینلاشسنگ، لاکن دلینگده خاتمه خوفی و حضور الهی که بارماق و پیش بولماق غمی یوقلیگی سببیدین کونگلی توق مغرورسن. اولگی توقسان (تسعون، نود) معنی سیده دور، ایکینچسی (توق) شبعان (سیر) معنی سیده و (سن) تو معنی سیده مرکب دور. الله جلّ شانه هر کیمنی کونگلینی ازلدین ریش و مجروح ایتیپ و خوف خاتمه و سرنوشت همیشه دلیده بولسه دنیاگه چندان علاقه سی بولمسدین انگا دل باغلامغای، اون بیش یاشینی کوب دیگای، بلکه اون یاشینی بیش و زیاده بیلگای. اولگی اون بیش پانزده، خمسة عشر معنی سیده عدد دور، ایکینچسی (اون) ده، عشر معنی سیده عدد و (بیش) زیاده، کوب معنی سیده دور.



بندہ عہدیدہ تورماقی بیانیدہ

کیل ای صادق کہ قیلدینگ صدق لافین	اولانچہ قیلماغیل وعدہ خالفین
خلاف ایتکان زبون لاردین زبون دور	بو دنیا و او دنیا سرنگون دور
خلایق آلدیده کـوتـه زبان دور	خدا در گاهیدہ اندین یمـان دور
خلاف ایتسنگ اگر ایغان سوزونگدین	کوتار ایر ککلیگ آتینی اوزونگدین
دادک قیغاجی دستارینگدین آرتوق	سنی یوق بولگانینگ بارینگدین آرتوق
چیقارمغیل آغوزدین قیلمس ایشنی	قیلورمن دیمہ قولدین قیلمس ایشنی
آغوزدین چیقسه سوز قیتارمغیل قاش	اگرچہ کیتسه ہم اول سوز اوچون باش
کیراک ایرمن دیگان نی وعدہ سی توز	اگر توز بولمسہ اندین کونگول اوز
یقین بیلگیل کہ توزلیکدین عصانی	ایرانلار آلدیلار اونگ قولغہ آنی
خصوصاً توز کیراک ایر اعتقادی	بولورمی ایگری ہیچ مسجد عمادی
سوزین بوزغان کیشینی یخشی ایرلار	قوسوب قیتہ انی ایچگانچہ دیرلار
قایو طیب کیشی ایچگای قبی دین	تیریک سن قالمغیل عہدینگ پی دین
مبادا اوزسنگ اقوال عقودینگ	توکولوب قالمغای یقغان نقودینگ

شرح: ای بندہ صادق وقتیگہ راست گویلیک و درست عہدلیک دعوی سینی قیلیب لاف اوردینگ، بایدکہ اولگونچہ بو قیلگان عہدینگ و وعدہنگ گہ خلاف قیلمہ. چونکہ وعدہ خلافلیک ایتکان کیشی زبونلارنی زبونی و پستلارنی پستی دور، بو دنیاہ وعدہ قیلگان کیشی آلدیدہ و آخرتہ محشرگاہہ اللہ حضوریدہ سرنگون و شرمندہ دور، مردم آلدیدہ تیلی کلتہ و اللہ درگاہیدہ حالی موندین یمان راق دور، ای برادر اگر ایغان و وعدہ قیلگان سوزونگدین و عہدینگ دین یانیب انگا خلاف ایتسنگ و عہدینگ دہ تورماسنگ اوزونگدین ایرککلیک و مردلیک آتینی کوتار، و مسلمان کامل لار قطاریدین چیق و منافقلار صفیگہ کیر [حدیث شریفہ کیلگاندور،



منافقنی علامتی اوج دور: وقتیکه سوزلاسه یلغان ایتور، و وعده قیلسه خلاف ایتار و امانت قویولسه خیانت قیلور^۱ وقتیکه عهدینگ و قولینگده تورمسنک باشینگغه شرف دستاری و سلّه سین اوراب یورمه! بیر قری قُلنی باغلاگان قییغ بیلماغی سنی بو دستار و سلّنگدین آرتوق دور و بو بی قول و بی عهدلیک بیرله دنیا ده تیریک یورگانینگ دین و بارلیگینگدین اولوب صفحه دنیا دین یوق بولگانینگ یخشی راغ دور (دادُک) (قری قُل معنی سیده (قیغاچ) رومال و بیلماغ معنی سیده و قیغ هم دییلور، چونکه انی ایکی برجیدین اوشلاب قیغاچ قیلیب بیلگه باغلانور. قیلمس ایشنی قیلورمن دیب آغوزدین چیقاریب وعده قیلمه و قولونگدین کیلمس ایشنی قیلورمن دیمه، هرگاه بیر ایشنی قیلانمن دیب آغزینگدین چیقسه و وعده قیلسنگ اندین قاش قیتارمغیل و سوزونگدین قیتماغیل، اگرچه اول سوز و وعده گه وفا قیلیش اوچون باشینگ کیتسه هم، ایر من دیب مردلیک لافینی اورگان کیشینی وعده سی توزوک و درست بولماغی کیراک، اگر هر کیمنی وعده و قولی راست و صحیح بولمسه انداغ کیشینی دوستلیگیدن کونگول اوزغیل، مونی هم یقین بیل عصا چوبنی راستلیگیدین ایرانلار و مردخالار انی اونگ قوللاریگه آلیب یورورلار و عزیز ساقلایورلار، خصوصاً انساننی اعتقادی صحیح و اهل سنت اعتقادلاریگه برابر و راست بولماغی لازم، زیرا که مسلمانلیکنی اساسی و تهدابی اعتقاد درست و صحیح دور، هیچ مسجندی عمادی (ستونی) ایگری بولمس، لهذا مسلماننین اعتقادی هم توغری بولماغی لازم، یخشی ذاتلار سوزین و عهدین بوزوب قیتگان کیشینی اوزی قی قیلیب قوسوب ینه قیته دین انی ایچکان کیشی گه اوخشاتورلار، قیسی پاک و طیب کیشی اوز قبی دین ایچار، هرگز ایچمس، لهذا تا تیریک بارسن، عهدینگنی بوزمسلیک پی دین و آرقه سیدین قالمغیل و هرگز سوزونگنی بوزمغیل، مبدا عهدینگ و سوزونگدین یانیب دُر کی سوزلارینگ گردن بندینی ایپینی اوزوب قویسنگ یقغان نقود و جواهراتینگ توکولوب یوقالیب قالمغای و بدعهدلیک سببی دین قیلگان اعمال صالحه لارینگ ثوابی حبطه اولوب کیتماغی. عقود عقد جمعی گردن بند معنی سیده دور، نقود نقد جمعی اقچه و پول معنی سیده دور، بو بیرده ثواب دین کنایه دور.

حکایت اسماعیل علیه السلام

خلیل اوغلی که اسماعیل دور ای سعد انی یاد ایتدی تنگرم صادق الوعد
انینگ صادقلیغین ای آدمی—زاد قیلیب دور بیر حکایت قیلغوچی یاد

^۱ آيَةُ الْمُنَافِقِ ثَلَاثٌ إِذَا حَدَّثَ كَذَبَ وَإِذَا وَعَدَ أَخْلَفَ وَإِذَا اتَّخَذَ خَانَ (حدیث ۲۲۰ : صحیح مسلم)



بارور ایردی اوشل شه بیر طرفگه	یولوقتی مؤمنی اول باشرف گه
دیدى تورسنگ بو بیرده ای نکو کار	اویومده یعنی بعضی ایشلاریم بار
باریب کیلسم قوشولسم سیزگه من بعد	تورای دیب وعده قیلدی صادق الوعد
کیلورمن دیب قاشیدین کیتگان اول کس	اونوتدی وعده سینی بولدی کیلمس
قیلیبمن وعده دیب اول صاحب راز	او بیرده آلتی ییل اولتوردی قیش، یاز
اوشل وعده اونوتگان نی گزاری	ییتوشدی آلتی ییلدین سونگره باری
اوشل وعده اوچون تورغاننی بیلدی	اویات بادی بیلان توتدیک توکولدی
آغوزدین دفتر اعدارین آچدی	دُر اشکین ایاغ آستیغه ساچدی
ذبیح الله انگا لطف ایتدی چندان	ایدی چون غنچه گل دیک بولدی خندان
سچوک تیلنی انگا صرف ایتدی چون بال	انا وعده انا عفو و انا حال!
کیشینی وعده سی چون بولمسه راست	محبت عهدین اندین قیلمه در خواست
ایشانمه ایغانیغه ای خردمند	اگر چندی که اول یاد ایتسه سوگند
سوزین بوزغان کیشی بوزمس مو ایمان	او کیمسه بیرله قیلمه عهد و پیمان
اگر توزلوک بیلان برپا بولورسن	الفدیک جان ایچینده جا بولورسن
اگر کج بولسه افعالینگ بودون دیک	قالورسن بلکه قان آستیده نون دیک
قیلیچ باشینگه کیلسه آیمه یلغان	اولومدین دور بتر چونکه اویالغان
اگر یلغانچی لیکده اوتسه آتینگ	قیامت کون نچوک بولغای اویاتینگ
نجس مردار ایمس یلغانچی لیغدین	مسلمان لیغده شرم ایت بو قیلیغدین



شریعت حکمی بیرله ای نکو رای گهی چین سوزنی هم کونگولونگده قیل جای

نمیمه‌نی یمان ایدی شه دین سخن چین بولسه هم بولمه سخن چین

شرح: حضرت اسماعیل علیه السلام که حضرت ابراهیم خلیل الله اوغلی لاری دورلار، الله اول ذاتنی قرآن کریمده صادق الوعد دیب یاد ایتدی: **وَادْكُرْ فِي الْكِتَابِ إِسْمَاعِيلَ إِنَّهُ كَانَ صَادِقَ الْوَعْدِ وَكَانَ رَسُولًا نَبِيًّا** [مریم: ۵۴] اول جنابنی عهد و سوزلاریده صادق و راستلیکلارینی بیر حکایت ایتغوچی ذکر ایتیب دور، اول کیشی بیر طرفگه باریب تورگانلاریده بیر مؤمن یولوقوب دیدی که بو بیرده بیر آز توختاب تورسنگیز اویومده بعضی ایشلاریم بار باریب اول ایشنی قیلیب کیلیب سونگره سیزگه قوشولوب بیرگه بارساک، اول صادق الوعد من تورای دیب وعده قیلدیلار، اول کیشی قیلگان وعده‌سینی اونوتوب کیلمادی، اول صاحب راز (اسماعیل علیه السلام) وعده قیلیب من دیب او بیرده آلتی ییل قیش و یاز اولتوردیلار، اول وعده‌سینی اونوتگان کیشینی آلتی ییلدین سونگره اول طرفگه یولی توشدی اول ذاتنی اوشل وعده اوچون تورگانلارینی بیلیب اویات و حیا شمالی بیرله توتدیک توکولدی (کوب خجالت بولدی) آغزی دین معذرت دفتیرینی آچیب، من اونوتدوم، فراموش قیلدیم، منی بغشلای سیز دیب عذر ایتماقغه شروع قیلدی و بیغلاب دُر دیک کوز یاشینی ایاغ آستیه ساچیب توردی اول ذبیح الله انگا بو قدر التفات و مهربانلیک کورساتدیلا رکه، غنچه دیک سیقیلیب تورگان کیشی گل دیک آچیلیب انگا انبساط و یازیلش حاصل اولدی، اول ذات عسل دیک سچوک تیللارینی انی خوش و خرم ایتماقگه صرف ایتدی لار، تاکه اول خرسندلیک بیرله آلدی لاری دین مرخص اولدی. انا وعده گه وفا، انا خطا و سهو و غفلت دین گذشت و عفو، انا حال نیک مآل مونداغ بولور. هرکیم‌نی قیلگان وعده‌سی صحیح و راست بولمسه عهد مودت و محبت و اخوت‌نی اندین در خواست و طلب قیلمه و انی ایغان سوزیه اگرچه قسم یاد قیلسه ده ایشانمغیل، چونکه سوزینی و عهدینی بوزگان کیشی قسمینی بوزمس‌مو؟ البته بوزار، انداغ بدعهد و بدقول کیشی بیرله عهد و مودت باغلامه و انی قولیگه باور قیلمه! اگر توزلوک و راستلیک بیرلان ثابت و استوار و برپا بولسنگ الفدیک جان ایچیگه جا بولورسن و همه گه محبوب و مقبول اولورسن، اما بالعکس افعال و کردارینگ بو دنیای دون کجرفتاردیک ایگری بولسه نون کبی قان آستیده قالیب پست و خوار بولورسن، لفظ نون کتابتیده کجلیک بار و قان لفظیده آخر حروف دور، جان ایچینده جا بولورسن دیگانی همه گه محبوب اولورسن دین کنایه دور، و قان آستیده نون دیک قالورسن دیگانی پست و خوار و ذلیل بولورسن دین کنایه دور، باشینگه قیلیچ کیلسه ده یلغان ایماغیل، چونکه یلغان سوزلاب سونگره مردم آلدیده اویالغان و شرمنده بولغان اولومدین بدتر و یمان دور. یلغان کذب (دروغ) معنی سیده (اویالغان) لفظی شرم قیلگان اویاتگان معنی سیده دور، ویا (او) ضمیر راجع یلغانگه (یلغان) کذب معنی سیده، بو توجیه ده (چونکه او ایتیلگان یلغان مردم آلدیده باعث شرمنده لیک بولگان اوچون اولومدین بدتر دور) لاکن اولگی توجیه یخشی راق دور. اگر بو دنیاده مردم ارا



یـلـغـانـچـی لـیـک بـیـر لـه آتـیـنـگ چـیـقـیـب عـمـرـیـنـگ اوتـسـه قـیـامـت کـوـنـی هـمـه مـردـم مـحـشـر گـه بـیـغـیـلـغـانـدـه فـرـشـتـه لـار سـنـی یـلـغـانـچـی لـار قـطـار یـگـه تـار تـسـه لـار، الـار حـضـور یـدـه سـنـی او بـاتـیـنـگ و خـجـالـتـیـنـگ قـنـداغ بـولـسـه کـیـراک، دـنـیـا دـه یـلـغـانـچـی لـیـک دین نجس و پلید و مردار راق هیچ بیر خُلق موجود ایمس، مسلمان بولوب توروب بو قیلغ دین شرم ایت و حیا قیل، شریعت بویروغی و حکمی بیرله بعضی اوقات چین و راست سوزنی سوزلامس دین انی دلینگده ساقلاب و کونگلونگغه جای قیلیب بیرا وگه ایتمه، چونکه هر بیر راست سوزنی سوزلاماق و بیرا و لارگه ایماق گاها درست ایمسدور، چنانچه (نیمه) چاقیمچی لیکنی رسول الله یمان دیدیلار، اگر اول سوز راست بولسه هم سن سخن چین بولمه و چاقیمچی لیک قیلمه و یا بیرا و نی حقیده بار نمرسه نی بطریق غیبت سولاماق ممنوع دور، اگرچه راست بولسه ده دلده ساقلاباق کیراک.

تنبيه: حضرت اسماعیل علیه السلامنی صادق الوعد لیک لاری قرآن خبری دور، و انده هیچ شک و شبهه یوقدور، لیکن ناظم رحمه الله کیلتورگان قصه نی اساسی بارلیگی معلوم ایمسدور، خصوصاً آلتی ییل قیش و یاز بیر جایده تور دیلار دیگانلاری مبالغه کورونور.

یخشی همراه بیانیده

کیل ای عازم اگر بولسنگ سفرده	رفیقی تاپ طریق پر خطـرده
کیراک دور ایر کونگول لیک یخشی همراه	رفاقت غه یرامس هر قایـوداه
نچوک کیم مغزنی جانده توتار پوست	محبت یولیده انداغ کیراک دوست
اوزین قل یارینی سلطانی بیلـسه	اوزینی تن رفیقین جانی بیلـسه
ایاغیگه اگر تیکسه تیـکانی	قدلغانچه کوزیگا کورسه آنـی
ساق ییل تیکسه یولدشین یوزیگا	اگر قولدین کیلور آلسه اوزیـگا
انگا کیلدی دیگان تیر بلاغـه	قیلیب جانین سپر توتسه اراغـه
یمان یولدش ایرور چون مار افـعی	ضرردین اوزگا یوقدور ذره نفعـی
توتوب دایم ییلان نی قویروغـینی	نچوک دل جمع ایتارسن بویروغـینی
یمان بولمای ولیکن بولسه نامـرد	قوروغ صورت ایرور قیلغیل کونگول سرد
اولوکدور بولمسه هر کیمده گردـه	تیر یلمسدور کوتارگان بیرله مـرده
ایمس ایرنی نشانی ریش و آلت	نشانی همت و غیرت و حالـت

شرح: ای آخرت سفریگه عزم ایتگان بو خطری کوب یولده بیر رفیق شفیق تاپ، سونگره قدم قوی [الرَفِیقُ ثَمَّ الطَّرِیقُ] ضرب المثل دور، اما باید رفیق ایر کونگول لیک مردانه یخشی کیشی بولماغی کیراک، هر قیسی کنیز



صفت هیزه لک کیشی رفاقتگه یرامس. (داه) کنیزک معنی سیده دور. باید رفیق قنداغ که پوست ایچیده گی مغز و گوشت نی جانی بیرله اسراب ساقلار (یعنی پوست اوزینی بلاگه سپر قیلیب ایچیده گی اجزالارنی ساقلار، تاکه پوستگه آسیب بیتماسه، ایچیده گی گوشت و مغزگه ضرر بیتمس) محبت یولیده گی رفیق هم شونداغ بولماغی کیراک، باید اوزینی بمنزلہ قُل و رفیقینی مثل پادشاه ویا اوزینی تن و رفیقینی جان بولماغی کیراک. و رفیقی ایاغیگه تیکن کیرسه انی باید اوزینی کوزیگه قدلغانچه کوروب متأثر بولسه قیش ایامیده یولداشین یوزیگه ساوق شمال تیکسه، اگر قولیدین کیلسه تنینی اراگه سالیب اوزیگه آلسه، انگا کیلگان تیر بلا و قضاغه جانیی سپر قیلیب اراغه توتسه، خلص کلام شولکه دوست و رفیق و محب فی الله رفیقینی مقابلیده اوزینی قُل کبی بیلیب و تمام یخشی لیکلارنی یاریگه روا کوروب، تمام زحمت و مشقتلارنی اوزیگه آلیب همه وقت انی خوشنودلیگینی ایستامای کیراک و اول رفیق هم مونی مقابلیده شونداغ بولماغی لازم، تاکه عدالت قائم و رفاقت اساسی محکم اولوب دوستلیک رشته سی اوزولمس لیگیغه باعث اولسه، اما یمان یولداش یمان افعی (بیلان) کبی خطرلیک دور، ضرردین اوزگه بیر ذره چه نفعی و فایده سی یوق دور. افعی بکسر عین، اما عربیده بفتح عین کیلیب دور. گردنی اینگیچکه و باشی یلپایگان کتّه یمان ایلان دورکه، چول و صحرا و تاشلیک جایلارده بولور، مار کفچه هم دیرلار، اما شارح نی افعی خصوصیده کیلتورگان قصه سی کاملاً بی اساس دور. یمان رفیق یمان بیلان کبی بولسه انی صحبتینی ترک ایتمای ایلاننی قویروغینی همیشه توتوب و انی بویروغ و امرینی خاطر جمع قنداغ ایتیپ یوروب سن، خلص کلام شولکه، یمان رفیق بیرله یورماق ضرردین خالی ایرمس، لهذا انی دوستلیگینی ترک ایتماق و صحبتیدین اوزاق بولماق لازم. مَثَل بارکه: (قازانگه یقین یورسنگ قراسی یوقار، یمانگه یقین یورسنگ بلاسی یوقار) مولانا مثنوی ده: «یار بد بدتر بود از مار بد» دیب دورلار، اگر یارینگ یمان بولسه، اما نامرد اولوب آدمگرچی لیک انده بولمسه قوروغ صورت و ساولات ایگاسی دور، انده اخلاق حسنه و انسانیت دین ذره چه یوق دور، انداغ کیشی نی محبتی دین دلینگنی ساووت، چونکه دنیا ده فائده سی بیتماگان کیشی نی آخرتده نیمه یخشی لیگی بیتور؟ هر کیمده گرده، همت، غیرت، شجاعت بولمسه اولوک قطاریده دور، هر قنچه انگا سوزلاگان بیرله غیرتگه کیلمس، چنانچه اولوکنی کوتاریب یورگان بیرله تیریلمس، ایرککلیکنی نشانه و علامتی ریش (سقال) و آلت (ذکر) ایمس، بلکه غیرت و همت و یخشی حالت دور. (آلت) اسباب و ابزار معنی سیده، اما بو بیرده آلت تناسلی (ذکر) مراد دور.

حکایت

سفر بولدی الارنی اختیاری
قضادین آقدیلار دریاگه ناگه
دیددی قویغیل منی یاریم قولین آل

سعید و سعد قیلدی عهد یاری
دل و جان دیک ایدی اول ایگی آگه
بیریسین توتتی ملاحی اوشل حال



مونى قويدى انى چون توتتى مضبوط بو هم ايدى منى قويغيل انى توت
تماشا قيل الاردین عهد یاری انا قولی درست ایرلارنى حالى

شرح: حکایتده کیلیب دورکه سعید و سعد آتلیغ ایکی کیشی اورته لاریده دوست و رفیقلیک عهدینی توزدیلار و سفر اختیار ایتیپ چیقیدیلار، اول ایکی دل آگاه بیر-بیرلاریگه شفقت و مهربانلیکده دل و جان دیک ایردیلار، قضا و قدر الهی دین ناگاه دریاگه آقدیلار، اوشل آنده بیرلارین کیمهچی توتگانده منی قوی رفیقیمی اوشله دیدی، اول ملاح مونى قویوب رفیقینی اوشلاغانده اول هم منى قویوب رفیقیمی توتغیل دیدی. الاردین ایشار و فتوت و رفاقت و عهدیده ثابت لیکنی کوروب اورگانیب آغیل، قولی درست مردلارنى حالى انا مونداغ بولور.

خوف و رجأ خصوصیده

کیل ای تن بول همیشه التجاده دوام العمر بول خوف و رجأده
کوتارمه هیچ رجأ و خوف دین رأس یقین بیل کفردور هم امن و هم یأس
سنینگ آلدینگده پیدا دور ایکی یول بیرى اونگ قول ساری بارغای بیرى سول
کیشی بیلمس قیامت دشتیده آه کیتار بنده ایکی یول دین قایو راه
اگر سان سیز عطا قیلسه خدایینگ بهشت عدن ایشیکین سورسه پایینگ
قریش یول قالسه جنت ایتگالی طوف برونغیدین زیاده ایلاگیل خوف
نعوذ بالله اول بارگان یولونگدین اگر قیتارسه نی کیلگای قولونگدین
اگر دوزخ لبینده بولسه پایینگ امید اوزمه که غافردور خدایینگ
عجب ایرمس اگر قیتارسه آندین نصیب ایتسه بهشت جاودان دین
اگر اوستونگده گی یتتی طبق نی کیزیب درس ایلاسنگ یتیمیش سبق نی
ملائک دیک اگر پرنده دور سن یقین بیلگیل که آخر بنده دور سن
سنی آتینگ و ذاتینگ بنده بولسه نچوک خوف ایتماسنگ جان تنده بولسه
ایرور قل نینگ ایشی قورقونچ و زاری قبول ایتماک ایگامنی اختیاری
اگر عفو ایتماسه بیچاره دور سن قایو یول دیسه آنده باره دور سن

شرح: ای تن همیشه بارگاه الهی که التجا و تضرعده بولوب (دائما) عمرینگی باریچه خوف و رجا اراسیده بول، و هیچ خوف و رجا (الله عذابیدین قورقماق و انی رحمت و مغفرتیدین امیدوار بولماق) دین باش کوتارمه و یقین بیل که عذاب الهی دین ایمن بولوب قورقمسلیک و انی رحمتیدین ناامید بولماق لیک هر ایکیسی کفردور.



علماء لار قول لاری دور: الإیمان بین الخوف والرجاء^۱ یعنی ایمان خوف و رجاً اورته سیده دور، آیه: فَلَا يَأْمَنُ مَكْرَ اللَّهِ إِلَّا الْقَوْمُ الْخَاسِرُونَ [الاعراف: ۹۹]، لَا تَقْنَطُوا مِنْ رَحْمَةِ اللَّهِ [الزمر: ۵۳]، وَلَا تَيَاسُؤُوا مِنْ رَوْحِ اللَّهِ إِنَّهُ لَا يِيَّاسُ مِنْ رَوْحِ اللَّهِ إِلَّا الْقَوْمُ الْكَافِرُونَ [يوسف: ۸۷] بو سوزگه دلیل دور. علمای کرام خوف و رجانی ایکی بال و قناتگه تشبیه ایتیبدورلار، هیچ پرنده و طائر بیر قنات بیرله اوچوب بیلمس، شو کبی مسلمان هم خوف و رجاً (ایکی قناتی) سبز ایمانی مکمل بولمس و حضیره قدسگه اوچوب بیلمس. ای مومن سنی آلدینگده ایکی یول کورونوب تورگاندور، بیرى اونگ قولگه بارور، بیرى سونگ قولگه، اما هیچکیم قیامت دشتیده عاجز بنده بو ایکی یولدين قیسی بیریکه بارورینی بیلمايدور، چونکه خاتمه مستوردور، و انسان قیسی حالده عالمدين اوتوشيدین بی خبردور، آیه: إِنَّا هَدَيْنَاهُ السَّبِيلَ إِمَّا شَاكِرًا وَإِمَّا كَفُورًا [الانسان: ۳] و آیه: وَهَدَيْنَاهُ النَّجْدَيْنِ [۱۰] : بلد] بو سوزگه دلیل دور، حالا ناظم رحمه الله خوف و رجانی تمثیل ایتیبدورستماقچی لار، اگر الله تعالی سنگا دنیاده و محشرگاهده سانسيز (بی حساب) بخشش و عطالار قیلیب جنةالعدن ایشیکیکه ایاغینگ سورکالیب انگا کیرماقگه بیر قریش یول قالسه قورقماغینگنی اولگی دین زیاده قیلگیل [نعوذبالله من ذلك] خدا قیلماسون، اگر اول بارگان یولونگدین قیتاریب دوزخگه سالسه [ای ناتوان بنده] قولونگدین نیمه کیلگای و اگر دنیاده کوب گناهلار قیلیب و شرارتلار ایتیبدورقماغینگ دوزخ لبیده بولسه اللهنی رحمت و مغفرتیدین امید اوزمه و مأیوس بولمه، چونکه پروردگارینگ غافردور، إِنَّ اللَّهَ يَغْفِرُ الذُّنُوبَ جَمِيعًا [الزمر: ۵۳]، إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ [النساء: ۴۸] بو سوزگه دلیل دور. الله فضلی دین عجب ایرمس که اندین قیتاریب بهشت جاودان دین نصیب ایتسه اگر اوستونگدهگی ییتی طبقه آسماننی کیزیب بیتیمیش خیل درسنی ملائکه لارگه سبق ایتیبدور فرشته کبی اوچوب یورسنگ مونی یقین بیل که آخر بنده عاجز و ناتوان دورسن، وقتی که آتینگ و ذاتینگ بنده بولسه و جانینگ هنوز تنده بولوب خاتمه نامعلوم بولسه قنداغ قورقما یوروب بیلانسن، قُل و بنده بیچارهنی ایشی خوف و زاری و بارگاه الهی که تضرع قیلماقدور و قُل لیکغه قبول ایتماق ایگام (الله) اختیاری، اگر الله جلّ شانہ گناهلارینگنی عفو ایتسمه، بنده بیچاره دورسن. قیسی یولگه بار دیسه اوشل یولگه بارادورسن (یا جنت یولی یا دوزخ یولی).

^۱ [سورة يس، تفسیر مظهری]، [ج ۲، ص ۳۳۵ جامع لطائف التفسیر]، [ج ۷۱، ص ۱۷، الحاوی فی تفسیر القرآن الکریم کاملاً]، [ج ۱، ص ۱۴۶، جهود علماء الحنفية فی ابطال عقائد] و باشقه هم کوب کتابلرده کیلگن.



حکایت

محمد کیم شه دنیا و دین دور	صفاتی رحمۀ للعالمین دور
زمین و آسمان نی خلق و خیلی	یراتیلدی اوشل ایرنینگ طفیلی
اوقورده بیر کونی تنگری کتابین	اوقودی انده دوزخنی عذابین
اول آیت وهمیدین کیتدی اوزیدین	بیقیلدی بیرگه اول دمه یوزیدین
صحابه هر قایو بیر حاله بولدی	زمین و آسمان در ناله بولدی
زمان دین سونگ کوزینی ایلادی باز	صحابه آیدیلار ای محرم راز
سنی خلق افضل ی قیلدی خدایینگ	مهیا بولدی جنت ایچره جایینگ
صفاتینگ رحمۀ للعالمین دور	خدادین مونچه قورقونچینگ نه دین دور
دید ی گرچه رسول جز و کل من	نچوک خوف ایلامای زیرا که قل من
اگر یوز مینگ بشارت بیرسه باریپ	کیراک قل دین اوشنچه خوف و زاری
کیشی نی اسم ذاتی بولسه بنده	بولورمو فارغیت قل دیگانده

شرح: حضرت محمد علیه الصلوة والسلام پیغمبریمیز دنیا و دین نی اولوغی دورلار، اول ذاتنینگ صفات لاریدین بیر رحمة للعالمین دور، آیه: وَمَا أَرْسَلْنَاكَ إِلَّا رَحْمَةً لِّلْعَالَمِينَ [الانبیاء: ۱۰۷] نص صریح دور، یعنی بیارگنیم یوق سیزنی، مگر رحمت قلیب تمام عالم اهلیگه. بیر و کوکنی، همه مخلوق و طوائف لاری اول ذات با برکات طفیل لاریدین یراتیلدی، شول ذات بیر کونی قرآن کریم نی اوقورده بیر آیت عذاب دوزخنی اوقودیلار، انی قورقونچی دین اوزلاریدین کیتیپ بیهوش بولوب یوزلاری بیرله بیرگه بیقیلدی لار، بو حالنی کوروب صحابه کرام هر قیسی لاری بیر حالگه توشدیلار و مشوش اولدیلار و گویا نظرلاریده بیر و کوک ناله ده بولگاندیک بولدی، بیر زماندین سونگ مبارک کوزلارینی آچدی لار، صحابه کرام ایدیلار: ای محرم راز الهی! خداوند سیزنی تمام مخلوقات افضل ی قیلدی و جنتده جایینگیز مهیا و تیار دور، و صفاتینگیز رحمة للعالمین دور، عذاب الهی دین مونچه قورقماغینگیز نیمه سبیدین دور؟ جواباً رسول الله دیدیلار که: اگرچه جز و کل، انس و جن همه گه عام مبعوث بولگن پیغمبر بولسم ده نچوک قورقمای، زیرا که بنده عاجز و قل بیچاره من. ناظم رحمه الله بو سوزدین نکته تارتیب دیرلار: اگر باری تعالی بیر کیشیگه یوزمینگ بشارت بیریب وعده لار قیلسه قل دین اوشنچه خوف و زارینی زیاده قیلماق کیراک دور. چونکه او حضرت حضرت اطلاق دور، چون و چراسیغمای دور، هر کیم نی که اسم ذاتی بنده و قل بولسه دائماً خوفده بولماغی کیراک، زیرا که قل دیگان کیشیده فارغیت و خاطر جمع لیک بولمس.

تنبیه: رسول الله‌نی شو حکایتده‌گی بیهوش بولگان‌لاری اساسی باریا یوق منگا معلوم بولمادی، هر کیم سندینی تاپسه بو بیرگه درج ایتسون.

خدانی رحمتیدین امیدوار بولماق بیانیده

کیل ای تن بیرماگیل وقتینگنی قولدین	یوگور دریای رحمتگه بو چولدیـن
گناهیم کوب ایرور دیب بولمه مایوس	عجب ایرمس اگر عفو ایتسه قدوس
دل و جان بیرله توبه قیلسنگ ای یار	مگر لطف ایلاگای دانای اسرار
عبث‌دین ایمدی ییغلب تیتره ییغلب	تيله جان و دلینگدین رحمت رب
هوانی پست ایتار اشکینگ نجومی	کواکب‌دور شیاطین‌نینگ رجومی
اگر لطف ایلاسه ستار عالم	بیتار بیر لحظه‌ده کار دو عالم
یوراک یاغین کیتار بولسون دیسنگ باز	قیلور کوز یاغینی ایچ یاغینی آز
نه دولت دور کیلیب عیبینگه شرمینگ	دل گرمینگ سنی آیریلسه گرمینگ
خدانی خوفیدین بیر قطره اشک	عزازیل آلدیده چندان بولور رشک
سعادتلیک کیشی ییب دایما غم	کوزین حق خوفی بیرله قیلسه شب نم
غرض اوزمه امید ای طالب راه	دیدي لا تَقْنَطُوا مِنْ رَحْمَةِ اللَّهِ
اوتولمس چرک شرک ای مرد سالک	اوتار لطف ایلاسه ما دُونِ ذَلِك

شرح: ای بیر تن، بیر بدن مؤمن برادر! وقت عزیزینگنی بیهوده تلف قیلیب مفت قولدین بیرماغیل، بو عصیان (گناه) چولیدین دریای رحمت الهی طرفیگه یوگورغیل، گناهیم کوب دیب نومید بولمه، خداوند پاک اگر عفو ایلاسه نه عجب‌دور. ای رفیق اگر دل و جان بیرله توبه قیلسنگ شایدکه اسرارلاریمیزنی بیلگوجی الله لطف و مهربانلیک ایلاب (تمام گناه‌لارنی عفو ایلاسه) بیهوده و عبث سوزلاردین ایمدی (حالا) لبینگنی ییغیب الله خوفیدین تیتراگان و قالتراگان حالینگده ییغلاب کوز یاشینگنی جاری قیل و دل و جانینگ بیرله پروردگار رحمتینی و مغفرتینی تيله‌گیل، اولگی ییغلب لفظی (ییغ) امر ییغماقدین (لب) شَفَة معنی سیده‌دور، ایکی‌نچیس ییغلاماق (گریه) دین مأخوذ دور. (عبث) بی‌فایده و بیهوده معنی سیده‌دور. خوف الهی دین کوزونگدین آقان یولدوز کبی یاشینگ نفسینگ هواسینی پست قیلور، یولدوزلار شیطان‌لارینگ اوروب هیدایدیگان فرشته‌لارنی تاشیدور، فرشته‌لار یولدوز بیرله شیاطین‌نی قولاکان‌دیک یولدوز کبی یاشینگ هوا و هوس اوتینی پست ایتسه و خاموش ایلاسه عجب ایرمس، اگر ستار عالم پادشاه با کرم لطف و مهربانلیک ایلاسه (بیر آه و ناله سحری مقبول درگاه



الهی بولسه) ایکی دنیا ایشی بیر لحظه ده بیتسه نه عجب، تن پرورلیک و بیغملیک اثریده یوراکده بیغیلگان یاغلار و زنگ گناهلار کیتسون و دلیم منور بولسون دیسنگ علاجی آسان دور، بیر آز ریاضت بیرله کیچه لاری خوف الهی دین بولگان کوز یاغینی و بارانی (و غم آخرت) ایچ یاغینی آز قیلیب درگاه الهی گه یقین قیلور و زنگ دلی تازه لاب مصفا قیلور، اولگی یاغین و اوچونچی یاغینی مایع و روغن معنی سیده و یا گناه زنگیدین عبارت دور، ایکینچسی بارش معنی سیده یاغماقدین مأخوذ دور، اگر اوز قیلگان گناهینگ و عیینگا شرمینگ (اویاتینگ) کیلیب ایسیغ دلینگ خوف الهی دین مینگ بولونسه سнга نه دولت دور. اولگی (گرمینگ) ایسیغینگ معنی سیده، ایکینچسی (گر) مخفف اگر و (مینگ) هزار و الف معنی سیده مرکب دور. الله خوفیدین توکولگان بیر قطره یاش شیطان آلدیده کوب رشک (حسد) گه سبب بولور، چونکه ریادین اوزاغلیگی سبی دین درگاه الهی ده قدر و قیمتی کوب دور و باعث رحمت و مغفرت الهی دور. نیک بخت کیشی همیشه عاقبت و آخرت غمینی ییب بایدکه حق تعالی خوفیدین کیچه لاری بیغلاب کوزینی هول قیلیب چیقسه و یا کوز یاشینی شبنم کبی توکوب چیقسه ای سعادت یولینی ایستاگان برادر بو سوزلاردین غرض و مقصود شولکه [هر قنچه گناهینگ کوب بولسه ده] رحمت و مغفرت الهی دین امیدینگنی اوزمه، چونکه اول ذات قرآن کریم ده: لَا تَقْنَطُوا مِنْ رَحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا [۵۳: الزمر] دیدی، یعنی الله رحمتیدین نومید بولمنگلار، به تحقیق الله همه گناهلارنی مغفرت ایتور، لکن ای سالک مونی بیلماق کیراک کیم، شرک گناهی اوتولمس، شرک دین کیچیک گناهلارنی الله لطف ایلاسه خواهلاگان کیشی لارگه اوتار، آیه: إِنَّ اللَّهَ لَا يَغْفِرُ أَنْ يُشْرَكَ بِهِ وَيَغْفِرُ مَا دُونَ ذَلِكَ لِمَنْ يَشَاءُ [۴۸: النساء] دلیل واضح دور. شبنم فارسی، شلدورنگ اوزبکی دور.

حکایت

پشیمان بولدی احوال تبه دین
گنه دین مدتی ایردی سلامت
یمانلیغ آرقه سیدین کیتدی یانه
پشیمان اولدی قیلگان فعلیدین باز
ولیکن قیلدی بوزغان عهدیدین شرم
یقین بیتدی یوراکی یاریلور غه
کیین باقمه اوزونگنی ایلگری سال
دمی آبی اوشل دریادین ایت نوش

ایشیتگیل فاسقی یاندی گنه دین
کیلور ایردی یمان نفسین ملامت
یمان نفسی تقاضا قیلدی یانه
سحرگاهی اویاندی اول گنه ساز
بولور ایردی دل و جانی بیلان نرم
یوق ایردی زهره سی توبه قیلور غه
ندایی کیلدی هاتفدین اوشل حال
همیشه مغفرت دریاسی دور جوش



نیچه توبه ایتیب قیلدینگ شکسته
ایرور توبه‌نگ سنی مقبول درگاه
اوروب نعره یقاسین ایلادی چاک
خدایم قیلدی آخر اولیادیـن
امید اوزمک روا ایرمس گدادین
انگا هم بولمه مغرور ای خردمند
او یانیب لطفیگه اولتور سویانیب
باشینگ گر کوکگه بیتسه قُل سن ای یار
نچوک غافل ایرور سن خوف ایتاردین
اوزولسه نور ایمان بیرله جانینگ
قیامت کونگا قوپسنگ یوزلارینگ آق
اگر اونگ ایلگینگا کیلسه کتابینگ
بهشت جاودان قیلـسه کرامت
نچوک فارغ یورارسن خرم و شاد
مگر بو کل خطر دین آتلاسنگ کول

اگر چندی که بوزدوَنگ عهد بسته
دل و جانینگ بیلان چون ایلادینگ آه
ایشیتدی بول ندای مرحمت‌ناک
اوزیدین کیچدی و عجب و ریادین
ترحم بنده‌گه کوبدور خدادین
یقین بیل گرچه غافر دور خداوند
اوتار دیب یاتماغیل قانغه بویانیب
اگرچه لطفی کوبدور قهری هم بار
سنینگ آلدینگده چندان دور خطر دین
عنایت قیلسه حق اولگان زمانینگ
جواب قبرنی بیرسنگ چو به‌راق
ترازوغه آغیر کیلسه ثوابینگ
جهنم اوستیدین اوتسانگ سلامت
بولاردین اوتمایین ای آدمیزاد
جهان کولگو ییری ایرمسدور ای قُل

شرح: ای برادر بو حکایتی ایشیتگیل که فاسقی قیلگان گناه‌لاریدین یانیب (قیتیب) یمان احوال‌لاریدین پشیمان بولدی، یمان نفسینی ملامت قیلیب بیر نیچه وقت گناه‌دین سلامت ایردی، اما یمان نفسی ینه گناه‌گه آلوده بولماق تقاضاسینی ایتدی، اول فاسق توبه‌سیدین یانگان (قیتگان) حالده یمانلیغ آرقه‌سیدین کیتیب مرتکب گناه اولدی. اول گناه کار بیر کیچه سحر وقتیده اویقودین اویغاندی، ینه قیلگان ایشیدین پشیمان بولوب دل و جانی بیرله ملایم بولگان ایردی، لیکن توبه و عهد قیلیب انی سیندورگانیدین و بوزغانیدین اویاتور ایردی، ینه قیته باشدین توبه قیلماقغه زهره‌سی (قدرتی) یوق ایردی، بو حالت دین سیقیلیب یوراک یاریلورغه یقین‌لاشدی، شول حالده هاتفدین ندا کیلدی که آرقه‌گه قراماسدین (کیین‌گه قیتمسدین) اوزونگنی ایلگری سال و قیته‌دین توبه قیل، چونکه همیشه دریای مغفرت الهی قینماغده‌دور، اول اولوغ دریادین بیر هوپلام سو ایچگیل، اگر چندی که باغلاگان عهدینگنی بوزوب پنجاه مرتبه توبه قیلیب سیندوردوَنگ، اما چون دل و جانینگ بیلان آه اوروب پشیمان بولدوَنگ، شو سبب سنی بو توبه‌نگ مقبول درگاه الهی‌دور، بول ندای مرحمتناک‌نی ایشیتگان زمان نعره اوروب یقاسینی چاک ایلاب اوز نفس و هوا سیدین و عجب و ریاسیدین کیچدی، آخر الامر توبه نصوح و



استقامت اثریدین خداوند متعال انی اولیاءالله لاردین قیلدی، ترحم و شفقت الله طرفیدین بنده لارگه نهایت کوبدور، لهذا بیز گدا صفت قُل لاردین انی رحمت و مغفرتیدین امید اوزوب مایوس اولماک ناروا دور، و همیشه دروازه رحمتنی قاقماق کیراک، مونی هم یقین بیلماق کیراککه، اگرچه خداوند متعال گناه لارنی مغفرت قیلگوجی دور، لاکن (ای خردمند) انگا مغرور اولوب گناهگه آلوده بولماق عقل دین ایمسدور و گناهیمنی اوتار و لغزش لاریمنی کیچار دیب گناه قانیگه بویالیب یاتمغیل، غفلت اویقوسیدین اویغانیب عمل صالح قیلیب سونگره انی لطیفگه و فضل و مرحمتیگه سویانیب اولتورغیل و قیلگان یخشی عملینگگه اتکا قیلماق، انی فضلینگه تکیه قیل؛ اگرچه اللهنی لطف و مرحمتی کوب بولسه ده قهر و غضبی هم باردور. (ای رفیق!) اگر باشینگ آسمانغه بیتسه ده باز هم قُل دورسن.

وجودگه کیلیب دنیاده حیات کیچیریپ اولگونچه و آخرت حشر و نشر حساب و کتابیدین قوتولوب جنتگه کیرگونچه سنی آلدینگده کوب خطرلار بار دور، همیشه خوفده بولماغینگ کیراک، قنداغ (قولیگه خط برائت آلگان کیشی دیک) قورقمسیدین غافل یورورسن، الله عنایت ایتیپ اولار وقتینگده جانینگ نور ایمان بیرله اوزولسه و منکر و نکیرنی سوال لاریگه جواب باصواب بیرسنگ قیامت کونی قبردین یوزینگ آق تورسنگ ترازوی اعمالده ثواب پله سی آغیر کیلسه نامه اعمال اونگ قولدین کیلیب تیکسه صراط کوپروگی دین سلامت اوتسنگ الله جنت جاوداننی کرامت ایتسه و جنتگه کیریپ خاطر جمع بولگان دین سونگره خوشحال لیک قیل و کولوب یور (ای آدم ساده) بو قدر خطرلار یولونگده توروب اندین اوتمایین قنداغ شاد و خندان فارغ بیغم یورارسن (ای بنده) بو دنیا کولگو و عیش و عشرت بیریری ایرمسدور، بو همه ایتیلگان خطرلاردین آتلاب اوتوب کیتسنگ، سونگره کولغیل، اولگی کُل لفظی عربی همه معنی سیده، ایکی نیچیسی کولماقدین امر (اضحک) و بخند معنی سیده ترکی دور.

قضاغه راضی و بلاغه صابر بولماق بیانیده

قضاغه راضی بول صبر ایت بلاغه
خدانینگ ملکی بولسه جان و جسمینگ
نچوک قیلسه اوزینی اختیاری
بولورمی بنده ده حجت و برهان
اگر صبر ایتسه کیلگان بلاغه
قچان لایق بولور بنده آتیغه

کیل ای بنده اوزونگنی سال خداغه
یقین بیل بنده بولسه اصل اسمینگ
انینگ دور مال و ملکونگ هر نه باری
بویون سونغیل نچوک کیم قیلسه فرمان
کیشی کیم بولمه راضی قضاغه
اگر شکر ایتسه حق نعمتیغه



بولور جنت بو اولتورغان قواله^۱
 آلورسن بهره هر اوتگان دمیدین
 اگر آغو ایچر بیلگای انی بال
 رضا جو قل انی کورمسو یخشی

خداغه هر ایشینگ قیلسنگ حواله
 کونگولده قالمغای دنیا غمیدین
 قایو قلغه میسر بولسه بول حال
 خدانی گنجیدین بول بولسه بخشی

شرح: (ای بنده) اوزینگنی بالکل خداغه سالیب همه ایشلارینگنی انگا تفویض ایتگیل، قضا و قدرغه راضی بولوب، بلاغه صبر ایتگیل و نعمتگه شکر قیلگیل و مونی هم یقین بیلکه اصلی آتینگ بنده و قل دور، و جسم و جانینگ و مال و ملکینگ هر نه باری الله نینگ ملکی دور، خواهلاسه آلور، خواهلاسه بیرور، قنداغ قیلسه اوزینی اختیاری دور، چون و چراگه بندهده حق یوقدور، زیراکه قل دیگانهده حجت و دلیل و برهانگه اوروون بارمی؟ اطاعتدین باشقه چاره یوق، سوز شو بولسه هر نه که فرمان الهی بولسه بویون سونگیل و اطاعت قیلگیل، هر کیم قضا و قدر الهی گه راضی بولمسه و باشیغه کیلگان بلالارگه صبر ایتمسه و حق تعالی نعمت لاریگه شکر ایتمسه، بو خیل انسان قل لیک آتیغه قچان لایق و سزاوار دور. امام طبرانی کبیرده بو حدیث قدسینی ابی هندال داری دین روایت ایتیب دور: مَنْ لَمْ يَرْضَ بِقَضَائِي وَ لَمْ يَصْبِرْ عَلَيَّ بَلَائِي فَلْيَلْتَمِسْ رُبًّا سَوَاءً [حدیث ۱۸۲۵۴: المعجم الکبیر للطبرانی] یعنی هر کیم منی قضا (و قدریم) گه راضی بولمسه و بلایمگه صبر ایتمسه مندین باشقه پروردگار آختاریب تاپیب آلسون. بو حدیثده تامل ایتگان کیشیگه قتیغ تهدید باردور، اگر همه ایشینگنی خداغه تفویض و حواله قیلسنگ، شو دنیادهگی اولتورگان جایینگ جنت کبی بولور و کونگلونگده دنیا غمیدین هیچ قالمغای و عمرینگنی هر اوتگان نفسی دین بهره آلیب لذت لانورسن، هر قیسی بندهگه بو حال میسر اولوب (قضاغه راضی، بلاغه صابر، نعمتغه شاکر بولسه) اگر بالفرض آغو (زهر) ایچسه انی بال (عسل) بیلغای و نارضاایت لیک اظهار ایتمگای، چونکه خدای متعال خزانه سیدین اول کیشی نی بخشی (حصه و نصیبی) شول بولسه بنده رضا جو انی یخشی کوز بیرله کورمسو؟

حکایت

دیدای ای قل آتینگنی ایلا اظهـار
 منینگ آتیم اوشل دور ای نکو ذات
 دیدای سن دین نه تیکسه به دور ای پاک
 دیدای سن قیسینی بیرسنگ اوشل خوب

غلامی آلدی عبدالله انصار
 دیدای ای خواجه سن قویسنگ قایو آت
 دیدای ای قل سیورسن قیسی خوراک
 دیدای قیسی کییم کونگلونگده مرغوب

^۱قواله لفظی نی شارح فقیرلار دریا بویگه بنا قیلگان کیچیک راق اوی دیب دور، اما لغت لارده کورولمادی، مطلق جای معنی سیده بولسه بو بیرده مناسب راق دور. شارح



دیدى هر قيسى بولسه اختيارينگ
آقوزدى اشکين اول قُل چشم تردين
بولورمى قُل ديگان نينگ اختياري
نى دور چاره م بويون سونماقدين اوزگه
ييقيلدى بيرگه و اوردى اوزينى
اي عبدالله کوردونگ فعل بنده
طريق بنده ليک اورگان بو قُل دين

دیدى اى قُل نه دور کسبينگ و کارينگ
دیدى باری قيلورسن قاي هنردين
دیدى اى يخشى لارنى شهر ياري
اگر امر ايلاسنگ هر قيسى يوزگه
ايشيتدى خواجه اول قُل نينگ سوزينى
يقاسين چاک ايتيب دير ايردى انده
اوزونگنى سال خداغه جز و کل دين

شرح: شيخ عبدالله انصار رحمه الله بير قُل ساتيب آلدیلار، انگا آتینگنى ايتغیل نیمه دیدیلار، جواب لاریگه، اى خواجه سیز قيسى آتنی قویسنکیز منی آتیم شول دیدی. ینه قيسى ييميشنى سيورسن ديگانلاریده، سیزدين نیمه خوارک منگه تیکسه اول يخشى دور دیدی. ینه قيسى کييم سنى دلينگده مقبول و مرغوب دور ديگانلاریده، سیز قيسى لباسنى بيرسنگیز اوشل منی آلدیمده يخشى و مرغوب دور دیدی. ینه سنى کسب و کارينگ نیمه ديب سوراگانلاریده، هر قيسى ايش سيزنى اختيارينکیز بولسه منی ايشيم اوشل دور دیدی. ینه قيسى هنرنی يخشى بيليب انی قيلورسن ديگانلاریده، نملیک کوزيدین ياشينی آقوزوب دیدی، اى يخشى لارنى اولوغی، قُل ديگاننى اختياري بولورمى؟ خواجه سى هر نه ديسه انی قيلور، هر قيسى طرفگه و هر قيسى ايشگه امر ايلاسنگ بويون سونوب اطاعت ايتماقدين باشقه نیمه چاره م بار دیدی. اول غلام سوزينی خواجه عبدالله ايشيتيب بيرگه ييقيلدى، اوزينی اوروب يقاسينی چاک ايتگان حالده دير ايردى، اى عبدالله بندهنى ايشی قنداغ بولور ایرکان کوردونگمى؟ (سن هم بنده من ديب يوروب سن) ايمدی جز و کل، کتّه و کيچیک ايشلارينگنى و تمام امورينگنى خداغه ساليب بنده ليک يولينی بو قُل دين اورگانگیل.

نظر قيلمه حقارت بيرله زیهار
حدیثی کيلدی پیغمبر تیلیدین
نچوک آرتوق کورارسن حشمت و جاه
ورع دور حشمت و جاه و جلالی
حساب آخرت کم بولغانی خوب
که قارون بولغای ايردى اهل حالی
يباردی مالی بيرلان بير قوييغه
محمدغه بلال ایرمس ایدی یار

کیل اى ناظر مسلمان بولسه هر یار
فقیرنی بيلمه کم دنیا ایلیدین
دیدى الفقر فخری یعنی اول شاه
عملدور يخشى قُل لارنينگ کمالی
ایمس دنیاسی بولغان بيرله محبوب
اگر به بولسه بولغان بيرله مالی
قواندی نیچه کون دنیا اویيغه
اگر دنیاسی یوق دين بولسه ایر خوار



عطا قیلدی خدا اول کیچه معراج
 بلال نعلینی صوتی کیلدی انده
 دیانت ملکیده دور مرد میدان
 سلیمان سن اگر قیلسنگ قناعت
 قناعت برچه علتنی شفافسی
 قناعت اهلیغه آغو عسل دور
 بیراونینگ باشیغه موری قیلور حرب
 قیلور هر ایگی سین بیردیک قرا خاک
 بیراو کورگانی یوق عمریده بیر پول
 بولور هر ایگی غه زیر لحد جای
 بیراو تاتقانی یوق آغزی توله آش
 بولور هر ایگلاسی کورمگانددک
 بیراونی کلفتی بولماسه بیر گرد
 بولور هیچ کورمگانددک ایگلاسی
 بیمه هرگز اوتار دنیا اوچون غم

محمد کیم نبی لارغه ایدی تاج
 مقام سدره غه بیتدی او بنده
 بلای فاقه گه صبر ایتگان انسان
 اگر چندی که بولسنگ بی بضاعت
 قناعت دور کونگول لارنینگ صفاسی
 قناعت کیم طبیب هر کسل دور
 بیراونینگ حکمی بیتسه شرق دین غرب
 اجل جلادی کوکسین ایلاغاچ چاک
 بیراونینگ نقره و طلاسی مولمول
 مونی مفلس دیمس، تنگلا انی بای
 بیراو اوتکاردی عمرین عیش ایله فاش
 اجل جان اچیغین کورساتگاج اندک
 بیراوده بولسه دایم محنت و درد
 الار بولسه اولومنی مبتلاسی
 غرض بول سوزدین ای فرزند آدم

شرح: ای سالغوچی هر رفیق و برادر مسلمانگه زینهار حقارت نظری بیرله قرامه، فقیر و بیچاره لارنی اهل دنیا [بای] لار دین کم بیلمه و پست کورمه؛ بو خصوصده پیغمبر علیه السلام دین حدیثی کیلگاندور، اول ذات الْفَقْرُ فَخْرِي دیدیلار، یعنی فقیر و بیچاره لیک منی باعث افتخاریم دور، بو سوزدین اول ذات مقصدلاری شول دور که قنداغ پول و مال و حشمت و جاهنی فقر و بیچاره لیکدین آرتوغ کورورسیزلار، حال آنکه، (منی آلدیمده و الله نزدیده) یخشی قُل لارنینگ کمالی عمل صالح دور و الارنینگ حشمت و جاه و جلالی ورع و تقوی دور، هیچ کیم دنیادار و بای بولگان بیرلان محبوب درگاه الهی بولمس، بلکه متاع دنیوی آز بولوب حساب آخرت کم بولگانی بنده گه یخشی راق دور.

تنبيه: الْفَقْرُ فَخْرِي وَبِهِ أَفْتَحِرُ^۱. قَالَ الْعَسْقَلَانِي هُوَ بَاطِلٌ مَوْضُوعٌ وَقَالَ ابْنُ تَيْمِيَّةٍ كَذِبٌ. انتهى [موضوعات

ملا علی قاری]

^۱ حَدِيثُ : الْفَقْرُ فَخْرِي وَبِهِ أَفْتَحِرُ. فَبَاطِلٌ لَا أَصْلَ لَهُ عَلَى مَا صَرَّحَ بِهِ مِنَ الْحُفَاطِ الْعَسْقَلَانِيِّ وَغَيْرِهِ. [ج ۶، ص ۱۳۹، تحفة

الاحوذی]



اگر انساننی مالی کوب بولگاننی بیرله یخشی بولوشی لازم بولسه قاروننی اهل حال و یخشی آدم بولماغی کیراک ایردی، چونکه اول کوب دنیا دار اولوب و گنج لارگه صاحب ایردی، اما اول (کم بخت) نیچه کون دنیا اوییغه و مال و متاعیغه قوانیب یوردی، آخر الامر انی الله غضبیگه گرفتار ایلاب مال و منالی بیرلان بیرنی توییغه ییاردی. اگر دنیا سی یوق لیگی سببی دین کیشی خوار بولماغی لازم کیلسه، بلال حبشی (فقیر لیک لاری بیرله) حضرت محمد علیه السلام گه یار و رفیق بولمسه لار ایدی، حضرت محمد علیه السلام که پیغمبر لارنی تاج سری و همه لارینی سروری ایردی لار، اول کیچه کیم خداوند معراج مقامینی اول ذاتغه عطا قیلیب مقام سدره المنتهی گه بیتگان لاریده حضرت بلال کفش لارینی آوازی او بیرده قولاق لاریغه کیلدی، چنانچه احادیثه کیلیب دور: قَالَ قَالَ رَسُولُ اللَّهِ -صلى الله عليه وسلم- لِبَلَالٍ عِنْدَ صَلَاةِ الْغَدَاةِ «يَا بَلَالُ حَدِّثْنِي بِأَرْجَى عَمَلٍ عَمِلْتَهُ فِي الْإِسْلَامِ، فَإِنِّي سَمِعْتُ دَفَّ نَعْلَيْكَ بَيْنَ يَدَيَّ فِي الْجَنَّةِ». قَالَ بَلَالٌ مَا عَمِلْتُ عَمَلًا أَرْجَى عِنْدِي أَنِّي لَمْ أَتَطَهَّرْ طَهُورًا فِي سَاعَةٍ مِنْ لَيْلٍ وَلَا نَهَارٍ إِلَّا صَلَّيْتُ بِذَلِكَ الطُّهُورِ مَا كَتَبَ اللَّهُ لِي أَنْ أُصَلِّيَ.

[حدیث ۱۱۴۰ : بخاری]، [۶۴۷۸ : مسلم] یعنی، نماز بامداد دین کیین رسول الله حضرت بلال گه ایدی لار: ای بلال اسلامده (سنی اوچون) امیدوار لیک راق قیلگان عملینگدین خبر بیر، پس به تحقیق من کفشینگنی آوازی جنتده آلدیمده ایشیتدیم، حضرت بلال ایدی لار، هر آئینه تون و کوننی قیسی بیر ساعتیده طهارت ایتگانیم یوق، مگر اوشل طهارت بیرله منگا تقدیر ایتیپ یازیلگان نفل نمازنی اوقودوم و شوندین باشقه امیدگه یقین راق اوز نزدیمده عمل قیلگانیم یوق. (امام بخاری و مسلم روایت ایتیپ دور لار) فقر و فاقه و یوقچیلیک غه صبر ایتگان کیشی دیانت ملکیده مرد میدان دور، اگرچه بی بضاعت و کمبغل بولسنگ، اما قناعت قیلسنگ سلیمان وقتینگ سن و پادشاه لار کبی روزگار اوتکارورسن، چونکه قناعت دل لارنینگ صفاسیغه باعث دور، و همه علت لارنی شفاسیگه سبب دور، و قناعت هر قسم کسل و مرض طبیی دور، قناعت لیک کیشی لارگه آغو (زهر) غسل دور، ناظم رحمه الله غنی و اهل تنعم لار و فقیر و اهل غم لارنی کیتار وقتده گی حال لارینی بیان ایتیپ دیر لار: بیراونی الله پادشاه و حاکم قیلیب دور، انی حکمی شرق دین غربگه بیتار، و بیراونینگ (کمال عاجز لیگدین) مورچه (چملی) کبی ناتوان نمرسه باشیغه سلاح تار تیب انینگ بیرله حرب ایتار، وقتیکه اجل جلادی کوکراگینی آچیب لارنی جان لارینی آماقغه کیلسه، هر ایکسینی قرا تفرغ آستیغه کیرگوزوب بیر خیلده قیلیب قویور، بای و فقیر، امیر و اسیر اورته سیده فرق قالمس، بیراونینگ کموش و آلتونی مول و کول دور، بیرا و عمریده بیر پول کورگانی یوق دور، ایرته گه اولوم بیتیشگانده مونی مفلس و بی پول دیمس و انی بای پولدار، بلکه هر ایکسیغه لحد آستی جای اولور، بیرا و تمام عمرین عیش و عشرت بیرله اوتکاردی، بیرا و عمریده آغزی توله آش تاتمادی، وقتیکه اجل جان آچیغینی لارگه اندک کورساتسه و تاتورسه هر ایکسی دنیا ده هیچ نیمه نی کورمگان دیک بولوب قالور. بیرا وده همیشه محنت و کلفت و الم و درد بولوب، اما ینه بیرا وده بو کلفت و درد و مصیبت لار دین بیر گرچه



هم بولمسه وقتیکه الار اولوم پنجه سیغه مبتلا بولسه لار، هر ایکی سی دنیاده هیچ نمرسه نی کورمگان دیک بولوب قالور. (ای آدم اوغلی) بو سوزلاردین غرض شولکه، باید اوتکانلاردین عبرت آلیب قناعت پیشه بولوب، بو نیچه کونلیک اوتار دنیا اوچون کوب غم ییمه گیل و الله گه توکل ایلا گیل.

خیانت دین یراق بولماق بیانده

کیل ای کامل کمال ایتسنگ دیانت
خیانت کیم کیلور قولدین و کوزدین
مونی بیلگای جمیع آدمی زاد
خیانت کیم ایرور پیدا کونگول دین
نه کیم توشسه کونگولگه یا کوزونگه
روا کورسنگ مسلمان یغه آنی
قایو ایشگا رضا بولسنگ کونگولده
ایرور عصیان رضاسی چونکه عصیان
مسلمان اوغلینی کورسنگ اوزونگ دیک
قایو قل نی مونینگ دیک بولسه حالی
اگر چندی که بولسه شبهه کم
روا کورمه مسلمان یغه زینهار
خصوصاً بیرماگیل تقوی لیک ایرگا
تقی نینگ کونگلی دور دارالصیانت
اگر تاپیلسه نعمت آلدیغه ساچ
اگر مینگ خلطه بیرسنگ خلطه کوب زر
اگر بیرسنگ اریغ دین قطره آب
کیشیگه بیرسه کیم مال حرامی
بولور کافر امید ایتگان اول انسان
خیانت نینگ بیری کیم بولدی موصوف

کیشیگه قیلماگیل هرگز خیانت
ایاغ دین، عضو پنهان دین و سوزدین
ایمس حاجت که بیر-بیر ایلاسم یاد
مونی انگلا دیانت بیرمه قول دین
روا کورماسنگ اول ایشنی اوزونگه
مونی دیرلار خیانت نینگ یمانی
اگرچه قیلماسنگ بولدونگ او یولده
رضای کفردور کفر ای مسلیمان
ضررده، نفع ده بیلسنگ اوزونگ دیک
بو دور بی شک مسلمان لیغ کمالی
روا کورسنگ اگر اوز نفسینگه هم
اگر کورسنگ بناگه ایلا اظهار
مغیلان سیپماگیل ریحانلی بیرگا
صیانت خانه گه قیلمه خیانت
وگر بولماسه آغزینگ عذر ایله آچ
سنگا اندین نچوک سود ای برادر
ایرور چندان ثواب ای گوهر ناب
امید ایتسه ثواب اول مرد عامی
بیلیب آلیب دعا قیلگان هم اول آن
بیلیب قیلماسه هر کیم امر معروف



خیانت لیک دیگیل انداغ کیشی نی
 بیلپسن سالماسنگ گر یخشی یولگه
 ایرور انداغ اولوغ بخل و خیانت
 یانر اوتغه توشارین بیلسنگ آگاه
 نچوک بولغای مسلمانلیکده انصاف
 ایرورمیز بیر-بیریمیزگه برادر
 اوگورسه یوز مقام مغفرت دین
 بخیل لیک موندین اوتمس ای مسلمان
 اوزی نینگ بوینیغه بولغای وبالی
 تاپیبسن امر معروف نینگ ثوابین
 یمان کور اول ایشینی جان و دل دین

وگر نهی ایتماسه منکر ایشینی
 بیراو یول بیلمایین یوزلانسه چولگه
 نچوک انصاف ایرور، قیسی دیانت
 اگر آلدینگده طفلی بولسه ناگاه
 اوزاتمس بولسنگ انگا دست الطاف
 جمیع بنده مؤمن سراسر
 بیراو چیقسه طریق آخرت دین
 اگر کورساتمسه یول کورگان انسان
 سن آغان سونگره توز بولماسه حالی
 آچیب دورسن برادرلیکنی بابین
 اگر کیلماسه قولدین یاکه تیلدین

شرح: ای مرد کامل دیانتی کمالینی ایستاسنگ، هرگز کیشگه خیانت قیلماغیل، خیانت قولدین، کوزدین، ایاغدین، عضو پنهان (ذکر و فرج) دین و سوزدین وجودگه کیلور، مونی همه آدملار بیلور، حاجتی یوقکه همه سینی بیر-بیر یاد ایلاسم و ذکر ایتسم، دلدین ظهورگه کیلادیگان خیانتی انگلاب (بیلپ) قویغیل و دیانتی قولدین بیرماغیل، هرنه ایشی که کونگولگه کیلسه و یا کوزگا توشسه و اول ایشی اوز نفسینگا روا کورماسنگ، لیکن انی بیر مسلمانیغه روا کورسنگ، مونی خیانتی یمان دیلار. قیسقه چه سوز شولکه، باید انسان هر عضوبنی خدا و رسول طرفیدین امر ایتیلگن یولده ایشلاتماگی کیراک، کم از کم مباحگه استعمال ایتسون، اما خدا و رسول نهی ایتگان و قیتارگان یولگه ایشلاتماگی حرام یا مکروه دور. مثلا قول بیرله نامحرم خاتونی و یا امرد باله نی و یا شونگه اوخشش اوشلاماگی منهی نمرسه لارنی اوشلاسه و یا قولی بیرله ظالمگه کمک قیلسه و یا ایاغی بیرله حرام و یا مکروه ایش یولیده یوروب بارسه و یا کوزی بیرله قراماگی حرام نمرسه لارگه نظر سالسه و فرجینی حرام دین ساقلاماسه و آغزینی غیبت و شکایت چقیمچی لیک و یمان سوزلاردین پاک ایتماسه و دلینی هر خیل عقاید زائغه و خیالات فاسده لاردین توختاتماسه، بولار یا اوز نفسیگه و یا بیر برادر مسلمانیگه خیانت دور.

بو حدیث شریفنی امام بخاری ادب المفردده و ابویعلی و طبرانی کبیرده و حاکم و بیهقی یزید بن اسیددین روایت ایتیب دورلار، أَحَبَّ لِلنَّاسِ مَا تُحِبُّ لِنَفْسِكَ [حدیث ۱۸۰۸۳ : طبرانی] ^۱ و طبرانی روایتی أَحَبَّ

^۱ [حدیث ۱۰۶۱۷ : شعب الایمان]، [۱۶۷۰۴ : مسند احمد] و باشقه هم کوب کتابلارده کیلگن.



لَاخِيكَ دُور، و بیهقی رجال طبرانی نی ثقات دیب دور، یعنی اوز نفسینگا دوست توتگان نمرسہنی مردمگہ دوست توتگیل و امام بخاری و مسلم و احمد و ترمذی و نسائی و ابن ماجہ حضرت انس رضی اللہ عنہ دین روایت ایتیب دورلار: لَا يُؤْمِنُ أَحَدُكُمْ حَتَّىٰ يُحِبَّ لِأَخِيهِ مَا يُحِبُّ لِنَفْسِهِ [حدیث ۱۳ : بخاری]، [۱۷۹ : مسلم]، [۲۵۱۵ : ترمذی]، [۵۰۱۶ : سنن نسائی]، [۱۲۸۲۴ : مسند احمد]، [۶۶ : ابن ماجہ] یعنی ہیچ بیرینگیزی ایمانی کامل بولمایدی تاکہ بیر برادر مسلمانیکہ اوز نفسیکہ دوست توتگان نمرسہنی دوست توتماسہ، دلده قیسی ایشگا راضی بولسنگ، اگرچہ اول ایشنی قیلماسنگده اول یولده محسوب اولورسن، چونکہ گناہگہ راضی لیک گناہ دور و کفر رضاسی کفردور، کمال اسلام شولکہ مسلمان زادهنی کوزونگدیک عزیز کورسنگ فایده و ضررده اوزونگ دیک بیلسنگ، قیسی کیشینی حالی و فعل اطواری مونینگدیک بولسہ (اول کیشی مؤمن کامل دور) و بی شک مسلمانلیکنی کمالی شولدور، بیر آزگینہ شبہہلیک نمرسہنی اوز نفسینگا روا کورسنگده انی باشقہ بیر برادر مسلمانینگہ روا کورمہ، اگر اول شبہہلیک نمرسہنی سہواً انگہ روا کورسنگ شبہہناکلیگینی اظهار آیلہ، خصوصاً (اینوقسہ) شبہہلیک نمرسہنی تقوی لیک کیشیکہ بیرماگیل و ریحانلی بیرگہ مغیلان اوروغینی سیپماغیل و ایکماغیل، مغیلان بضم میم و کسر غین تیکن لیک بیر گیاه دور، عربیده ام غیلان دیرلار. ناظم رحمہ اللہ پرهیزگار کیشی لار وجودینی ریحان زار بیرگہ تشبیہ ایتیب و الارگہ شبہہلیک نمرسہلارنی بیرماغنی اول ریحانلی بیرگہ تیکن لیک اوت ایکماقغہ تشبیہ ایتیب دورلار، متقی لارنی دلی دارالصیانت دور، صیانت خانہگہ خیانت قیلماغیل و شبہہلیک نمرسہنی الارگہ روا کورمگیل، اگر نعمت حلال تاپیلسہ اول ذاتلار آدیلاریغہ ساچغیل و اگر حلال موجود بولمسہ آغزینگی عذر اوچون آچغیل. اگر مینگ خلطہ حرام و شبہہ کوب ارالاش طلا دین مردمگہ بیرسنگ سنگہ اندین نیمہ فایده، چونکہ مال حلال دین خیرات و صدقات بیرسہ مقبول اولور، اما شبہہلیک و حرام مخلوط مال دین صدقات او قدر فایده سی یوق دور. اما بالکل حرام مال دین صدقہ بیریب امید ثواب قیلماق قریب کفرگہ آلیب بارور، اولگی خلطہ لفظی اصلی خریطہ عربی دور، اما فارسی و اوزبکی ده خلطہ استعمال اولور، چرم و تکه باب نمرسہلار دین پول و باشقہ نمرسہلار سالماق اوچون یسالور، ایکینچسی عربی ارالاش معنی سیدہ دور، اگر اریغ دین (مال پاک و حلال دین) بیراگہ بیر قطره سو کبی آزگینہ نمرسہ بیرسنگ (ای گوهر خالص) کوب ثوابی باردور، بو توجیہ ده اریغ لفظی ده توریه باردور، چونکہ اریغ جوی معنی سیدہ مشهور دور، و سو لفظی هم فکرنی انگا آلیب بارور، لاکن ناظم رحمہ اللہ معنی بعیدی پاکنی ارادہ ایتیب دورلار، چونکہ یوقاریده شبہہلیک ناپاک مال دین صدقہ ذکر اولدی، اگر اریغ دین جوی مراد دیسک توریه بولمس معنی ظاہر دور، مال حرامنی بیر کیشیکہ بیریب امید ثواب ایتسہ اول کیشی کافر بولور، اول مالنی حراملیگینی بیلیب توروب آلیب دعا قیلگان کیشی هم اوشل آن کافر بولور. ینہ خیانت انواعیدین دیب وصف ایتیلگان نمرسہلار دین بیریب توروب امر معروف قیلمس لیک و نہی منکر ایتمس لیک دور، عالم بولوب توروب امر معروف و نہی منکر ایتمسہ انداغ کیشینی خاین دیگیل، بیرا یول بیلمس لیگ دین چول و صحراگہ



یوللانسه (و هلاک بولماغی خوفی بولسه) سن بیلیم توروب انی یخشی یولگه سالماسنگ بو قنداغ انصاف و قیسی دیانت دور، انداغ ایش کته بخل و اولوغ خیانت دور. اگر آلدینگده یاش باله بولسه بیردین انی یانگان اوتغه توشارینی بیلیم آگاه اولسنگ، انی خلاصیگه لطف و مرحمت قولینی اوزاتمسی بولسنگ بو قیلگان بی شفقت لیگینگ مسلمانلیکده قنداغ انصاف دین بولور، سراسر عالمده گی همه مؤمن لار بیر-بیریمیزگه برادر دینی دورمیز. شو اوچون بیرا و آخرت یولیدین چیقسه (و توبه قیلما ی) مقام مغفرت دین یوز اوگورسه یول کورگان عالم کیشی انی هدایت قیلیب یول کورساتمسه کوب یمان دور. حدیث شریف: **مَنْ كَتَمَ عِلْمًا اَلْجَمَهُ اللّٰهُ بِلِجَامٍ مِّنَ النَّارِ** [حدیث ۲۶۵ : ابن ماجه]، [۱۰۶۰۵ : مسند احمد]، [۹۶ : صحیح ابن حبان] تحتیگه داخل اولور و بخیل لار قطاریگه کیرور، اگر نصیحت و هدایت قیلگان بیرله انی حالی یخشی بولمسه و گمراه لیکیدین قیتماسه، گناهی اوزی نینگ بوینیغه دور، سن برادرلیک ایشیگینی آچیب دورسن و وظیفه ایمانی ادا قیلیب امر معروف ثوابینی تاپیب دورسن، اگر امر معروف و نهی منکر تیلینگدین ویا قولونگدین کیلمسه باید اول منکر ایشی جان و دل دین یمان کورگیل، امام احمد و مسلم و ابو داوود و ترمذی و باشقه لار ابو سعید رضی الله عنه دین روایت ایتیپ دورلار، رسول اکرم صلی الله علیه وسلم ایدیلار: سیزلاردین هر کیم منکر و یمان ایشی کورسه، پس انی قوی بیرله تغییر بیرسون و اوزگارتورسون، و اگر انگا قدرتی بیتماسه تیلی بیرله اوزگارتورسون، اگر انگا هم قدرتی بیتماسه دلی بیرله انکار ایتسون و دلی بیرله انکار ایتماق ایمانی نی ضعیف راغی دور.

جوانمر دلیک نشانی

کیل ای انسان اگر بولسنگ چین ایردیک	آغیرلیک پیشه قیل دنیا ده بیردیک
اگر تیپسه سنی هر قیسی موجود	زیان قیلمه تقی بیتکور انگا سود
یوراکینگ قیلسه لار آهن بيله چاک	چیقار آلدیغه تورلوک نعمت پاک
اگرچه عالمه سندین تیگار نفع	اوزونگدین قیلماغیل تفراغ آتین رفع
آتینگ ^۱ بیر دور سنم بیردیک قیلیق قیل	یمانلیغ ایلاگن گه یخشی لبق قیل
کیشی تاش اورسه باشه ای خجسته	کولوب باقغیل یوزیگه مثل پسته
بوسیندور ماقغه دلتنگ اولمه زینهار	امید اولدور که خوش کورگای خریدار
ایاغ آستیده قالدیم دیب دیمه وای	بولور چین کاسه کوب تیپکو بیسه لای
کیراک دشمنغه دوستلوغ قیلسنگ اظهار	باشینگ یارگان کیشی لارنی دیسنگ یار

^۱ بیران نسخه لارده ممکن آتنگ هم کیلگان بولسه کیراک، چونکه شارح بیت نینگ آتنگ شکلی نی هم کورستگنلار.



جفا الماسی تیکسه قتیغ الماس
و یا محنت جبالی یاتسه باسیب
قچان در کین بولور گر بولسه در کین
دعانی هرگز انگا قیلماغای بـــد
هدایت بیرله توفیقین تیلار بـــل
کیتور گردین کیراک گر دین کمالی

رضا ملکیده تمکین ایلاگان ناس
دیمس آسیب انی خلق اورسه آسیب
جهالت اهلی قیلمس کینه ترکیـن
اگر راضی بیسه مینگ ضربه یـــد
ضررگه راضی بولمس هرگز اکمل
سولور کین گردیدین طاعت جمالی

شرح: ای برادر، اگر حقیقی و چین ایرلار و مردخدا لاردیک بولسنگ بیر کبی آغیرلیک و وزمین لیکنی اوزونگه پیشه و کسب قیل، اگر هر کیم سنی ایاغی بیلان تیپیپ اذا یتکورسه انگا زیان و ضرر تیگورمسدین بلکه انکه فایده یتکورگین، چنانچه تفراغنی کللالار لای قیلیب قنچه کیراک تیپیپ ایشلاسه لار و انی ایاغ آستیده ایزسه لار اوشنچه یخشی ایدیشلار وجودگه کیلیب همه منفعت آلور، یوراکینگی اگر تیمور بیرلان یارسه لار زمین دیک الار آلدیگه تورلوک (رقم-رقم) میوه پاکنی چیقارغیل، یعنی دلینگه آزار نشترینی اوروب اذیت و تکلیف بیرسه لار مقابلیده الارگه یخشی لیک قیلغیل، اگرچه عالم اهلیگه سندین منفعت بییتیب تورسه ده اوزونگدین تفراغ آتینی کوتارمغیل و متواضع و سینوغ بولغیل، اسمینگ و آتینگ آدم خاکی دور ویا آتنگ و پدینگ تفراغدین یراتیلگان آدم علیه السلام دورلار، چون اصلینگ بیر تفراغ دور، لهذا سن هم بیردیک قیلیق قیلیب یمانلیک قیلگان کیشی لارگه یخشی لیک قیل، ای خجسته صفات، اگر کیشی باشینگا تاش بیرله اورسه پسته دیک انی یوزبگه کولوب باقغیل (خجسته: خانینگ ضمه سی-له و جیم و تانینگ فتحه سی-له مبارک و میمون معنی سیده دور) بو تاش بیرله اوروب باشینگنی یارماغیغه زینهار دلتنگ بولماغیل و سیقیلماغیل، امید شولکه دل سنوغ لارنی خریداری (الله) آلدیده مقبول اولوب و یخشی کورونگایسن، چونکه پسته نی هم تاش بیرله باشیغه اورسه لار آغزی آچیلیب قیمتی آشیب و خریدار آلدیده مرغوب و مطلوب اولور، دنیاده خوار بولوب ایاغ آستیده قالدیم دیب وای دیمه و شکایت قیلمه، زیراکه عاقبتی محمود دور، چنانچه لای قنچه کیراک کوب تیپکی بیسه و ایاغ آستیده ایزیلسه اوشنچه قدری آشور، و کاسه چینی اولور، دشمنگه دوستلوغ اظهار قیلماغینگ و باشینگنی یارغان کیشی لارنی یار و رفیق دیماغینگ کیراک، احسن الی من اساء الیک^۱ غه عمل قیلماق مردلارنی و نفسینی اولدورگان ذاتلارنی ایشی دور، چنانچه شیخ سعدی^۲ علیه الرحمة دیب دورلار:

اگر مردی احسن الی من اساء^۲

بدی را بدی سهل باشد جزا

^۱ [ج ۱۲، ص ۲۶۹، تفسیر روح المعانی].

^۲ باب دوم در باره احسان، بوستان، سعدی.



رضا ملکیده متمکن و بو مقامده جای آلگان کیشی لار آلماس جفا تیگیب مجروح ایتسه، انگا جزع و فرع قیلیب شکایت قیلمسلاار و انی قتیغ آلمسلاار، بلکه صبر بیرله مقابله قیلورلار، اولگی الماس لفظی بفتح همزه مشهور قیمت بیع معدنی تاشلاردین بولوب کوب قتیغ دور، هند، برازیل، ترانسوال و باشقه بعضی ممالک معدنیده تاپیلور، هر رنگ بولور. ایکینچسی آماقیدین نفی دور، نمی گیرد و لایاخذ معنی سیده دور. و هم راضی کیشی خلق انی بیر نمرسه گه آسیب اورسه لار و کلتک لاسه لار و یا محنت و مشقت تاغلاری باسیب یاتسه بولارنی آسیب و مصیبت و زحمت دیمس، اولگی آسیب لفظی فارسی آزار و ضرر معنی سیده و ایکینچسی ترکی آسماقیدین مأخوذ آویزان کرده معنی سیده دور. جاهل کیشی لار کینه و عداوتنی ترک ایتمسلاار، هر کیمنی عقل و ادراکی بولسه کینه نی یمانلیگینی بیلسه قچان کینه لیک بولور، اولگی در کین لفظی (در) و (کین) دین مرکب کینه لیک معنی سیده، ایکینچسی هم (درک) عربی و (این) فارسی بیرله مرکب و الف تخفیفاً حذف ایتیلیب (درکین) بولگن، مونی بیلگن و توشونگن معنی سیده دور، اگر رضا مقامیده گی کیشی بیر کیشی قولیدین مینگ کلتک بیسه انی حقیغه هرگز دعای بد قیلماغای و کامل کیشی بیر مسلمان ضرریغه راضی بولماغای، بلکه انی توفیق و هدایتینی الله دین تیلماغای طاعت و عبادت جمالی کینه و عداوت ساقلاماق گردیدین و انی تاثیریدین سولوب پژمرده اولور و ثوابی کیتور، اگر دین نینگ کمالی سنگه کیراک بولوب (کامل لاردین بولماقنی ایستاسنگ) کینه نی ترک ایتیپ طاعت اوستیغه توشگن گرد و تفراغنی کیتگورغیل و همه گه قلب مصفا بیرله رو برو بولغیل، اولگی گردین لفظی غبار و توزیگان تفراغ معنی سیده ایکینچسی (گر) مخفف اگر و (دین) آئین معنی سیده مرکب دور.

تنبیه: ناظم رحمه الله نی بو بابده گی یمان لیک قیلگانگه یخشی لیک قیل، سنی تیپسه انگا فائده یتکور، باشینگه تاش اورسه کولوب قره و دشمنگه دوست لیک قیل و شو کبی سوزلاری همه سی مسلمانلار مقابلیده دور، اما (خدا او کوننی باشگه کیتور ماسون) کافر و ده ری لار مقابلیده شدت و غلظت گه مأمور میز، چنانچه قرآن کریم ده سورة فتح آخیده حضرت محمد عليه السلام و اصحاب لاری تعریف لاریده: **مُحَمَّدٌ رَّسُولُ اللَّهِ وَالَّذِينَ مَعَهُ أَشِدَّاءُ عَلَى الْكُفَّارِ رُحَمَاءُ بَيْنَهُمْ** [فتح: ۲۹] یعنی محمد (ص) خدانینگ رسولی دور (اول ذات) و الارکه اول کیشی بیرله دورلار (صحابه لار) کافرلارگه قتیغ لیک بیرله پیش کیلورلار، و اوز اورته لاریده رحم و شفقت بیرله.

لهذا مسلمانلارگه جهاد فرض کفایه دور، بیر یوزیده بیر طائفه جهاد قیلسه همه دین ساقط بولور و الا همه گنه کار اولور. اما بیر مملکت اسلامیه کافرلار هجوم ایتیپ باسیب کیلسه، اول مملکت آدم لاریگه جهاد و مدافعه فرض عین بولور، اگر الارنی مدافعه گه قوت لاری بیتماسه، یانلاریده گی باشقه مسلمانلارگه هم الارگه معاونت فرض اولور، ثم و ثم همه مسلمانلارگه فرض اولور، بیز مسلمانلار شو فریضه دینی نی ادا قیلماگان لیک اوچون همه بیرده خوار اولوب یورومیز. الله هدایت ایتسون.



احد تاغیده بولگان محاربه

شہید ایتدی ینه بیتیمیش کیشینی	احد تاغیده پیغمبر تیشینی
عمر کیلدی پیمبرنی قاشیغہ	عجب کون توشدی مؤمن لار باشیغہ
دعا قیلغیل قریلسون برچہ کفار	دیدى بیغلاب ایا سلطان ابرار
هدایتگہ دعا قیلدی محمد ^(ص)	ولیکن قیلمادی اول دعوت بد
ابو سفیان و خالد ایردی سالار	اوشل روزی کہ انبوه ایردی کفار
مسلمان بولدیلار هر ایگلاسی	اجابت بولدی پیغمبر دعاسی
احد کافرلاری بولدی مسلمان	او ایگی ایر بیلان کوب اهل طغیان
مسلمان بولدیلار ایلگینده مینگ شهر	چو خالد آلدی دین نینگ شهیدین بهر
ابو سفیان قولیده تاپتی اسلام	عراق ایله دمشق و خطہ شام
میسر قیلمادی آلتون، کموشدین	محمد ^(ص) آلدی عالم خلق خوش دین
رسول الله نینگ خاص امتی سن	اگر سن مرد صاحب ہمتی سن
قیلورسن هر محلدہ پیرونی	توتارسن جان ایله فعل نبی نی

شرح: احد تاغیده مشرکین قریش بیرلان بولگن اوروشده پیغمبر ^{علیه السلام} تیشلارینی و اصحاب کرام دین بیتیمیش کیشینی کافرلار شہید ایتیب مؤمن لارنی باشلاریغہ عجب قتیغ کون توشدی، حضرت عمر ^{رضی اللہ عنہ} پیغمبر ^{علیه السلام} قاشلاریغہ کیلیب بیغلاگان حالده، ای سلطان ابرار، دعا قیلینگ همه کافرلار قیرلسون دیدی. لیکن رسول الله دعای بد قیلیش اورنیگہ الار هدایتیگہ دعا قیلدیلار: اللهم اهدي قومي فانهم لا يعلمون [ص ۲۱۷، ج ۱، تفسیر العلی القدیر لاختصار ابن کثیر] یعنی، خدایا قومیمنی هدایت قیل، پس البتہ بیلمايدورلار (نادان ایرورلار). احد تاغی مدینہ منورہنی شمال طرفیده بولوب مشهور اُحد غزوہسی شول بیرده وقوعگہ کیلگاندور، بو تاغ حقیده رسول الله، اُحد جبل یحبنا ونحبه [۱۴۸۲: بخاری] یعنی احد تاغی بیزنی دوست توتار و بیزانی دوست توتارمیز، دیدیلار. اوشل احد اوروشی کونی مشرکلار جماعہسی کوب توپلانیب کیلیب ایردی، الار طرفیدین ابوسفیان بن حرب و خالد بن ولید لشکر باشی ایردیلار، رسول الله دعا لاری مقبول درگاه الہی اولوب هر ایگی لاری فتح مکہده مسلمان بولدیلار، اول ایگی ایرنی مسلمان بولوشلاری بیلان احد کافرلاریدین کوب طاغی لار مسلمان بولدی، وقتیکہ خالد بن ولید ^{رضی اللہ عنہ} دین مبین اسلام دین بهرہ آلیب انی عسلیدین تاتدیلار، اول ذات قیادت و باشلوقلاری آستیدہگی لشکر قولیده تقریباً مینگ شهر فتح بولوب و آدم لاری اکثر مسلمان بولدیلار، حضرت خالد ^{رضی اللہ عنہ} جنابلاریگہ رسول الله (سیف الله) لقبی نی بیردیلار، تا آخر عمرلاریگچہ مینگلارچہ محاربهگہ



شامل اولوب آخر اوز اوی لاریده وفات ایتدیلار، کسل لیک ایام لاریده بعضی کورگان کیلگان کیشیلارگه ایتور ایدیلار، من بسا اوروشلارگه شامل اولوب محاربه ایتدیم، بدنیمده زخم و جراحت یتماگان ییری کم قالدی، افسوس که (شهادت درجه سیگه یتمسدین) بستریده اولورمن، لانامت عین الجبان، یعنی قورقاقنی کوزی اویقوکه بارماسون. بو سوزدین مقصدلاری مردمنی جهادگه ترغیب ایتیپ، الارگه دیماقچی لارگه انسان هر قنچه مهلکه لارگه توشوب محاربه لارده بولسه ده، تاکه اجلی یتماسه اولمایدور، اولومدین قورقوب جهادنی ترک ایتمنگ لار و هم شهادت جامیدین نوش ایتماگانلاریگه و اوی لاریده اولوشلاریگه تأسفلاری ظاهر اولور، اما ابو سفیان قولیده عراق، دمشق، شام خطه لاری فتح اولوب، خلقی اسلامگه مشرف بولدی.

تنبیه: عراق حضرت سعد قول لاریده و شام حضرت خالد.

حضرت محمد علیه السلام عالمنی آلتون کموش خرج ایتیپ آلگانلاری یوق، بلکه خلق خوش و رویه نیک اثریده مردم اوزیچه مسلمان بولدیلار، ای برادر، اگر سن هم مرد صاحب همت بولوب و رسول الله نینگ خاص امت لاری لیک دعوی سینی قیلسنگ، بایدکه، جان و دل بیرله رسول اللهنی قیلگان ایشلارینی قیلیپ و قیلماگانلاریدین اجتناب ایتیپ هر ایشده و هر محله اول ذات پیرولیک لارینی قیلورسن و یمانلیک قیلگانلارگه یخشی لیک قیلیپ الار حقیگه یخشی دعا قیلورسن.

مناقب خواجه بهاءالدین نقشبند علیه الرحمه

بهاء الحق والدین طاب ثوابه	عوانیغه یولو قدیلار بناگاه
عوان بیر سوز دیدی اول بنده بیر سوز	عوان قویدی یمانلیغ بابینه یوز
یوزیغه سالدی قمچین مرد خالی	قیزیل قان بولدی سنبل دیک سقالی
اوشل قان لیک سقالین آلدی قولگه	دیدي یارب مونی سال یخشی یولگه
غضب قیلمه انگا قیلغیل هدایت	مهم اخروی سین قیل کفایت
بو سوزنی انگلادی اول مرد بی باک	اوروب نعره یقاسین ایلادی چاک
یوزینی بیرگه سور توب ناله قیلدی	کوزینی یاشینی چون ژاله قیلدی
آلیب همت عصاسین کیردی یولغه	قولین تابشوردی اول همتلی قُلگه
انا خلق و انا علم و انا حال	انا دولت انا نصرت و اقبال
انا همت انا خُلّت انا کار	انا تبعیت سلطان ابرار
یمان لارنی ایشیدور کینه توتماق	مسلمانلیغ یمانلیغنی اونوتماق



قیلور قنچه جفا کیلسه تحمل
حمیتده کیراک چون قتیغ الماس
اگر چندی که اول ایش بولسه بیر گرد
نظر ایله کـــتاب مجتهدین

اوزینی نفسینی کم ایلاگان قُل
ولیکن بو تحمل ایلاگان ناس
حمیت بایینی اوتکارمگای مرد
حمیت قیسی دور بیلسنگ به تعین

شرح: جناب حضرت خواجه بهاء الدین نقشبند علیه الرحمة (که سلسله طریقه نقشبندیه اوشل ذاتگه منسوب دور) خداوند جایلارینی جنتنی یخشی قصرلاریدین قیلسون! ناگاه بیر عملدار [حکومت کیشی سیغه یولوقدیلار و دچار کیلدیلار، اول کیشی بیر سوز دیدی، مقابلیده خواجه بیر سوز دیدیلار، اول عملدار یمانیغ کوییغه یوز قویدی، اول اوز حدیدین تجاوز قیلگان عملدار اول جناب یوزلاریغه بیر قمچین سالدی، اول ذاتنینگ سنبل کبی سقاللاری قانگه بویالدی، اول جناب قانلیک سقاللارینی قولغه آلیب یارب بو بندهنگنی یخشی یولگه سالگین و انگا غضب قیلمای عنایت و مهربانلیک قیل و اخروی مهماتینی اوزونگ کفایت قیل دیب دعا قیلدیلار. اول بی باک و بی پروا کیشی بو سوزلارنی و قیلگان دعالارنی انگلاب اول ذات نفسلاری انگا تاثیر ایتیپ، نعره اوروب یقاسینی چاک ایلاب یوزینی بیرگه سورتوب، ناله قیلیب، کوز یاشینی ژاله دیک قیلیب آقوزدی و همت عصاسین قولغه آلیب طریقت یولیغه کیریب اول ذاتغه (حضرت بهاء الدین گه) قولینی تابشوروب مرید اولدی، انا خُلق، انا حلم، انا حال، انا دولت، انا نصرت، انا اقبال، انا همت، انا خلت، انا ایش، انا سلطان ابرار (رسول الله) گه پیرولیک، مونداغ بولور، سن هم موندین اورنک آلیب، بو اخلاقلارگه متصف بولغیل و یمانلیک قیلغانلارگه یخشیلیک قیلغیل، کینه توتماق و دلده ساقلاما ق یمانلارنی ایشی دور، اما یمانلیکنی اونوتوب انی دلدین چیقارماق مسلمانلارنی و یخشی ذاتلارنی ایشی دور، ریاضت و طاعت اثریده اوز نفسینی ایزیب انی هوی سیدین قیتاریب باشقه لارنی اوزیدین زیاده و نفسینی همه دین کم کورگان کیشی هر قنچه اولار طرفیدین جور و جفا کیلسه، انگا صبر و تحمل قیلور، لیکن بو صبر و تحمل قیلگان کیشی حمیت باییده و ناموس توغریسیده الماس کبی قتیغ و تیز بولوب سهل انگار و سستلیک دین اوزاغ توروب غیرت و حمیتنی اوز وقتیدین اوتکارمسدین تیکشیریب مقصرلارگه سزا بیرغای، اول بی پروالیک اگرچه بیر گرچه (آزگینه) بولسه ده اندین اوتمغای، حمیت شرعی قیسی لیگینی انیغ بیلماقچی بولسنگ، فقهای کرام و مجتهدین عظام کتابلارینی مطالعه ایتگیل و الارگه نظر سالغیل و یا علمای کرام دین سورگیل.

(عَوَّان) به فتح عین و تشدید واو ظالم و حکومت دربارینی عسکری منصبداری معنی سیده، لیکن ناظم ضرورت شعری اوچون به تخفیف واو استعمال قیلیب دورلار.



ایشان صوفی یاران لاریگه وداع قیلگان لاری

آلورمیز دیب محبت جامیدین شهد
 آچیلمس عاصیدین سیز آیغان اشکال
 کشفات و علامات و مقامات
 آلیب ایردیم ایلک نفسانیت دین
 بهار و تیره ماه و یاز و قیش دین
 طمع نانیغه قول سالغان لاریمغه
 یورونگلار بیر مکمل ایرته یانه
 عزیزی ایستنگیز سیزدین رضامن
 او یاتلیغ من سیزینگ رخسارینگیزدین
 ییلیب یوگوروب امید ایتکانینگیزدین
 منینگ حالیمغه مشکل دور صبا یوم
 توتونگ محکم انینگ قوتلوغ ایشینی
 مبارک باطنی چون در و مرجان
 انینگ ظاهر سوییدین بولسه سیراب
 چوموب باطنغه جیبین ایلاسه پر
 جهان ایوانی کینگ دور خالی ایرمس
 قنی اخلاصی کوب همتملی غواص
 وگر نه قول سالیب قاقماق نچوک سود
 خبردار ایلانگیز من روسیه نی
 قدم تفراغینی کوز توتیاسی
 منگا هم بیرسه لار وحدت می دین

برادرلارکه بیزگه قیلدینگیز عهد
 تاپیلمس بنده ده سیز ایستگان حال
 طلب قیلمنگ بو ناقص دین کرامات
 بیله آلمن نهانی تربیت دین
 پشیمان من، پریشان اوتکان ایشدین
 پشیمان من ایلک آغان لاریمغه
 بارینگ ایمدی یارانلار هر قیانه
 قوروغ قول آغانیمدین در اذامن
 منی دیب قالمگیز اوز کارینگیزدین
 بحل ایلانگ کیلیب کیتگانینگیزدین
 کیچورمس بولسنگیز من قل دین ای قوم
 تانیب مندین تانیب اورع کیشینی
 کیراک مرشد دیگان چون بحر عمان
 جهالت دشتیدین کیم کیلسه سوساب
 اگر بولسه کیشی کیم طالب در
 دیمنگ تاپیلماغای بو نشئه لیک کس
 تاپیلغانده مونینگ دیک لجه خاص
 چوموب آغای ایلیمغه در مقصود
 اگر سیز تاپسنگیز بیر یخشی شه نی
 قیلای من هم یوزین کونگولوم ضیاسی
 نه بولغای سیز برادرلار پی دین

شرح: ای برادرلارکه محبت جامیدین شهد آلیب ایچورمیز و طریقت و تصوف یولیگه کیریپ بهره ور بولورمیز
 دیب، بیز بیرله عهد ایتیپ قول بیریب بیعت قیلیب مرید بولگانلار، من بنده عاجزده سیز ایستگان حال تاپیلمس
 و بو بنده عاصی و گنهکار دین سیز آیغان طریقت اشکال و چیگل لاری آچیلمس و بیشیلمس، لهذا بو بنده
 ناقص دین کرامات و کشفات و علامات و مقامات (لارکه اولیاء الله لاردین ظهورگه کیلور) طلب قیلمنگ،



نهانی سری تربیتنی بیلمای من، مریدلار قوللارینی نفسانیتدین و هوی و هوسدین آلیب ایردیم، شونینگ اوجون بو اوتکان پربشان ایشلاردین و شو خیل بی‌ثمر اوتکان آی و ییللار و بهار و کوز و یاز و قیشلاردین پشیمان من و هم خلقنی قولینی آلیب مرید قلیب طمع نانیغه قول سالغانلاریمغه نادم و خجالت من، ای رفیق و برادرلار، هر طرف و هر قیانه بارینگلار و بیر پیر کامل و مکمل ذاتیگه تیانیب و سویانیب انی صحبتیده یورونگلار، علم حالدین قوروغ بولوب توروب خلقنی مریدلیکغه قبول قلیب قوللارینی آلغانیمدین خیلی آزرده من، حالا بیر عزیز کاملینی ایستنگیز و اول کیشیگا انابت قلیب قول بیرنگیز، سیزلاردین راضی من، منی مرشدیم دیب یوروب اوز ایشلارینگیزدین قالمنگلار و سیزنی یوزینگیزدین اویاتلیغ من، منی آلدیمگه کیلیب کیتگانینگیزدین و تیز یوگوروب مندین فیض و فتوح امید ایتکانینگیزدین اوتونگ و کیچیرینگ و بغیشلانگ و حلال ایتینگ، اگر ای گروه، بو نمرسه‌لارنی مندین کیچورمس و اوتمس بولسنگیز، ایرته‌گه قیامت کونی منی حالیمغه مشکل و قیین بولور. (بَحَلْ) لفظی بای فارسی و حَلْ عربی بیرله مرکب بخشش و عفو و حلال ایتیش معنی‌سیده‌دور، و (صبا) لفظی مخفف صباح ایرته‌سیده بو بیرده قیامت کونینی اراده ایتیب دورلار. مندین تانیب و انکار ایتیب بیر متقی و پرهیزگارراق ذاتنی یخشی تانیب اول کیشینی قوتلوق (مبارک) و یخشی ایشینی محکم توتوب اول جنبه‌ پیرولیک قیلینگلار. اولگی تانیب لفظی تانماقدین مأخوذ انکار و قیتماق معنی‌سیده، ایکینچیزی تانماقدین مأخوذ معرفت معنی‌سیده‌دور. مرشد و پیر دیگان کیشی علوم ظاهریده بحر عمان و دریای بیکران دیک و علوم باطنی‌ده انینگ مبارک ایچی دُر و مرجان بحر عمان کبی بولماغی کیراک، هر کیم جهالت چولیدین سوساب علوم ظاهر سوییدین ایچکالی و علم تاپگالی کیلسه انینگ علوم ظاهری‌سیدین سیراب اولسه و اگر کیمسه طالب دُر حقیقت و مرجان طریقت بولسه، اول ذات باطنیغه چوموب چونتاک و قوبینی اول در و گوهرلاردین تولغازسه یعنی مرشه و پیر کامل اول ذات بولوب بیلورکه علوم شریعتده کامل و علوم طریقت و حقیقتدین هم حظ وافر بولوب علم و عمل و تقوی‌نی جمع‌لاگان کیشی بولسه، مونداغ کامل و مکمل عالم و عامل نشأ‌لک کیشی تاپیلماغای دیمنگلار، جهان‌نینگ ایوانی و دنیانی اطرافی کینگ‌دور، مونداغ ذاتلاردین خالی ایرمس‌دور (نشأ‌ة) خلقت معنی‌سیده‌دور. مونینگ‌دیک عالم، عامل و مرشد کامل (که علم قال و حالده لجه‌ خاص دریا کبی پُر) ذات تاپیلغانده اخلاصی کوب همتلیک غواص و مرید خاص قنی‌که اول لجه‌ خاص الهی و دریای پر دُر و مروارید نامتناهی‌گه چوموب قولیگه دُر مقصودنی آلسه و اول ذاتنی علوم ظاهری و باطنی‌سیدین بهره‌ور بولسه، و الا تنها بیر قول بیرب مرید بولوب اول جنابنی خدمتیده تورمای و استفاده ایتمای (دریاگه بیر قول اوروب قاچقان کیشی‌دیک) یورگان‌دین نیمه فایده، اگر شونداغ بیر یخشی ذاتنی تاپسنگیز، مندیک یوزی قرا (کنه‌کار) نی هم خبردار قیلینگ، تاکه من هم اول ذاتنی پرنور یوزینی کورماقنی و او کیشی صحبتیده بولماقنی قرا کونگلوم ضیاسی و دلیمنی نوری قیلای و باسقان ایاغ تفراغینی کوز توتیاسی



ایلائی، اگر سیزلارنی آرقه لارینگیزدین منگه هم وحدت میی دین بیرسه لار کرم الهی و نعم نامتناهی سیدین نیمه کم بولغای.

ایشان صوفی فرزندلاریغه نصیحت قیلغانلاری

تَوَّام اولدور ای فرزانه فرزند	نگهدارینگ سنی بولسون خداوند
کوزومنی روشنی صادق محمد	یراق بولسون کوزونگدین دیده بد
ایشیت من خسته دین بیر نیچه قولی	ییگیت لیکغه سنی بیتکورسه مولی
یمان یورمه یمان اندیشه قیلمه	آتنگ دیک روسیه لیک پیشه قیلمه
یراتغان تنگریغه قیلغیل توکل	طمع قیلمه کیشی دین بیرگینه پول
طمع بیر پرچه بولسه قیلماغیل رای	بولور بیر پرچه دین یوز پرچه بی جای
یوزونگدین پرده کم کم بولماسون پست	حیادین عاری یوزنی عاری بولمس
طمع بیرله کیچورگان نفس غماز	اگر آغزین تیلار بولسنگ تیلار باز
نقاب شرم آچیلمسدین بورونراغ	انی بیرک ایله هر یاقدین تالقیب باغ
قناعت قیل ملامت ملکی بولمه	اتانگ دیک خلق و ایلگه کولگی بولمه
پیمبرلار فعالی دور قناعت	انگا وابسته دور مجموع طاعت
بیلینگنی باغلا محکم بولمه مفلوج	کوزونگ آچ کاروانی قیلدیلار کوچ
بیلینگنی باغلا محکم بنده لیک گه	اتانگ دیک قویمه یوز شرمنده لیک گه
شرارت اهلینی پیوندی بولمه	هوی بیرله هوس نی بندی بولمه
کیچیک لیکدین عبادتگه بویون قوی	قیامتنی اویون قیلسنگ اویون قوی
عجب خوشدور کیچیک لیکدین بولوب ساغ	بو کولماغنی قویوب غمدین بوکولماغ
شبابی توکسه کوزدین هر شب آبی	انی عینین دیگیل رحمت سحابی
ریا گردینی یوقتورمه ایتک گه	آتنگ دیک بولمه تابع نفس سک گه
تواضع دین کوتارمه یوقاری باش	تکبر قیلماغیل مانند خشخاش
تکبر خاطرینگه کیلسه فی الحال	عزایل قصه سینی یادینگه آل
کونگول نینگ منزلین قیل گوشه فقر	قیامت زادی قیلغیل توشه فقر
جهان نینگ حرصیدین قیلغیل اوزینگ دور	آتنگ دیک بولماغیل دنیاگه مغرور



امید ایتگان کوزومنی نوری بالـم
 اگر چندی که بولسنگ قول قنات لیک
 اوروغ لیغ من دیمه تانگلا اوروغ بار
 اوزونگنی ایلا کوب بولغان سری خوب
 بولوب خویش و تبارینگ بیرله مغرور
 بو دنیادین اگر اوتسنگ قوروغ لب
 اوتار دنیاده هر کیم بولسه دین لیک
 عجب آفت ایرور جاه و ظرافت
 بیلیب دنیا مقامین غیر معمور
 کوتارسنگ باشغه ارتوغ بولمه ارتوغ
 خدادین هر نه کیلسه ایلاغیل صبر
 خدانینگ امریغه قیلغیل اطاعت
 محبت فوطه سینی باغلا بیلـگا
 هوس دنیاده قیلمه محترم لیک
 اگر اوچ کونده تاپسنگ پرچه نان
 اگر بیر ییلده پیدا بولسه بیر پول
 کیتارنی بیلسه هر کیم جای تنگه
 جهان مهرین کونگول دین ایلا زایل
 ایشینگنی ایلاغیل کون کوندین اقوی
 اگر تقوی ایشین قیلسنگ به اخلاص
 اگر بولسون دیسنگ جان و دلینگ جمع
 اگر علم و عمل بیر بولسه رنگی
 اگر تاپسنگ خدا درگاهیده قرب
 سحرلار قوب کوتار دست دعانی

آتنگ دیک بولماغیل رسوای عالم
 خدا درگاهیده بول مسکنت لیک
 حساب و نامه و وزن و سوروغ بار
 نیچه من کوب دیگانلار بولدی منکوب
 دیمه من زور اگر دین بولسه منظور
 کونگولگه سالمه هرگز یاد منصب
 بیلور منصبدین آرتوق خوشه چین لیک
 شرافتنی بیلله کورمه شرافت
 بولور زیرک وزیرک آتیدین دور
 بولور معلوم صبا اورسه ملک بوغ
 آتنگ دیک قیلماغیل اوز نفسینگا جبر
 زیاد ایت طاعتینگ ساعت به ساعت
 آتنگ دیک عمرینگ اوتکارمه بیلگه
 ولی بول حالینگه لایق کرم لیک
 بیمه یلغوزانی یرمین قیل احسان
 بیمس یلغوز خدانی ایستگان قل
 بیمس تنگه غمین بو نفس لنگه
 آتنگ دیک بولماغیل دنیاغه مایل
 خدانی سویگانی دور اهل تقوی
 دیگای شاید سنی حق بنده خاص
 ورع آئین بولوب علم آئین ایت شمع
 هر آیین کیتار آئینه زنگی
 محبت کاسه سیدین بیرسه لار شرب
 تیلله مونگلوغ اتا بیرله انانی

شرح: ای فرزند زیرک و باهوشیم (الله جلّ شأنه دین) تولاّم تیلّاگیم و امید شولکه سنی ساقلالاغوچی خداوندنی
 اوزی بولسون، ای کوزومنی نوری اوغلوم صادق محمد عائین و حاسد یمان کوزلیک کیشی لارنی دیدۀ بدی سنی



کوزونگدین یراق و اوزاق بولسون (تولام) (تولّا) گه میم متکلم قوشولگان اصلی تَوَلّی عربی، اما فارسی و ترکی ده تَوَلّا و تمنا دیب بیرله استعمال ایتورلار، امید معنی سیده دور. من پیر خسته آتنگدین بیر نیچه نصیحت و وصیت سوزینی ایشیتیب قولاغینگه ایسیرغه قیلیب تاقغیل، مولی میز الله سنی یگیتلیک و جوانلیکغه بیتکورسه، یمان یورمه، یمان تورمه و یمان اوپلامه، آتنگ دیک یوزی قرالیکنی کسب و پیشه قیلمه، یراتگان الله گه توکل قیلیب هیچ کیشی دین بیر پولگینه طمع و توقع قیلمه، طمع اگرچه بیر (پرمقداریچه آز اولسه ده انی طرفیگه رأی اوروب تمایل قیلماگیل و اوزونگنی آلوده ایتماگیل، چونکه بیر بار پرده حیا کوتاربیلیشی تاثیریدین یوزلار پرده بیجا اولوب بی خیالیک عادت اولوب قالور [پرچه] لفظی پَر اوچادیگان جانورلارنی بدنیده گی موی معنی سیده، و (چه) کلمّه تصغیر بیرله مرکب دور، ویا پرده حیا توشیشی بیرله یوزنی پرده سی بی جای اولوب سیرغیلیب توشماقغه باشلار، شو خیلده سنی یوزونگدین پرده حیا کم-کم قوی توشماسون و بی شرملیک عادت بولماسون، چونکه حیادین عاری (برهنه) یوزنی (عاری) ننگ و شرمی بولمس، اولگی عاری اسم فاعل لُج و برهنه و یلانغاچ معنی سیده، ایکینجی سی ننگ، شرم معنی سیده عار لفظیگه یای نسبت قوشولگن، عمرینی طمع بیرله کیچورگان یمان عیب جو نفسینگ اگر انی آغزینی قناعت پچاغی بیرله تیلسنگ و کیسسنگ هم ینه عادیچه بیر اولاردین تیلار و طلب قیلار، چونکه ترک عادت امر محال دور، اولگی تیلار لفظی تیلماقدین آینگان، بولک قیلماق و کیسماق معنی سیده، ایکینجی سی تیلماقدین آلینب، طلب ایتماق و سوراماق و گدالیک قیلماق معنی سیده دور، نقاب و پرده شرم و حیا آچیلیب بی خیالیک عادت بولمسدین ایلگری راغ اول نقاب و پرده نی هر طرف دین باغلایدیگان ایپ تاقیب باغلاب محکم قیل و قناعتنی پیشه قیل، بی قناعتلیک قیلیب مبادا ملامت قبضه سیگه اسیر اولمه و آتنگ دیک ایل و خلقگه کولگی و مسخره اولمه، باغ لفظی ترکی شو بیرده باغلایدیگان ایپ معنی سیده، مثل بیل باغ، ایشتان باغ و غیرهما. قناعت پیغمبرلارنی خوی و خصلتلاریدین دور، همه طاعتلار انگا وابسته و باغلوغ دور و بیلینگنی بارگاه الهی گه بنده لیک غه محکم باغلاب آتنگ دیک شرمنده لیکغه یوز قویمه، شرارت اهلینی یولداشی بولمه و الارگه ینداشمه و هوی و هوسنی اسیری بولمه، یاشلیکیدین عبادتگه بویون سونوب گردنینگنی ایگغیل، قیامت و آخرتنی یادینگغه آلیب اوپلاسنگ اوپون و کولگینی قویوب توشه آخرتنی تهیه قیل، اولگی اوپون لفظی اوی یاد و ایس معنی سیده و (ن) مفعول بیرله مرکب یادینی معنی سیده دور، ایکینجی سی لعب و بازی معنی سیده دور، کیچیک لیک دوری، و یاشلیک ایامی دین طاعت و عبادتگه بویون سونوب و لهو و لعب و یمان ایشلاردین ساغ و سلامت بولوب بو خیلده اوپناماغ و کولماغنی قویوب و ترک ایتیب آخرت و قیامت و عاقبت غمیدین بوکولماغ و ایگیلماغ قنداغ یخشی دور، اولگی بوکولماغ لفظی (بو) اشارت و (کولماغ) ضحک و خندیدن معنی سیده مرکب دور، ایکینجی سی ایگیلماغ و خم شدن معنی سیده دور. اگر یاش ییگیتلار الله خوفیدین هر کیچه سحرلار توروب کوزلاریدین یاش و اشک سوینی توکوب بارگاه الهی گه سیغینسه لار، الارنی ایکی کوزینی رحمت بولوتی



دیگیل. اُولگی شباب لفظی عربی شابنی جمعی دور، بیگیتلار معنی سیده، آخبرده گی یای تنکیر دور. ایکینچیسى (شب) کیچه و لیل معنی سیده و (آبی) سوی معنی سیده مرکب دور، لیکن بو پرده کوز سوی (یاشی) مراد دور، طاعت و عبادتده باخلاص بولوب ریا (اوزی توگول) انی گردینی دامن و ایتاکینگ گه یوقتورمه و آتنگ دیک نفس ایت صفت گه ایرگاشمه و انی آرقه سیده بولمه، همیشه اوزونگی همه دین کم توتوب متواضع بولوب هرگز اندین باشینگی یوقاری کوتاریب خشخاش (کونار) بوتہ سی کبی قدینگی بلند، بالالیگی گه مغرور اولوب تکبر قیلمه، اگر کبر و غرور دلینگی گه کیلسه، فی الحال شیطاننی (سجده گه امر قیلگنده کبر و غرور ایتیپ سجده دین بویون تابلانگان) قصه سینى یادینگا آلیب کبر دین اوزونگی ساقله، فقر و بی نوالیک کنج و کنارینی کونگلونگه منزل و جای قیل، یعنی همیشه دلینگده فقر محبتی جاگزین بولسون، فقر توشه سی که فقیرلیک و بینوالیک دور، انی قیامت زادی و آخرت توشه سی قیلغیل، حرص دنیادین اوزونگی اوزاق قیل، آتنگ دیک دنیاغه مغرور و فریفته بولماغیل، ای کوزومنی نوری یخشیلیکنی امید ایتکان بالم آتنگ دیک سن هم رسوای عالم بولماغیل، اگرچه قول قناتلیک (آغا-اینی لیک، خویش و تبارلیک) بولسنگده کبر و غرور قیلمسدین درگاه الهی ده عجز و فقر و مسکنت بیرله متصف بول و شکسته لیک اختیار قیل، اوروغلیغ من، قوم و قرینداشیم کوب دیب، قُوانمه و کبر ایلامه، چونکه ایرته گه اجل بیتسه، انی اوروغی و دَرُو قیلیب، قوم و قبیلنگ بیرله قبرگه یوبارماغی بار دور، اندین سونگ قیامتنی حساب و کتابی و نامه اعمال کیلماغی و ترازوده عمل لارنی اولچاماغی و قیلگان ایشلارنی سورماغی باردور. اُولگی اوروغ لفظی قوم و خویش و تبار معنی سیده، ایکینچیسى حصاد و دَرُو معنی سیده دور. سوروغ سوال و پرسیدن معنی سیده دور، اوزونگی (قوم و قرینداشینگ کوب بولغان سری انگا شکر ایتیپ) یخشی قیلماقغه کوشش ایلا، چونکه اوتگن اقوام لار دین قنچه منی قومیم کوب دیب فخر و غرور ایلاگان لار آخر منکوب اولوب فلاکت و مصیبت لارگه گرفتار اولدیلار، اُولگی من کوب لفظی من (انا) معنی سیده متکلم دور، و کوب (بسیار) معنی سیده مرکب دور، ایکینچیسى نکبت دین اسم مفعول نکبت و فلاکت زده معنی سیده دور، اگر منظور نظرینگ دین و دیانت بولسه خویش و تبارینگ بیرله مغرور اولوب من زورمن دیمه، اگر بو دنیادین (فقر و فاقه سببی بیرله) قوروغ لب اوتسنگ و انی ناز و نعمت لاری دین بهره ور بولماسنگده هرگز منصب دارلیک یادینی و عملدارلیک هوسنی کونگولگه سالمه. بو اوتار دنیای فانیده هر کیم دین و دیانت لیک بولسه، خوشه چین لیک و بوشاقچی لیکنی منصب دارلیک دین آرتوق بیلور، جاه و عزت و خوش طبعی و ظرافت عجب آفت دور، بو دنیا جاه و جلالی و خوش طبعی و ظرافتی کبی شر و آفتنی شرافت و علو مقام بیلله کورمه. اُولگی شرافت (شر) بد و یمان معنی سیده و (آفت) آسیب و زیان معنی سیده مرکب دور، ایکینچیسى شرف باییدین مصدر بزرگواری و علو مرتبه معنی سیده دور، بو دنیا مقام و منزلینی ناآبادلیگینی و ناپایدار ایکانلیگینی زیرک و هوشیار کیشی بیلیب و زیرک آتیدین اوزاق بولور. زیرک هوشیار معنی سیده وزیرک وزیر لفظی گه کاف تصغیر کیرگاندور. اگرچه وزارت کتّه منصب بولسه ده ناظم رحمه الله انی



بی ارزش و حقیرلیگیگه اشارت اوچون کاف تصغیر کیلتوروب دورلار، اگر باشینگه توغ و بیرق کوتاریب کته منصبگه ایگه بولسنگده باشقه لاردین آرتوغ بولمه و اوزونگنی زیاده کورمه، هر کیمینی مرتبه و مقامی آرتوغ و عالی لیگی ایرتهگه فرشته (حضرت اسرافیل) بوغ (صور) لارینی اورسه لار و چالسه لار و قیامت قایم بولسه معلوم بولور، اولگی (ارتوغ) لفظی (ار) مخفف اگر (توغ) علم و بیرق معنی سیده مرکب دور، ایکینچیزی آرتوغ زیاده معنی سیده ترکی دور. (بوغ) صور معنی سیده، حیوانات شاخیدین یسالگان نمرسه دورکه تیگیرمن لار بیکار قالسه چالورلار، بو بیرده اسرافیل علیه السلام چالادیگان صورلاریگه ایشلاتیلیب دور. الله طرفیدین باشینگه هر نه مشقت و مصیبت کیلسه، صبر ایلاغیل. آتنگ دیک بی صبر و بی تحمل لیک قیلیب اوز نفسینگه جبر قیلماغیل، الله امریغه اطاعت قیلیب و بویون سونوب طاعت و عبادتینگنی ساعت به ساعت کوپایتور. (فوطه) بیلباغ محبتنی بیلینگا محکم باغلا، آتنگ دیک عمرینگنی غفلت و بطالت بیرله (بیل) شمالگه ساوروب مفت و رایگان قولدین بیرمه، دنیاده مردم اورته سیده محترم و محتشم لیکنی هوس و آرزو قیلمه، چونکه عزت و ذلت الله قولیده دور، خواهلاسه عزت و احترام بیرور، و خواهلاسه ذلت و خواری و ناپایداریلیگی اوچون بولار هوس و آرزوگه لایق و سزاوار ایمس، لیکن حالینگگه لایق و مناسب کرم لیک و سخاوت پیشه بول، اگر بیر پرچه ناننی اوچ کونده تاپسنگ انی یلغوز بیمسیدین باید یریمینی احسان قیلسنگ، اگر بیر ییلده بیر پول پیدا بولسه الله رضاسینی ایستاکان کیشی انی یلغوز بیمس، هر کیم جای تنگ (قبر) گه کیتارینی بیلسه و طول امل و حب دنیاگه مبتلا بولمسه، بو نفس لنگ (چولاق) گه تنگه و طلا تاپیب انی سیمیرتوروش غمینی بیمایدور. اولگی تنگه لفظی (تنگ) ضیق، تار و (گه) ادغام ایتیلگان دور، ایکینچیزی درهم معنی سیده دور. جهان مهری و دنیا محبتینی دلینگدین زایل ایلاب بالکل چیقارگیل، آتنگ دیک دنیاگه مایل و محب بولمه، اخروی ایشینگنی و طاعت و عبادتینگنی کوندین کونگه قوی راق و زیاده راق ایلاغیل، اهل تقوی پرهیزگارلار خدانی سویگان قل لاری دورلار، **إِنَّ أَكْرَمَكُمْ عِنْدَ اللَّهِ أَتْقَاكُمْ** [۱۳: الحجرات]، **إِنَّ اللَّهَ يُحِبُّ الْمُتَّقِينَ** [۴: التوبة] آیتلاری دلیل دور، اگر اخلاص بیرله تقوی و پرهیزگاریک ایشینی قیلسنگ شاید حق تعالی سنی بنده خاص دیسه، آیه: **إِنَّ اللَّهَ مَعَ الَّذِينَ اتَّقَوْا وَالَّذِينَ هُمْ مُحْسِنُونَ** [۱۲۸: النحل] بو سوزگه دلالت قیلور، اگر جان و دلینگ جمع بولوب وسواس شیطانی و خیالات نفسانی دین قوتولای دیسنگ ورع و تقوی نی اوزونگا آیین و عادت قیلیب و علم دینی آیینی شمع و چراغ ایتیپ انی یاروغیده یول یورگیل. اولگی آیین لفظی فارسی کیش و عادت معنی سیده، ایکینچیزی ماه قمر معنی سیده نون مفعول بیرله مرکب دور. اگر علم و عملنی رنگی بیر بولوب ایکلاسی جمع بولسه هر آیین به تحقیق دل آیین و کوزگوسینی زنگی و غباری کیتار و جلا تاپار. اولگی هر آیین لفظی به تحقیق معنی سیده ایکینچیزی آیین لفظی مرآة و کوزگو معنی سیده دور، اگر خداوند کریم درگاهیده تقرب تاپیب و محبت جامیدین شرابی بیرسه لار سحرلارده قوبگیل و اورنینگدین تورگیل و دعا قولینی کوتاریب مونگلوغ اتا بیرله انانی مغفرت و رحمتینی تیللاگیل.



خاتمة الكتاب

کیل الله یار سوز کوتاه قیلغـیل
 قراسنگ دور سنی اصلینگ قراسنگ
 اولوم طوفانی بو سرنی قیلیب فاش
 قریب جسمینگ قریب بولدونگ هوس گه
 آقردی ساچ ندامت اشکینی ساچ
 یالینگ آقی اثر قیلمادی حـاله
 هوی بیرلان توزوک ایش قیلما دینگ هیچ
 سнга ایدی اوشل پیر کهن سـال
 عمل کم ایلاغای اوز قالی بیـرلان
 بولور آرتوق هوس بیرلان هوا سی
 قلم قیلدینگ قرا کونگلونگنی قیل آق
 اوزونگ قیلما ی کونگول بازارینی طی
 اگر بولسه کونگول نینگ اختیاری
 بیتیب سن فارسی تیلده کتـابی
 همه فتوی و تقوی نینگ بیانی
 دیدینگ شیئی قلیلی ترکی تیلدین
 اگرچه یخشی سوز قند و شکر دور
 خطاسی بولمغای آغان سوزونگنی
 خداغه زاری قیلغیل ایرته و شام
 حجاب مغفرت یاپغای خـطاغه

بیلینگنی باغلا عزم راه قیلـیل
 بیریب دور سن ریا قانی بیله رنـگ
 اگر ایچ بولمسه سود ایلامس تـاش
 نچوک شرمنده لیک سن توسلی کس گه
 یقانگ اوشله دهان معـذرت آچ
 او یاله یور باقیب هر دم او یـاله
 بولوب دور کیچ هوس بازاریدین کیـچ
 اگر قال اهلیده تاپیلما سه حـال
 قالور عزت و حرمت آلی بیـرلان
 ایرور حال اوشبو علت نینگ دواسی
 اوشل ایرنینگ سوزین حلقه قیلیب تاق
 کیشیگه سوزلامک تا چند و تاکی
 نه بولغای قالسه مندین یاد گـاری
 تمام انده مسایل نینگ جـوابی
 اون ایکی مینگ دین آرتوق بیـتی آنی
 کیچ ایمدی البتّه بو قال و قیلدین
 خطاسیدین ولی خوف و خطـر دور
 تضرّع خاکيغه سورغیل یوزونگنی
 ایشینگنی پخته قیلغیل قالمغای خام
 سزاوار ایلاغای تورلوک عـطاغه

شرح: ای الله یار! سوزنی قیسقه قیلیب بیلینگنی توکل بیلماغی بیرله محکم باغلاب آخرت یولیغه عزیمت قیلغیل، اگر نظر بصیرت بیرله قراسنگ و باقسنگ سنی وجودینگ و جسمینگ اصلی و رئیسی و الله نزدیکه معتبر اعضاسی دلینگ دورکه معاصی قاره لیگی زنگی دین بالکل قاره بیب و غلظت و قساوت کسب ایتیب قرا تاش کبی بولگاندورسن انی اوستیگه ریا قانی بیرله رنگ بیریب دلینگنی قرا و قتیغ لیگنی مردم دین بیکی تیب یوروب دورسن، ناگهان اولوم طوفانی بو سرنی فاش و آشکارا قیلیب قویدی و دلینگنی قاره و قتیغ لیگی همه گه



معلوم اولدی و سیرتینگی ریا (و خواجه کورسون) اوچون خوش مقوی قلیب یورگانینگ هم ظاهر اولدی، شونینگ بیلان (اگر ایچ و قلب یخشی بولمسه تاش و سیرت و ظاهرنی کورار کوزده یخشی لیگی سود ایلامس و فایده قیلمس) دیگان سوزنی حقیقت لیگی هویدا بولدی، آیه: **ثُمَّ قَسَتْ قُلُوبُكُمْ مِّنْ بَعْدِ ذَلِكَ فَهِيَ كَالْحِجَارَةِ أَوْ أَشَدُّ قَسْوَةً** [البقرة: ۷۴] بو سوزگه اشاره دور، و حدیث: **أَلَا وَإِنَّ فِي الْجَسَدِ مُضْغَةً إِذَا صَلَحَتْ صَلَحَ الْجَسَدُ كُلُّهُ وَإِذَا فَسَدَتْ فَسَدَ الْجَسَدُ كُلُّهُ أَلَا وَهِيَ الْقَلْبُ** [حدیث ۴۱۷۸: مسلم] و حدیث رواه ابن جریر و الترمذی و النسائی و ابن ماجه عَنْ أَبِي هُرَيْرَةَ، أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ، قَالَ: **إِنَّ الْمُؤْمِنَ إِذَا أَذْنَبَ كَانَتْ نُكْثَةً سَوْدَاءُ فِي قَلْبِهِ، فَإِنْ تَابَ وَنَزَعَ وَاسْتَغْفَرَ، صُقِلَ قَلْبُهُ، فَإِنْ زَادَ، زَادَتْ، فَذَلِكَ الرَّأْنُ الَّذِي ذَكَرَهُ اللَّهُ فِي كِتَابِهِ: {كَلَّا بَلْ رَانَ عَلَى قُلُوبِهِمْ مَا كَانُوا يَكْسِبُونَ}**. [۴۲۴: ابن ماجه] و قال الترمذی حسن صحیح، دل صلاحیتده بولسه تمام اعضا صلاحیتده بولماغی و قتیکه فاسد اولسه همه جسدنی فاسد و خراب اولوشی و گناه بیرلان دلنی قاره بولوب توبه بیرلان صیقل تاپیب تازه بولماغی یوقاریده گی حدیث لار دین معلوم اولور، و هم دلنی تمام اعضاگه رئیس لیگی بیلینور، جسمینگی قوت و طراوتی کیتیپ قریب موی سفید اولوب آخرت سفری یقین لاگان سری هوی و هوس گه یقین لاشیب و حرص و طول امل گه اوچرا دینگ، سن کبی قری کیشیگه بو ایشلار قنداغ اویات و نچوک شرمنده لیک دور. اولگی قریب لفظی قریماقدین آلینگان شیخ و پیر بولوب معنی سیده ترکی دور، ایکینچسی نزدیک و یقین معنی سیده عربی دور. ساچ و سقال آقاریب قری لیک دوری و پیرلیک ایامی کیلیب و اول دنیا سفری یقین بیتوشدی، باید غفلت و بطالت و گناه و عطالت بیرله اوتگان عمرینگا پشیمان اولوب ندامت اشکینی یوزونگدین ساچغیل و توبه قلیب یقانگی اوشلاب پیشگاه الهی ده معذرت آغزینی آچیب عفو تقصیراتینگی سوراگیل. اولگی ساچ لفظی باشنی جونینی ایتیلور، ایکینچسی ساچماقدین امر بیاش معنی سیده دور، یقانی اوشلا ماغ توبه قیلماقدین کنایه دور، عرفده گنهکارلار کتله لار آلدیده توبه قیلماقچی بولسه لار یقالارینی توتوب توبه قیلدیم دیرلار. یالینگ (سقالینگ) آقی و قری لیک نشانی سنی حالینگ گه هیچ اثر قیلما دی (هنوز هم غرور جوانی و اوامر شرعی گه نافرمانی سنده موجود دور) هر دم و هر نفس باید او آق سقالینگه باقیب و قراب و اوز اعمالینگه نظر سالیب اویالیب و حیا قلیب یورگیل، یالینگ لفظی (یال) آتنی بوینیده گی ساچی معنی سیده و (نگ) خطاب بیرله مرکب دور، اما بو بیرده سقال مراد دور. اولگی (اوباله) لفظی اویاتیب حیا قلیب و شرم ایتیب معنی سیده، ایکینچسی (او) اشاره (یاله) مخفف یال گه سقال گه معنی سیده دور، ناظم رحمه الله اوزلاریگه یالینگ دیب هضمأ لنفسه خطاب ایتیب دورلار، ورنه یال حیوان گه استعمال اولور، هر کیم قریب هم خدا طرفیگه یانماسه انی حالی حیوان دین بدتر دور، ایام جوانیده هوی و خواهشات نفسانی آرقه سیده یوروب هیچ توزوک ایش و یخشی عمل قیلما دینگ، حالا وقت کیچ بولوب ایام پیری بیتیب دور و کیتار پیت یقین لاشیب دور، لهذا هوی و هوس دین کیچیپ بیر نیچه کون قالگن عمرینگه



طاعت و عبادتگه مشغول بول. اولگی کیچ لفظی ناوقت و آقشام معنی سیده ایرتهنی مقابلی دور، ایکینجیسی کیچماقدین امر [اوت] معنی سیده دور، (ای الله یار) اوشل کیسه (قری) کیشی سнга ایدی که علم قال اهلیده علم حال تاپیلماسه یعنی علم ظاهرگه علم باطن توأم بولمسه اول عالم اوز علم قالیگه کم عمل قیلغای و عزت و حرمت اهلی و بای و معتبر و منصب دارلار بیرله گرفتار اولوب قالغای و انینگ هوی و هوسی و خواهشات نفسانیسی آرتوق و زیاده بولغای، شو علت و مرض نینگ دواسی علم حال و تصوف دور (ای الله یار) اوشل مرد خدانینگ سوزینی قولاغینگه حلقه (ایسیرغه) بلداغ قیلیب تاقیب انگا عمل قیلگیل و تا حال علم قالگه اشتغال ایتیب قلم بیرله صفحات یوزینی قرا قیلدینگ، حالا علم حالگه اورونوب کثرت ذکر بیرله کونگلونگی آق قیلگیل، اوزونگ کونگول بازارینی و طریقت مقاماتینی طی قیلمای و تصوف یولیدهگی مهالک و مخاوف و شدایدلاردین اوتمای و کمالغه بیتمای باشقه کیشی لارگه علم قال و حال دین سوزلامک قنچه و قنچهچه، اگر دلینگی اختیار و آرزوسی شونده بولسه که مندین بیر اثر و یادگار باقی قالسه نیمه بولغای، بو ایش سابقاً جامه عمل کییب وقوعگه کیلگان، چنانچه «مسلك المتقين» آتلیک فارسی تیلده بیر کتاب یازیب سن، انده تمام مسائل ضروریه نینگ جوابی باردور، و همه سی فتوی و تقوی نینگ بیانی دور، و ابیاتی اون ایکی مینگ دین آرتوق دور، ترکی تیلده هم بیر آز نمرسه دیدینگ (ثبات العاجزین گه اشارت دور). ایمدی بو قال و قیل دین کیچیب حال ایشیگه مشغول بول اگرچه یخشی سوز (خصوصاً علوم شرعیه ده) قند و شکر دیک شیرین و سچوک بولسه ده، لیکن سهو، خطاسیدین خوف و خطر باردور، (مبادا) آیغان سوزلارینگی خطاسی بولمغای (شونینگ اوچون) یوزینگی زاری و تضرع بیرله خاک مذلت غه سوروب ایرته کیچ بارگاه خداوندی گه یالباریب خطالارگه پرده عفو یا پماغینی سوراب ایشینگی خام قالدیرمس دین خوب پیشیتیب کیتگیل، تاکه خداوند ستار و غفور خطالارغه حجاب مغفرت یاپیب صواب لاری ثوابیگه آخرته تورلوک عطالارگه لایق و سزاوار ایلغای، و بول کتابنی اوقوغوچی و مدرسه ایتگوچی و انگا عمل قیلگوچی لارنی خاتمه سینی مؤمن و مسلمان لیک عقیده سی بیرله توگاتغای. آمین!

قد تم تبیض هذه الرسالة يوم السبت قبيل العصر التاسع والعشرين من جمادى الثانی من شهر سنة ثمان و ثمانین بعد الالف و ثلثمائة (۱۳۸۸) من هجرة النبی ﷺ المطابق لثلاثین من برج سنبله سنة سبع و اربعین (۱۳۴۷) بعد الالف و ثلثمائة هجرية شمسية فی بلدة کابل عاصمة افغانستان عصمها الله الرحمن من شرور آخر الزمان بيد احقر العباد حبیب الله بن السید یحیی خان بن السید فیض خان بن السید ألوغ خان النمنگانی ثم الکابلی العلوی النقشبندی الحنفی، اوصله الله الی جمیع مقاصده الدینیة، و حماه الله من الرذایل الدینیة، و علمه من العلوم الدینیة، و جعل اولاده و احفاده مهتدین بهدی



الرسول الاكرم و اصحابه ذوى الهمم و آله هداة الامم الى الطريق الامم صلى الله تعالى عليه و على آله
و صحبه و سلم و شرف و كرم و الحمد لله اولا و آخراً و ظاهراً و باطناً.
لقد تم سواد هذا الكتاب بعون الملك الوهاب بيد افقر العباد الى رحمة ربه، هارون القندزى فى
يوم الجمعة المباركة الموافق لست من ذى القعدة سنة ١٣٨٨ قمرية المطابق لرابع دلو من بروج سنة
١٣٤٧ شمسية و ابتهل الى الله الكريم ان يجعله خالصاً لوجهه و ذخراً ليوم لا ظل فيه الا ظله و صلى
الله على نبيه و على آله و صحبه.

